



國家圖書館藏

古籍題跋叢刊

國家圖書館 / 編

GUO JIA TU SHU GUAN CANG
GU JI TI BA CONG KAN

第19冊



北京圖書館出版社

國家圖書館藏古籍題跋叢刊

第 19 冊

北京圖書館出版社

第十九冊目錄

儀顧堂續跋卷十三至卷十六	一
雁影齋題跋	一七一
國朝文椒題辭	二九一
詔宋樓藏書題跋輯錄	三八五

儀顧堂續跋卷十三

歸安陸心源伯剛甫著

元槧吳禮部集跋

吳禮部文集二十卷前有吳先生小像及蘭陰山人自贊卷一賦四言詩卷二至卷五古詩卷六七律詩卷八九絕句卷十雜著卷十一書卷十二三記卷十四五序卷十六至十八題跋卷十九策問卷二十移祭文事迹共九百六十首附錄張樞撰墓表杜本撰墓誌銘每葉三十二行每行二十字

四庫提要云吳禮部集流傳頗尠此本乃新城王士

續寫自崑山徐秉義家因行于世則元刊之少可知
二十卷後有黃堯圃手跋中有季振宜藏書朱文方
印

元槧元印清容集跋

清容居士集五十卷目錄二卷後附王瓚所撰謚議
蘇天爵所撰墓志銘每葉二十行每行十六字字皆
趙體與元刊玉海相似當爲同時所刊上海郁氏宜
稼堂刊本之所祖也卷五十後有永樂丙申畏齋王
肄手跋言得此書蟲鼠損傷於暇日補治則中間抄
補皆明初人筆也是書抄帙尙多刊本流傳極罕余
又藏舊抄本爲愛日精廬張月霄舊藏後錄王肄跋
當从此本抄出恐世無第二本矣

宏治本王秋澗全集跋

秋澗先生大全文集一百卷每葉二十四行每行二十字明宏治刊本行款與元至治壬戌嘉興路刊本同當卽以元刊翻雕者惟元刊前有王構序王士熙王公儀羅應龍跋明刊皆缺元刊制辭哀挽墓志皆列總目之後目錄之前版心刊目錄二字未免眉目不清明刊則改列於後版心刊附錄二字較爲允當耳

元槧歸田類藁跋

張文忠公文集二十八卷附錄一卷前有字朮魯翀
歸田類稿序次目錄卷一賦卷二擬雅卷三至卷五
古詩卷六至卷九律詩卷十絕句卷十一書卷十二
十三序卷十四至十六記卷十七至二十碑銘卷二
十一表銘碣銘壙銘卷二十二誌銘卷二十三表傳
書疏露布操卷二十四文詞贊卷二十五至二十七
三事忠告卷二十八經筵餘旨附錄則畫像倪中撰
記劉耳撰贊張起巖撰神道碑黃潛撰祠堂碑也每
葉二十行每行十八字版心有字數元元統刊本

四庫所收以明刻二十七卷本爲本而別採永樂大典所載補其遺缺釐爲二十四卷似當時未見元刻此本據字朮魯翀序書爲養浩所自編與十三卷所載自序九百餘首四十卷之數不合愚謂自序是初退休時作當在至治中此或天厯以後所定有所棄取耳卷中有周春二字白文方印松藹二字朱文方印松藹藏書朱文方印海甯周芑兮舊藏也

元藥松鄉集跋

松鄉先生文集十卷次行題句章任士林叔實前有
趙子昂撰任叔實墓誌銘陸文圭敘杜本敘卷十末
摹刊任勉私印陽文方印任氏近思陰文方印辟口
世家陰文方印每葉二十六行每行二十三字是書
有明泰昌時刊本脫誤甚多此則其祖本也卷中有
蓮涇朱文方印太原叔子藏書記白文長印金星輅
藏書記朱文長印任勉或卽刊書之人俟攷王聞遠
號蓮涇吳縣人編有孝慈堂書目金星輅嘉興人編
有文瑞樓書目皆乾嘉間藏書家也

元槧檜亭集跋

檜亭藁九卷次行題天台丁復仲容父前有至元五年李桓序六年李孝先序四年危素序十年楊嗣序後有十年諭立跋每葉二十行每行二十字每篇下注明前集續集前集其堦饒介編續集門人李謹之編此則至正十年南臺御史張惟遠合刻于集慶學宮者有閩中徐惟起藏書印朱文長印徐興公白文方印晉安徐興公家藏書朱文方長印及薩守德相兩印面籤亦興公手書也

元槧松雪齋集跋

松雪齋文集十卷目錄一卷外集一卷附楊載撰行狀至順三年謚文一卷前有戴表元敘下有戴氏辛初陽文方印後有至元後己卯何貞立跋下有長沙何貞立陽文長印卷十後有花溪沈璜伯玉跋行狀後有黃蕘圃手跋集爲趙仲穆所編文敏歿後二十年尙未付梓至元後己卯沈璜始從仲穆假本刻于家塾案花溪在今歸安縣治東六十里璜蓋歸安人當與沈夢麟一家與趙氏有連獨怪是集卷帙無多仲穆不自梓行必待璜爲之刊不可解也

元槧趙子昂詩集跋

趙子昂詩集七卷題宜黃後學譚伯潤伯玉編集前有目錄目後有至元辛巳春和建安虞氏務本堂編刊一行每葉二十二行每行二十一字元麻沙書坊刊本卷一五古卷二五律卷三五絕卷四七古卷五七律卷六七絕卷七六言雜箸比松雪齋集多有所思望美人等詩十餘首

洪武本九靈山房集跋

九靈山房集三十卷題男戴禮叔儀類編從孫同伯初伯編前有至正二十五年揭泐序洪武十二年翰林待制宋濂序王禕序皆以手書上版者濂序下有景濂朱文連珠印金華宋太史氏朱文方印龍門生朱文方印每葉二十八行每行二十字卷中有徐勣之印朱文方印徐氏興公白文方印孔御家藏白文方印鄭氏注韓居朱文長印鄭燕之印白文方印閩中徐惟起藏書印朱文長印余又有一部後缺六卷曹倦圃抄補有曹溶之印朱文方印

元槧陳眾仲集跋

陳眾仲文集十三卷卷五題安雅堂集前有至正九年張翥序至正辛卯晉安林泉生序每葉二十行每行二十字語涉元帝皆提行元刊本卷一至三賦詩卷四至六序卷七至十記卷十一十二碑銘卷十三銘跋解說策問贊傳各體皆備並無缺少

提要以元史本傳四字爲三字之譌良是前有黃堯圃手跋卷末有虞稷二字白文方印前有士禮居白文長印二西藏書白文方印蓋經黃虞稷千頃堂黃堯圃百宋一廬收藏者

洪武本程雪樓集跋

楚國文憲公雪樓程先生文集三十卷附錄一卷次
行題奉直大夫秘書監著作郎男大本輯錄三行翰
林侍講學士中奉大夫知制誥同修國史同知經筵
事門生揭傒斯校正卷一至卷九玉堂類藁卷十奏
議存稿卷十一至二十五記序引碑銘贊說箴祭文
祝文書啟題跋二十六至三十詩而以樂府殿焉前
有歐陽玄序下有太史氏陽文長印區易玄印陽文
方印文忠世家白文方印次李好文序序後有至正
癸卯中春雪樓諸孫世京謹錄刊行一行次江陵熊

釗序附錄則行狀神道碑晉錫堂記像贊詩詞書後
祭文也是集揭傒斯原編四十五卷其孫世京與揭
泂重定爲三十卷至正二十三年刊于建陽劉氏書
肆成十卷而元亡肆毀世京之子程涇程涇命書市
朱自達續成至洪武廿六年刻全熊釗爲之序此其
初印本也有休寧汪季青家藏書籍朱文方印古香
樓朱文腰圓印汪文柏白文方印柯庭圖書朱文方
印柯庭流覽所及朱文方印松藹藏書朱文方印餘
印不錄

明景泰本道園學古錄跋

道園學古錄五十卷次行題雍虞集伯生首有蘄陽鄭達序次摹刻歐陽元手書序歐陽致劉伯溫書及葉盛跋次日錄目錄後有重增目錄其文則散入各卷之內一至二十曰在朝藁二十一至二十六曰應制錄二十七至四十四曰歸田藁四十五至五十曰方外藁爲道園之幼子翁歸及其門人李本所編後有李本跋至正元年閩憲僉幹克莊刻于福建至正九年江西肅政廉訪使劉伯溫改爲大字重刊之大字版不久卽亡景泰七年鄭達知崑山過太倉之興福

寺得建本于寺僧陳與主簿南海黃仕達捐貲刻于東禪寺四閱月而畢工建本無序歐陽元序及致伯溫書則成化中葉盛從道園四世孫吳江虞湜家就大字本鈎摸補刊者也每葉二十六行每行二十三字版心或刊道園學古錄幾或刊學古幾學多作李錄多作畧當卽以建本翻刊者明嘉靖覆景泰本行款匡格皆同惟重增目改入各卷之內吳兔牀所藏本爲人割去葉盛跋歐陽札鄭逵序題跋記遂誤以爲元刊不知鐫刻有歐序者乃大字本也莫友芝經眼錄誤同不免爲書賈所愚矣

元槧道園遺稿跋

道園遺稿六卷次行題雍虞集伯生前有至正己亥楊椿序募刊眉山楊椿朱文方印楊子壽章白文方印後有至正二十年黃潛序募刊金華二字朱文長印黃氏晉卿白文方印每葉三十二行每行二十二字至元二十四年吳江金天瑞伯祥刊本後附鳴鶴餘音一卷爲伯生與全眞馮道士唱和之作馮先有蘇武慢詞二十首伯生和十二首無俗念一首後有伯生記及至正甲辰金天瑞跋每葉二十行每行十七字

元槧翰林珠玉跋

新編翰林珠玉六卷次行題儒學學正孫存吾如山
家塾刊三行題邵菴虞集伯生父全集前有目錄每
葉二十二行每行二十字共計詩五百八十八首七
律次韵宋顯甫一首與前御溝詩複其出于道園學
古錄之外者四言古一首五言古三首七古三首七
言律廿二首七言絕廿八首存吾廬陵人元風雅亦
其所選也觀是書款式所選似不止一家今祇存伯
生一家耳有黃丕烈印白文方印復翁白文方印白
堤錢聽默經眼朱文長印後有堯圃兩跋

李雲陽集跋

雲陽集十卷明弘治刊本前有危素序後有弘治壬子傅瀚跋潘辰題弘治癸丑李東陽跋以

文瀾閣傳抄本校一過閣本卷六雲篷記後脫永寧權茶鹽提舉事進思堂記一首凡五百九十一字卷二和汪士章詠一鏡亭韻原本二首閣本亦脫一首凡二十字危素序閣本亦缺

卞山小隱吟錄跋

卞山小隱吟錄二卷元黃玠撰玠爲黃東發先生曾孫父名正孫字長孺自號尙絅翁其沒也黃潛爲誌其墓見金華黃先生集此本上卷五言古下卷七言古而無近體詩似不屑爲近體詩者然玠嘗與顧玉山瑛游玉山名勝集載玠七律十餘首吳興藝文補載玠七律四首五律一首七絕六首均在此本之外似非不爲近體詩者想大典所存祇得其半非全帙也

元槧閒居叢稿跋

順齋先生閒居叢稿二十六卷次行題曰男蒲機類
編門生薛懿校正前摹至正十年前史官金華黃潛
手書序下有金華二字陽文連珠印黃氏晉卿白文
方印後附其弟道銓誄及墓石文每葉十八行每行
十四字字畫娟秀體兼歐褚必是名手書以上版者
卷一卷二賦及古詩卷三五律卷四至六七律卷七
八絕句卷九銘箴贊解辨說樂語春帖疏卷十題跋
卷十一齋醮文祝詞致語上梁文詩聯卷十二樂府
卷十三經旨策卷十四傳記卷十五制表牋卷十六

碑卷十七書卷十八至二十序卷二十一字說序卷
二十二祝文卷二十三祭文表辭卷二十四五墓誌
銘墓表卷二十六行實案道源二子樞早世機中戊
午第仕文水縣尹西大行臺辟爲掾見墓石文

元槧牧潛集跋

筠溪牧潛集一卷次行題高安釋圓至前有大德三年方回序以手書上版下有西齋陽文長印方萬里父陽文方印虛谷書院陽文方印後有大德三年天目雲松子洪喬祖跋其書不分卷以類各爲起訖詩一銘二碑記三序四書五雜箸六榜疏七故喬祖跋祇云一卷也每葉二十四行每行二十一字元大德刊本至明刻始分爲七卷

四庫本卽以明刻箸錄此則元刻祖本也前後有錢天樹印白文方印曾藏錢夢廬家朱文長印

元槩丁鶴年集跋

丁鶴年詩集三卷次行題門人四明戴稷戴習修江
向誠向信道方外曇鐙編次前有至正甲申戴良序
下有叔能陽文方印澹居老人至仁序下有至仁陽
文方印兆中陰文方印後有烏斯道丁孝子傳缺名
高士傳後有徐惟起手跋前有晉安高氏惟式朱文
方印閩中徐惟起藏書印朱文長印徐渤之印白文
方印徐氏興公朱文方印高惟一明初福州人有孝
行福建通志有傳則是本在明初已爲藏書家所珍
矣

元槧鐵崖古樂府復古詩集跋

鐵崖先生古樂府十卷復古詩集六卷題門生富春吳復類編前有至正丙戌張天雨序吳復序卷十後附鐵崖所作吳復墓誌至正八年復卒其後人所附八也詩集題太史紹興楊維禎廉夫著太史金華黃潛卿評門生雲間章琬孟文註前有至正二十四年章琬序後有至正甲辰琬跋下有印曰學古曰雲間世家曰章氏孟文其目錄以復古詩集連作十六卷詩則別爲起訖版心統題古樂府復序云先生爲古雜詩五百餘首自謂樂府遺聲琬序則云輯前後所

製二百首及吳復所編又三百首名曰復古詩集蓋其體爲古樂府復古則琬所名也故琬所註者名復古詩集其不註者仍名古樂府蓋二而一者也今復所編四百九首琬所註一百五十二首共得五百六十餘首分計之則篇數不符總計之固有贏無絀無所刪削也吳復字見心富陽人四歲能誦書千餘言喜吟哦學詩于鐵崖自號雲槎秋客著有雲槎集以處士終

叢書堂本貞一稟跋

貞一齋雜著一卷詩稿一卷次行題臨川朱思本本
初父前有至治三年臨江范梈序眉山劉有慶序泰
定二年虞集序四年吳全節序天歷元年柳貫序卷
末有時壬申中秋前四日五鹽道生姚楫敬書版心
有叢書堂三字精抄本字體似吳匏菴案叢書堂爲
匏菴藏書之所姚楫當是匏菴門下而爲之抄書者
故字亦似之阮文達以爲匏菴手抄者非也
四庫未收阮文達始進呈思本事蹟詳挈經室外集
有黃丕烈印蕘圃平江黃氏圖書朱文方印三

鐵崖文集跋

鐵崖先生文集五卷次行題會稽楊維禎三行題毘陵朱昱校正前有宏治十四年馮允中引後有朱昱跋其爲東維子集所未收者序三首題識三首傳二首錄一首議記四首跋八首書四首辨一首志五首贊五首箴一首說十六首銘一首祭文二首墓誌銘四首

四庫未收阮文達亦未進呈卷中有朱象元氏朱文方印太史氏印白文方印雲間世家朱文方印謝庸印白文方印東墅朱文方印

元張伯顏槧本文選跋

文選六十卷次行題曰梁昭明太子選三行題曰唐
文林郎守太子右內率府錄事參軍事崇賢館直學
士李善注上前有李善序進書表呂延祚進書表元
宗詔旨元余璉序元槧本每頁二十行每行大字二
十注雙行行二十一字每卷有目連屬篇目版心間
有刻工姓名卷一首葉有九華吳清床刀筆七字六
十卷末有監造路吏劉晉英郡人葉誠一行行款與
宋尤延之刊本同其與尤本不同者每卷首葉之第
四行有奉政大夫同知池州府路總管府事張伯顏

詩經卷一之三
詩經卷一之第一葉則以九本第十行
班孟堅下小注六行排密縮爲四行卷二則以張平
子下小注八行縮爲六行卷三則以第六行張平子
薛綜注六字移于第五行東京賦下卷四則以第四
行京都賦中三字并入第五行卷五則削第五行左
太沖吳都賦一首劉淵林注十二字而移左太沖劉
淵林注七字于第六行吳都賦下卷六則以第五行
魏都賦一首及小注并入第六行卷七則以第七行
畋獵下三字并入第八行卷八則以第五行司馬長
卿上林賦并入第六行卷九則以第八行班叔皮北

征賦一首八字并入第九行卷十則以第四行紀行
下三字并入第五行卷十一則以第九行王文考魯
靈光殿賦十字并入第十行卷十二則以第五行木
元虛海賦五字并入第六行卷十三則以第十二
三行風賦小注四行縮爲兩行卷十四則以第五
顏延年赭白馬賦并入第六行卷十五則以第四
志中二字并入第五行卷十六則以第九行陸士衡
歎逝賦六字并入第十行卷十七則移第十行陸士
衡三字于十一行小注上卷十八則以第八行長笛
賦小注四行縮作兩行卷十九則以第六行第七行

并作一行卷二十則以第五行曹子建上責躬詩十
三字并入第六行應詔詩之上卷二十一則以第九
行鮑明遠詠史詩一首八字并于第十行卷二十二
則以第二葉第九行宿東園詩一首六字并入第十
行卷二十三則以第十九行并入第二十行卷二十
四則以第十七行并入第十八行卷二十五則以第
十七行酬從弟惠連五字并入第十六行卷二十六
則以第二葉第七行并入第八行卷二十七則以第
二葉十一十二三行縮爲兩行卷二十八則以第
十二行劉越石屏風歌一首八字并入十三行卷二

十九則以古詩十九首小注六行縮爲四行卷三十則以第八行擣衣詩五字并入第九行卷三十一則以孫巖宋書云云小注四行縮爲兩行卷三十二則以序曰云云小注六行縮爲四行卷三十三則以第六七八三行并作兩行卷三十四則以漢書曰枚叔云云小注四行縮爲兩行卷三十五則削第十行七下二字卷三十六則以蕭子顯齊書云云小注八行縮爲六行卷三十七則以表者明也云云小注十行縮爲八行卷三十八則以第十五十六兩行縮作一行卷三十九則削第十三行上書二字卷四十則以

第十一行并入第十二行卷四十一則以第七行并
入第八行卷四十二則以十七十八兩行并作一行
卷四十三則以第十行十字并入十一行卷四十四
則以第八行八字并入第九行卷四十五則以第十
四行八字并入第十五行卷四十六則以第六行十
三字并入第七行卷四十七則以第十一行十一字
并入十二行卷四十八則以第六行九字并入第七
行卷四十九則以第七行六字并入第八行卷五十
則以第十一行六字并入第十二行卷五十一則以
第四行七字并入第五行卷五十二則以第六行王

命論三字移入第七行善曰王命者云云之下而移
班叔皮三字于第九行雙行注之下卷五十三則以
第七八九三行縮作兩行卷五十四則以五等公侯
云云小注四行縮作兩行而削陸士衡三字卷五十
五則以第九十十一三行小注縮作兩行卷五十六
則以十四行九字并入十五行卷五十七則以第十
行九字并入第八行卷五十八則以第九行九字并
入第十行卷五十九則以姓氏英賢錄小注六行縮
爲四行卷六十則以第七行八字并入第八行其行
款起訖皆與尤延之本同惟尤本兩都賦序注亦皆

依違尊者都舉朝廷以言之六臣本都上有所字舉
上有連字此本有此二字與尤本不同似是既刻成
而挖改者當是伯顏據六臣本所改以掩其襲取尤
本之迹耳池州爲昭明封國有昭明廟廟有文選閣
文簡始刻善法置版學宮見淳熙辛丑文簡序元初
燬于火大德中司憲伯都嘗新之延祐中復燬伯顏
重刻之見余璉序獨怪淳熙距大德不過百餘年版
雖燬印本必非難得伯顏不以原刻重雕而必改寫
重刻既改寫重刻矣又惟恐失尤本之真于每卷首
葉縮小排密以就之何也宋人刻書皆于卷末列校

刊銜名從無與著書人並列者隆萬以後刻本此風
乃甚行伯顏其作俑者也伯顏原名世昌文宗賜名
伯顏蘇州相城人至順中知福寧州置田造士人多
稱之見僑吳集及福建通志尤本無呂延祚序及元
宗詔伯顏據五臣本增之不免畫蛇添足余璉序文
理澁謬殆學姚牧菴而失之不及者歟元之路宋之
州軍明之府卷末路吏二字亦元刻之一證也

宋蜀大字本三蘇文粹跋

三蘇先生文粹七十卷卷一至卷十一老泉先生文
卷十二至四十三東坡先生文卷四十四至七十頴
濱先生文每葉二十行每行十八字版心有刊工姓
名語涉宋帝皆空格宋諱避至桓構止蓋紹興初蜀
中刊本也有李申耆兆洛手跋季振宜藏書朱文長
印張金吾印白文方印月霄白文長印卽延陵季氏
宋版書目愛日精廬藏書志所箸錄者

影宋抄尤本文選考異跋

李善與五臣同異四十一葉影寫宋刊本行款與尤本文選同有摹尤延之手書刻文選題及淳熙辛丑袁說友跋又說友刻昭明太子集跋不著撰人姓氏袁跋有尤公博極羣書親爲校讎語則此四十一葉亦必文簡所爲無疑也宋人朴實不以校讎一二字自矜獨得故自序不言第二十葉有云自齊謳行至塘上行五臣與善本倫次不同是文簡所據必有善注單行本非從六臣本摘出至尤序所云衢州本余家有其書四明本亦尙有存者皆六臣注非單行善

注由是觀之善注單行文簡以前無刻本矣袁刻文
選跋胡氏克家據陸敕先校本錄于考異後脫學者
是所謂成民而致力于神者與淳熙辛丑三月望日
建袁說友題二十七字昭明集五卷余藏嘉靖乙卯
覆宋本袁跋在焉葉調生吹網錄謂今無傳者誤也
池州昭明廟疾疫水旱有禱輒應淳熙中江東旱說
友與池人禱之應見文簡題東堂跋中昭明生不與
侯景之難沒而血食池州千餘年不衰天之報施文
人可謂厚矣

成化唐藩本文選跋

文選六十卷明成化丁未唐藩刻本前有唐藩希古序後有唐世子跋每卷李善銜名後有張伯顏重刊銜名兩行每葉二十行每行二十二字注雙行文義悉依延祐中張伯顏池州刊本而字畫較精惟唐藩序不言所本世子跋則若唐藩自以五臣注刪存善注者豈唐藩父子于此書均未寓目耶每卷有伯顏名而序若佯爲不知者豈刻成後亦未寓目耶不可解衆伯顏重雕尤本不言所本亦不仿宋人列名卷末之列而自列銜名于作者之次好名而近于陋唐

藩所雕張本亦不言所本幾若善注單行自我作古
可謂心心相印然既已沒其由來矣而仍刻其名且
改易行款非以原本重雕助率重刊四字其義又安
在乎惟張刻仍尤本之舊此刻又仍張刻之舊在文
選諸刻中不失爲善本耳

儀顧堂續跋卷十四

歸安陸心源伯剛甫箸

元槧郭茂倩樂府跋

樂府詩集一百卷題曰太原郭茂倩編次前有至正
初元周慧孫序至元六年李孝先序元槧本每葉二
十二行每行二十字卷首有彭城二字朱文橢圓印
錢孫保一字求赤白文方印秀水盛柚堂朱文長印
每冊有盛百二白文方印孫保朱文方印錢氏校本
朱文方印天啟甲子朱文方印卷中朱筆皆求赤筆
四庫提要云據建炎以來繫年要錄茂倩爲侍讀學

士郭褒之孫源中之子其仕履未詳愚案茂倩字德
粲東平人通音律善篆隸元豐七年河南府法曹參
軍祖勸翰林侍讀學士給事中贈吏部尚書父源明
字潛亮初名元賡字永敬嘉祐二年進士官至職方
員外郎知單州軍州事蘇頌誌其墓見蘇魏公集卷
五十九與繫年要錄微有不同要錄從永樂大典錄
出恐有傳寫之譌蘇集從宋本影寫當可據惟郭源
中亦有其人累官都官員外郎充廣陸郡王申王院
教授職方員外郎見蘇魏公集外制或源明與源中
弟兄而茂倩嗣源中歟

宋槧宋朝文鑑跋

新雕宋朝文鑑一百五十卷目錄一卷題曰朝奉郎
行秘書省著作佐郎兼國史院編修官兼權禮部郎
官臣呂祖謙奉聖旨銓次前有呂喬年編文鑑始末
呂祖謙進表謝表周必大序劉炳序後有沈有開跋
趙彥适序每葉二十行每行十九字版心有字數及
刊工姓名先是此書祇有建寧書坊刊本文字脫誤
嘉泰甲子梁溪沈有開知徽州參校訂正刊于郡齋
嘉定十五年辛巳趙彥适以東萊家本改補三萬餘
字刊而新之端平元年四明劉炳守新安又于東萊

家塾得正誤續本命新安錄事劉崇卿參以他集刪改三千有奇見沈有開趙彥适劉炳序跋與嚴州刊小字本多所不同小字本當出建寧坊本此則以呂氏家塾藁訂正者也嚴州本前明版刊尙存藏書家多有之此本則前明正德中已罕流傳葉文莊菴竹堂藏書極富僅從顧觀海家本影抄見愛日精廬藏書志劉炳明州人寶慶二年進士見延祐四明志趙彥适魏王廷美九世孫見宋史宗室表喬年字巽伯東萊弟祖儉長子也沈端憲壻袁絜齋稱其克肖厥父議論勁正不阿見絜齋集沈有開字應先常州無

錫人先受業于張南軒栻呂成公仕嚴有開亦從之
淳熙五年進士累官處州教授太常博士秘書丞寧
宗卽位與趙忠定之謀遷起居舍人爲忌者所中家
居十年起知徽州奉使江東連疏求去知太平州加
直龍圖閣致仕見咸淳毘陵志葉水心集以此本校
嚴州本卷一五鳳樓賦屋卑者豐上脫臺卑者崇一
句卷二十四范雍招魯清詩嚴州本有目無詩此本
目在宋庠重展日湖後詩附卷末嚴州本卷六十梁
燾論呂大防乞以旱罷疏末缺一百十餘字胡宗愈
請令帶職人赴三館供職疏首缺八十餘字而以梁

熹論呂疏皆思以禮句與胡宗愈疏職臣愚竊謂士不知朝廷之治體云云接連其梁熹論還政疏則全缺卷七十一陳瓘台州羈管謝表嚴州本自奉聖旨陳瓘自撰尊堯集云起此本多臣某言云云一百三十餘字卷六十九代范忠宣賀平河外三州表京東運副謝到任表皆畢仲游作嚴州本誤作林希嚴州本卷六十五有王冕漳州進珠表此本有目無文或重修時刪之歟

宋槧唐百家詩選殘本跋

唐百家詩選存卷一至卷五卷十一至十五前有王
荆公序元符戊寅楊蟠序每葉十八行每行二十字
版心有刻工姓名宋諱玄朗匡殷貞眞徵恒頊煦曙
署樹竟鏡境敬檠警皆爲字不成卷六河流暗與溝
池合之溝字卷十三慎莫厭清貧之慎皆不缺避而
非南宋刊其爲元符刊無疑卷一日月雨雪雲五類
卷二四時晨昏節序泉石四類卷三花木茶果蟲魚
三類卷四京關省禁屋室田園四類卷五樓隱歸休
二類卷十一音樂書畫親族墳廟城驛雜詠六類卷

十二古京宮榭古室古方國昔人遺賞昔人居處五
類卷十三十四送上送下卷十五別意有懷二類卽
百宋一廬賦所謂小讀書堆分類本也分類出自後
人則不可知選則未必僞選或非盡出荆公詩則不
僞宋瑩仲必以此本爲僞亦一偏之見耳書賈欲充
完本自十一以後首行末行卷字下及版心數目字
皆挖改幸有挖之未淨者原書卷第細審尙可辨每
冊有休文後人朱文方印北山草堂洪灣沈氏白文
兩方印北山草堂珍藏朱文橢圓印汲古主人朱文
方印子晉朱文方印麟湖沈氏世家朱文長印

影宋天台集跋

天台前集三卷前編別編一卷續集三卷續集別編一卷影寫明刊本前集三卷續集前二卷皆李庚編後一卷林思蔽林登李次蓐編前集別編續集別編題曰郡人林表民前集有嘉定元年李兼序別編後有陳耆卿跋又拾遺十二首有嘉定癸未林表民跋續集後有李兼題別編卷五後有淳祐戊申卷六後有淳祐庚戌林表民跋

提要云庚字子長其爵里無考惟李兼序有李槩出其先公御史所哀文集語又有寓公李公語則嘗官

御史而流寓天台者也愚案庚臨海人字子長歷御史臺主簿監察御史兵部郎中繼奉祠提舉江東常平乾道間知南劍州勤廉有爲常勸義冢分男女爲左右誌以兩塔淳熙中朝散大夫知撫州後知袁州未上卒有集號詒癡符藏書甚富買屋近郊聚書數萬卷于樓上閉戶不與人通老矣猶沈酣其中里閭罕識其面見樓鑰攻媿集江西通志福建通志嘉定赤城志卷三陳耆卿跋續集李兼跋皆言別編爲林表民之父師點所纂續集後一卷則爲州人林思歲林登及其子李次暮所編此本別編皆題表民名而

表民之跋絕不述及其父何也所採諸人如王欽若
陳堯叟查道初暉丁謂馬知節李維劉鎬孫奭李建
中陳越曹谷曾會姜嶼蘇爲陳旣濟趙世長王從益
戚綸張復錢易章得象黃震劉起孫冲崔希範王得
益方演舒亶賈收葉清臣高竦黃鑑吳遵路張友道
章岷刁約吳育趙槩傅瑩張瓌許懋楊大雅余良孺
孔陶皇甫泌徐舜俞張士遜呂夷簡魯宗道李簡李
諮李及李遵勛宋綬祖士衡張師德馮元邱雍石中
立黃宗旦錢景臻李宗諤梁鼎陳克吳淑劉少逸安
德裕孫旦葛閣張日損何執中陸長倩徐億劉握周

延雋趙企陳白張景修石公弼左知微石待舉吳賁
方洵武黃璞王珏羅適余元李柬劉宗孟張奕劉理
錢暄馬良器郭三益章憑鄭與京俞純父黃軫李經
李熙輔吳可幾汪泌柳安道姚舜諧石象之楊嵩薛
如初張無夢許操葉發岑象求虞策劉彝左譽虞謨
孫大廉楊蟠李復圭姚孳郭茂倩余爽張康國周之
深樓光石郊太史章元積中楊愈李仲偃畢士安陳
堯佐蘇澥史蘊李元凱石端誠錢惟濟趙況石義叟
阮思道舒雅張肅王化基林顏吳師正鄭至道王漢
之王沔之毛漸錢勰王欽臣呂穆仲宋景年蔣之奇

元絳王介之姚祐馬城孟觀鮑朝賢劉丹慎鏞周啟
明鮑當蘇庠孫何左緯趙屺李鎔成大亨郭明甫姚
寬陳公甫陳恬任太初江爲蔡肇錢昱范貽孫趙挺
之范鉞王廉清周升李邴王絢韓肖胃洪擬錢伯言
黃叔敖李擢胡世將胡舜陟趙思誠胡邃江常曾統
徐公裕謝升俊莊綽薛弼陳棠鄭望之侯彭老康執
權范寅賓吳說鄧仁憲廉布劉季孫鮑慎由李長民
林仰蔣璨賀允中劉棐鄭誼高述陳興宗薛抗范宗
尹潘朝英沈揆曾惇李益謙謝伋王嶠郭仲荀張偁
蔡向崔黃臣章望之王振徐融孟大武楊筠蘇遲蘇

簡何沆李益能

薛昂陳璣錢文子彭郁徐大受

林憲高似孫胡融徐似道陳謨蕭振李龔王卿月晁
公爲錢端禮汪澈岳甫虞似良張昌求仲弓王曉鄭
伯熊高文虎陳知柔丁可石礲劉知過唐仲友楊傑
李庚李兼李龜朋桑世昌謝直趙彥齡袁復一林師
蒧陳謙鄭伯英劉次皋宋之瑞黃營徐桷王戢陳相
安丙顧化龍王居安陳巖李琪陳夢建胡交修李端
民王衡趙汝愚趙汝讜石延慶趙必愿劉坦之釋長
吉道全法具慧明蘊常或集已無存或並名氏闕然
皆賴此集存其崖略而楊億蔣堂晏殊夏竦張舜民

朱翌周行己許景衡胡宿綦崇禮張守李正民洪邁
曾幾尤袤汪藻諸人之詩往往爲武夷新集春卿遺
稿晏元獻集胡文恭集夏文莊集畫墁集瀟山集北
海集浮沚集橫塘集毘陵集浮溪集野處類稿茶山
集梁溪遺稿所未收可藉此以補其缺

聲畫集跋

聲畫八卷前有淳熙丁未十月谷橋孫紹遠稽仲
自序提要云自署谷橋不知谷橋爲何地也愚案福
建通志孫紹遠淳熙七年以承議郎知興化軍丁未
爲淳熙十四年距知興化時不及十年當即其人金
承遼制縣之下置鎮及得宋地地名多承宋舊惟於
縣之下置鎮金史地理志南京路開封府祥符縣鎮
四一曰郭橋谷郭同音谷橋當即郭橋紹遠雖南渡
後人先世或爲谷橋望族不署縣名而署谷橋猶著
鼠璞之戴植世居桃源鄉不署鄞而署桃源也

嚴陵集跋

嚴陵集九卷前紹興八年董莽序知不足齋抄本每卷有目連屬篇目遇國朝字皆提行乾隆中鮑以文從天一閣所藏宋本傳錄者案莽字令升宣和中官鎮江府學教授紹興初官廣西提刑以趙鼎薦四年擢吏部員外郎尋試太常少卿改尚書右司員外郎守起居舍人兼禮部侍郎有旨禁程頤學禮部欲錄黃行下莽難之爲御史劾奏七年罷爲集英殿修撰知衢州旋請祠起爲徽猷閣待制知嚴州罷任寄居宜興二十六年起知婺州引年告老著有廣川家學

二十卷燕談三卷見書錄解題繫年要錄

宋槧中興羣公吟稿戊集跋

中興羣公吟稿戊集七卷宋刊本每葉十八行每行
十八字卽石門顧修刊本所祖也凡戴石屏三卷高
菊磻二卷姜白石一卷嚴祖叔一卷宋本有目錄十
四葉顧本行款皆同獨缺其目前有戈小蓮跋黃堯
圃手書二跋卷中有呂晚村家藏圖書朱文長印沈
廷芳字春旂更字椒園白文方印馬思贊印白文方
印仲韓朱文方印元錫之印白文方印嚴氏久能朱
文方印芳椒堂印朱文方印案呂晚村名留良石門
人國初以謀逆戮屍馬思贊字韓仲一字寒中又字

南樓海寧人其藏書之所曰衍齋嚴久能名元照歸
安諸生其藏書之所曰芳椒堂與錢竹汀友善沈廷
芳字晚叔一字萩林仁和人監生舉鴻博授編修官
至山東按察使箸有十三經注疏正字隱拙齋集何
元錫字夢華杭州人是書原本四十八卷一百五十
三家見趙希弁讀書附志

四庫未收阮文達亦未進呈今祇存七卷四家目後
有割補痕恐戊集亦不全耳

宋槧文章正宗跋

文章正宗二十四卷宋槧本每葉二十行每行二十字版心有字數及刊工姓名宋諱有缺有不缺蓋宋季坊刊也間有元修之頁則無字數及刊工姓名矣提要云總集之選錄左傳國語自是編始遂爲後來坊刊古文之例誠哉是言豈知變本加厲有以典謨訓誥與後世文人並選者乎是又西山所不料也

宋麻沙本萬寶詩山跋

選編新奇萬寶詩山三十八卷次行空三行題書林
葉氏廣勤堂新栞前有雍作噩歲重九日余性初敘
宋省監皆試五言六韵詩建陽書賈葉景達彙爲此
書以備場屋之用凡分四百數十類約一萬六千餘
首每葉三十行每行二十三字

四庫未收文達亦未進呈各家書目亦不箸錄始見
于明文淵閣書目延陵季氏宋版書目王氏孝慈堂
書目爾疋太歲在戊曰箸雍在西曰作噩戊與酉不
相值非戊戌卽已酉之譌蓋理宗淳祐末年刊本也

元槧唐詩鼓吹跋

唐詩鼓吹十卷題曰資善大夫中書右丞郝天挺註
每葉二十行每行二十字小字雙行有音有註注卽
埒于句下版心有字數及刻工姓名前有至大元季
趙孟頫序至大戊申西蜀武乙昌序姚燧序後有大
憲七年盧摯後序遺山選詩于唐祇取此九十餘家
去取不得謂不嚴惟胡宿宋人宋史有傳誤在唐人
之列想由南北隔絕未得其詳郝氏當元一統之嘗
雖不強爲註釋而不加辨正何也明之廖文炳
國朝之錢朝鼐王俊臣王清臣陸貽典增註此書自

謂正郝氏之失而亦絕不一及豈未見宋史耶天挺
字繼先號新齋出于宋魯別族仕元世宗至仁宗官
至河南行省平章謚文定見元史一百七十四及武
乙昌姚燧序非金史隱逸傳之郝天挺

四庫提要已據池北偶談正陸貽典之謬陸所見本
無武姚二序及盧摯後序

四庫所据本同均不若此本之完具也

元版中州啟劄跋

中州啟劄四卷元槧本每葉二十六行每行二十二
字錢氏補元史藝文志箸于錄原本久佚乾隆中館
臣從大典錄出二卷附存其目前有大德辛丑江西
儒學提舉許善勝序是書爲元江西行省檢校掾史
蒲陰吳宏中元卿編見許序所收爲趙閑閑許魯齋
元遺山姚雪齋竇太師楊西菴王文炳杜止軒徐威
卿楊飛卿商孟卿郝陵川王澹游陳季淵宰晉伯勾
龍英儒胡德珪胡紫山徒單雲甫王器之陳之綱呂
鵬翼王顯之烏古倫正卿高勝舉鮮于純叔王子勉

王子初王仲謨劉靜修姚牧菴劉伯宣徐子方許蒙
泉盧疏齋張夢符宋齊彥王肯堂李澍張子良晉汝
賢師顏安鎮海唐顯之四十四人之作皆布帛粟菽
之辭四庫館未見全本此則猶元時原本也

影元抄玉山名勝集跋

玉山名勝集明天啟中徐韶翁刊于廣東張萱爲之校勘卽今

四庫箸錄九卷本也此本不分卷自玉山草堂起至寒翠止三十八題每題各爲起訖與常熟張月霄藏本同尙從元人舊本抄出與九卷本頗有不同如玉山草堂分題詩此本脫良琦顧瑛于立七首九卷本則缺鄭元祐得秋字陳基得新字二首玉山佳處九卷本有袁華七律一首爲此本所無今各依類補入九卷本柳塘春末附玉鸞謠玉鸞傳二篇亦爲此本

所無已刻于鮑濬飲所輯玉山逸藁今不錄然天啟
本寒翠所上脫一葉綠波亭題詠中缺僧法堅陸仁
釋至奐詩三首文質詩一首而割裂他詩屢入且譌
誤甚多不如此本之善

元槧元文類跋

國朝文類七十卷目錄三卷前至正二年浙江儒學
提舉司公文一道備載至元二年中書省咨待制謝
端修修撰王文郁應奉黃清老編修呂思誠王沂楊
俊民等請于江南學校錢糧內刊版呈省府委副提
舉陳登仕校勘劄付至元四年西湖書院交到書板
申文省府委西湖書院山長方員同儒士葉森對勘
劄付至正元年提舉黃奉政關文次有元統二年江
南行御史台監察御史南鄭王理敘國子助教陳旅
序後有元統三年太原王守誠跋至元四年西湖書

院初刊第四十一卷缺下半卷一十八版九千三百餘字目錄及各卷有九十三板脫漏差誤一百九十餘字經黃奉政于蘇天爵家得元藁請補刊完全此本四十一卷既已補完其餘亦無一缺葉爛版當是至正二年初印本每葉二十行每行十九字版心有字數及刊工姓名目錄後有儒士葉森點對六字卷中有玉蘭堂印白文方印王履吉印白文方印健菴二字白文方印季振宜藏書朱文長印御史之章朱文大方印吾道在滄洲朱文方印玉蘭堂長洲文徵明藏書之所王履吉名寵文徵明弟子季振宜號滄

葦泰興人順治中官御史吾道在滄洲御史之章皆其印也元文類刊本余所見凡五一爲翠微精舍本刊于元至正初一爲明晉藩本題曰元文類刊于嘉靖時一爲明坊刊細字本題曰校元文類當刊于明初一爲修德堂本刻于明季一卽此本乃此書祖本也多考亭書院記翠岩本明初坊本又多卷十八李節婦馮靜君兩贊卷七十高昌侯氏家傳卷十九建陽江源復一堂記似皆書賈所妄增西湖書院之版明時尙存缺葉爛斷甚多晉藩本行款與西湖同而缺爛甚多當以後印西湖本翻雕者翠微本卷四十一

缺下半卷當據至元四年西湖未修補本付雕而增
考亭書院記明初本又從翠岩本出而妄有所增修
德本則又據坊刊細字本重雕者五本之中以西湖
本爲最此則又西湖本之最善者也

元槧中州集跋

翰苑英華中州集十卷中州樂府一卷前有元好問
中州鼓吹翰苑英華序首爲十一卷總目卷一首題
中州集下十集仿此樂府則題中州樂府每卷有目
連屬篇目樂府卷末有至大庚戌平水進修堂刊木
記每葉三十行每行二十八字版心有字數皆宋本
舊式也平水在平陽府見金史地理志元太宗八年用
耶律楚材言立經籍所于平陽見元史進修堂當是
書坊之名猶建安之有勤有堂萬卷堂耳宋元之際
坊刻南有麻沙北有平水遙遙相對然麻沙刊本流

傳尙多平水刊本此外惟平水韵略蓋亦難能而可貴矣汲古毛氏刊本先缺樂府後得陸文裕家藏本始成全璧而十一卷總目終缺此猶元刊元印總目亦全提要以集中小傳皆兼評樂府爲樂府中州集合爲一編之証今總目第十卷後接樂府目又爲提要得一塙証矣

宋元詩會跋

宋元詩會一百卷題曰皖桐陳焯輯選焯仕履已詳提要前有康熙癸亥曹溶序曹溶與焯書潘江序凡例九條是書爲焯乞養罷官後所輯卷一至卷三十三北宋二百三十一人卷三十四至六十五南宋一百六十八人字里世次無考二十五人神童二人羽流釋子三十四人香奩二十九人六十六至卷一百金詩一百三十五人元詩二百七十五人凡例頗自負屢舉潘訥叔曹石倉詩選一人數收之失今觀其書疏謬更甚于潘曹誠有如此

提要所譏者如致中徐璣字也徐璣與徐致中竝收致中小傳曰淳熙皆人與永嘉四靈唱和于夏日懷人詩注下曰此詩併謝公岩作別本又作徐璣是知有永嘉四靈而不知致中卽四靈之字王澹冉琬元吉孟鯁皆金人見中州集劉壎至大辛酉爲南劍州學官見隱居通議而皆列之南宋江爲魯交俞汝尙黃大受利登薛嵎黃文雷杜旃名氏尙顯而列之字里世次無考仁宗賜梅摯詩全篇載庚溪詩話而以爲不傳孝宗冷泉亭詩全篇載武林舊事而僅收十四句皆疏漏之甚者司馬朴以不屈被殺字文虛中

以刼金主被殺朱弁滕茂實被羈不屈宋史皆有傳
何宏中爲韋城尉汴京被圍獨韋城不下後爲兩路
統制接應副使以糧盡被禽金人憐其忠授之以官
宏中投牒于地曰我嘗以此物誘人出死力若輩欲
以此嚇我耶囚京西獄久之免爲黃冠自號道理先
生起紫微殿遷徽宗東華君御容事之後病歿姚孝
錫爲代州兵曹金人寇雁門州將議降孝錫投牒大
駟不與其議旣得脫去遂往五台移疾不仕放浪詩
酒自號醉軒皆見齋東野語此六公者皆宋之忠臣
而列之金人焯自謂辨正宋史有功史學而顛倒黑

白一至此乎

至正鄱陽本金石例跋

蒼崖先生金石例十卷次行題鄱陽楊本編輯校正
三行題廬陵王思明重校正每葉二十行每行二十
字小字雙行前有至正五年楊本序傳貴全序湯植
翁序王思明序後有潘詡跋序跋每葉十二行行十
三字卷十後有諸生趙光邈謹書學生洪慶重錄二
行昂霄著此書生前未經定藁至正五年其子詡字
敏中者爲饒州理官屬鄱陽楊本字緝如者校正而
次第之丁亥刻于中州至正九年戊子王思明復刊
于鄱陽此則王刊本也有太原叔子藏書蓮涇二印

元第三刊金石例跋

蒼崖先生金石例十卷目錄次行題鄱陽楊本校正
三行廬陵王思明重校正前有楊本序後有潘詒跋
每葉十行每行二十二字序跋行款與全書同卷九
後有十卷多論先王本朝制度故茲未暇錄焉一行
四庫提要云書在元代版凡三刊至正五年詔刊于
家者爲初刊至正九年戊子王思明刻于鄱陽爲再
刊此本刊自何人無攷當又在戊子鄱陽刊本之後
前雖缺湯傳王三序目錄有思明校正一行可証蓋
是書元代第三刊也有西畝艸堂白文方印

許彥周詩話跋

許彥周詩話宋刊本每葉二十六行每行二十八字
前有建炎戊申自序提要顓襄邑人彥周其字也始
末無考愚案石門文字禪有大雪寄許彥周宣教法
弟臥病次彥周謝彥周仙茅彥周見和復答次韻彥
周送彥周贈彥周遊南嶽參機道者次韻彥周見寄
彥周借書彥周法弟作出家菴又自爲銘作此寄之
其送彥周詩有二云彥周雖綠髮風味映前古又云死
生人所怖玩之于掌股語一則曰法弟再則曰法弟
蓋其人曾官宣教郎而中年出家者

克齋詞跋


克齋詞題曰茗溪沈端節舊抄本提要云溧陽志載
端節寓居溧陽嘗令蕪湖知衡州提舉江東茶鹽漕
熙間官至朝散大夫其說必有所據愚案端節乾道
三年任蕪湖縣丞加意民瘼時大旱禱雨有感建志
喜齋于神山後升蕪湖知縣見太平府志蕪湖縣志
蓋克齋亦當時循吏非僅以詞見長者余前修湖州
府志未爲補傳深愧疏漏因備箸于此

儀顧堂續跋卷第十五



歸安陸心源伯剛甫著

邊鸞杏花鷓鴣軸跋



邊鸞杏花鷓鴣直幅紙本重設色高一尺九寸廣一尺二寸四分有黃琳國器書畫府印朱文長印黃琳美之朱文方印休伯朱文方印澹軒白文橢圓印李應禎項騏題于詩斗案黃琳字美之一字蘊真上元人官錦衣衛指揮家有富文堂藏書畫有王維著色山水王維伏生授書圖都元敬驚爲未見見客坐新譚及朱述之金陵詩徵停雲館所刻趙子昂與中峯

札亦有黃琳美之印三希堂帖所刊尤多清秘藏歷代賞鑒家亦列其名其鑒賞之精可知蓋宏正時一大收藏家也澹軒爲元王若水軒名李應禎初名甦以字行原藉長洲徙上元景泰癸酉舉人官至南京太僕少卿頃麒成化時人官南京刑部郎中皆有書名邊鸞畫世不多見此幅濃厚工細栩栩如生斷非宋以後人所能既有李項題詩又經王澹軒黃美之鑒定其爲真迹無疑

米元章字冊跋

米南宮書將之茗溪呈諸友詩二章居半歲借書劉李周三姓四章題元祐戊辰八月八日襄陽漫仕黻下蓋朱文方印曰米芾圖書每葉紙長一尺七分廣八寸半歲依修下缺二頁存二十一葉後有米友仁跋及內府圖書朱文方印睿思殿印朱文方印紹興二字連珠朱文印秋壑二字朱文橢方印與郁逢慶題跋記所載不同逢慶所記襄陽漫仕米黻六字在呈諸友下末題元豐戊辰八月八日作愚案諸友詩是未到茗溪時作借書劉李周三姓詩是居茗溪半

載後作相距甚遠若借書詩是八月八日作則將之
茗溪詩當在正二月作不得統題八月八日作以此
証之逢慶所記其贗無疑矣郁氏續集載李西涯跋稱
有紹興及睿思殿印後見吳門蔣氏刻本有紹興二
字朱文印及睿思殿朱文印書殊不一當卽逢慶著
錄之贗本也此冊爲高宗內府物悅生別錄云凡宣
和紹興內府物似道往往乞請得之此秋壑印所由
來也元祐戊辰米老四十二歲故其書姿媚而不放
縱與章吉老墓志墓表蕪湖學記有中晚之別其爲
真跡則一也

郭河陽溪山行旅卷跋

郭河陽溪山行旅圖卷絹本長一丈二尺三分高一尺二寸五分山水縈迴樹林疏曠木葉多脫石骨半露屋宇不高上覆以茅兩旁累瓦脊壓以塼有閣臨水下樹木椿疊木爲橋其上蓋土皆北方景象非南中所有驢十頭或負載或騎人人十有坐者立者步者騎者杖者隨者擔荷者負傘者攜物者戴笠者問路者指視者渡橋者人各不同神情畢肖後署款曰河陽郭熙前有周密公謹之印白文方印周氏文種堂白文長印後有宣文閣半印項叔子三字白文方

印項墨林三字白文方印愚案雲烟過眼錄載蘭坡趙與勤所藏有郭熙溪山行旅卷後云以上書畫止是短卷大者不在此數其中多佳品今散落人間者皆是也是草窗作過眼錄時其書畫已散出此卷必爲草窗所得故有周氏二印書種志雅二堂爲艸窗父晉藏書籍書畫處印文作文種想後又有更易此非淺人所知必非僞印且印泥已駁落非細審不明清河書畫舫云郭熙畫法源出李成晚年尤號超逸其溪山行旅圖真本元初趙蘭坡故物今在構李項氏秀勁可愛今此本有項氏藏印其卽蘭坡所藏過

眼錄所載米菴所記無疑也宣文閣爲元時收藏書畫之所柯九思曾官宣文閣鑒書畫博士元內府物往往經其鑒定蓋宣文閣鑒書畫博士印印分三行行三字卷末宣文閣半印卽此印之首行而缺後二行是則未歸項氏之前又當入元內府矣畫法靈秀山石皆水墨渲染絕無筆墨痕迹吾友胡石查司馬謂石谷學之得其形模而神韻則萬不能及洵篤論也

王居正紡車圖跋

右王居正紡車圖長工部尺二尺二寸四分高八寸五分中置紡車老嫗坐而轉車旁置竹筐犬蹲于前童子竿蟾蜍蹲于後老嫗牽絲對車立後角下有悅生朱文胡蘆印似道朱文方印是畫曾藏龔蘅圃家朱文長印珊瑚網箸于錄原有子昂兩跋今佚跋云賈師相故物圖雖尺許氣韻雄壯命意高古精采飛動今卷末有悅生二印氣韻画意亦與趙跋合其卽子昂所藏無疑圖贗本甚多是卷既有賈印又經蘅圃王方素邨諸家鑒藏後之觀者勿以失跋疑之也

蔡忠惠尺牘跋

蔡忠惠尺牘澄心堂紙高八寸二分闊一尺前題九月十八日襄奉書後題襄再行留台同年屯田兄足下留台者判留都御史台也宋史職官志三京留司御史台管勾臺事各一人舊名判台以朝官以上充掌拜表行香糾舉違失中興以後不置同年者忠惠進士同年也忠惠天聖八年進士攷歐陽文忠劉沆元章簡皆與忠惠同舉進士宋史有傳無爲屯田郎及判留台事劉奕劉昇翁紀黃珀皆忠惠同鄉同年奕昇珀皆累官屯田員外郎紀官檢校屯田郎中

見福建通志選舉表人物傳亦無言判留台者忠惠與劉奕尺牘有稱屯田二兄者此札或亦與劉奕然無判留台稿証未敢決耳再行者宋人正啟用四六別紙則以散行此是別紙故曰再行忠惠集啟箋之後有別紙一門是其証也前有江上外史朱文方印潤州笄重光鑒定印朱文方印廣陵李書樓珍賞圖書白文方印文武世家朱文方印宋人論書以蔡忠惠爲第一洪容齋朱文公晁昭德劉後村林竹溪皆云然虞道園謂君謨有前代筆意至坡谷而晉魏之法盡論者推爲宋代第一殆以此歟公書頗自珍惜

不妄與人見歐陽文忠所爲墓志故七百年來流傳
尤少王弇州最號博收僅得安樂扶護二帖秀水項
氏所藏尤廣亦祇二帖文氏借摹刊入停雲館帖見
紅雨樓集此札道勁端麗有唐人遺則証以停雲館
刻筆意悉合又經江上外史鑒定洵無疑義余搜羅
三十年宋代名家法書蘇有昆陽城賦黃有晦堂開
堂疏米有大字將之茗溪詩久以無蔡爲憾近費杞
懷太史典試浙江請急過蘇爲余和會得之誠吾家
鎮庫至寶也

黃文節書晦堂和尚開堂疏跋

山谷書晦堂開堂疏長二丈一尺六寸高六寸二分
宋黃蘗箋五接題云龍黃清禪師云江東西士大夫
知晦堂和尚是真歸依處本由德占發之追考其功
故欲書此文於卷以便覽者崇寧元年七月壬辰山
谷黃庭堅題前有洪焯題後有陶宗儀鄭元祐跋李
東陽陸完觀款案疏文爲徐禧作禧洪州分寧人宋
史有傳德占其字也疏作于元豐五年見羅湖野錄
晦堂名祖心始興鄒氏子住江西黃龍寺名其方丈
曰晦堂人呼爲晦堂叟嘗舉論語吾無隱乎爾請山

谷詮釋至於再而晦堂不謂然山谷怒時暑退涼生
秋香滿院晦堂曰聞木樨香乎山谷曰聞晦堂曰吾
無隱乎爾山谷欣然領解身後山谷爲作塔銘見禪
燈錄及內集清禪師名維清武甯陳氏晦堂弟子也
自號靈岩叟山谷嘗爲作像贊又寄詩示絕有云騎
驢覓驢真可笑以馬喻馬亦成癡一天月色爲誰好
二老風流只自知見內外集及江西志考山谷年譜
是年年五十八六月知太平州九日而罷七月甲午
後繫舟達觀臺下八月復至江州壬辰在甲午前二
日此疏當是由太平至江州時舟中所書也黃龍寺

在今義寧州宋之分寧縣也山名自云紹聖甲戌在黃龍山中忽得草書三昧是年九月又自巴陵取道通江入黃龍山訪維清爲之編閱南昌集見內集卷十九及年譜宋時刻石于寺拓本罕見黃書僞迹遍天下如梵志詩明時已有兩本見張丑真迹日錄此本道健縱肆紙厚如錢又經陶南邨鄭僑吳李西崖陸水邨諸公鑒定其爲真迹無疑書畫彙攷著錄之本無陶鄭李三跋而有唐寅印記恐摹本耳

范華原烟嵐秋曉卷跋

右范華原烟嵐秋曉圖絹長工部尺一丈九尺五分
高一尺二寸八分自近而遠自密而疏山則有帖有
關有磬有磬有厂有自有岑有巒水則有林有沚有
谿有素有滙有渭有限有濬人則或坐或立或負或
擔或漁或農或老或少屋則或茅或簷或豐或庳或
亭或樓或塔或閣樹則榮然而丹赭然而黃焉然而
蔥翠巢然而琴儷涉渡之梁負戴之驢行旅之舟曲
折之逕層見而疊出迤邐而不窮宋徽宗瘦金書題
其上曰范寬烟嵐秋曉圖己丑御覽下有天下一人

押押下蓋御書朱文胡盧印後蓋宣和御覽御府之
印朱文兩方璽前有雙龍圓璽登聞鼓院之印朱文
方印墨林主人白文方印子京朱文胡盧印平生真
賞朱文方印項墨林鑒賞章朱文長印子京父印朱
文方印神品朱文連珠印墨林子朱文長印退密朱
文胡盧印□□印章朱文方印賜錦老人白文方印
項子京隨字編號書於左角下後有緝熙殿寶朱文
方璽天籟閣朱文長印櫺李朱文圓印子孫世昌白
文方印元汴朱文方印弘遠朱文方印項叔子白文
方印吳郡□□□印白文方印賜錦白文騎縫半印

及墨林主人項子京家珍藏子京父印子京四印後
有楊士奇跋下蓋廬陵楊士奇朱文方印項元汴跋
下蓋元汴朱文方印及項氏藏印九攷宣和畫譜山
水門載范寬烟嵐秋曉圖二此題已丑御覽爲大觀
三年所題其卽宣和殿所藏之一無疑也峯巒渾厚
草木華滋筆筆中鋒如作篆籀傳色沈厚氣局雄闊
以所藏沈石田有竹居卷証之皴法樹法界畫人物
設色勾勒無一不同石田蓋全師之楊東里推爲第
一妙筆項墨林推爲生平傑作知言哉墨林所藏散
於明季此卷二百年來流傳人間仍不出嘉禾境髮

逆亂後始爲嘉興守許雪門所得雪門身後歸之知
海寧州曾星槎星槎知此卷之可寶而以左角下隨
字爲疑已丑秋大兒樹藩次兒樹屏赴試秋闈余亦
偕行遇星槎於武林出以相質余笑曰君能以此卷
讓我當爲君言其故星槎漫應之及余告以項氏千
字文編號乃始恍然星槎君子人也不肯食言卷遂
歸余償以原值白金三百銖星槎名壽麟湖南邵陽
舉人宰山陰八年廉靜公正所去民思今春已作古
人執筆題此良用盡然

小米墨戲卷跋

右米友仁畫紙長工部尺二尺三寸四分高五寸七分山色溟濛烟樹掩藹瓦屋五間爲樹所蔽僅露屋脊後有宗夏題下蓋白雲山舍白文方印錢惟善題下蓋思復朱文方印費恂題無印前有季振宜印朱文方印滄葦朱文方印卞令之鑒定朱文長印後有令之清玩朱文方印雲卿白文方印廷韓甫白文方印平石無夢宇文公諒題于別紙平石之印曰契此里人公諒之印曰宇文子貞子貞印似印而加蓋者前有式古堂書畫朱文長印後有令之朱文方印仙

客朱文方印與書畫彙攷所載合惟彙攷稱長二尺二寸高五寸微有不同余所用乃工部營造尺卞所用疑是裁衣尺故有參差耳張米菴謂高米水墨雲山皆數十百次積累而成非後人草率點染所可同類而觀此畫純用濃墨層層點染斷非元以後人能小米雖無題字印記而元人平石無夢子貞三家皆定爲米畫又經莫雲卿季滄葦卞令之三家鑒定令之又收入彙攷可信其爲真跡也公諒字子貞湖州人元史有傳平石無夢二人俟攷

李龍眠十國朝貢圖卷跋

右絹十接長工部尺九尺七寸八分高六寸四分所
畫十國曰李旼曰白李羅曰崑崙曰朝鮮曰女直曰
九蠻十八洞曰三佛齊曰登樹綱曰漢兒江曰女送
皆書于旗上女直卽女真也後署款曰李公麟造人
二百二十有九官吏臧獲士卒與人馬夫婦女之儔
不一其類冠巾纓笠衣裳袴褶靴履薙髮辮髮束帶
垂帶之制不同其國行者立者乘者騎者牽者驅者
負者戴者扛者持者攜者捧者迴顧者偶語者拍手
者吹者擊者佩者前驅者後擁者展帛爲輿懸兩端

于木二人舁之者人事不同其貌亦無一同者獸則馬二十羊十象一獅一物則若旗若旆若旌若節若麾若蓋若弓若刀若劍若叉若矛若珊瑚若瑯玕若盤若壺若幃若屏若俎若筐若奩若筐若束帛若橐韃間見而層出筆勢簡勁意態生動實爲見所未見每段有李鈺私印白文方印吳逸士宋子虛朱文方長印原本似是長卷僉父割而爲冊上下亦有割損故圖中旗幟有僅存下半者湯貞愍隸書額其端曰李龍眠十國朝貢圖神品別紙有趙仲穆跋蓋仲穆朱文方印王達善跋蓋王達善氏朱文長印皆真跡

僧六舟何子貞太史又跋于別紙劉後村見于林竹溪家者日本于闐三瞳日南天竺第林堅昆波斯等十國與此十國不同攷宣和畫譜載龍眠十國圖二是龍眠所畫原有二卷此圖疑卽宣和所藏之一當有宣和御題御印均爲僞父割損耳或有疑爲添款者攷女真之名著于唐末宋初後改號曰金不復稱女真今圖有女真國則爲徽宗以前所畫無疑神哲之際擅白描者更無妙手則此畫舍龍眠其誰乎況趙仲穆王達善兩跋宋子虛鑒印可信又經貞愍子貞達受賞鑒其爲真迹無疑

朱文公顏淵註稿跋

朱子論語顏淵篇集註稿自問君子註起至君子以
文會友章註止中缺棘子成曰章至盍徹乎經註存
二十九紙每紙直烏絲欄六行高工部尺八寸五分
闊四寸小行草書經頂格註低一格添註塗改甚多
證以所藏上時宰二劄筆意雖同此秀潤而彼蒼老
蓋論語註創稿於三十後劄則五十以後所書年有
老少字亦有枯潤其爲真迹則一也後有吳匏菴唐
六如兩跋陸氏吳越所見書畫錄著於錄尺寸微有
不同者所用之尺不同也

陳居中文姬歸漢圖跋

陳居中文姬歸漢圖絹本長工部尺二尺五寸三分
高六寸三分題曰陳居中畫凡番官九番女五文姬
坐于車中馬十一駝一駕車于上南宋人畫駱駝往
往蹄與馬蹄同番女髻亦不類昔人以爲話柄此卷
番女之髻如牛角長倍于首與南薰殿圖像攷所載
元皇后冠同駝蹄不作馬蹄形畫法甚古居中嘉泰
時人未嘗身至北地當必有所本也前有珍賞圖書
朱文方印琴書堂白文方印後有耿會侯鑑定書畫
之印朱文方印信公珍賞朱文方印嘉禾周鼎海昌

蘇平題于別紙有耿都尉信公書畫之印白文方印
子子孫孫永寶用朱文方印審定真迹朱文方印皆
康熙中耿信公收藏印也周鼎字伯器嘉興人正統
中汴陽典史書法瀟灑見書畫謹蘇平字秉衡海寧
人景泰十才子之一見明詩綜信公名昭忠一字會
侯號在良遼東人靖南王仲明之孫嗣王繼茂之子
逆賊精忠之弟也順治賜昏哆羅縣主爲縣主額駙
累官太子少師太子太保鎮南將軍謚勤僖工藝事
精鑒別圖書鼎彝炤耀几席見徐乾學澹園集耿公
墓志蓋康熙間一收藏家也

趙千里春江待渡圖卷跋

右趙千里春江待渡圖絹高工部尺一尺一寸八分
長九尺七寸七分首畫山嵐重峻花樹叢深林中瓦
屋整齊陳設精緻一人倚案立一人坐而聽一室設
二朱杌二人對坐於中跨隄繫石爲礮一人攜壺而
登一人盪舟谿中谿邊茅屋兩三家編竹爲籬隔谿
有亭息者二人彌望山中緋桃爛然古松夭矯迤邐
不絕松下瓦屋中有三人似隱居者一人臨崖扶杖
眺望崖下茅屋數椽舟泊于門渡約略立而若問訊
者二人隔岸牧童騎牛橫笛小牛尾之一人荷耒自

山後來次有石橋跨谿一紅衣人杖而登一童攜琴
從其旁高峯入雲瀑布逾重山而下注于谿面瀑作
亭二人坐而觀一童依柱立山後寺觀壯麗樓閣崇
闋下臨行路二人擔而趨二人雁行一童從若皆將
赴渡者谿有二舟一在谿中一人篙而前一人坐鷁
首一人持柁于尾一舟近岸一人持篙若將行者山
之麓層樓二門臨石橋一人杖而過一人擔而從若
渡而來者村居六七家憑牖坐者一人屋外望者一
人一人將叩門犬隨其後一人竿而驅二驢三馬負
戴前行亦將赴渡者次臨路十餘家浮屠矗于後山

之巔行人五一人擔一人負若將赴渡者一人拱而
顧一人杖一人負若渡而來者隔谿二人荷鋤並行
居者五人四人憑牖觀一人當門立門前繫二舟踰
木橋坡上人十有四立者坐者趨者擔者負者回顧
者偶語者弛擔而息者渡船五其二半隱於岸樹林
蔽處露十餘檣焉船上人十餘舉桅者撐篙者解維
者理索者持柁者立而指者坐而觀者渡口有山上
有樓如城江中行舟二各張前後帆舟不一人人不
一事後署款曰千里伯駒前有鄭氏明德朱文方印
許氏元復朱文方印後有史氏曰鑑堂珍藏白文長

印雲間何氏叔昆攷藏印朱文長印墨林生朱白文
方印喬氏蕢成白文方印完菴朱文方印攷珊瑚網
載史明古所藏有趙千里春江待渡圖此卷雜花生
樹紅桃爛然待渡情景宛然在目又有史氏藏印其
卽明古所藏珊瑚網所載無疑也黃志雲跋于別紙
其趙仲穆鄭明德二詩疑爲後添千里僞跡甚多此
卷皴法樹法全學右丞精細古厚非千里不能又經
元喬仲山鄭僑吳明許元復史明古項墨林諸家鑒
賞其爲真迹無疑

劉松年琴鶴圖跋

右劉松年畫絹長工部尺一丈五分高一尺七分首
畫坡樹水石跨以石梁梁上策杖而行者一人一童
負而隨其後一人拱而前行已過石梁數十武回顧
若前導然二鶴相對鳴于坡上屋宇背山近水中設
一几兩杌几上書兩帙爐一瓶一兩人對坐而談一
童攜琴將及階白鶴一舞于庭次陂陀竹樹白項鳥
十二棲于樹者十其二展翅而下將止于樹後署疑
曰畫院待詔劉松年繪前有金章宗內府之印朱文
方璽羣玉中秘朱文璽子京朱文胡蘆印項子京家

珍藏朱文長印後有乾坤清氣朱文方璽西楚王孫
朱文方印平生珍賞朱文方印項墨林跋于別紙有
退密朱文胡盧印墨林署款已缺蓋墨林所藏每于
署款處註年月得價估人欲得重值惡其害已因並
署款而去之耳後有楊東里題下有朱文方印曰士
奇之印前有橢李朱文圓印子京珍藏朱文方長印
楊跋項跋本一紙後人割去項款遂分爲二矣畫中
士人衣服皆作唐宋粧惟頭上非冠非巾以帛束之
髻垂向後長過于首非唐宋所有攷金人辨髮之制
史所不詳李心傳建炎以來繫年要錄屢敘薙髮之

事亦不言其制帛巾所束疑卽辮髮與今之垂於背者略異其殆金人燕居冠服歟章宗明昌元年卽宋光宗紹熙元年暗門于淳熙中爲畫院學生紹熙中待詔賜金帶是松年待詔之日正章宗在位之時其時宋金無隙使命往來不絕于道或松年受金使之指所繪後進于章宗故有章宗印璽歟藉此可以攷見金人燕居衣冠之制不僅其畫之可寶也趙清獻公以一琴一鶴自隨傳爲佳話後世士流慕之多爲琴鶴之圖子京以其有屋必名之爲琴鶴軒陋矣今改題爲琴鶴圖庶乎近之

張樗寮書大方廣佛華嚴經卷七十一跋
右紙十接長五丈七尺四分高一尺一寸梵經式六
十二葉葉二十行行十五字烏絲方格字幾及萬始
終一筆不懈其全部在

內府缺六卷杭州朝鳴寺有三卷見太平清話此卽
朝鳴寺三卷之一道光中爲烏程鈕明經福惇所得
明經身故歸於余其漆板裂紋如古琴面刻大方廣
佛華嚴經第七十一字亦樗寮書非卽冊之首
行摹刻者七百年來裝池無恙尤爲難得尙有二卷
今歸沈仲復中丞不及此冊之完善也

王明梅金明池龍舟圖卷跋

王孤雲金明池龍舟圖絹長七尺九寸八分高一尺三分大樓一樓之下一層扁曰寶津之樓殿一亭三皆重簷亭一在殿前一在殿後一在樓前池中石臺長倍于闊者百周以石欄樓殿及亭峙焉中跨環橋亦甃以石重樓龍船一向石臺而來小龍船十有六二尾樓船行其一先之餘皆迴旋臺左右小舟三一載雀籠一載小孩一繫于重樓之下鞦韆船二木魚船二皆在橋兩旁人三百有七立者拱者望者倚者浮者斧者矛者旗者旌者纛者梃者漿者舞者鼓者

金者笛者籠鳥者執笏而朝者排班而侍者大者盈寸小僅數分樓後石臺之下署臣王振鵬四字後有振鵬隸書跋署曰至治癸亥春莫廩給令王振鵬百拜敬畫敬書蓋孤雲處士圖書朱文方印前後有皇姊圖書朱文方印末存韓印二字白文半印孤雲于至大庚戌先爲仁宗作此圖閱一紀又爲大長公主作此圖清河書畫舫箸于錄原有李原道等十四人題跋今已失書畫舫載有韓逢禧諸人印富在裱褙騎縫之際故今祇存韓印二字半印耳大長公主者魯國徽文懿福眞壽大長公主也順宗女仁宗姊適

帖木兒子弼阿兀刺見元史公主表收藏書畫甚多
今所流傳尙不止此圖每見明代贗鼎皆濃俗可厭
是卷工細之中仍饒士氣閱之令人驚心動魄虞道
園謂永嘉王振鵬妙在界畫運筆和墨毫分縷析左
右高下俯仰曲折方平直曲各盡其體而神氣飛動
不爲法拘愚謂郭恕先之後蓋罕其匹斷非明以後
人所能諸跋雖失無害其爲真迹也明嘉靖時爲分
宜所得籍沒後以折俸歸韓存良太史崇禎中歸張
米菴道光中萬廉山司馬以重值得之因此獲罪于
琦相然則題跋之失當在髮逆亂江南時矣

黃文獻袁通甫墓誌跋

故靜春先生袁通甫墓誌銘題金華黃潛撰烏絲闌紙本三十行行二十六字吳訥跋以爲文獻親筆余疑前無結銜後無印記非書丹式近閱徐一夔始豐稿卷十四引待制王禕之言曰公凡爲文脫稿必命門生代書而碎其初稿公字畫甚佳以秘惜故多不傳云云則此稿信非文獻手書而爲門下士代書矣惟元刊金華黃先生集寺記塔銘連篇累牘通甫文行甚高誌反不收且旣不惜其文而反秘其書殊不可解耳

俞紫芝四體千文跋

俞紫芝四體千文末題至正十又五年夏六月廿二日紫芝生俞和寫于黃岡之隱居下有俞穌二字朱文方印俞子中父白文方印紫芝生三字白文長方印烏絲闌紙本六十一葉每葉騎縫有墨林二字白文長印後有樵李項氏士家寶玩九疊篆朱文長方印項元沐印朱文方印墨林山人白文方印子京父印朱文方印墨林秘玩朱文方印項子京家珍藏朱文方印項墨林鑒賞章朱文長印前有賜進士蘭台逸史姚公綬書紫芝墨妙四字畫紫芝獨立小像一

葉芝草一葉當爲雲東所藏而後歸墨林者案俞和
字子中自號紫芝生本嚴之桐廬人父章遊錢塘因
家焉少時得見趙文敏用筆之法極力攻書日益有
名篆隸行草各臻於妙一紙出用趙文敏私印識之
人莫能辨其眞贋壬辰之亂避地隣縣之黃岡嘯傲
于海風山月之間久之乃還故廬故舊凋零喚酒獨
酌賦近體詩歌長短句援筆書之以寫無聊不平之
思而草聖猶飛動如初洪武十五年三月七日卒年
七十六見徐一夔始豐稿俞子中墓誌是黃岡者錢
塘隣縣之鄉名非湖北之黃岡縣也海寧有黃灣徐

一夔避地嘗居之至正壬辰徐壽輝陷杭州遂及餘杭武康德清於潛安吉惟海寧無恙墓誌有嘯傲海風山月語黃岡地必近海意者黃灣卽黃岡歟壬辰爲至正十二年墓志云久之乃還故廬其居黃岡必非一年證以題款年月時代悉合子中生于大德丁未至正十五年年四十九若晚年則草聖雖如初篆楷或不能復作矣冊爲無錫故家舊藏費昶懷太史爲余介紹得之太史賞愛紫芝小像及芝艸兩葉卽以贈之時閱五百餘年紙墨雖舊完善無缺惜草體爲僞父影摹所污耳紫芝錢塘人雲東墨林皆嘉興

人不知何時流入錫山今歸穰梨館歷元明及
本朝而收藏不出浙西翰墨因緣信非偶然

儀顧堂續跋卷第十六

歸安陸心源伯剛甫著

消夏錄載司馬端衡米元暉合卷跋

消夏錄載司馬端衡與米元暉合卷其印文曰司馬次仲之孫後有王珉田如鼇王與道富元衡四跋卞令之書畫彙攷不列其名豈以端衡不見史傳又不見畫史會要而疑之耶愚案端衡名槐夏縣人官參議行六十五抱才負氣其少壯值徽宗時黨人子孫不得仕進遂放意于画落筆高妙有顧陸遺風論画終日衮衮如孫吳談兵臨濟趙州說禪以画得名紹

與初陸放翁尤及見之稱之曰丈必生于北宋而卒于南渡後者見渭南文集傳燈圖跋樓攻媿集趙氏所藏大士跋觀田如鼇跋端衡實溫公之孫然溫公字君實史傳神道碑年譜均不言又字次仲惟公兄旦字伯康則公字次仲亦宜公二孫長名植次名栢見范太史集司馬康墓誌而無槐豈植栢二人後又改名槐歟疑莫能明也王珉字中玉玉山人政和五年進士紹興中官侍郎寓居衢州田如鼇字癡叟南安人宣和六年進士江西通志有傳富元衡蘇州人姑蘇志有傳

吳越所見書畫錄所載山莊義訓圖跋

所見書畫錄載有李伯時山莊義訓圖後有半江華
淞跋王澐跋以奕京方奇亮育爲伯時子玟爲伯時
女以愚玟之蓋奕京方奇亮育乃金華潘竹隱之子
玟乃竹隱之女所畫乃七進圖也七進者猶枚乘七
發之類爲潘祖仁作其文載吳師道敬鄉錄與此皆
同惟多首一段其文曰奕方作真游子賦相酬荅意
敬慕古人作者念其無所依倣戲爲七進以示之歲
在荒落月紀仲呂竹隱老人晝臥於家愴恨鬱悵眊
瞢寂默沈吟憎歛寤寐太息兒曹憂之聚而謀曰翁

之戚甚矣盍相與寬之于是推次序列搜意屬詞長
跪稽首造于燕私下接奕奉觴進曰云云此本無之
蓋後人不知竹隱爲何人欲僞題龍眠名故刪之耳
攷吳禮部集卷十二有七進圖記曰七進圖者畫金
華潘氏父子也竹隱老人名祖仁字亨父子奕女玫
子京方奇亮育七人首畫一竹牀老人衣冠臥文簾
上右手支頤左手撫膝熏爐塵尾置旁草屐陳下六
子一女環侍次畫奕奉觴進一隸袒裼右提酒壺左
持其格次畫二女御踵行次人背面捧槃中芍藥前
人以右手扶槃花隱其手次女玫在後目持花一枝

重臺特起異於槃中者次畫京拱而行从隸以竹枝
貫雙魚于盤置刀一帶葉橙一醯器一捧以獻次畫
茶具列供事者數人一童跪地垂手持碾困睡或撚
紙觸其鼻微醒欲嚏方坐瓦具上以甌授附于爐者
將瀹茗也次畫奇導引一老奴左襁負棋局右手挈
籃中圓器貯子者也次畫亮捧五木以趨次畫竹間
一室簾牖明整几格積羣書有迎立以請竹風蕭然
老翁舉兩手整巾帶而行六子暨童奴八人導从前
後蓋竹隱文規模枚叔而藻麗出新意書以漢隸亦
工每段次畫于文用李伯時白描法精絕似之然末

有考也竹隱後贈中奉大夫奕後名良佐字致君贈通奉大夫京後名良貴字義榮一字子賤政和五年進士官徽猷閣待制中書舍人自號默成居士方後名良瑗字仲嚴終太學生奇後名良翰字叔倚紹興十五年進士官至太府寺丞倅平江府亮後名良知字叔愚早卒育後名良能字季成登紹興五年第官秘書省正字江州倅默成常自稱兄弟六人又云吾母生子十有二人長女適錢經國稱之爲姊卽玟是也紹興乙卯默成自左史除西掖竹隱已九十次年卒于旣从潘氏借觀因略記之據此則其畫當有八

段華淞跋祇見迎風嘯傲之老人不見牀上之老人
不但文缺首一段卽畫亦缺首一段矣骨董家一涉
考證往往郢書燕說此其尤甚者也

江村消夏錄所載刁光胤畫冊跋

消夏錄載五代刁光胤畫冊有乾道元年御題其蝶戲猫圖題句有後村詩與涪翁詠一句愚按劉後村生于孝宗淳熙十四年丁未卒于咸淳五年己巳年八十三見林希逸竹溪集後村行狀乾道二年戊子前乎淳熙丁未凡二十年是時後村尚未生孝宗何得見其詩乎其僞無疑也

沈石田山水卷跋

右沈石田設色山水卷絹本有石田二字白文方印
后南二字朱文方印吳匏菴五古一章題于別紙題
曰延陵吳寬題于森若葉氏之青霞閣下有吳寬二
字匏菴二字朱文方印匏菴題石田畫集中凡十餘
章或曰石田生或曰沈子或曰沈郎或曰石翁或曰
吾鄉沈石田或曰石田高士皆指其人以實之不泛
題畫景而已此云石田沈徵君同一例也葉氏森若
無考家藏集卷十六有與葉翁遊小城南詩卷十七
有與葉翁看牡丹詩卷十八有葉翁以叢竹分種因

題墨竹謝之詩卷二十三有東隣葉翁送牡丹詩卷二十九有中秋夜與葉翁飲詩森若疑卽其人詩系應酬之作森若非文人學士故集中不收其爲真迹則無疑也家藏集乃匏菴手定刪除甚多石田筆力雄厚揮灑滿紙往往無餘地署款僅蓋印章題於別紙若以石田無款匏菴集無詩而疑其僞則眞矣卷經金文通之後收藏有息齋二字朱文方印太傅大學士章白文方印息齋文通自號也箸有息齋文集

石濤贈石溪冊跋

右石濤山水冊十二葉每頁有題有阿長清湘石濤
搜盡奇峯打草稿贊之十世孫清湘老人元濟苦瓜
瞎尊者前身龍眠濟等印其一頁題曰呈石頭先生
博笑其一頁題曰石頭先生年道長并正其一頁題
曰時癸未秋日爲石頭劉先生作畫拈出請正曰并
正曰拈出請正其人當亦能畫者以愚考之此冊蓋
爲石溪作也案石溪名髡殘字石溪一字介邱號白
禿又稱殘道者武陵人住金陵之牛首寺俗姓劉幼
有夙慧不讀非聖之書後棄舉子業而爲僧見讀畫

錄青溪遺集畫徵錄諸書蓋亦明之遺民也石濤爲
楚藩後裔自稱清湘老人必分封於沅湘間者二人
生旣同時又同鄉里後又同居金陵同爲明室遺民
同工詩畫同逃于禪相契必深其爲石溪作無疑也

楊忠烈家書跋

右明楊忠烈公家書紙本高九寸長二尺九寸首題曰字與之易之賦之言末題九月十九日字有晏如主人四字白文方印凡三十行每行約十七八字案忠烈諱連字元孺號大洪湖北應山縣人萬曆三十五年進士除常熟知縣官至右副都御史天啟四年疏劾魏忠賢二十四大罪五年忠賢矯旨逮公死詔獄年五十四崇禎初謚忠烈見明史二百二十四卷之易字元仲公之子也公被逮欲赴闕上書請以身代公力止之順治初官江南松江府同知亂賊據南

匯討平之四年松江提督吳勝兆叛之易罵賊遇害
照例優卹事聞贈按察司副使見湖北通志楊忠烈
公集有獄中遺易兒書卽其人也明史本傳載公于
萬曆四十三年二月抗章乞去卽出城候命帝褒其
忠直而許之歸天啟二年起禮科給事中旋擢太常
少卿書中有無功無勞叨冒卿貳語則此爲公起復
八都擢太常少卿時家書無疑也九月十九日者天
啟二年九月十九日也太太者公之母史稱公身後
母妻棲止譙樓是公殉國後太夫人尙在也大爺者
公兄清也清應山諸生與漣同讀書山中慕里中二

宋二連人以宋連目之以貢歷金華府同知公被難
清罷職家居事雪後同知衢州府致仕見湖北通志
公自號晏如主人其兄清曾由貢生官南京助教通
志皆未詳可據以補其缺

朱文肅溫寶忠董伯念手札跋

右朱文肅家書四通溫寶忠札三通董伯念札三通
烏程周芸齋別駕所藏也文肅以位顯寶忠以忠著
伯念以氣節重皆吾郡有數人物寶忠札多憂時感
事之言其于員嶠無貶辭亦非阿其所私蓋員嶠雖
嫉賢害能而鑒于周延儒之獲戾頗能謝絕苞苴避
嫌遠疑明社未亡公論未定寶忠亦不能不爲親者
諱也伯念三札雖無大關係而豪俠之氣流露行間
可以覘其所造余皆已錄入穰梨館過眼錄惟文肅
忝居高位無補時艱書中亦多蹉跎語故不錄

高句麗廣開土大王談德紀勳碑跋

後漢書東夷傳初北夷索離國王出行其侍兒於後
倭身王還欲殺之侍兒曰前見天上有氣大如雞子
來降我因以有身王囚之後遂生男王令置于豕牢
豕以口氣噓之不死徙於馬蘭馬亦如之王以爲神
乃聽母收養名曰東明東明長而善射王忌其猛復
欲殺之東明奔走南至掩淲水以弓擊水魚鼈皆聚
浮水上東明乘之得渡因至扶餘而王之焉三國誌
注引魏略略同魏書高句麗出于扶餘自言先祖朱
蒙母河伯女爲夫餘王閉於室中爲日所照引身避

之日影又逐既而有孕生卵大如五升有一男子破殼而出餘與後漢書略同爲隋書及文獻通攷東國通鑑之所本與碑云天帝之子母河伯女郎剖卵降生由路夫餘奄利水爲木連嶺浮龜塵聲卽爲連嶺浮龜然後造渡合鄒牟疑桂婁之譯轉三國志高句麗有五族有消奴部絕奴部順奴部灌奴部桂婁部本涓奴部爲王稍微弱今桂婁部代之是也儒留王名類利東國通鑑作琉璃明王永樂大王之名不見于外國記載乃當時國人之尊稱耳東鑑三國記高句麗談德薨號廣開土王與碑稱廣開土境好大王

合則此碑應題爲高勾麗廣開土王談德紀勳績碑
案東鑑晉太元十七年壬辰三月高勾麗王伊連薨
太子談德立碑稱永樂五年歲在乙未則談德當立
于辛卯年非壬辰實晉太元十六年也東鑑又載壬
辰秋七月談德帥兵四萬攻百濟北鄙陷石峴等十
餘城冬十月攻陷百濟關彌城與碑合惟碑稱六年
丙申鑑系之壬辰差四年蓋三國史爲高麗王氏臣
金富軾所箸當中國宋徽宗時時代旣遠文獻殘缺
皆當以碑爲正十七世孫者孺留王之十七世孫也
東鑑記類利薨子無恤立號大武神王爲一世無恤

死子解邑朱立號閔中王爲二世解邑朱死無恤子
解憂立號慕本王爲三世解憂被弑類利之孫宮立
號太祖王爲四世宮傳位于弟遂成號次大王爲五
世遂成弑弟伯固立號新大王爲六世伯固死子男
武立號故國川王爲七世男武死子延優立號山上
王爲八世延優死子位居立號東川王爲九世位居
死子然弗立號中川王爲十世然弗死子藥盧立號
西川王爲十一世藥盧死子相夫立號烽上王爲十
二世相夫死弟咄固之子乙弗立號美川王爲十三
世乙弗死子斯由立號故國原王爲十四世斯由死

子臣夫立號小獸林王爲十五世臣夫死弟伊連立號故國壤王爲十六世伊連死子談德立爲十七世與碑合談德在位二十二年攻陷百濟石峴等十餘城又克關彌城伐契丹虜男女五百口招諭本國沒陷民戶一萬而歸一敗百濟于水谷城再敗百濟于渭水一侵燕而平州刺史慕容歸棄城走築城國南者七築城國東禿山者六而碑所稱救新羅破倭人克東夫餘諸戰功東鑑皆失載實爲高句麗英武之主此廣開上境之稱所由來也惟談德之攻百濟攻契丹皆在卽位五年之後免喪久矣自金富軾三國

史誤系之壬辰年權近遂有衰經伐國之貶賴有此碑可以証其誤耳碑所稱諸城名當在三國魏志東京傳三韓所屬八十國之中多穰城疑卽爰襄國阿旦城疑卽曰斯烏旦國古利城疑卽古離國牟盧城疑卽牟婁國樂彌城疑卽不彌國閭奴城疑卽順奴部芻奴城疑卽消奴部析支城疑卽月枝國其地則不易考耳百殘利殘皆卽百濟三國志避泰亾人名樂浪人曰阿殘阿與百利與濟皆聲轉鴨盧卽鴨綠也關彌城見東國通鑑碑字作閔乃關之變體或釋作閣非也

魏都督冀定十一州太尉公劉懿墓誌銘跋

此劉懿卽魏書之劉貴碑有二君諱懿字貴珍宏農華陰人史稱貴秀容陽曲人宏農與秀容相去甚遠本紀屢稱秀容人劉貴元和姓纂劉氏宏農望出漢高兄代王喜後則碑云宏農者其族望也祖給事父肆州攷之本傳父乾魏世贈前將軍肆州刺史與碑合而祖給事則史失載誌所敘官位多與史合爲騎兵時有第一酋長之號除左將軍時先歷直閣將軍左中郎將除涼州仍鎮西將軍之任則史從略尙書右僕射史作左或傳寫之譌耳史稱建明初爾朱世

隆專擅以貴爲征南將軍西南道行臺使抗莊帝行臺元顯恭則誌諱之史稱貴凡所經歷莫不肆其威酷非理殺害誌所云猛烈同于夏日嚴厲等于秋霜者亦微辭也興和元年十一月卒贈官亦與史合惟史稱諡曰忠武誌不著諡蓋誌刊于初葬時或未議諡也正月庚戌朔與通鑑目錄合銘後列七行一云夫人常山王之孫尙書僕射元生之女按魏誌常山王名遵其孫有可悉陵陪斤忠而無名生者或史譯國語而生乃華文歟俟考一云長子撫軍將軍銀青光祿大夫都督肆州諸軍事肆州刺史元孫史與誌

合而史較畧一云妻驃騎大將軍司徒元恭女案恭
魏廣陵王羽之子也一云世子散騎常侍千牛備身
洪徽史元孫早卒次子洪徽嗣武平末假儀同三司
奏門下事作誌時元孫已卒故徽稱世子後爲齊河
州刺史見齊本紀封樂縣男卒贈燕州刺史見北史
一云妻大丞相渤海高王之第三女按史魏孝靜皇
后獻武第二女此則孝靜后之妹也一云次子肆州
中正徽彥一云少子徽祖無攷

魏滄州刺史王僧墓誌跋

王僧於史無徵誌云父願以眞君年中黃輿南討策功天府除平遠將軍卽魏書眞君十一年車駕南伐走宋將王玄謨事神龜年中冀土不賓民懷跋扈卽神龜二年瀛州民劉宣明謀反事正光年除清州高陽令地形志高陽縣屬青州清青北碑多不分如崔敬邕誌臨清作臨青是也此誌顯祖曾祖祖之名皆筆跡極細與全誌不同初拓者顯祖下存一直曾祖下存上半文字祖下似彙字之半近拓則形迹全無此猶初拓本也書法姿媚而勁似崔敬邕墓誌

魏崔敬邕墓志銘跋

右崔敬邕墓誌二十九行行二十九字石已佚案敬邕魏書附崔挺傳挺之從祖弟祖父名位列於誌前云祖秀才殊字敬異夫人從事中郎趙國李休女父雙護中書侍郎冠軍將軍豫州刺史安平敬侯夫人中書趙國李詵女殊與雙護不見史休卽休之別體休字紹則盛孫纘次子見北史李士謙傳詵字令孫京兆太守附李順傳高允徵士頌亦列其名誌所敘官位與史合惟爲都官時兼吏部郎史所不書誌云臨青男史作臨淄營州刺史史作管州按臨青當卽

臨清魏書地形志司州陽平郡東楚州晉寧郡皆有
臨清縣清青本通作臨淄者史之誤營之爲管以字
形相近傳寫而誤誌稱延昌四年徵爲征虜將軍大
中大夫嬰疾連歲以熙平二年卒史誤以卒之歲爲
授征虜之歲而云神龜中卒又史稱諡恭碑云諡貞
皆當以碑爲正碑云孤息伯茂史稱子子盛襲爵奉
朝請伯茂卽子盛字六朝時名與字史家往往隨意
互見如源彪之稱文宗鄭頤之稱子默皆是也

北齊鄭子尙墓誌銘跋

子尙及祖萬父乾皆於史無考魏書地形志東益州有梓潼郡睢州有臨潼郡而無潼郡誌稱潼郡安陽二郡太守蓋省一字其爲梓潼臨潼則不可攷矣誌云神武皇帝委以心腹乃擢爲親信齊本紀神武建牙陽曲有款軍門願厠左右者署爲親信則親信者猶今之親軍如尉興廢爲親信都督是也又云遷長樂王府開府中兵參軍按文宣第五子紹廉初封長樂天保十年改封隴西尉粲亦襲封長樂王紹廉未爲開府儀同粲位司徒得開府置官屬子尙當是尉

梁參軍本紀天保五年詔常山王演上黨王渙平原
王段韶於洛陽西南築伐惡城嚴城太平寰宇記嚴
城卽穀城在河南縣則伐惡城亦當不遠誌云武平
五年卒於伐惡城子尙蓋伐惡城戍主也武成本紀
云河清四年始將傳政使內參乘子尙乘驛送詔書
史不書姓內參乘與親信近或卽鄭子尙未可知也

北齊文宗殘墓志跋

誌僅存七十餘字蓋北齊源彪墓志也誌有云君諱
文宗缺又云祖爲西戎所逼以眾臣魏天子嘉缺又
云司徒隴西惠王父子恭司空文獻公按北齊書彪
傳云字文宗西平樂都人也父子恭魏中書監司空
文獻公與誌合彪蓋以字行故誌稱諱文宗卽齊書
本傳亦惟篇首著彪名文中遇稱彪名處皆以文宗
書之子恭魏書附其祖源賀傳賀本河西王禿髮
檀之子僞檀爲乞伏熾磐所滅賀自樂都來奔卒贈
侍中司徒謚惠懷有十七子子恭其一也誌云祖爲

西戎所逼以眾臣魏謂賀也祖字上所缺者必曾字
司徒隴西惠王蓋謂懷也文宗之祖彪後入周授儀
同大將軍入隋授莒州刺史遇疾去官開皇六年卒
年六十六見本傳則誌刻於隋時矣

北周賀毛公墓誌跋

右侯植墓誌高廣皆一尺一寸三分二十五行行二十一字石在陝西沈吉田方伯所贈也題周故開府賀毛公之墓誌案植周書北史皆有傳誌云字永顯建昌人其先侯姓漢司徒霸之後史云字仁幹上谷人燕散騎常侍龕之八世孫高祖恕魏北地郡守子孫因家於北地之三水父欣泰州刺史字貫與史不同案漢之上谷屬幽州魏改隸東燕州在今直隸宣化山西大同府境魏之建昌郡屬涼州漢之北地郡亦屬涼州魏改隸雍州又置西北地郡屬幽州皆在

今甘肅境漢三水縣屬涼州安定郡在今甘肅平涼府境興平中割安定扶風二郡地置新平郡三水乃隸新平晉廢魏神麴中復隸涇州置新平郡上谷與建昌不相涉愚謂史稱上谷乃龕之籍至恕始遷三水魏兩北地郡皆無三水縣新平與北地毗連故由北地而家三水魏建昌郡置于何時古爲何地地形志缺以誌葬于幽州三水縣及史傳家北地之三水兩語証之當于漢三水縣境爲近魏世州郡陷復改置不常卽幽州一州自皇興至太和五易其名可見而史所失載尤多書缺有間今旁推曲証而得其故

恕爲侯植高祖其人當在道武時其時三水當隸北地郡故曰家北地之三水至太武神麴中置涇州新平郡乃改隸新平故地形志以三水隸新平至永熙以後當又割三水等縣置建昌郡後又改建昌郡隸幽州而周仍之故誌稱建昌人又曰葬于幽州三水縣但地形志皆失載耳序所謂永熙綰籍無者不錄是也史箸其祖籍則曰上谷誌記其所居則曰建昌耳戮河橋之封豕摧沙苑之長蛇與傳稱從太祖破沙苑戰河橋合騁驍悍于洛陽與傳稱齊神武逼洛陽從孝武西遷合周書本紀大統二年太祖率眾聲

言還長安潛至小關縱兵擊竇泰斬之誌云平竇賊于小關者指此太祖率十二將東伐至弘農東魏高干李徽伯拒守命諸將冒雨攻之城潰斬徽伯虜其戰士八千漢弘農魏改恆農在今陝州境周虢仲封國誌云尅恆農于陝虢者指此大統十三年開府楊忠園柳仲禮長史馬岫于安陸十四年仲禮來援忠大破之斬仲禮馬岫以城降宋安陸郡屬司州今德安府隨州境周隨侯封國誌云效武績于隋陸指此蓋此三役植皆在行間傳不詳書可據此以補其缺其官右光祿大夫義州刺史驃騎大將軍開府儀同

三司司倉大夫肥城縣開國公賜姓賀正氏皆與史
合惟歷衛大將軍太子中舍人史亦失載河陽太守
史作清河贈光州刺史史作平州謚曰斌史作謚曰
節子定遠次定徽次定嵩次定國次定周次定貴史
惟載一子名定不云定遠皆當以碑正之卒保定四
年四月己丑朔與通鑑目錄合惟戊申爲二十日碑
云二十一日小誤竟作竟華作華捷作捷陸作陸號
作號戮作戮苑作苑長作長遐作遐證以北碑往往
多同疑皆太武帝所造新字非別體也

隋吳公李氏女尉富娘墓誌跋

此周尉遲侯兜之曾孫女尉遲綱之孫女尉遲安之女也侯兜尙周太祖姊昌樂大長公主生迴及綱見周書尉遲迴傳綱自有傳安附綱傳誌稱姓尉氏省遲字祖兜省侯字綱封吳國公安綱第三子以嫡嗣襲爵吳國公故曰吳公也綱官位與史合史稱安大象中官柱國不言仕隋爲左光祿大夫左武衛大將軍可以補其缺富娘年十八未嫁而死其母以歸李氏而合葬之此冥婚之見於唐之前者

隋蘇慈墓誌銘跋

誌云君諱慈字孝慈按蘇孝慈北史及隋書均有傳
父武周周兖州刺史據誌武周魏驃騎大將軍開府
儀同三司充雲二州刺史平遙郡開國公贈綬銀延
三州刺史則武周所歷官乃魏而非周隋書周字疑
傳寫之誤誌所敘官位多與史合惟魏初起家右侍
中士加曠野將軍周天和七年授左勳衛都上士建
德元年授夏官府都上士治中義都上士四年授車
騎大將軍儀同三司大都督領禁兵宣政元年授前
侍伯中大夫改右侍伯少司衛大象元年授司衛上

大夫及卒謚安公史皆不書仁壽三年三月癸卯朔
與通鑑目錄合

韋玄貞墓安鎮土府碣跋

此碑上有符篆六十四字計十一行行六字下正書
十九行行八字文有云西方七炁素天元始符命告
下西方无極世界土府神鄉諸靈官順天皇后先考
酆王王妃崔滅度五仙託質太陰云云按唐書韋后
傳中宗復位武三思諷羣臣上后號爲順天皇后贈
父玄貞上洛郡王外戚韋温傳帝幽廬陵玄貞流死
欽州妻崔爲蠻首甯承所殺帝復位遣使迎玄貞喪
討寧承斬其首祭崔柩柩至帝與后登長樂宮望而
哭贈酆王起陵曰榮先是此碣乃榮先陵中物文有

安鎮土府又有西方七炁云云則知東南北中亦有之共五石惟此僅存蓋道家厭勝術也周仁軌傳云睿宗夷玄貞墓民盜取寶玉略盡天寶九載復詔發掘長安尉薛榮先往視冢銘載葬日月與發冢日月正同而陵名與尉名合是玄貞墓在當時兩遭發掘而此石至今猶存不可謂非幸矣碑不著年月其刻石當在神龍景龍時也

肅府重刊淳化閣帖跋

肅府本閣帖十冊每卷未有淳化二年壬辰歲十一月六日奉聖旨摹勒上石篆字三行萬厯四十二年乙卯歲秋八月九日草莽臣溫如玉張應召奉肅藩令旨重摹上石隸書三行卷五後摹有至正十年張瑄等觀款後附肅恭王書卷九後附肅憲王書卷十後有萬厯乙卯張鳴鶴跋丙辰趙煥跋丁巳公鼐宋維登賈鴻洙戊午李起已未盛以弘徐元案黃和趙耒李從心庚申周鏘劉世綸天啟辛酉李夏崇禎戊寅王鐸天啟辛酉肅世子識鋁跋及不題年月周如

錦張孔教高鏘劉重慶柴以觀傳振商黃衮周懋相
湯巖燧張鍵跋細繹諸跋皆以肅府所藏太祖所賜
爲宋拓並無指爲淳化祖刻者以余觀之未必勝于
潘願兩刊耳潘願石已無存肅本自乾隆以後殘缺
甚多跋亦不全此本完善如新跋皆齊備又附趙書
千文當爲前明拓本勝于近拓多矣



雁影齋題跋序

湘鄉李年元前輩與余伯兄兩農壬辰同入詞館高才閎識博學工文官京曹時有名公卿間中經戊戌庚子之變心懷孤憤發為危言聳論以摩切當世以此不爲權貴所容幽憂感歎不永其年所著雁影齋詩鈔故人吳松隣爲之授梓以傳同年王君書衡數爲余言君有古書題跋數卷尚藏于家余暮年篤嗜丹鉛聞此私心嚮往久之日者君之子鑑介鄉人王伯淵寄君題跋遺稿四卷見眎言將排比付刊屬爲序而行之授君自序知所記者多爲巴陵方柳橋之


書憶光緒戊戌之秋余以新選庶常將乞假還蜀聞
碧琳瑯館後人方輦遺書入都度置於琉璃廠工藝
局中連楹充棟為卷逾數十萬排列以數十架計余
偶瀏覽及之未遑深討洎庚子後再入國門則書已
四散存者輸入國庠尚餘十數萬卷未嘗不慨然深
喟以方氏搜討之勤儲藏之富曾不數年飄風墜露
渺不可追求其甲乙簿錄附於丁陸之間而亦不復
存為足惜也今篇中所記視方氏所藏年祇存十一
於千百然於古刻秘鈔為世所希觀者固已標舉無
遺且於卷帙之異同版刻之行格收藏之印識咸條

分縷析詳著於編使後人一展卷之頃而宛若自見
其書如閃影於鏡中而圖紋於掌上是則方氏之藏
雖散而獲此一帙猶足為異時考索之資其為功於
典籍顧不鉅耶君為此編多隨手紀錄而成初非經
意之作然時或考訂其源流評量其得失亦復翔實
淹賅與邵亭蘇隣執風諸人差可齊轡並轡知近代
治目錄學者所宜知也顧余詳覽全編錄入宋刻凡
二十四種天刻凡三十三種第其中如儀禮圖古今
源流至論韓柳二集皆元刻也而誤以為宋本趙訪
春秋三種宋史稽古錄百川學海李文公集歐陽文

忠集存復齋集皆明刻也而誤以爲元本殆襲原書
之標題而未加以鑑別遂致此差失耳至編中各書
余先後獲見者如宋本白氏六帖爲董授經所得今
歸張石銘宋本東萊觀濶文今歸劉翰怡嚴鐵橋校
初學記今歸蔣孟蘋余曾臨有校本宋本甲申雜記
間見近錄二書經藏吳松隣繆藝風兩家其後竟歸
余齋斯皆踪述之可攷見者也若顧亭林之脩文備
史朱竹垞之百古叢書杭可菴之藝餘類纂皆號爲
秘籍孤本今竟流轉不知所歸微君在舉崖略並其
名亦湮滅無聞世有嗜古多聞之士曷徵訪以傳其

書庠不負君晨鈔腹寫之勤也歟乙亥嘉平祀竈日
江安傅增湘序

禮塔園寫本



雁影齋題跋序

巴陵方柳橋觀察官廣東四十年好書有奇癖聞人家善本必多方鉤致之不可得則展轉傳鈔期於必備光緒初元日本方一意變法視舊籍如土苴觀察則遣人走海外輒以賤價購之所謂佐伯文庫之書大都歸觀察故所得秘笈尤多訖於晚年最其所藏爲卷幾盈五十萬而京師上海諸書賈不遠數千里奔走其門者猶無虛日觀察屢權府事權釐金嶺海故膏腴聞天下所入頗不資乃盡耗於書及其下世則生計蕭然於是其文孫湘賓大令盡輦其書至京師余以辛卯鄉試與湘賓爲舊交又值戊戌八月余方持婦服姬人陳氏復相繼夭亡幽憂獨居庭樹哀蟬助余愁寂時余寓北半截胡同湘賓賃屋沙土園頗宏敞而無車馬之喧迺請予館其家爲定書目於是所謂五十萬卷者余皆得見之遇舊槧精鈔隨意記錄間加考証以備遺忘坐擁百城往往經

旬不出幾忘其身之在京師人海中也惟鄭叔進編修童子諒郎中蔡
皋門觀察方厚卿舍人李筠菴大令時時相過從暝寫晨鈔至廢眠食
自謂天下之至樂矣迨庚子夏五紅巾難作湘賓倉卒南歸書亦稍稍
爲人售去余所記蓋不及百種於方氏藏書不過九牛之一毛而已每
書皆記其行數字數藉以存古書面目且亦錢竹汀黃蕘圃莫子偲諸
公舊例或頗疑記印識太詳余曰此四庫總目例也總目於魏了翁尙
書要義記曠翁手識印山陰祁氏藏書印澹生堂經籍印東萊博議記
董文敏及朱竹垞印李士實世史積疑記文衡山及天籟閣印曾宏父
石刻鋪序記朱彝尊名字二印唐蕭茂挺文集記曹溶名字二印宋劉
一止茗溪集記曝書亭印元侯充中艮齋詩集記毛晉私印方回桐江
續集記玉蘭堂及季滄葦印集部存目內斜川集記虞山汲古閣毛子
晉圖書偽印簡明日錄元方濶叔淵遺稿亦記顧嗣立名印故余因仍

之且亦以考見聚散源流不爲無益也癸卯十一月以寫本示王書衡
同年書衡勸付排印一依舊稿不復分別部居時湘賓已死叔進子諒
皋門厚卿筠菴皆分散四方京師更大亂公私塗炭書籍散亡文武道
盡重以死生離合之感家國身世之憂棖觸前塵恍如夢寐遂徇書衡
之意略序緣起爲他日作洛陽伽藍記東京夢華錄者添一故事也自
惟廢學失時耳目寡淺大雅宏達殫見洽聞覽而陋之固其宜矣十一
日燈下湘鄉李希聖自序

雁影齋題跋卷第一

長樂鄭

孫錫西

請錫西

湘鄉李希聖亦元著

新雕添注白氏事類出經六帖三十卷

宋本

卷首有准慶歷二年三月初一日轉運司牒准禮部貢院牒准勅命指揮毀棄淫僞浮淺俚曲穢辭并近年及第進士一時程式文字不可行者除已追取印板當官毀棄外有小字六帖一部可以印行今於元印板後錄略看詳定條制照會施行者詳定官登仕郎試祕書省校書郎守杭州司法參軍潘說重詳定官宣德郎守祕書省著作佐郎監杭州裴卸斛斗錢帛綱運兼糧料院權書記廳公事馬元康蓋南宋重繙慶歷本也每版十二行行二十一字卷首有汪士鐘藏白文印考藝芸書舍宋元本書日子部內有此書又有茂苑周錫璣藏於漱六樓十字係墨書及香嚴漱六樓二朱文印又有汪振勳及

汝南仲子劉藏等印卷尾有梅原吳下汪三印又有袁廷檣借觀印
考王深寧玉海白孔六帖在宋末已合刊分爲百卷天祿琳瑯書目
有單本孔帖三十卷已訖爲希世之珍此係白帖單行本尤爲難得
吳任臣十國春秋蜀母昭裔傳請後主鏤板印九經又令門人句中
正孫逢吉書文選初學記白氏六帖刻板行之此本出於慶歷慶歷
本當出於五代猶可考見蜀本面目據儀顧堂題跋陸存齋亦有此
書傳維鱗明書書成於國初康熙乙亥其子發調刊本經籍志類書內亦有白氏六帖無卷
數傳志經籍皆明代藏書非明人自著最爲疎謬然爲目錄家必要
之書

宗鏡錄節要二卷

宋本

葉二十行行二十二字用蝴蝶裝卷首有汪士鐘印

白文 閔源真賞印

朱文考藝芸書舍宋元本書目釋家內有是書爲汪氏舊藏無疑又有

寶之印

文白

其李茶陵故物歟又有金匱蔡廷楨藏印

文朱

廷楨字伯卿

好收藏流傳舊槧有醉經軒印者余往往見之上卷首有宣和御寶

文白

又有烟客印

文朱

蓋曾入王太常家卷尾又有西河毛古愚印屢經

名家鑒藏紙墨古黝筆畫圓秀真宋槧之佳者是書四庫不錄乃宋

初僧延壽所集首題大宋吳越國慧日永明寺主智覺禪師乃錢氏

時僧也閩中樵陽比丘了一因延壽之書而節錄之故曰節要前有

左朝請郎尚書禮部員外郎護軍楊傑序述是書之成吳越忠懿王

寶之元豐中魏端獻王

神宗弟

始鏤版元祐初又重刊是書無刊刻年

月其爲元豐本元祐本則不可考然決爲北宋所刊故宣和時曾入

內府余於釋氏諸書粗知涉獵宋元舊刻間亦遇之然未有如此本

之精者也

宋季三朝政要

元本

每版十三行行二十二字卷首有五硯樓藏印文白蓋袁氏舊物也又

有粵人吳榮光印文白柳橋觀察官粵時所得吳氏舊藏不少此其一

也張孝達尙書督兩廣嘗從方氏假觀宋元槧本故卷首有無競居

士文白張之洞審定舊槧精鈔書籍記文朱萬物過眼即爲我有文朱等印

卷一下有廷檣之印袁氏又愷文皆朱六卷末有五硯樓袁氏收藏金

石圖書印文朱末附仁和趙氏跋云荷屋廉使得於閩中此書傳本極

少四庫著錄本闕清祐七年後五年事鈔本流傳魚魯之訛觸處皆

是此本完全無缺亦無訛字卷首題陳氏餘慶堂刊目錄末前一行

有皇慶壬子四字考皇慶壬子爲元仁宗元年蓋元刻也此書有金

山錢氏南海伍氏及學津討源本惜無暇校耳

通鑑紀事本末朱版

每半頁十一行行十九字卷首有萊斐軒藏書記文白汲古閣印文朱毛

氏珍藏

文白

又爲王鴻緒陳玉方胡蘓門所遞藏卷首有其印記又有

張之洞審定無競居士等印此板明初尙存南雍故印本流傳不少此本紙墨確係元印非明印也此書在南宋時卽有兩本初刻於嚴陵淳熙元年楊萬里出守臨漳過嚴陵爲序行之至寶祐時宗室趙與憲以嚴陵版字小且訛易爲大書重刊讎校亦精版藏與憲家至元延祐六年其孫趙明安售於宣城陳良弼此本楊趙二序之後有良弼序蓋宋版而元印者也

增修互注禮部韻略五卷

元本

卷一末有至正乙未仲夏新書堂重刊每半頁十一行卷首有張孝達尙書題跋二行及張之洞審定等印此書四庫著錄者係宋本云明代刊版訛舛頗多此本槧刻尙精可資校正考愛日精廬所藏亦元至正辛丑興慶堂刊本不知視此本何如其書聞尙在湘潭袁氏

他日當得見之

文選六十卷 宋本

每版九行行十五字字大如錢筆畫圓勁宋本中之精槧也卷首有

宋本二字隸書橢圓印

朱文

又有番禹俞守義藏印

朱文

年年歲歲樓珍

藏書印

朱文

會稽沈氏光烈字君度印

白文

此書歷經趙承旨文待詔鑒

藏故卷中有趙氏子昂印

朱文

松雪齋藏書印

朱文

停雲生印

白文

翰林待

詔印

朱文

目錄有張之洞審定無競居士等印其餘諸印不盡記書無

刻梓年月每卷後題校對人名有左從事郎贛州觀察推官左從政

郎贛州州學教授州學學諭齋長齋諭直學司書左迪功郎贛州司

戶參軍左迪功郎贛州石城縣尉左迪功郎新永州零陵縣主簿左

迪功郎新昭州平樂縣尉皆宋官制也推官教授等皆贛州官是贛

州刻本其零陵主簿平樂尉二人蓋贛州人新授官者也書中凡孝

宗以上諱皆缺筆光宗諱惇則不缺是孝宗時所刻也考尤延之淳熙辛丑刻本跋云贛上嘗刻李善注本往往裁節語句可恨此本亦贛上所刻前刻五臣注而無刪節誠善本也嘉慶中胡果泉重刻尤氏本時未見此本卷末有陳蘭甫跋云如典引今其如台而獨闕也尤氏本注云尙書曰夏罪其如台孔安國曰台我也汲古閣本亦然嘉應李繡子據此爲僞孔傳翻案有詩云諸儒不省太常移晚出羣將孔傳疑典引先存安國學中郎注裏幾人知此本尙書曰上有善曰二字非蔡中郎注也古本之可貴如此以上見東塾集此本自趙氏文氏以後展轉歸番禺侯君謨康由侯氏歸陳蘭甫沈君度從陳氏購之方氏又得自沈氏歷經名家鑒藏可寶也方氏所得文選舊本有十因名曰十文選齋然以此本爲冠

太平惠民和劑方十卷

宋本

此本得自日本故無收藏家印記亦無刊刻年月但題云建安雙璧
陳氏留耕書堂刊行蓋閩本也余嘗謂醫書最宜校讐一字之訛關
人性命虞山張氏據元本刻入學津討源渤海高氏刻入續知不足
齋叢書余以兩本對勘異同甚多惜無盧抱經顧千里其人耳此書
在宋時風行天下自朱丹溪局方發揮出其傳遂微然固與聖濟總
錄道光中揚州刻本及日本刻本均
二百卷四庫所收僅二十六卷同爲方書之淵海所宜家置一
編者也

分門集注杜工部詩集宋本

每版十一行行二十字不著編輯人名字考王琪序稱何君瑒丁君
修得原叔家藏及古今諸集聚於郡齋三日而後已殆即何丁二人
所編也分七十三門極爲繁碎日月門星河門雨雪門雲雷門四時
門節序門千秋節門晝夜門夢門山岳門江河門陂池門溪潭門都

邑門樓閣門登眺門亭榭門宮殿門宮詞門省宇門陵廟門居室門

分上鄰里門寄題門田圃門仙道門隱逸門釋老門寺觀門皇族門

世胄門宗族門外族門婚姻門園林門果實門池沼門舟楫門梁橋

門燕飲門紀行門分上述懷門分上疾病門懷古門古跡門時事門

分上邊塞門將帥門軍旅門文章門書畫門音樂門器用門食物門

投贈門簡寄門分上懷舊門尋訪門酬答門惠貺門送別門分上慶

賀門傷悼門鳥門獸門蟲門魚門花門草門竹門木門雜賦門所採

集注姓字自昌黎韓氏以後共百四十九人書爲汲古閣謙牧堂

牧堂爲揆叙藏書之所揆爲明珠子納蘭容若之弟藏書甚多所遞藏每卷前後有毛氏子晉印

謙牧堂藏書記文白又有孫佑宸印文白及孫佑宸前生經眼再來看印

朱又有廣圻審定印每卷前後皆有朱文又有萬氏徐氏等印不盡記紙墨既

佳槧印並妙宋本中之上品也

朱文公校昌黎先生文集四十卷外集十卷

宋本

每版十三行行二十三字卷首有崑山顧氏家藏印

朱文公每冊首皆有

又有

賜硯齋印

朱文每冊首皆有

考賜硯齋爲桐城龍汝言字子嘉之齋名所著

有賜硯齋集四卷

道光戊戌年刊

殆卽其人也序文上有江左周郎印

白文九

世卿族印

朱文

又有子京父印篆法甚劣則書賈所僞每冊後有莫氏

雲卿印

白文

其餘前後諸印不盡記考朱子韓文考異係仿經典釋文

之例別爲卷帙附於韓文至嘉定中福州王伯大以不便省覽始散入篇內寶慶三年刻於南劍州伯大又自加音釋附於每卷之後及坊賈重刻又將伯大音釋散入句下此本一卷後稱留耕王先生又音釋不在卷後則麻沙所刊之本也槧印雖不甚精然經顧莫諸名家鑒藏亦可貴也韓文自方氏舉正朱子考異以後以陳景雲之韓集點勘王元啟之讀韓記疑最爲善矣

增廣註釋音辨唐柳先生集四十三卷

宋本

每版十三行行二十三字墨色明朗殆印本之最先者無收藏家印記然紙色墨色確爲宋本無疑書賈好偽造收藏家印記而篆法甚劣致使古書舊槧爲其點污最爲可惡此本獨無之亦幸事也四庫著錄卽此本雖麻沙坊刊然勝於明刊本萬萬矣

唐人萬首絕句

宋本

此紹熙刊本也自四十五卷後皆闕前有洪文敏原序一首自宣諸復古殿以下亦闕書賈補綴增一云時二字卽接紹熙元年云云而彌縫無跡亦善於欺人矣查萬首絕句在宋時即有三本一本一百卷一本一百一卷者爲文敏所自刊半刻於會稽半刻於鄱陽一百一卷者爲汪綱守越時刊合鄱陽會稽本而併刻之者也

原本

五六言共二十五卷汪本則分出六言爲一卷故多一卷汪本明時有翻本曾入天祿琳琅

又有吳格重修之本

則僅會稽初刻之一半據文敏自題云越府所刻七言至二十六卷五言至二十卷此本正四十六卷則汪舍人修補越府所刻之一半印行之本也曹氏棟亭書目有萬首絕句下注四十卷殆不全之本也自嘉定辛亥至今幾千年在洪汪二本之間別爲一本爲從來談版本者所未見自明以來洪氏全本已不可見四庫著錄本僅九十一卷已佚其九卷矣明翻宋本僅七十一卷而訛謬百出余將一卷首篇杜詩略一讎校不知醉裏風吹盡知訛作如漫與九首與訛作興而此本不誤足見舊槧之可貴卷首有玉蘭堂印

朱文每冊皆有吳寬印

朱匏翁印

白文二印每冊皆有

歷經長洲文氏及吳文定所鑒藏雖不全之本

亦可寶也書用綿紙神采奕然殆宋本之初印者趙氏寒山堂刻本改易原本分卷之舊爲錢遵王所痛詆則又明人之故技也王漁洋池北偶談云韓致堯詩白玉堂東遙見後令人評泊畫楊妃李子田

云評泊者論貶人是非人也今作評駁者非近諸本或作斗薄或轉訛陡薄殊無意義萬首絕句本作評泊當猶近古漁洋所據蓋明翻汪本也

修文備史鈔本

題岷山顧寧人炎武彙輯所輯書曰皇明帝系圖無撰人名曰皇明

帝后紀畧盛元佐編曰皇明寶訓卷五宋濂等編曰穆皇登極儀下題

見世經堂集曰神宗步禱儀附謁陵曰獻寶卷四十袁秩撰明人列傳

自徐達起至徐禎卿止曰儲置餉增疏曰兵制志卷三史繼偕撰曰太

倉考刪曰太常紀刪卷四蕭彥撰下題念潛子刪輯曰謚紀考曰廠庫

須知何士晉撰曰九邊考長沙魏煥撰曰北邊世系考曰大同板升

考曰平播日錄曰平播碑曰東三邊列傳速把亥董狐狸元魯黑

罕長委長昂宜大鎮史二官車達雞黎鼓十寨諸恩

回夷播酋楊應龍集賦賴元爵藍一諸諸酋黎鼓十寨諸恩

獐 竊盜王張住 京營叛兵 王之佐 登虔劉堂良 草坪石
纂祿 浙江大營畔 兵馬文英 象山昌國營畔 兵何中列 叛兵

陸文緒傳胎子 叛兵王禮重承恩張瑣兒張勝豪 湖盜殷應采
崇明江陰諸盜 貴州安國亨安智奢效忠 土婦奢世統奢世

結 雲南鎮鎮著羅 思諸夷 緬甸 羅雄 曰可齋雜記彭時撰曰水
者繼榮必六 安南莫茂治以上列傳目

東日記曰守溪長語曰寓圃雜記曰損齋備忘錄 卷二 梅純撰曰清溪

暇筆曰瑯琊漫抄曰書齋瑣綴 卷八 尹直撰曰菽園雜記陸客撰曰堊

記 卷四 祝允明撰曰後鑒錄曰西征石城記曰撫安口口記曰興復哈

密記曰東征紀行記曰雲中紀變曰庚戌始末志王世貞撰曰防邊

紀事曰伏戎紀事曰撻國紀事曰靖夷紀事曰綏廣紀事曰平夷賦

曰平番始末曰平蠻錄曰炎傲紀聞曰安南奏議曰西南紀事 卷二 郭

應聘撰曰議處安南事宜曰史乘考誤共數十種前有趙收菴懷王

序言得自桐鄉金少權金氏得自汪氏古香樓桐鄉藏書家也有抄

本無刊本所抄各種間有分卷者而全書並無卷數全紹衣精於考

核流覽極博所爲亭林神道表詳載著述獨無此書自來序錄家亦未之及此趙氏之言也而趙氏前有一序以爲不出亭林謂七十五種中見於皇明紀錄彙編金聲玉振集凡三十餘種二書皆於萬歷中刊行亭林豈有不見之理啓禎間事無一字及之而水東日記守溪長語等書各已刻入本人之集寓圃雜記菽園雜記又散刻叢書中以爲決不出亭林之手序但稱洛不署姓俟考余謂此亭林隨手記錄之書欲以留備史料啟禎以後之事殆欲輯錄而未暇其中如兵衛太常太倉廠庫詳密瑣屑可考見一代制度九邊及西南諸夷內地畔兵諸傳皆爲明史諸書所不詳亦可見當時情事非亭林留心掌故決不能爲此核其體例與郡國利病書用意相同殆晚年自負國史之重隨手編輯未及成書而先生遽歿故止於嘉隆以前平定張穆譔亭林年譜於顧氏著述臚舉歲月搜采無遺亦無此書之名誠非常

之祕笈矣惟鈔手極劣譌舛甚多藏書者僅較書之厚薄率爾付裝遂使片段不分有牽連割裂之病好學如趙味辛何以不爲之校刊甚不可解海內好古之士儻能廣爲流布將已有傳本者備存其目不必再刊庶不負前賢之用心矣

甲申雜記

宋本

每版十行行十九字吳氏筠清館舊藏也墨光如漆蓋宋本之初印者第四條述阿李國事末言鍾傳坐冒賞貶遂復成其議復字下空格注御名以文義求之當是構字構乃高宗名此書無刊刻年月當是建炎紹興間刊本也敘述瑣屑頗多北宋遺聞其中如言曆日載幾龍治水而今所傳寶祐四年會天曆則無之足以考見宋時制度沿革不同惟喜談因果如唐程在長沙買几子其後竹脚中破內有刻字具述某年月日破以爲萬物皆有定數又述馬默貸沙門島流

人東嶽聖帝賜以男女蔡持正爲第四人過嶺宰相孫升感夢於前
歐陽大椿見字於壁如此之類頗爲荒怪無稽宜周益公之斥爲妄
也而李仁甫通鑑長編頗采之

揮塵錄

宋本

每版十二行行二十字卷首有粵人吳榮光印

白文

卷後有荷屋所得

古刻善本印

朱文

吳氏筠清館所藏書畫印

朱文

無刊刻年月其中當擡

頭之字皆空一格不別爲一行宋人刻書舊式多如此此書乃宋人
從王明清揮塵錄內摘出數十條託爲楊誠齋所撰四庫提要已駁
之左禹錫誤收入百川學海乙集盧抱經補宋史藝文志亦誤列之
小說家然其書則固宋本也其中言宋初承五代搶攘之後三館

宋以

昭文集賢史館爲三館

有書僅一萬二千卷目乾德以後加意搜羅獻書者優

與出身至眞宗咸平時書大備矣而八年榮王宮火延燔三館焚燬

殆徧此書之一厄也自此以後廣爲傳寫且置校勘校理之官嘉祐中獻書者每卷支絹一疋及五百卷者與文資可謂優矣訖於宣和天下異書盡登祕閣靖康之變悉付劫灰書之又一厄也方承平時士大夫家如南都戚氏歷陽沈氏廬山李氏九江陳氏鄱陽吳氏俱有藏書之名今皆散佚可見從古藏書無久而不散之理黃蘗圃平生舊槧亦及身而盡屬他人甚至絳雲文選費畢生之心力聚天下之菁華盡付一炬則又不如散在人間之爲愈也若明之李中麓且以藏書賈禍野獲編洪朝選撫山東開章邱李少卿先芳家富藏書與借觀不與因起大獄破滅其家李以悲恨死及洪歸閩後爲撫臣勞堪許其居家不法庾死獄中或謂有天道焉于東阿筆廢但記洪芳洲爲少司寇時逼死故都御史楊順以媚華亭不知有章邱李中麓事也洪與中武康山中白晝鬼哭何其癡乎

聞見近錄

宋本

每版十行行十九字亦筠清館舊藏也其中揚州后土廟一條中云

宋丞相構亭花側曰無雙構字空格注御名二字殆亦建炎紹興間刻本也其書皆述北宋遺聞故曰近錄蓋王定國爲王文正之孫本世家望族於朝章國典聞見甚切故敘述頗詳然亦有失實者如太祖召諸方鎮置酒大林中語其所謂十兄弟者可殺我而爲官家方鎮皆伏地不敢對此殆近於齊東野語已爲畢氏續通鑑考異所駁李心傳舊聞證誤舊聞證誤永樂大典輯本僅一百四十餘條經錢瑯編修從錢唐丁氏影寫宋殘本首二卷又得二十九條別爲補遺一卷刻之亦辨其張融建宅一條寇準服何首烏一條錢若水罷相一條大旱罷賈文元一條鄭天休諸公會李氏第一條馮當世爲樞密使一條然終不以一眚累其全書也困學紀聞云李微之舊聞證誤執政不坐奏事以王定國聞見錄爲證與王沂公筆錄不同李仁甫修長編未見定國書故事專用筆錄則宋人亦甚重其書矣

初學記二十卷

嚴鐵橋手校其本即萬歷丁亥徐守銘刻於寧壽堂者也卷首書後一篇用硃筆塗改數十字較刻本而盡於此下多數行蓋刻漫稿時所刪節也歐陽公集古錄跋尾流傳真跡往往與集本不符不足怪

也

四庫總目詞曲類樂府雅詞卷首有朱彝尊題詞手跡亦與集不符

此鐵橋用王蘭泉宋板大字本一

一對勘極爲精密用朱墨二筆塗乙處極不苟可見讀書之細而亦

見徐本之譌謬百出明人所刻之書往往如此宋吳明可不肯傳書

以爲校讎不善貽誤後人誠篤論也考陶岳五代史補楊行密以初

學記一部餽成汭其爲刻本寫本不可得而知

書有板本始於唐宋其時祇稱數字學小

書而已後唐長興三年始刻九經

今宋本已不可得見而黑口小字本及廉石居之

元板亦無從物色余所見嘉靖辛卯無錫安國本嘉靖甲午晉府刻

本楊鑑重翻晉府本萬歷丁酉陳大科本吳陵宮氏岱雲樓校補陳

大科本古香齋袖珍本皆多譌謬惟陳大科本稍善好古者若能以

此校本付雕庶不負嚴氏四十日之心力矣

全室集九卷

明釋宗泐撰

此書得自日本無刊刻年月蓋明初本也乃宗泐

字季

從子永祚所

編前有徐一夔序一首考靜志居詩話附錄解縉曰詩僧宗泐進所

精思刻苦以爲得意之作百餘篇上一覽不竟日盡和其韻則知泐

詩精華不過百餘首今此本殆數倍之以和御製詩爲一卷樂府爲

一卷餘則五七言古今體也分體不編年其詩亦頗有風骨見於集

中者如宋景濂張來儀輩皆負一代文名聲氣所通淵源有自宜其

詩之無蔬筍氣也視杼山白蓮禪月則不及然與鐔津文集

明支那本石

門文字禪

明支那本

抗行天壤間固無愧色也釋麟洲極推服之以爲一

字一寸珠一言一尺玉錢牧齋列朝詩傳謂虞文靖黃文獻張潞公

皆推重之非偶然也

春秋屬辭十五卷

元本

每版十三行行廿四字前有汴自序末題金居敬覆校倪尙誼校對
朱升校正蓋善本也惜頗多譌漫若以通志堂本趙吉士本一一對
勘則成善本矣

春秋左氏傳補注十卷

元本

每版十二行行二十四字印本視前較清朗趙氏於春秋主左氏又
參用公穀可謂全無家法宋以來經學大抵如此左氏本不傳春秋
漢人具有定論趙氏欲通春秋而求諸左氏可謂適楚而北其轅矣

春秋師說三卷

元本

每版十三行行字多少不定卷首有烏程蔣維基記印

朱文

咸豐庚申

以後收藏印

朱文

此爲趙氏述其師黃澤之說卷首題至正戊子八月

幾望門人新安趙汴敬題卷端蓋其時所刻也未附黃楚望行狀一

篇卽其所撰楚望本深於易兼通術數劉文成傳其學楊升菴丹鉛

錄載其從曾義山子得異書胡蘆石洞中恐不可信

按近世所傳燒餅歌皆以爲出

自文成恐亦如陶弘景之胡笳曲劉藏春之西江月同出於後人依託也王文祿名世學山載劉誠道少讀書寺中一異人出神爲僧所焚其人神返卽附基身顯明增前數倍及以金瓜夜叩宮門救明太祖之厄則王弼州史乘考譌已辨之矣陳建皇明通紀云上一日與友諒慶戰劉基在御舟忽躍起大呼上亦驚起回顧曰見基雙手揮之連聲呼曰難星過可更舟上悟如其言更之坐未半餉奮舟已爲敵砲擊碎矣則更爲齊東野人之談不足一哂也

說文繫傳

惠定宇批閱本細核之非惠氏手跡乃傳鈔之本也惠氏讀說文記

有刻本

借月山房本指海本半畝園本

此本考訂精核者皆見於記惟此本旁用硃

圈及三角圈標出以備考訂解口部孩字引尙書微子呼紂爲孩子

僞古文作刻字

小徐易下曰祕書謂下爲月字日月爲易本用許君賊下祕

書贖從賊之例不知所指何書惠氏必以參同契當之解龍字爲後

世肉飛仙如此之類則不免於好奇炫博矣解克字爲仁以爲己任可也必詆王肅劉炫以克爲勝以己爲私爲背於理此不過陰攻朱子又不出其名未免門戶之見解假爲至謂真假之說始於王莽劉歆說書以古文嘉禾假王蒞政爲假僞字遂有假皇帝之名至詆許氏非眞之說本於劉氏則豈所謂蟲生於木還食其木者歟

蒲菴集六卷

明釋來復撰

書無刊刻年月蓋明初本也來復字見心豐城人主四明之定水寺詩分體不編年乃其門人曇鋳法住所編前有歐陽立宋濂二序其詩頗有風格在明初與宗泐齊名而詩則過之朱彝尊靜志居詩話詆其癡肥謂不及全室之戍削非篤論也所與往還多王公貴人黃諤卿顧玉山危太樸丁鶴年又皆一時風雅之士早年嘗親炙虞伯生歐陽元功故學有淵源在僧詩中自宋以後殆無其匹錢牧齋列

朝詩傳云蒲菴詩文洪武十二年其徒曇銓釐爲十卷而元季之作見賞於道園諸公者此集皆不載則錢氏所見已非其全今此本有詩無文千頃堂書目明史藝文志皆著於錄而四庫不收陸心源所藏亦係鈔本蓋難得之祕笈也集中讀繹津集詩云韓歐外侮見長城以入主出奴之見謂韓歐之闢佛爲外侮契嵩之護法爲長城可爲一笑考御選明詩姓名爵里及明詩綜來復所著尙有澹游集鐵琴銅劍樓書目有澹游集係舊鈔本集中皆當時名卿大夫往來投贈詩篇並寺中碑銘序記其詩則顧俠君元詩選所不錄殆未見其書也

虛堂習聽錄

元本

前有大德改元冬閏十二月立春前二日中山傅夢徵序書無卷數但分上中下卷首題林老人評唱丹霞淳禪師頌古書堂習聽錄亦

元槧中之佳者

新編張仲景註解傷寒百證歌五卷

元本

每版八行目錄九行行十七字卷首有安樂堂印怡親王府舊藏也
又有張之洞審定及壺公等印紙墨精絕元槧中之初印也此書爲
宋學士許叔微撰按直齋書錄解題載叔微所著有類證普濟本事
方十卷傷寒歌三卷尙有傷寒治法八十一篇仲景脈法三十一圖
傷寒論二卷辨類五卷皆云未見四庫提要祇載類證普濟本事方
十卷並云傷寒歌不傳不特四庫未收即宋時亦稀有之本惟錢氏
書目有之其後絳雲一炬人間孤本盡付六丁此冊前後無序跋刊
刻年月無考各家書目所載均係三卷朱國禎湧幢小品亦云擬傷
寒歌三卷此本則五卷其爲分卷不同或係數目字傳寫之誤均不
可知然實爲非常之祕笈也方太守有手跋在卷首甚致鄭重珍襲

之意此書劉氏刻入述古叢鈔陸氏刻入十萬卷樓叢書惜未能一校勘也其傷寒九十論仁和胡氏用愛日精廬影本印行

歷代名臣奏議三百五十卷

明永樂本

書成於永樂丙申十二月刷印僅數百本頒諸學宮而藏版禁中故傳本極少以張天如之博覽自言生長三十年未嘗一見最後乃得太原藏本是此書在明末已稀如星鳳況今日乎今通行本即張天如刪節重刊之本也此係足本惟當時乃奉勅編撰之書故古今奏議幾於搜采無遺何以卷首無序亦無監纂編纂官職名殊不可解考鄭端簡曉今言知是時西楊士奇在南京佐太子監國正危疑之際沈德符野獲編士奇之誌贊善梁潛墓也云永樂十五年車駕狩北京上有疾兩京隔數千里支庶萌異志者內結權倖飾詐爲間一二讒人助於外會有陳千戶事連梁潛遂死非命十六年九月十七也所謂明異志者蓋指趙王高燾權倖者內臣黃儼江保也鄭所指此蓋此書本以璽書諭太子令翰林儒臣編撰故也

雁影齋題跋卷第一

乙亥秋日
男鑑恭校

雁影齋題跋卷第二

湘鄉李希聖亦元著

曝書亭輯叢書

鈔本

卷首有朱十葵尊錫鬯印

朱文

蓋竹垞稿本也有南皮張尙書審定諸

印所輯之書爲桑悅思立庸言一卷王禕華川卮辭一卷陳獻章白

沙語要一卷岳正類博雜言一卷黎文黎子雜釋一卷陸深儼山纂

錄一卷王鴻儒凝齋筆語一卷鄭善夫經世要談一卷何塘陰陽管

見一卷王守仁傳習則言一卷鄭梓輯郁離子微一卷徐泰詩談一

卷王文祿文脈三卷王禕青巖叢錄一卷馮可賓輯空同子纂一卷

崔銑后渠庸書一卷方孝孺侯城雜識一卷黃省曾擬詩外傳一卷

吳風錄一卷皇甫庸近峯記略一卷黃省曾客問一卷黃潤玉海涵

萬象錄一卷共二十二種皆從學海類編名世學山二書中錄出其

編次之先後亦不可解殆欲廣續未底於成而遂中止書中用硃筆校過頗爲精審書無傳本藏書家亦均未著錄其集中跋餒寇紀略云余鈔入百六叢書歸田之後爲友人借失後十八年復從吳興書賈購得今觀此本殆即百六叢書之餘也而世亦無傳蓋竹垞著述散佚者當不少矣如瀛洲道古錄張鑑秀水計氏澤存樓藏書記言道古錄稿本尙在而盧抱經館閣續錄跋言未見風庭掃葉錄吉金貞石志吉金貞石志李光暎觀妙齋金石文考略引一條似已有或書今未見傳本亦均無傳錢竹汀詩云蠶尾山房放鶴洲靜志居詩話城南放鶴洲南渡初禮部郎中朱敦儒營之以爲墅洲名其所題雖不見地志觀樵歌一編多在吾鄉所作此說近是竹垞放鶴洲取此偶然隻字亦千秋蓋不盡可憑也

活人心二卷元本

無謬人名字卷首題玄洲道人涵虛子編又自稱臞仙前有序文一首即其自撰方氏書目誤以爲宋本錢謙益列朝詩集小傳載寧獻

王權所著書有活人心二卷獻王爲太祖十六子博學好古脫節篤
信冲舉自號耀仙其書上卷言服食導引之法而歸本於寡慾清心
其源蓋出於道家而兼神仙家下卷列玉笈二十六方及加減靈祕
十八方多出諸方書之外者此書得自東瀛亦祕笈也

明高儒百川書志有此書

又有腰仙神奇祕譜三卷腰仙文譜八卷腰仙詩譜一卷詩
格一卷太和正音譜十二卷詞林須知四卷西江詩法一卷

太平寰宇記鈔本

乾隆壬辰孔荭谷在京師太僕寺街壽雲簪借周書昌本抄校書昌

即周永年輯貸園叢書者也

永年在四庫館爲纂修官集部一門提要多出永年與翁方綱之手與荭

谷爲同年周本即從曝書亭本過錄朱本乃合濟南王氏岷山徐氏

本合鈔者也荭谷此本雖展轉傳鈔而始終無懈筆又經周夢棠校

過自言正錯簡十餘頁補脫文三十餘行改訛字萬餘蓋精鈔而兼

精校之本也此書有江西兩刻本萬氏本多擅改金陵書局據樂氏

祠本重刊亦多訛字此係舊鈔精校之本因此可貴至其闕卷則宜都楊守敬已據東瀛本補六卷尙闕二卷有半則此本亦同無從再覓矣按樂氏此書所敘州縣沿革大概本之元和郡縣志而以舊唐書地理志益之其山川事蹟雜採羣書意在務博往往一卷之中前後重複一人之事彼此抵牾不獨如竹垞所云不合正史已也然於龐雜之中亦有網羅之益如淮南山南諸道可采補元和志闕卷惟後附外域記二十九卷全引通典間有增益亦不出舊唐書外夷列傳此則附贅懸疣竟可直從刪汰矣四庫提要及錢竹汀養新錄皆盛推之殆未及詳考耳

大唐類要一百六十卷

鈔本

考讀書敏求記云今行北堂書鈔爲吾鄉陳抱中所刻攙亂增改無從訂正聞嘉禾藏書家有原書蒐訪十餘年而始得所謂嘉禾藏書

家即指竹垞也曝書亭集跋大唐類要云書賈以此求售反覆觀之
卽北堂書鈔也愛日精廬藏書志跋北堂書鈔云此係永興原本分
甲乙丙丁戊己庚辛壬癸十冊未經常熟陳禹謨增刪竄亂者是書
爲四庫所未見合浦之珠豐城之劍不足比其珍貴也鐵橋漫稿跋
云康熙中朱錫鬯得大唐類要有跋見曝書亭集季滄葦得古唐類
範見延令書目嘉慶初古唐類範爲吳縣黃蕘圃所得散片兩包未
曾裝冊有秀水朱氏及季滄葦印每卷古唐類範四字俱挖補蓋類
範卽類要類要卽書鈔原本也莫友芝云同治丁卯冬來蘇門獲胡
氏琳瑯祕室明鈔本書鈔憶郁氏宜稼堂書目有大唐類要欲借一
校適丁雨生方伯藏書有此乃顧湘舟藝海樓鈔本不知所出未知
於郁氏本何如略校胡本數頁其舛錯甚於胡本而足以補正者亦
自不乏方氏此本卽從持靜齋借鈔莫子偁所謂藝海樓本者也張

金吾所藏末題明嘉靖丙午六月十二日五川居士在萬卷樓記蓋

從楊夢羽藏本傳錄者今不知流落何地

張氏藏書多歸湘潭袁氏今亦散佚矣

士禮

居鈔本今歸振綺堂胡氏寫本爲莫子偲賺去郝氏本則兵燹後無從物色矣嚴鐵橋校刻本僅五十五卷近歲有南海孔氏刻本而虞氏原書始盛行於世孔氏本校勘頗精惟不當改易行款聞仁和勞季言有校本未知尙在否書此以俟世之留心古籍者

記纂淵海二百卷

考四庫著錄此書僅一百卷乃明萬歷己卯大名知府王嘉賓刊並有刪改非潘氏原本也焦弱侯國史經籍志及內閣書目卷數相同

葉氏菴竹堂書目

葉氏原本非伍氏所刻之僞本

不記卷數陸氏十萬卷樓所藏亦

一百卷惟高儒百川書志黃氏千頃堂書目范氏天一閣書目季滄

葦書日本皆一百九十五卷

天一閣係鈔本

陳徵芝帶經堂書日本一百九

十五卷從范氏本傳鈔虛抱經補宋史藝文志亦作一百九十五卷

而云今本一百卷則亦未見其書此本爲卷二百多於四庫所藏者

一倍較范氏鈔本亦多五卷蓋非常之祕笈也每版七行行雙行十三

字惟十三卷起至十五卷夾縫上下題弘治歲在昭陽大淵獻會通

館活字銅板印二十八卷一百五頁三十五卷二頁七八頁三十七

卷五頁三十八卷一頁一蓋明時所補也竹汀日記鈔有容齋五筆弘治

三四頁四十卷一頁余以方氏所藏百卷本對校之百卷本第一卷爲

混元部五行部此本則以論議部居首知四庫本爲王嘉賓所移改

刪節眞所謂刊刻之功不贖其竄亂之罪者矣考浙江采進遺書總

錄范氏藏本實經進呈當時館臣倉猝成書未及詳核故著王刊本

而遺此本遺書總錄謂天一閣本書尾有泰定乙丑圓沙書院刊行

而此本無之核其紙墨當是宋本而會通館所補之版殆即據泰定

本也惟天一閣書目載潘自牧嘉定己巳自序云凡爲部二十有二爲門一千二百四十有六合二百三十六卷總八十萬言較此本又多三十六卷此本無潘氏自序又無目錄僅二十一部蓋卽潘氏原本書賈嫌其不全故並去之然實爲海內孤本未可以其不全而輕之也四庫提要及天一閣書目均作潘自牧誤考金華志作潘景憲字叔度而提要不引豈未嘗深考耶

樓攻媿春秋繁露跋云聞姦女潘同年叔度景憲多收異書卽

其人也

此本分二十一部爲論議部性行部識見部人倫部人道部人情部人事部人已部敘述部接物部問學部言語部政事部名譽部著述部生理部喪紀部兵戎部釋部仙道部閭儀部

明本分混元部五行部天文部歲時部節序部測候部律曆部祥瑞部災異部地理部居處部郡縣部職官部仕宦部科舉部學校部人

倫部人道部性行部識見部論議部問學部言語部政事部名譽部
物理部人已部接物部敘述部人事部人情部著述部祭祀部禮儀
部樂部喪紀部兵戎部閭儀部字學部文卷部襟懷部民業部釋部
仙道部技術部博奕部雜戲部飲食部香藥部果食部花卉部草部
木部竹部禽部獸部水族部蟲豸部共五十八部

鈞磯文集十卷

鈔本

唐徐寅撰

全唐詩作徐發

四庫全書錄徐正字詩賦二卷賦一卷計八首各

體詩一卷計三百六十八首阮氏擘經室外集

大興傳以禮重編名擘經室經進書錄

錄鈞磯文集五卷凡賦五十首此本前五卷每卷賦十首惟第五卷

星賦漢武求仙賦伍員知姑蘇臺有游鹿賦有目無文計闕三首不

知阮氏本何如第六卷爲長律八首五律二十一首七絕二十八首

第七卷七律五十二首第八卷七律五十二首第九卷七律五十二

首第十卷七律五十二首共二百六十五首然提要所舉五言如白
髮隨梳少青山入夢多歲計懸僧債科名負國恩七言如豐年甲子
春無雨良夜庚申夏足眠聽魅聲中雙闕雨牡丹花畔六街塵月明
南浦夢初斷花落洞庭人未歸爭如澗底凌霜節不受秦王號此官
張均兄弟皆何在却是楊妃死報君皆見於卷中

鄭方坤嘉鄉全閩詩話所引閩書及

劉克莊后村集后村題跋朱國禎湧幢小品論
寅諸詩爲全唐詩所有者此本亦一一皆在

其餘諸詩亦盡從全

唐詩抄出十國春秋云寅所著有探龍集一卷雅道機要並詩八卷
亦曰鈞磯集又有賦五卷蓋久散佚矣此本不知何人分析卷第而
藏書家珍爲祕笈展轉傳鈔皆不加深考者也

說文解字補義十二卷

明本

此書昭文張金吾藏有元至正本錢塘何夢華錄副阮氏經進於朝
亦影寫本也考莫友芝宋元舊本書經眼錄張氏本後歸郁氏宜稼

堂邵氏書多歸方氏

邵氏書至精者爲丁禹生中丞豪奪餘以萬金售之陸存齋存齋挑其重本由上海書賈吳申

甫歸方氏

獨無是書此本爲永樂十八年刻本前有至正乙未包希魯自

序後有包氏嗣孫產孝及石簾序按包氏此書焦弱侯國史經籍志

傳是樓書目千頃堂書目錢竹汀補元史藝文志盧抱經補遼金元

藝文志

金門詔補三史藝文志未錄

皆著於錄其補義大抵如王介甫之字說鄭

漁仲之六書略多望文生義嚮壁虛造之談故阮氏亦以議論多宋

學少之而張昭文藏書志獨稱其精核考王西莊蛾術編詆包氏解

母字云女當從一一則其德不爽故女加一爲母以爲膚淺而杜撰

而張金吾亦引包氏此條獨以爲有義可通不免阿其所好明之趙

凡夫於此書亦痛加詆斥然趙氏所著說文長箋爲顧亭林日知錄

所指摘甚至漢唐不辨笑柄甚多則不足以詆包氏矣

日知錄尚摘長箋引虎兕

出於柳句誤稱孟子至謂其未讀論語四庫提要滄浪詩話條內頗爲之呼冤

大易粹言十卷

宋本

每半葉十行行二十字卷首有大興朱氏竹君藏書之印

朱潤州笱

重光鑒定印

朱文

按重光字子宣自號江上外史又有張之洞審定舊

槧精鈔書籍記

朱文

壺公

白文

等印前有嘉定癸酉五月張嗣古序云此

書歲久板漫滅不可讀因念刊書之難復爲之修改七百三十有六

板凡二十六萬一千五百九十四字此本紙墨甚精即修改時初印

之本也首冊尾有光緒十三年九月南皮張之洞跋推爲方氏書庫

宋本第一按此書宋史藝文志作曾種撰四庫提要據張嗣古序文

定爲方聞一撰而天祿琳琅書目以聞一列名校勘與作跋之程九

萬李祐之一例謂不必遠改藝文志近駁經義考余謂曾獻之此書

不過采輯宋人成說似無須假手於人方氏或與有編輯之勞亦事

所常有四庫提要必欲改題方名殊爲過矣

歐陽文忠公集 不分卷

明子承祖撰承祖字孟武揚州人據武之望序稱其膺中祕之命不知所歷何官也四庫總目無其書明史藝文志千頃堂書目均不著錄錢牧齋列朝詩集朱竹垞明詩綜皆不選其詩集中姓名亦無見於史傳者然其詩承七子之餘波亦頗有風格五言如銀燭燒寒短金尊入夜傾山閣浮鰲背江帆度酒杯七言如久無朱鯉傳消息漫有青尊對薜蘿莫上龍堆望鄉國胡笳一曲淚沾巾卽集中佼佼矣陳松珊侍御撰明詩紀事搜羅明人別集最多亦不知承祖爲何人也

東萊集註類編觀瀾文七十卷

宋本

每半葉十一行行十九字此書本林之奇少穎所編分甲乙丙三集甲乙集各二十五卷丙集二十卷所選詩文自屈原以下至宋歐陽

修司馬光蘇軾秦觀諸人之作皆與焉稱名稱字無一定體例即以
王安石一人而論或稱荊公或稱介甫亦前後互異甲集以賦爲首
詩歌次之書頌碑銘論記諸體又次之乙集則論又在詩前丙集有
各體而無詩其字句與各家集本亦多異同文亦駢散兼收如甲集
既選韓退之平淮西碑丙集又錄段文昌作可謂蘭艾同登矣呂伯
恭本受學於少穎故爲之注集中所選多人人傳誦之文故呂注錄
前人成說爲多亦有不注一字者朱子謂伯恭好用心於駁雜文字
豈此之類乎阮氏外集乙集僅五卷又無丙集此本視宋史藝文志
亦多七卷乃秘笈也蓋得自日本方氏影寫重刊可謂好古矣

勉齋先生黃文肅公文集三十五卷

宋本

每半葉十行行十八字梁蕉林舊藏也紙墨皆佳惜板頗有澀漫按
勉齋集本四十卷此本止三十五卷殆不全之本書賈割去其闕卷

目錄耳勉齋本講學家詩文均非所長甚至婚書

宋人婚書多入集注大本刻豫章先

主遺文亦有之青詞亦濫登卷內然其精要則固布帛菽粟之言也

漢書宋本

每半葉十行行十九字卷首有言壽堂圖書及蔡夢溪諸印又有紫
珊印紫珊爲徐渭仁字蓋春暉堂物也以紙墨觀之的爲宋刻然訛
字頗多如目錄中魏豹作耦陜樊噲之噲訛作會中山王勝之勝訛
作膠兩龔之兩訛作兩宣元六王之王訛作年第一卷注二千石有
予告有賜告有賜二字倒章邯已破項梁破訛作故青州俗呼無子
遺爲無照類呼訛作州顏注吸音翕訛作關漢有天下太半半訛作
平故父有天下句脫父字郭蒙與齊將擊脫將字入定代地代訛作
大其餘尙不勝枚舉其中蓋有補板殆書賈所譜三朝板者耶

題跋舉訛

字用四庫提要詞曲類柳永樂章集例

後漢書

紙墨行欵與前書同蓋一時印行之本也卷首印記與前亦同訛字觸目皆是目錄鄧禹子訓孫鷺脫鷺字第一卷太公金匱之金訛作日左傳之左訛作右弘農七郡之郡訛作司日月告凶之凶訛作內注十三誤也之誤訛作謨第二卷更謂成卒之成訛作成今選舉不實之今訛作令註不以政事爲務之務訛作防詰諸軍營之詰訛作諸其餘未及細勘世有好思誤書者當以此爲枕中鴻寶矣惟此本

目錄帝后紀一十卷第一卷第十卷分上下汲古閣本亦同

抱經堂文集跋

吳槎客漢書云汲古所梓漢書當是據北宋本

今世所翻之汲古本則作一十二卷矣

局本韓江

書局本

第一卷上下二字均在皇帝字下今翻本亦已更動目錄後

有光武起後漢乙酉歲改建武元年傳及十二帝至獻帝建安二十五年庚申凡一百九十五年十二帝后紀一十二卷志三十卷八十

列傳八十八卷六行汲古本同今翻本亦無之矣兩漢書以汪文盛
本爲最湘潭袁氏有劉好問漢書爲海內孤本袁漱六最所矜異不
知尙在否至袁氏所贈曾文正之漢書莫子偲定爲宋末元初本者
余曾從曾重伯處見之其中鈔補頗多實係元本也黃蕘圃景祐本
見於百宋一廬賦者尙在聊城楊氏他日或得見之吳玉搢金石存
曹全碑跋云陽曲傅山先生云謝承後漢書余家有之明永樂間揚
州刊本初邵陽曹全碑出曾從謝書考證多所裨益大勝范書比寇
亂亡失矣今碑中如攻西域羅黨禍及戊部司馬之類皆與范書不
合安得謝書一印証之永樂去今不過五百年世間容有其書附志
於此以待留心古籍者物色之

仁和孫志祖顧谷補輯謝承後漢書
五卷尙未刊行見鄭文焯國朝著述

未刊
書目

證道歌元本

歌爲永嘉眞覺大師所撰而宏德禪師爲之註頌前有至元六年釋大訢序即其時所刻也考祖庭事苑永嘉大師諱玄覺俗姓戴氏求證於曹溪六祖所作證道歌詠播天下卽此書也按永嘉卒於先天二年十月十七日僅後六祖兩月睿宗命謚無相大師淳化中詔修龕塔云云據朱時恩佛祖綱目作開元二年十月端坐而滅與事苑所記不同未知孰是考葛立方韻語陽秋云余曾祖通議自號草堂逸老參佛日契嵩遂悟眞諦有註證道歌行於世則此書在北宋時已盛行矣

古今源流至論別集十卷

宋本

每半葉十三行行二十七字卷首題新刊箋註決科古今源流至論其書蓋備科場之用首篇卽論朱子綱目褒貶之意繼論周子通書朱子四書而以誠字復字別爲一篇其於洛閩緒言抄摘亦頗得要

領然以太極圖非濂溪作潛虛非溫公作亦頗示異同

朱子亦謂潛虛非司馬溫

公全書好事者偽成之云見方回桐江集

此本紙墨甚古然譌字頗多如傳堯俞至譌爲

渝傳堯蓋當時麻沙坊本也

古今源流至論前集十卷後集十卷別集十卷續集十卷

宋本

每半葉十三行行二十八字卷首有范鍇王翬張廷濟蔣維基諸人印紙墨頗古雅在麻沙坊本中尙不甚惡劣方氏所藏尙有萬歷庚寅宗文堂本則不及此遠矣

金陵新志十五卷

元本

書成於至大時而刊於至正四年前有索元岱序據首卷文移分派溧陽州學刊五卷溧水州學明道書院各刊三卷本路儒學刊二卷共用中統鈔壹百肆拾叁定貳拾玖兩捌錢玖分九厘陸文裕金臺紀聞曰元時州縣皆有學田所入謂之學租以供師生廩餼餘則刻

書工大者合數處爲之故讎校刻畫頗有精者此本則槧印俱劣而

圖尤甚

其板後歸南監殆明印也

蓋是時元運已衰江淮之間盜賊蠭起故刊書

事極草草養新錄平津館鑒藏及廉石居藏書所記與此本同

儀禮圖十七卷儀禮旁通圖一卷

宋本

每半葉十行行二十字字畫遒勁略帶隸意墨光爛然宋槧中之上品也每葉夾縫中皆詳列某人校某人重校某人刊幾於每葉異人無一人校刊至三葉者可以知其精矣總校者爲閩何據平津鑒藏記當爲南宋閩中所刻天祿琳琅及拜經樓本即從此本出卷首有吳城敦復二朱文印按楊氏此書全錄儀禮十七篇及注疏宋諸儒之說而附圖以明之故爲十七卷末附旁通圖則大半皆旁行斜上之表也其書頗便於初學自張皋文儀禮圖出其考訂精確處雖非楊氏所及亦未能遽廢之也信齋本朱子門人引朱子語必稱朱先

生用許叔重說文稱賈侍中之例

白虎通德論十卷

元本

據周廣業云白虎通德論本二書原題如是姑仍之

每半葉十行行十六字前有大德九年四月朔日張楷及望日嚴度序即其時所刊也據盧抱經云白虎通以吳槎客小字宋本爲最善大德本次之其佳處往往與小字本合視明代傳鑄吳琯何允中程榮胡文煥本勝處實多此本三正作三政三綱六紀分作二條皆與盧氏所言脗合

按王鳴盛尚書後案據訛本白虎通引書無逸篇曰厥兆天子爵爲書無逸篇之佚文謂其家所藏宋本

白虎通如是考此本但作書逸篇無字則王光祿所據蓋明本也宋翔鳳序藏琴銅劍樓書目亦謂宋板大字小字二本及元大德本均作書逸篇可見此本之善矣據王西莊蛾術編白虎通義一條言其所藏者爲元大德九年東平張楷刻

祖庭事苑八卷

宋本

每半葉八行行十七字前有大觀二年法英序後有紹興甲戌中秋比丘師鑒及紫雲二跋其書爲睦菴善卿所編錄雲門雪竇懷禪師

池陽法眼語而大書分注僅便於釘釘詞章之用非彼教中持誦之書也

理學類編八卷

元本

每半葉十四行行二十二字前有臨川吳當

字伯尚

序卷尾助刊人姓

名頗多不詳錄是書爲臨川張九韶美和所輯前三卷均論天文四卷論地理五卷論鬼神六卷論人物七卷論性命八卷論異端以周子二程子張子邵子朱子六先生之言爲主而本之六經論語孟子參以諸儒辨論亦頗有體要其中所引之書今亦有未見傳本者一鱗片甲藉是以傳可見其采輯之廣矣

存復齋集十卷

元本

每半葉十一行行二十十字前有至正九年秋閏七月俞焯序乃其曾孫夏所編而項璉爲之校正卷首有孝友堂印卷尾有睢陽世家印

即朱氏家藏本也朱澤民本以畫名詩非其所長然當時如趙孟頫
虞集黃潛康里巖巖鄧文原周伯琦馮子振皆一代勝流莫不互相
推重豈因其畫遂並重其詩歟楊仲弘送朱澤民之京師詩云君有
長材希屈賈好將詞賦重當時是仲弘亦甚推服之楊詩見傳習元風雅元風雅有
二一爲四庫著錄本一爲阮氏經進本均未刊刻余所見皆然余所知不足齋鈔本顧俠君元詩選未見此書知其流傳甚少矣見朱氏題畫詩爲此本所無者尙不少蓋出其後人所搜輯勢不能
一無所遺也

宋諸臣奏議百五十卷

宋本

每半葉十一行行二十三字前有淳祐庚戌趙希澗史季溫二序此
本乃忠定之孫必愿官閩時梓於學宮季溫之父史容字慈室以忠定
之客嘗與編輯之役故季溫捐金助刻是書而朱貔孫爲之監梓忠
定是書編輯於閩而奏進於蜀當時即已刊行自淳熙至淳祐六十

年間蜀板已毀此本乃閩中所刊王漁洋居易錄曾見溫陵黃氏所

藏宋刻本當與此本同據忠定劄子本名名臣奏議而陳彭年丁謂

夏竦陳升之李清臣邢恕秦檜諸人之作皆與焉因學紀聞云文鑑

猶楚詞後語之取息夫朱子亦議其將王荊公議廟制文字編作細

注爲不能決擇是非惟篇後附奏進年月其例最善後有作者尙當

效之四庫提要評朱子名臣言行錄取呂惠卿實係紀文達之誤劉

見文獻通考言行錄並無呂吉甫也魏默深正紀氏之誤而不及此

一條至魏氏証楊升菴杜撰朱子語類大顛書乃昌黎死案則語類

韓非子二十卷明本

前後無序跋刊刻年月無考惟第四册首行下有虧四二字殊不可

解考士禮居藏書題跋記云去年在坊間購得明刻韓非子取所校

張本核之多合固知其爲善本也然究未知其本之何自出爰假貞

節堂袁氏所藏道藏本手校一過見卷中有同卷字又有虧四記也

乃知亦自道藏本出此本與黃堯圃所藏本同蓋明重刻道藏本號

按道藏以千字文記冊數此書四冊當自虧一至四今惟存虧四二

字矣

宋孫鳳云韓非子二柄篇易牙蒸其首子而進之証以墨子及漢書元后傳則首子爲是宋板韓非子作子首非是此本亦作

子首吳嘉刻影宋韓非子作首子

韻府羣玉二十卷

元本

每半葉十行前有滕賓序

字玉霄通虛子論曲謂滕玉霄如碧漢閒雲即其人也

及至大庚戌

臘月姚雲序目錄後有長方墨印元統甲戌春梅溪書院刊十字元

統爲順帝紀元之號甲戌則元統二年也孫祠書目

嘉慶庚午刻本書目答問以爲

未刊誤矣

有明十行本不知卽此本否方氏又有明萬歷十年趙用賢本

明刻迂評本日本弘化重刊顧澗賓所校宋乾道本據萬歷時秣陵

王孟起刻本有沔陽陳文燭序言舊梓本歲久板漶漫蓋指此本也

陳序言葉廷珪海錄不傳今其書固在殊爲失考附訂於此此本於凡例後附該載事目王刻本

則改曰事類總目且有所增益如類目中散事地理人名姓氏草木樂名皆注新增及附字已非陰氏兄弟之舊故陳刻自題曰新增說文韻府羣玉書經明人重刻無不爲之竄亂然後知舊本之可貴也是書本與回溪史韻並重故明成祖纂永樂大典時諭解縉等朕嘗觀韻府回溪二書云云朱竹垞盛推史韻而趙子昂謂韻府勝於錢氏書蓋非平情之論也

雁影齋題跋卷第二

乙亥秋日
男鑑恭校

雁影齋題跋卷第三

湘鄉李希聖亦元著

李文公集十八卷

元本

每版十行行二十字卷首有嚴可均印

朱文

鐵橋印

白文

汪文柏印柯庭

印繆沅印

白文

冊後有休寧汪季青家藏書籍印

朱文

各體文共一百三

首註明原闕二首核之乃疏引見待制官及歐陽詹傳也末附戲贈

詩一首而目錄誤作湖增其他譌字極多蓋元時坊本也李習之集

唐藝文志著錄十八卷而歐陽公所得者僅五十篇蓋不全之本也

趙汴東山存稿書李集後云十有八卷凡百四篇乃蘇天爵藏本某

既從公傳寫復總其篇目云云景泰乙亥邢讓從陳緝熙傳鈔本爲

徐養元刻本之祖亦十八卷汲古閣本卷數同所闕二篇亦同四庫

著錄乃鮑士恭所進卽汲古本也光緒乙亥南海馮煥光得東洋文

政二年刻本十八卷一百二篇亦闕其二乃以嘉靖時刻本及毛本對校刊行又補遺一卷得集外文八篇刊於上海惟四庫提要歷數諸本馮氏又廣爲搜羅皆不見此本知其流傳甚少矣馬少監墓志馮氏本註原闕從全唐文補入此本目錄不注闕字而無其篇答開元寺僧書則篇目俱闕洪盤洲云建陽小本獨多答開元寺僧一書然不著於目錄與馮本異不知海內尙有書錄解題之二十卷本爲閩百詩所欲尋訪者乎孫馮翼刻孫可之集影宋本跋云習之集十八卷蜀本分二十卷所謂蜀本當指宋本然孫氏亦未必見其書也

重訂四書輯釋二十卷元本

每半葉十二行行二十三字前有至正丙戌長至後七日汪克寬序及卷首士毅與書賈劉叔簡書均與四庫著錄本同其改題輯釋章圖通義大成與所列名亦同惟朱公遷約說提要誤作約旨耳卷首

有帶經堂陳氏藏書印考帶經堂書目此書下註曰元本陸存齋儀
顧堂題跋云周季貺太守謂陳氏書目爲其孫星村所偽造以余觀
方氏所得帶經堂本亦不下數十種知周氏之言爲誣矣錢竹汀養
新錄云公叔文子朱註作公孫枝王伯厚以爲傳寫之誤予見四書
輯釋載朱文公論語註公叔文子衛大夫公孫拔也又引吳程曰拔
皮八反俗本作枝誤即公叔發乃知今世所行集註本非考亭之舊
王厚齋所見亦是誤本今觀此本與錢氏所言合然其書則不過與
其所撰作義要訣僅供場屋應試之需猥雜庸陋勢如亂絲又爲書
賈所增竄而胡廣等之四書大全竟以此爲藍本

五經大全皆鈔錄
前人成說見李默

續孤樹
哀談

永樂君臣之無識貽笑至今故雖明代學究如張自烈亦知

痛加攻駁至挂彈章而王船山讀之魏文毅纂之則不可解矣

儀禮十七卷

明繡宋本

每半葉八行行十七字卷首有佐伯文庫印蓋得自日本據海寧陳仲魚經籍跋文云相傳爲明嘉靖中徐氏繙刻宋本三禮此其一也顧千里跋黃蕘圃嚴州本儀禮引日知錄云十三經中儀禮脫誤尤多士昏禮脫罔授綏云云一節十四字賴有長安石經據補而其註疏遂亡又言鄉射脫士鹿中云云七字士虞脫哭止云云七字特牲脫舉解者祭云云十一字少牢脫以授尸云云七字以爲此秦火之未亡而亡於監刻今各條固儼然具在也遂以爲希世之珍此本敬字缺筆徵讓等字不避蓋天聖以前刻本顧氏所舉經註脫文一一皆在雖係繙刻而其原則在嚴本之前紙墨絕精猶係當時初印固當與宋本同其寶貴也顧亭林張蒿庵皆一代通儒殫精經學徧搜舊本至及於開成石經獨不見此本則自明代已流傳甚少矣陳氏以亭林不見真本說文足本廣韻一例病之非通論也此本可以訂

正今本者甚多陳氏別有校記其與唐石經合者經籍跋文已臚舉之矣

方輿勝覽七十卷

宋本

每半葉十四行行二十八字前有嘉熙己亥良月望日新安呂午序

後有穆自序卷首有錢謙益印

朱文

牧齋藏書印

白文

季振宜印

朱文

滄葦

印

朱文

目錄前有何焯之印

白文

吧瞻印

朱文

又有稽瑞樓及胡惠孚當湖

小重山館胡氏邃江珍藏及蔣維基茹古精舍藏書等印方氏所藏尚有一元本與此行款不同此本爲絳雲舊物庚寅之火幸而僅存考絳雲樓書目地誌類有宋版方輿勝覽卽此本也祝和父以朱子母黨嘗從之游獨留意詞章頗與趙蕃相類其爲此書據其自序亦爲四六而設與其所撰古今事文類聚不過同爲鈎鉅之資四庫目錄必以失地志古法譏之則不察其用意之所在矣方是時南渡君

臣湖山燕衍已置中原於度外此書及王象之輿地紀勝

甘泉岑氏
南海伍氏

兩刻本岑本
附校勘記

所記亦祇東南半壁江淮以北卽一字不登與樂史太

平寰宇記詳列燕雲棄地者用意各殊觀於一書而宋之興亡即可
決矣

戰國策十卷

元本

每半葉十行行二十字前有泰定二年八月吳師道自序後有至順
四年七月吳師道自識此本紙墨頗精蓋吳氏自刻本卽四庫提要
所謂舊有曲阜孔氏刊本頗未是正此本猶元時舊刻較孔本多爲
可據者也李錫齡刻入惜陰軒叢書中惜未能一校

東維子集三十一卷

元本

每半葉十二行行二十四字前有至正二十五年二月貝瓊序此本
爲章琬所刊屬瓊爲之序瓊本楊維禎門生也卷首有烏程劉氏珍

藏印及疏雨薰習璜川吳氏收藏圖書印

吳名素來即編纂刻書目若也吳志忠刻仿宋本四

書集註亦稱

四庫著錄本僅從陶宗儀輟耕錄增入辨統論於卷首

其餘分卷及句讀疑似之處均旁註一句字皆與此本同四庫本方氏有震无咎齋從文瀾閣傳寫者但譌字甚多耳

黃四如集四卷

元本

每半葉十行行二十字前有元至治三年清明後一日清源傅定保

序此本乃仲元之子子材刻於閩定保與仲元爲宋咸淳辛未同榜

進士故子材屬爲之序卷首有繡谷薰習

朱蟬華文吳焯白印蓋繡

谷亭舊藏也書用綠色印行於古今人名皆旁加匡廓爲從來槧本

中所僅見此本僅四卷與提要所言諸本皆不合惟杭堇浦道古堂

集所記與此本同四如本講學家而其爲文頗掉弄腔拍微傷自然

王漁洋稱其文聲牙詰曲不諧於俗非知四如者也所爲諸記篇末

多襲歐陽修豐樂亭記之調層見叠出未免爲壽陵之學步邯鄲錢
牧齋屢用余爲誰虞山蒙叟錢謙益也爲吳父正錢錄所詆而不知
始自四如其夢筆記述見孔子授以二筆皆圍徑三寸漬墨甚濃言
之鑿鑿紀曉嵐痛詆吳康齋日記屢夢文王孔子

尤何明史樂府亦
謂之更不足辨矣

沈景倩野獲編云本朝大儒吳康齋每對人輒以兩手作圈勢自而
云無時不見太極浮薄者遂以爲康齋受侮之多如此而

此則不置一詞高下在心宜姚姬傳之斥爲猖獗也錢竹汀據韓勅
碑及曲阜縣石刻大中祥符封鄆國夫人制句容縣石刻封鄆國夫
人制定聖妃爲并官氏非并官氏畢秋帆續通鑑考異又引柯氏宋
史新編正俗本家語之失在漢學家以爲創獲而四如叙鄭雲我孔
子年譜亦作并官與黃蕘圃所記之宋本東家雜記同知其誤自元
以後矣

李治敬齋古今類
卷七亦作并官氏

集中有註及評語皆鄙陋無足觀不知何

人所爲提要以爲出其子亦臆度之辭耳

娜嬛記舊鈔本

字畫遒勁明人鈔本中之善者有濟陽蔡廷楨金匱蔡氏醉經軒讓
王故國人家等印卷尾有黃蕘圃手跋爲潘氏刻士禮居題跋時所
未見錄之於此以當補遺跋云道光甲申長至月予有滂喜園之設
一時故家多有以書籍來售者然爲長孫美濬習業所收在於易爲
脫手非儲藏可比因遇舊刻名鈔老人書魔復動不免流涎近所收
如黃山谷之大全集此可爲吾家世守之寶其餘經史子類亦復檢
取一二蓋欲重舉祭書之典即不能盡屬宋刻無妨稍變其例也此
舊鈔娜嬛記不知誰所鈔骨董鋪攜來求售始云祝京兆書又云桑
民懌書此徒見序文而爲此言毫無影響其實就書中編次云云又
按諸圖記當是姚汝積茂善手鈔惜其人未知其詳耳卷中又云國
朝吳一標建先校序中又云建先劄劄是必先有刻本而此從刻本

鈔出者乃舊刻未見而今世傳本祇有毛氏津逮中本其跋云有新
安黃氏刻與此序所云不同而毛氏似亦未見此本桑祝及屠之序
或明言之或晦言之初不知其何故而尤可笑者在隱其序傳其書
一語更不知其何故矣通校一過與此序次迥殊且有異同詳畧似
此鈔爲勝惜舊刻不傳無從識其面目爲恨歲闌無閒錢置此姑留
此以待友朋之向我索塵賦中物而歸價者與之亦可謂好事之至
季冬之二十二日爲乙酉新春後五日見復生識

藝餘類纂四十卷

國朝杭機撰機字可菴仁和人杭堇浦之父也其書第一卷爲帝學
聖文二卷至三卷爲天文四卷至七卷爲地理八卷至九卷爲政術
功勳十卷爲刑法十一卷十二卷爲禮儀十三至十五爲祭祀十六
十七爲音樂十八至二十爲經典藝文二十一至二十四爲武功二

十五至三十二爲人事三十三爲釋道三十四爲方術巧藝三十五三十六爲居處三十七爲產業三十八爲珍寶布帛三十九爲儀飾四十爲食物每門之中又各分小目所引之書皆自本書錄出與轉相裨販者不同在類書中尙爲有體要卷首有序乃雍正四年其子世駿所作有篋而藏之貽我後嗣等語係堇浦手蹟此書世無刊本故詳記之

文選六十卷

元本

每半葉十行行二十二字前有昭明太子序及李善進文選表呂延祚進五臣集註表每卷標題於李善註上次行有奉政大夫同知池州路總管府事張伯顏助率重刊皆與天祿琳瑯書目所言脗合惟書目謂張伯顏無考按錢竹汀養新錄引鄭元祐僑吳集有平江路總管致仕張公壙誌云公諱世昌字正卿成宗賜名伯顏由將作院

判官累任慶元路同知延祐七年陞奉政大夫池州路同知泰定五年改福甯州尹後遷漳州路總管告老以平江路總管致仕即其人也

按伯顏據誌原石尙存已破

據卷首余璉序稱張正卿証之竹汀之言爲不謬

當時館臣如彭元瑞號爲淵博何以疏略至此又考蔣生沐東湖叢記載陳仲魚元本文選跋云凡六十卷目一卷每葉二十行行二十一字每卷首題奉政大夫同知池州路總管府事張伯顏助率重刊惟不列年月然余定爲延祐本錢遵王讀書敏求記云善註有張伯顏重刊元版不及宋版遠甚以余所聞中吳藏書家所有宋版已多不全似未若斯之完善復借鈕君非石所藏元版校之惟末卷後鈕本無監造路吏劉晉英郡人葉誠十一字此已剝蝕其行款字畫纖毫畢合或云明萬歷間金臺汪諒所刊未必然也爰繙一過始知汲古本所脫者如上林賦脫標郭璞註思元賦脫爛漫麗藐以迭過二

句並註陸士衡答賈長淵詩脫魯公戾止袞服委蛇二句並註曹子
建筌篥引脫百年忽我遺生在華屋處二句鮑明遠放歌行脫今君
有何疾臨路獨遲回二句七發脫自太子有悅色至然而有起色矣
二段共十九行並註宣德皇后令脫標任彥昇三字曹子建求通親
親表脫有不蒙施之物一句若斯之類遽數難終惟封禪文脫上帝
垂恩儲社將以慶成二句元刊已脫又如西都賦註引三倉誤作主
倉閒居賦註引韋孟詩誤作安革猛詩元刊亦然汲古本蓋仍其誤
而何義門亦不能校正云云以陳氏所言考之此本惟上林賦脫標
郭璞註餘皆不脫封禪文所脫及西都賦閒居賦誤字亦同據卷首
余璉序大德九祀越十有三載再明年又未幾計之當刻於英宗至
治初陳本行二十一字故數七發所脫爲十九行此本則十八行陳
本有卷末監造一行即天祿琳瑯後目所載之本與此截然爲二明

弘治元年唐藩重繙此本行欵字數纖悉皆同但紙墨略新耳文選自書錄解題有六臣之本而單行李註世遂罕傳近世所通行之本

惟汲古閣本耳然四庫提要謂汲古本陸雲贈

當作答題要字誤

兄機詩註

中有向曰一條濟曰一條又贈張士然詩註中有翰曰銑曰濟曰向曰各一條及左思魏都賦本張載註乃俱題劉淵林名羽獵賦用顏師古註則竟漏本名幽通賦用曹大家註則散標句下又文選之例於作者皆書其字而杜預春秋傳序則獨題名上十七卷末附載樂府君子行一篇註曰李善本古詞只三首無此一篇五臣本有以爲毛氏因六臣之本削去五臣獨留善註故刪除不盡未必真見單行本也此本亦雜入五臣註其他諸條與提要所謂舛互者均合蓋已非崇賢原本然則毛氏所稱從宋本校正者其言當亦不謬提要疑爲毛氏所排纂蓋館臣未見此本故坐毛氏以贗古之罪耳

六書統溯源十三卷

元本

元楊桓撰每半葉八行序文上有季振宜字詭兮號滄葦印

朱卷一文

上有文徵明印

白文

玉蘭堂印

白文

卷首有顧千里手札一通蓋與袁

壽階者卷尾有孫爾準跋此書四庫已著錄然僅十二卷焦弱侯國史經籍志亦同此本十三卷疑十二卷本在前嗣以末卷太多故析而爲二惟千頃堂書目及錢竹汀補元史藝文志盧抱經補遼金元藝文志金鳳誥補三史藝文志均作十三卷即此本也提要稱其卷三至卷十二皆諧聲字此本則作形聲又言獨缺象形一門名之曰六書實止五也然楊氏原書并無假借然則名爲六書實止四矣提要蓋未嘗深考也

附顧千里札

壽階吾兄先生閣下奉到手示並各冊循覽一過皆真舊刻本內六

書統溯源乃元槧之至精者考核既極精微收羅尤爲宏富惜不爲
佞宋主人所見刻入士禮居內以餉海內六書家留案頭十日遲遲
奉繳愛不釋手耳

詩經疏義二十卷

元本

每半葉十二行行十五六字不等第一卷下題後學番陽朱公遷克
升疏義野谷門人王逢原夫輯錄松塢門人何英積中增釋書林安
正堂劉氏重刊元槧中之善本也四庫本爲葉氏所刊與此本異朱
子詩集傳自軸廣劉瑾遞相發明遂成門戶朱氏此書作於輔劉之
後於集傳如註之有疏故曰疏義然劉瑾不甚攻小序朱氏則於葛
藟之刺平王緇衣之美武公皆謂其無據即如清人之刺文公明見
於左氏傳者亦以無據斥之其餘諸條亦逐加辨駁惟白華刺幽后
一條獨以爲可信耳朱子詩集傳未成呂伯恭即有異議其書初出

葉水心

見習學記言

陳君舉

見四朝聞見錄

皆起而攻之而朱子自負特甚謂後

世有揚子雲必好吾書矣其弊遂流爲王魯齋之改二南刪鄭衛

百閤

詩毛朱詩說至以詩三百篇非孔子原書爲漢人取孔子已刪之詩一切湊合其說出於程篋篋出於許魯齋馮景解春文集已駁

之師心自用古義寢微則又非朱子所及料也

景德傳燈錄三十卷

元本

每半葉十三行行二十四五六字不等每卷末有四方木印署延祐

三年刻梓於湖州道場禪幽之菴或署延祐丙辰重刊於湖州道場

山其字或篆或隸或楷亦前後不同考宋龔明之中吳紀聞云永安

禪院僧道元續佛祖訖近世名儒禪語爲傳燈錄三十卷以獻祥符

中詔翰林學士楊億知制誥李維太常丞王曙判定刻板宣布則此

書在北宋時卽有官刻不知海內藏書家尙有之否

古今事文類聚前集六十卷後集五十卷續集二十八卷別集三十二

卷新集三十六卷外集十五卷遺集十五卷

元本

前後續別四集宋祝穆撰新外二集元富大用撰遺集元祝淵撰每半葉十四行行二十八字四庫著錄者與此本同所謂元代麻沙板者也宋元人此等類書幾於汗牛充棟本無足觀不過以其舊籍舊板而錄之耳祝和父本朱子母黨子姪行故其人倫部外祖孫一門采入朱子記外大父祝公遺事和父幼孤朱子育之於家塾命黃勉齋爲行冠禮所以提挈之者無所不至嘗訓之云記問之學不足爲人師記得十件只是十件記得百件只是百件其箴砭可謂切矣而其自序則謂此書善足以爲法不善足以爲戒講學之士亦將有取豈徒類書之云乎殆亦自知其非而故爲解免也

宋史四百九十六卷

元本

每半葉十行行二十字前有阿魯圖等表及修史提調官等銜名後

有至正六年中書省咨浙江等處行中書省文云精選高手人匠依

式鏤板不致差訛所用工物本省貢士莊錢內應付如果不敷不以

北監本作拘

是何錢內放支年終照算仍禁約合屬毋得因而一概動擾

違錯工畢用上色高紙印造一百部裝潢完備差官赴都解納外合

行移咨須至咨

北監本誤盜

者此本每葉均有利寫人姓名而紙墨甚精

尙是當時官本錢竹汀謂監本汲古本孝宗紀缺一葉此本獨完其

餘可以補正者尙多卷首有徐渭仁印

白文

紫珊

朱文

張叔未

白文

清儀

閣

朱文

等印

歐陽文忠公文集一百五十三卷附錄五卷

元本

每半葉十行行二十字此本爲周益公所編定者即四庫著錄本也

然提要謂無曾三異編校姓名此本亦無之考明天順時所刻本行

款字數與此悉符似即從此本繙出者後附編定校正人姓名於孫

謙益丁朝佐王伯芻羅泌諸人之外有紹熙四年郡人鄉貢進士曾三異字無疑則此本原有曾名四庫本偶脫耳方氏藏本亦脫去周益公序文卷首有張之洞審定及壺公無競居士等印

三國志六十五卷

元本

每半葉十行行大字十九小字二十二十一字不等卷首有梁山舟及蔣維基印前有大德丙午桐鄉朱天錫跋云江左憲臺命諸路學校分派十七史鐫梓池庠所刊者三國志又有池之爲郡士類率多貧窶學計歲入寡贏是舉幾至中輟總管王亢宗博士孔涓孫董提以底於成云云魏志十九二十二十三二十七二十八三十後均有右修職郎衢州錄事參軍蔡宙校兼監鏤板左迪功郎衢州州學教授陸俊民校正兩行則此本實從宋本繙出紙墨尙精而譌字不少如首卷第十葉紹使人說太祖欲連和宋本紹作紿誤矣此本不

誤間亦可資校正其餘略一對校勝監本實多

日知錄馮夢禎爲南
系酒手校三國志猶

不免誤終
勝他本

方氏有顧千里校三國志所據即南監本也

集百家註分類東坡先生詩二十五卷

元本

每半葉十三行行二十三四字不等卷首有張之洞審定等印前有
趙夔及王十朋序所采諸家姓氏後有建安黃善夫刊於家塾之敬
室長方木印紙墨甚精元本中之初印也四庫提要以王十朋及趙
夔二序皆係依託以年月及王梅溪集考之其僞顯然其標題稱王
狀元而諸家姓氏內有王龜齡王夢齡王昌齡名必係當時書賈射
利者之所爲惟提要稱趙夔序分五十類實止二十九類蓋有所合
併此本分七十九類溢於趙夔原序豈又有所分析耶所錄諸家姓
氏共九十六人稱爲百家亦不爲過提要以千家註杜詩五百家註
韓柳文之故示誇誕者相況殊爲失平四庫著錄者爲三十二卷本

與此本不同

稽古錄二十卷

元本

每半葉十行行字大小不等卷首有墨林珍賞

朱文

及陳繼儒印

白文考

書錄解題此書宋刻有二本越本彙聚諸論於一卷潭本則分係於各代之後此本與潭本合卽四庫著錄本也然不言潭本爲何人所刻考朱子大全集有與鄭知院書某嘗在長沙嘗得溫公稽古錄正本別爲刊刻殊勝今越中本始知潭本爲朱子在長沙時所刻不知海內藏書家尙有之否

精選東萊先生左氏博議句解八卷

宋本

每半葉十行行二十一字觀其標題板式蓋閩中麻沙坊所刊也此書通考作二十卷而四庫著錄者爲二十五卷提要稱楊士奇謂別有一本十五卷題曰精選黃虞稷稱明正德中有二十卷刊本坊間

鬻本又僅十二卷非惟篇目不完併字句亦多妄削云云此本僅八卷又出諸本之外蓋宋自熙寧後改用策論取士此書實爲揣摩應試之資而坊賈亦視爲射利取贏之計故刻本紛如亂麻不可究詰而呂氏原書世久不見全本近人胡月樵刻入全華叢書者乃足本也此本刪節過甚其註亦陋略無足觀不過以其爲南宋舊刻而錄之耳

韻補五卷

元本

每半葉八行行二十字有鮑韻山農袖海道入胡爾榮陸恩熾諸人印此書汪鈍翁有刻本其序見堯峯文集盛推其淹治謂朱子悉采之以協詩三百篇則實沿朱竹垞經義考之誤提要不辨汪說殆未見其書也至鈍翁序謂近世好古之儒往往譏排協韻之非甚而上之疑孔子之繫易次之黜顏師古章懷太子之註兩漢書其說蓋爲

顧亭林而發此則鈍翁之褊衷而不顧其說之謬矣

校本孟東野集十卷

周香嚴手校末有其自跋稱黃復翁於乾隆甲寅秋得小字宋刊孟東野集十卷云云其跋已見楊紹和楹書偶錄及士禮居題跋記惟黃薨圃跋爲潘伯寅尙書搜輯所未得者附錄於下跋云古人藏書最重通假非特利人抑且利己如予與香嚴居士爲忘年交所藏書必通假通假之妙人知利人我爲利己此何以說即如此集余所藏共有三本香嚴跋已詳言之予自歲乙亥以來百宋一廬中完壁斷珪一旦俄空焉殆天與我以好不與我以力耶然書魔故智未克盡除故鈔寫校讐之力尙可副我所好前香嚴在日曾借手錄敝藏陶淵明集宋刊精本影寫一過其籤題圖記無不影摹茲孟東野集亦宋刊精本未及假錄而香嚴作古因從其文孫處假歸因珍重不便

假手鈔胥命三孫美鏘錄之閱歲始就還書之日重感故人子孫不
忘通假高誼俾予鈔錄以還舊觀且多香嚴手校異同尤得所指南
云甲申五月蕘夫卷首有金匱蔡氏醉經軒及廷相伯卿甫等印

雁影齋題跋卷第三

乙亥秋日
男鑑恭校

雁影齋題跋卷第四

湘鄉李希聖亦元著

百川學海元本

每半葉十四行行二十八字前有康熙壬辰長至月蘿花居士吳焯記卽其手跡也卷首有勘書集珍藏鐵華珍賞新畚審定尺鳧繡谷薰習等印此書明弘治時華汝德有刻本將左氏原帙改分又移易其先後次第如元本聖門事業圖後爲學齋佔畢明刻本則爲漁樵對問其他次第亦多改動此本脫去目錄乃吳尺鳧手鈔補入者蓋就本書編輯故不分甲乙十集吳氏殆未見明本然吳氏所鈔目錄其標目下間附考訂如釋常談三卷下附案文獻通考云釋常談一書不著名姓秘書丞龔蹟正續之漁樵對問一卷下云案晁氏讀書志云宋張載撰邵氏言其祖之書也文獻通考又引晁氏云皇朝邵

雍撰國老談苑二卷下云案文獻通考作國老閑談稱夷門君玉不

著姓

按撰者爲王君玉

道山清話一卷下云案文獻通考云不知何人撰書

尾有其孫暉一跋不著姓庚溪詩話二卷下云國史經籍志有此目

亦失名今書中有一條稱宋光宗爲皇太子在恭邸時巖肖備員講

官姓侯再考

按係宋陳子象撰四庫總目已著錄

司馬溫公詩話一卷下云案晁氏讀

書志作續詩話司馬光撰據光自序係續歐公者端硯譜一卷下云

案跋尾云縉雲葉樾傳此譜稱徽廟爲太上皇當是紹興間人作歟

州硯譜一卷歟硯說一卷辨歟硯說一卷下云案硯譜有邁跋云景

伯兄治歟刻硯說三種國史經籍志作洪景伯則邁當是洪邁案文

獻通考歟硯譜唐積撰後二種云不知何人據跋尾只言刻不言自

作通考之說必有據也硯譜一卷下云案晁氏讀書志硯譜宋唐詢

撰以紅絲石爲第一端石次之此譜列紅絲於端石之前當是唐書

如此之類亦頗有裨於考證此本字大不及明本而實爲左氏原書
又係繡谷亭舊藏印識宛然手蹟狼籍殊爲可寶至明人刊刻古書
無不爲其所亂顧亭林謂有明一代之書皆盜竊豈惟著書即刊書
亦然矣

通志二百卷

元本

每半葉九行行二十一字前有至治二禩壬戌夏五吳繹序及至治
元年五月疏是書先刻於三山郡庠及吳繹守閩乃捐俸募楮五十
部傳之北方乃至治二年九月印造者附列江浙等處行中書省所
委官將仕佐郎太平路當塗縣主簿袁矩承務郎福建道宣慰使司
都元帥府都事江王紀昇福州路總管府提調官經歷侯維清福州
路總管府提調官知事楊也先福州路總管府所委提調官福州路
儒學教授李長翁福州路總管府所委提調官福州路錄事司判官

蓋從祀七人銜名與平津館鑒藏記本同

高麗史一百三十九卷

明鈔本

卷首有朱竹垞跋二首跋見曝書亭集此則其手跡也印識宛然蓋
曝書亭舊物又有吳省蘭印稷堂印讀史精舍印馬玉堂印笏齋印
卷尾有道光辛卯歲武原馬氏漢唐齋收藏書籍長方楷字印此書
四庫在存目中僅二卷提要以爲偶存之殘帙非完書矣平津館影
寫本作一百三十七卷蓋不連目錄二卷計數耳王漁洋居易錄所
見本亦一百三十九卷頗譏其以太祖王建之祖引金寬毅編年通
錄謂爲唐肅宗子閔漬編年綱目則以爲宣宗皆誕而不可信

居易錄云

世家四十六卷志三十九卷表二卷列傳五十卷

南北朝雜記

舊鈔本

題新喻劉敞原父撰所采南北史事共八十條皆從紀傳錄出其體

例與洪邁南朝史精語不同精語僅摘字句此則於本人紀傳中錄
其一事而首尾完具王洙談錄記歐公云凡看史書須作方略鈔記
殆當時風氣如此故其時如楊侃之兩漢博聞丁度之前史精要皆
盛行於世宋史藝文志因別立史鈔一門然原父此書宋史藝文志
無其目存之於此姑以志疑蓋藝文志脫漏之書見於錢竹汀養新
錄者尙不少也

此本元錢塘陳世隆天台
徐一夔刻入藝圖搜奇

袖珍方四卷

前有洪武二十四年八月望日序又有永樂十三年乙未季秋月序
言數年以來印板模糊今令良醫等復校訂正刊行於世蓋洪武先
有刊板至永樂時又重刊也此本卷尾有皇明弘治壬子仲春楊氏
清江書堂重刊蓋不及百年已三易板矣其書計方三千七十又七
分八十一門而不著撰人名字作序者亦不著名據序文知其輯於

雲南而洪武永樂二刻亦均在滇中蓋邊遠多瘴故方書盛行也

元文類七十卷目錄三卷

元本

每半葉十行行十九字前有元統二年四月戊午鄭王理及五月五日陳旅二序觀其卷首文移乃西湖書院刊本又有中書省移咨一道云江浙等處行中書省劄付本司刊板印行當職近在大都於蘇參議家獲睹元編集檢草較正得所刊板本第四十一卷內缺少下半卷計一十八板九千三百九十餘字不曾刊雕又於目錄及各卷內較正得中間九十三板脫漏差誤計一百三十餘字蓋是當間較正之際失於鹵莽以致如此宜從本司刊補改正庶成完書今將缺少板數漏誤字樣錄連在前關請施行准此儒司今將上項文類板本刊補改正一切完備隨此發去合下仰照驗收管施行須至指揮至正二年二月日施淵此本蓋當時印行之本紙墨甚精卷首有張

之洞審定無競居士等印後有元統三年三月三日太原王守誠題
卽葉盛水東日記所謂至正初元刻大字本也四庫著錄者乃從此
本翻雕

通鑑續編二十四卷

元本

陳桎撰每半葉九行行二十二字前有至正二十一年周伯琦至正
十八年陳基諸人序桎本元人入明爲翰林編修以附楊憲遷待制
四庫提要改稱明人爲得其實然此書則實在元時所刊不得以其
爲明人而疑之耳卷首有馬玉堂笏齋印

朝野僉載十卷

影鈔本其中構字空格註御名蓋從宋本過錄有士禮居藏及黃丕
烈復翁等印其甲字毛晉私印汲古主人諸印則書賈所僞造也按
此書四庫著錄者係六卷此本分十卷與唐書宋史藝文志及郡齋

讀書志書錄解題文獻通考所記皆不合提要謂張鷟爲開元時人而書中有寶歷元年資陽石走事實歷乃敬宗年號與鷟時代不相接此本亦有石走一條乃在第八卷而孟宏微對宣宗事則此本竟無之其第九卷宗楚客一條三行以後所記諸珍物及李可及進百年曲皆懿宗女同昌公主事前後既不相蒙時代尤不相及疑亦僉載補遺中語而提要未嘗指摘豈內府本無此一條耶抑當時秉筆者未嘗細勘耶考宋人所撰五色線按是書本三卷汲古閣刻者僅二卷引此書共三條而太歲在午人馬食土歲在辰巳貨妻賣子歲在申酉乞漿得酒一條此本亦無之則自宋時流傳之本已不一矣其中如鄭愔崔湜掌選一條李盡忠破營府一條桑條韋一條突厥鹽一條武媚娘一條杜曲誅諸韋一條索元禮一條喬知之婢碧玉一條侯思正解豸豈識字一條吉頊請誅來俊臣一條仙人獻果玉女登梯一條侯敏

妻董氏一條高叡妻秦氏一條天后夢鸚鵡一條先天二年正月張

燈一條

與舊唐書殿
挺之傳合

張易之母阿藏一條安樂公主定昆池一條張

昌儀屬天官侍郎一條朱前疑諂諛一條常元楷被誅一條韋后隔
簾拜周仁軌一條周仁軌過秋分一日平曉斬之一條宋之遜告王
同皎一條白鐵余埋銅佛一條李日知行杖一條薛懷義造夾釘大
像及明堂火一條胡超合長生藥一條武三思謂張易之是王子晉
後身一條突厥破萬榮新城一條久視二年三月大雪一條田歸道
不屈默啜一條皆爲通鑑所采其劉仁願以仁軌檢校帶方州刺史
一條李敬立爲元帥一條程務挺平稽胡爲儀鳳中一條駱賓王爲
徐敬業畫策取裴炎同起事一條魚思嘔造匭一條七寶臺散壞爲
姚璿語一條來俊臣徐有功先進狀一條王孝傑戰死一條來俊臣
三月三日在龍門題朝士姓名一條孫彥高頑愚一條武懿宗射閭

知微一條鳩集鳳池驅驢宰相一條司刑寺囚作聖人迹一條宋景畢構見鬼人彭君卿一條崔湜妻及二女皆幸於太子一條王琚去官侍母一條薛訥八萬人沒於契丹一條姚崇縊殺趙海一條張說諂事王毛仲一條皆見於考異中爲通鑑所不取合而觀之其書之疏密均可見矣然如補闕連車載拾遺平斗量權推侍御史盪脫校書郎及沈全交續之云云一條通鑑採之而胡註乃引容齋隨筆以爲此語出於張鷟則梅磻蓋未見此書故其註引長孫無忌以烏羊毛爲揮脫及如意初黃鵬歌皆不知源出此書也

孫耕閒集一卷

宋孫銳撰銳字穎叔吳江平望里人咸淳十年進士授廬州僉判值元兵南侵遂絕意仕進挂冠東歸年七十九卒於德祐初其集爲元至元十八年趙時遠編前有時遠序稱其集累若干卷多散佚不傳

予忝世誼因搜其遺稿或扇頭壁上或蠹簡鼠穴得數十首云云此
本計詩僅三十五首即時遠原編之本也銳生值亂離鴻冥物外本
不欲以文章自名故其詩多模山范水之詞格調不高而一邱一壑
自得天機如漁父詞和立真子得家書和陶淵明又作立真子吟至
以爲仙去可以知其所尙矣然其詠鴟夷子皮及孔明八陣石亦時
露英氣殆與陶淵明刑天舞干戚不用周必大二老堂詩話說沈濤
交翠軒筆記則謂刑天當仍作形
天惟無千歲三字實舞
干戚之訛其說甚辯 猛志故常在者託興相同歟此書四庫未錄
阮氏經進書亦無之乃舊帙之僅存者兩宋名賢小集內無銳詩厲
鶚宋詩紀事選銳詩僅三首吳之振宋詩鈔曹廷棟宋百家詩存均
未入選則皆未見矣此本爲知不足齋舊鈔丹黃燦然蓋鮑廷博手
校本也玉爾堂叢書所刻即用鮑氏校本沈西雍跋云宋詩紀事會
見此集仕履不全似未附墓誌也翁海維跋云石湖別墅詩
收入顧彥崖宋人名賢小集元真鈞磯
歌重建殊勝寺記慈湖說收入平望志

東園客談一卷廣客談一卷

明孫道易撰錄名人嘉言懿行及近代軼事遺聞據當時友朋所書共三十二則每條下各出其名凡錢惟善全思誠陶宗儀趙宜潛夏文彥夏頤孫道明朱武郭亨邵煥吳祐孫李珪孫元鑄周景方楊依

孫

提要作楊孫誤

李升曾朴計十七人廣客談共二十三則凡錢惟善李升

唐志大蔣堂高晉陸友仁郭亨莫晉黃璋全思誠姚廷美謝晉錢應庚夏文彥莫昌陳亨道計十六人卷末署洪武十二年歲次乙未八月二十九日壬辰雲間映雪老人孫道易寫於華亭平溪草舍時年八十又三按客談四庫存目於小說類而所數人名與此有異陶宗儀說郛所刻者則僅三分之一且更其名曰友聞曹溶學海類編又沿其誤其廣客談一卷四庫既未存目傳本尤稀此本爲知不足齋從錢曾述古堂鈔本傳寫者滿紙丹黃鮑廷博所手校也

明十一朝實錄

自永樂至萬歷計二百餘冊每冊首有東海蟻錄臣錢容保拜手恭
讀印蓋明時舊鈔也明之實錄是非顛倒本不足憑王弼州史乘考
誤糾正頗多沈德符野獲編亦載馬昂妾事武宗實錄與世宗實錄
自相矛盾桂萼令董中峯記於武廟實錄中譏刺王文成縱兵劫掠
南昌爲之一空皆懟筆也又謂本朝無國史以列帝實錄爲史已屬
紕謬乃太祖錄凡三修當時開國功臣壯猷偉略稍不爲靖難歸伏
諸公所喜者俱被剗削建文帝一朝四年蕩滅無遺後人搜括摺拾
百千之一二耳景帝事雖附英宗錄中其政令尙可考見但曲筆爲
多云云是明代已有攻之者閻百詩潛邱劄記云實錄之所載以方
正學之抗節而史臣至誣之爲乞哀

史乘考誤及朱竹垞高麗史跋亦痛斥之

以謝餘姚之

特正而史臣至詆之爲媚后

弘治元年太監郭璘請選女子於宮中或諸王館以待上服闋冊封二妃廣衍

儲嗣左庶子謝遷諫止謂六宮當備而三年未終山陵未畢諒陰之
痛不宜遽及此事焦泌陽乘史筆謂謝進此諛詞以諛孝宗繼嗣之
不廣王弼州考誤中聖齡甫十九此泌陽懟筆蓋陰刺中宮之擅議甚正
謝公之從諛時上聖齡甫十九此泌陽懟筆蓋陰刺中宮之擅議甚正
初乃小人無忌憚耳孝宗冊之論旨以此野獲德之後來推闡員一記云謝
盡俱不得旨最後以李長沙及謝名上始並荷簡用其後中宮妹入
宮上用內意欲冊為妃謝又奏要幾二女為比上是之竟以外廷力
爭而止此則恐不免然則佞如泌陽固不足以信矣而賢如文貞抑果
免有意迎合矣

可謂之信史乎

憲宗實錄詆陳白沙其厲頑錄
以為丘濬憲章錄以為張元禎

他如世穆兩朝

獨裁於江陵則簡核而可喜

野獲編今誤永嘉相業者大抵多溢美
則江陵公秉史筆時以聲氣相附每追

頤其功也然則當時亦致不滿矣

神宗一代補綴於眾手則踏駁而不倫光宗欲正

其訛而不果懷宗欲補其闕而未能觀於閭氏此論其得失均可見
矣然當時實錄之進焚草於太液池藏真於皇史宬在朝之臣非預
纂修均不得見自申時行當國始流布於外得者至艱況傳至今日
亦甚可寶也

漢泉漫稿十卷後錄一卷

汲古閣影鈔本每冊首有元本及甲字印又有毛晉私印

朱文 子晉

汲古主人

朱文

毛辰之印

朱文

斧季

朱文

等印卷末有子晉藏書印

朱文

汲古

得修綆等印此書四庫著錄所謂曹文貞詩集者也然提要據吳全節跋稱有張夢臣歐陽原功蘇伯修呂仲實四序今皆無之此本前有張起巖呂思誠序夢臣卽起巖之字仲實卽思誠之字也惟歐蘇二序則此本亦無之其總目所列御史臺咨文太常博士謚議均有錄無書目中提調校刊謄寫姓名一條亦未載入皆與四庫本同此本每卷下有文林郎江南諸道行御史臺管勾男復亨類集及國子生浚儀胡益編錄二行四庫本蓋無之故據吳全節跋又譌作江南諸道御史臺管勾殆因原文之誤耶至曹伯啟詩及樂府皆庸音俗調無一可觀提要乃以春容和平中原雅調推之非篤論也

南詞八十七卷

鈔本

明李東陽編輯首有天順六年夏四月上浣東陽自序言從故藏書家得珍祕繕本宋元諸名家詞凡六十四家計八十七卷目爲南詞藏於家塾其曰南詞者序所謂六代江南采蓮諸曲去倚聲不遠也此書世無傳本四庫既未著錄各家書目皆不載惟德清許氏鑑止水齋書目有懷麓堂詞選二十四本

西涯所錄皆全集不得稱選

未知即此書否

此本係南昌彭文勤所藏卷首有文勤硃筆題辭數行署癸卯中元

日雨窗芸楣總目下有南昌彭氏

朱文

印知聖道齋藏書

朱文

印遇讀者

善

白文

印又有李之郇印序下有宣城李氏瞿硎石室圖書印記

朱文

按

西涯此集在汲古閣毛氏之先當時并未付刊所集六十四家除己爲虞山毛氏錫山侯氏及近人臨桂王氏所刻者餘皆久不經見之書考陳振孫書錄解題列詞集九十二家而總註其後曰自南唐二

主詞以下皆長沙書坊所刻號百家詞其最末一家爲郭應祥振孫

稱嘉定間人則諸人皆在寧宗以前矣今已大半不傳嘉靖任良幹

所刊楊升菴詞林萬選

四庫提要疑其依託至提要引劉子昂汴京書事詩曰楚穀繁華事可傷師師垂老過湖

湘樓衣檀板無顏色一曲當年動帝王以爲師師流落楚南此語大誤按劉詩所指乃蕭山之湖湖非楚南也考張邦基汴都平康記云

致和間汴都平康之盛而李師師崔念月二妓名著一時李生門第尤饒靖康中李生與同輩趙元奴及樂廷吹笛袁絢武震輩例籍其

家李生流落來浙中士大夫猶邀之以聽其歌然憔悴無復向來之態矣是爲李師師未嘗流落楚南之明證附訂於此序稱升

菴藏有唐宋五百家詞升菴去直齋時三百年安得有五百家之多

其言未免欺人失實何元朗序顧氏所刻草堂詩餘亦祇稱家有宋

人詩餘六十餘種毛子晉窮蒐宋本所刻自晏殊珠玉詞至盧炳哄

堂詞共六十一家可謂詞林之淵海矣然汲古閣所藏宋人詞集實

不止此如阮文達四庫未收書目所進之宋曹冠燕喜詞一卷朱敦

儒樵歌詞三卷王以凝詞一卷王佑遐給諫所刻之章華詞皆從汲

古舊鈔過錄而未嘗付刊蓋毛氏本擬刊宋詞百家並不以六十一家爲限也四庫總目於詞曲一門自晏殊珠玉詞至國朝曹貞吉珂雪詞僅五十九家簡略已甚今自汲古毛氏外合之侯文燦所刻張先子野集賀鑄東山詞葛刻信齋詞吳儆竹洲詞趙以夫虛齋樂府五家專舉宋人及王給諫之潘閬逍遙詞李彌遜筠溪詞鄧肅栢欄詞朱敦儒樵歌拾遺朱雍梅詞倪稱綺川詞高登東溪詞丘崇文定公詞曹冠燕喜詞姜特立梅山詞趙礪老拙菴詞袁去華宣卿詞李處全晦菴詞管鑑養拙堂詞王炎雙溪詩餘陳亮龍川詞補陳人傑龜峯詞許棐梅屋詩餘方岳秋崖詞李好古碎錦詞何夢桂潛齋詞趙必珠覆瓿詞歐良所編撫掌詞章華詞尙不及九十家此本宋人詞集爲毛侯王三家所未刻及世無刊本者尙十三家真非常之祕笈矣書爲陽湖董綬金比部所藏余假觀頗久乃明鈔本字句與毛刻異

同頗多惜王給諫及朱古微侍郎文叔問舍人均不在京師未能一

校耳茲將西涯總目列後其有刻本者附註目下使覽者易於檢尋

焉

王漁洋居易錄言宋枚仲所得李長文學士昌垣鈔本數十家詞不甚流傳者尙多有之未知其書尙在否

南詞總目

宋

南唐二主詞一卷

侯文傑刻入名家詞以後祇稱侯刻

龜峯詞一卷

陳人傑著

王鵬運刻入宋元三十一家詞以後祇稱王刻

蓬萊鼓吹詞一卷

夏元鼎著字宗禹

逍遙詞一卷

潘園著

王刻

耐軒詞一卷

王達著

文湖州詞一卷

此係喬吉夢符樂府章丘李中麓有刻本不知何以錄名湖州

珠玉詞一卷

晏殊著字同叔

毛刻六十一家詞卷數同以後祇稱毛刻

六一詞四卷

歐陽修著
字永叔

毛刻六一詞一卷

半山詞二卷

王安石著
字介甫

附集

小山詞二卷

晏幾道著
字叔原

毛刻小山詞一卷

虛靖真君詞一卷

屯田樂章詞二卷

柳三變著
字耆卿

毛刻樂章集一卷

東坡詞二卷

蘇軾著
字子瞻

毛刻作一卷

山谷琴趣詞二卷

黃庭堅著
字魯直

毛刻山谷詞一卷

姑溪詞一卷

李之儀著
字端叔

毛刻同

後山詞二卷

陳師道著
字履常

毛刻同

壽域詞一卷

杜安世著

毛刻同

丹陽詞一卷

葛勝仲著
字魯卿

毛刻同

溪堂詞一卷

謝逸著
字無逸

毛刻同

竹友詞一卷

謝薖著
字幼槃

信齋詞一卷

葛郯著
字謙問

侯刻
常州先哲遺書刻

省齋亦一卷

廖行之著
字天民

聖求詞一卷

呂濱老著

毛刻同

初寮詞一卷

王安中著
字履道

毛刻同

酒邊詞一卷

向子諲著
字伯恭

毛刻同

樂齋詞一卷

向鏞著
字豐之

簡齋詞一卷

陳與義著
字去非

毛刻同

樵歌詞三卷

朱敦儒著
字希真

王刻別行

竹齋詞一卷

沈瀛著
字子受

逃禪詞一卷

楊無咎著
字補之

毛刻同據四庫
提要楊應作楊

稼軒詞四卷

辛棄疾著
字幼安

毛刻同

知稼翁詞一卷

黃公度著
字師憲

毛刻同

于湖詞二卷

張孝祥著
字安國

毛刻四卷

松坡詞一卷

京鏞著
字仲遠

侯刻

竹洲詞一卷

吳儼著
字益恭

晦菴詞一卷

李處全著
字粹伯

王刻

養拙堂詞一卷

管鑑著
字明仲

王刻

白石先生詞一卷

姜夔著
字堯章

毛刻同

龍川詞一卷

陳亮著
字同父

毛刻同

龍洲詞二卷

劉過著
字改之

毛刻一卷

西樵語業詞一卷

楊炎正著
字濟翁

毛刻同作楊炎四庫提要已糾其
誤倪燦補宋史藝文志亦作楊炎

石屏詞一卷

戴復古著
字式之

毛刻同

樵隱詞一卷

毛开著
字平仲

毛刻同

履齋先生詞一卷

吳潛著
字毅夫

文溪詞一卷

李昂英著
字俊明

毛刻同

空同詞一卷

洪璚著
字叔瑛

毛刻同

烘堂詞一卷

盧炳著
字叔陽

毛刻同
烘應作烘

蒲江詞一卷

盧祖皋著
字申之

毛刻同

克齋詞一卷

沈端節著
字約之

毛刻同

王周士詞一卷

王以靈著

金谷遺音詞二卷

石孝友著
字次仲

毛刻一卷

白雪詞一卷

陳德武著

綺語詞一卷

張東澤著

倚菴詞一卷

李祺著
字禎昌

樂府補詞一卷

知不足齋刻

金

東浦詞一卷

韓玉著
字溫甫

毛刻同

元

松雪詞一卷

趙孟頫著
字子昂

侯刻

鳴鶴餘音一卷

虞集著
字伯生

此書本八卷

蛻巖詞二卷

張翥著
字仲舉

知不足齋刻本

竹窓詞二卷

沈禧著
字廷錫

侯刻作張野

古山樂府二卷

張楚著
字楚夫

雲林樂府一卷

倪瓚著
字元鎮

知不足齋刻本

貞居詞一卷

張雨著
字伯雨

草堂詩餘三卷

讀畫齋刻本
詞學叢書本

元風雅十二卷

鈔本

前集六卷傳習所采集後集六卷孫存吾所續輯也此書四庫著錄作二十四卷然提要稱前集首劉因凡一百十四家後集首鄧文原凡一百六十六家此本目錄家數皆同殆四庫本析每卷爲二其實一本也卷首有知不足齋諸印及蔣維基印凡遇當時應檄寫之處皆一一檄寫蓋從元刻本影鈔者錢竹汀補元史藝文志亦稱元詩前集六卷傳習采集孫存吾編類元詩後集六卷孫存吾編是錢氏所見本亦祇十二卷必元本如此也顧嗣立元詩選凡例所數元詩諸選本自蘇天爵文類外如偶武孟乾坤清氣曾應珪元詩類選蔣易皇元風雅揭軌光岳英華宋公傳元詩體要孫原理元音顧瑛草堂雅集潘訥叔宋元詩皆所采錄而獨不及此書知爲顧氏所未見乾隆中開四庫館時江浙采進遺書凡宋人集大半經厲樊榭點勘者元人集大半經顧俠君點勘者二公所見固博而遺漏亦復甚多

王鳴盛蛾術編譏樊榭宋詩紀事漏收伊川程子之母侯氏聞雁憶外五律一首然實不止此也吳蘭修跋宋方信儒南海百詠亦詆樊榭未見其書愛日精廬藏書志所載元人才調集中仕履始末如盧昭葉廣居馬琬李瑱不花帖木兒等元詩選俱未載或顧君未見其

書云樊榭宋人集多假之馬氏玲瓏山館俠君元人集多假之徐氏

傳是樓也至提要所謂范氏天一閣所藏有元朝野詩集二冊亦題曰元風雅不知何人所編云云當即錢氏藝文志所載皇元風雅八卷無撰人名或云宋襲核其卷數與提要所言二冊多少亦合是又在阮氏未收書目蔣易元風雅之外然則同時有三皇元風雅矣

懷古錄三卷鈔本

宋陳模纂模字子宏號月庭廬陵人前有寶祐二年甲寅四月既望模自序此書四庫未錄各家書目皆無之惟上元倪燦宋史藝文志補文史類有此書亦作三卷然諸書從無徵引及之者實孤本矣其書上卷中卷論詩下卷論文頗多入微之論惟模本江西人故推服

黃陳歐王甚至其論詩則謂后山勝於山谷至以呂居仁江西詩派

不應收后山后山集中似江西者極少云云其意似不甚主江西頗

能破除鄉曲之見

錢大昕養新錄云呂本中江西詩派圖意在尊黃涪翁并列陳后山於諸人中后山與黃同在蘇門

詩格亦與涪翁不相似乃抑之入江西派誕甚矣云云而不知陳氏此書已先論及竹汀蓋未見其書也故於李義山絕

句摘舉十數首推爲唐人冠冕視方回瀛奎律髓之獻媚陳黃力排

崑體者其識解亦能出當時風氣之外其中頗多宋人遺事不見於

他書者如所舉王荊公詩眠分黃犢草坐占白鷗沙二句則爲本集

所無寶慶初大理評事胡夢昱上書直言濟王事貶象州

方回桐江集讀胡評

事夢昱書跋言評事在象州作皂角詞有鐵漢之語而不記其詩

蔡光工於詞靖康間陷虜中辛幼

安常以詩詞參請之如此之類亦頗有裨於考證在宋人譚藝諸書

中實爲佼佼而傳本甚稀嘗舉以告張孝達尙書樊雲門按察皆詫

爲未見此本卷首有知不足齋諸印其中丹黃猶係鮑淥飲手校也

古今姓氏遙華韻九十六卷

鈔本

元洪景修撰景修字進可號達觀臨川人自稱布衣其事跡當考臨川志據景修至大元年戊申自序稱自咸淳戊辰始著是書積歲月得姓九百有奇鈔爲姓氏遙華韻參章定類稿千一百八十九姓無其人者無信不徵云云殆窮一生之力以從事於此書者首有至大三年程鉅夫及至大元年門人姜性仁二序其書自甲至癸分十集甲集十卷乙集十卷丙集十一卷丁集十卷戊集十一卷己集八卷庚集十卷辛集十卷壬集八卷癸集十卷此書見文淵閣書目四庫未錄阮氏經進書亦無之方氏蓋從豐順丁氏傳錄者其書以韻隸姓又采古今名人事蹟按次時代分隸各姓之後爲凌迪知萬姓統譜之藍本四庫錄凌氏書而不數景修此作蓋未見其書也考姓氏諸書自唐林寶元和姓纂宋鄧名世古今姓氏書辨證以後如洪忠

宣之姓氏指南

洪書今不傳

章定之名賢氏族言行類稿元人之排韻氏

族大全作者甚衆蓋由南宋啟割盛行務切姓氏類書雜出便於獮

祭之資

蘇東坡贈張子野孔毅父諸詩及山谷化鶴看羊之句亦均切姓不獨駢偶爲然也

至鄧名世且以著

書得官景修殆亦聞風興起者歟其書採摭既繁榛楛不剪如收辛

幼安而載其上梁一文未免支離已甚收秦少游而謂爲東坡妹婿

至沿市井之談

愛日精廬藏書志稱其戊戌集未附載黃更生王烈女傳一篇備錄全文與全書體例不符爲褒揚忠烈之意似爲

然所引元以前諸書頗有足資校正者如元和姓纂今從永

樂大典錄出者已非全書景修所引猶完本也

雁影齋題跋卷第四終

乙亥孟冬
男鑑恭校

國朝文概題辭自序

禹域叢書第三種

咸豐庚申春官再放過夏京師貧疾無俸而主人十室中皮書頗夥得以恣覽余性耆丁部於國朝諸家尤有雞跖之合始創意爲文概一書自是購之廠肆假之友朋至丁卯凡八年所見無慮數千家國朝人文亦踰千餘家手錄文目則於習見及坊間易購者置之凡得數百家監司江右此事亦閒爲之壬申歸田時時續訂方將分類葺書而遭慕閣夫人之變萬事決裂移家兩度散失遂多存者亦爲蟬鼠瞰半去冬遊滬又爲人所陷如入網羅自分此生讀書二十年學無所得著書又復奚望惟此數百家之文頗有世人眇見之作卷端題辭雖評語無當萬一而實兼小傳爲之亦有數事爲近人所未知者棄擲可惜爰錄置匣中凡六卷第存文目無題辭者舍之或有棄取得失久貯胸中而其集不存案頭則亦姑已亦無如之何也在園雜誌卷二云倪永清字世選詩最四集人各前一小傳後一小跋意不縛複句不雷同適如其人倪髯不知何許人詩最亦未之見人列一傳集爲一跋如其人已難之況欲意不複而句不同抑難之難矣葛莊謂永清一代高手輟生何敢望之至梨洲文海爲姚呂蘇三家後大著作以此繫之則令蠡無負山與井廡論

海匪所知矣

國朝文樞題辭卷一目錄

禹域叢書第三種

山陰張陶庵岱

新建陳石莊宏緒

南昌王軫石猷定

甯化李檀河世熊

永新賀子翼貽孫

新建徐巨源世溥

臨川傅平叔占衡

海甯朱欠庵一是

餘姚黃梨洲宗羲

南昌彭樹廬士望

黃岡杜茶邨濬

崑山預寧人炎武

崑山歸恒軒莊

蕭山蔡子伯仲光

寧都邱漫無維屏

仁和柴省軒紹炳

崑山葛龍仙芝

萊陽宋荔裳琬

宣城施愚山閏章

永年申鳧盟涵光

寧都魏東房際端

會稽蔣雲壑嶧

漢陽熊鐘陵伯龍

睢州湯文正公斌

商邱侯朝宗方域

長洲汪鈍翁琬

無錫秦留仙松齡

吳江吳漢槎兆騫

吳江計甫草東

侯官林西仲雲銘

新城王文簡公士正

遂安毛鶴舫際可

會稽孟次微遠

商邱宋漫堂學

無錫邵子湘長蘅

澤州陳文貞公廷敬

貴谿鄭次公重

丹徒張文貞公玉書

太倉吳梅邨偉業

益都孫文定公廷銓

上海李舒章雯

桐城姚端恪公文然

國朝文獻題辭卷一

禹域叢書第三種

清山陰平步青著

山陰張陶庵岱瑯嬛文集

陶庵爲文恭曾孫生長華隴少年頗事聲伎選舞徵歌國變後肥遯流離著書以老所纂凡二十八種有明於越三不朽圖贊尙有傳本石匱書爲谷應泰借刻易名明朝紀事本末夢憶刻入硯雲甲編及粵雅堂叢書史闕有鄭柳門信重蔡本而文集爲王白嶽兩謙芟定厘十之七未開雕乾隆中歸余浣公侍御給大觀樓王蘭上惠攜之入黔道光戊戌其子介峰上舍介臣校錄蘭上分爲六卷光緒丙子始授梓人黎文肅公叙謂其興衍瑰奇鄭柴翁珍謂精渾渾勝歸唐何論二十四家介峰謂天池以奇警勝先生以雄渾勝譽之似過即祁雪瓢原叙云選題選意選句選字不輕易下筆櫻桃館闕編何能過之白嶽叙爲不主一家而別成家亦非定評蓋猶是陸忠烈王諱庵倪文貞一流文字固文恭家法也

新建陳宏緒石莊初集二集鴻桷集寒厓近稿恒山存稿敦宿堂留書

西江自北宋歐陽王曾出以古文雄長。寧中南渡後有周益公元有虞道園明有楊東里。艾天傭國初有巨源彭魏石莊上掩東鄉下啓易堂。空所依倚一洗晚明纖細通倪之習。與榆墩足稱兩大。湘帆軫石尙在下風。不解李邁堂以古文正脈據爲西江所有。而所甄錄國朝文兩編轉以出隸外籍之熊漢陽爲首。不特年輩倒置也。第石莊遭國變不出與藥地諸遺逸爲石交。而恥躬堂詩集自叙云癸甲乙丙游止不時。僅一適癡山西谿。坐以謠詠舉未越境。自注造謠陳宏緒石莊志節宜與躬菴無差池。不知謠詠何事。諸家文從未有及之者。躬菴亦不詳著。豈有所諱耶。夏曠父最熟滄桑遺事。詢之亦無以答。石莊各集章門坊肆烏有。考四庫全書存目有陳士業全集十六卷。似各集多已不傳。鴻輒數宿兩種。卷亦闕少。非其原刻。無以證與彭相失顛末。三魏集盛行。榆墩尙有傳本。惟先生諸集湮砌將盡。段得田紱潛研堂集云多矣而不能傳。傳矣而不能久。傳且久矣而或不著。然則竭一生心力於文字。而江河不廢萬古者。一代有幾人哉。

南昌王軫石猷定四照堂集

軫石子少卽能文。其時竟陵公安派盛行。士多效之。詭瑣俚碎。文格日下。軫石取裁左國。自具機

杼間撫歐曾時出新意與石莊榆墩樹幟章門由是易堂諸公起咸知通經學古爲高雖李一足湯琵琶諸傳陳令升譏其不悅小說伎倆躬菴謂取炫世目不慮傷品竹垞亦謂學未成而早死然情至之作感懷家國悲壯蒼涼有不可磨滅者宜徐敬齋推爲開風氣之先汪文端公廷珍論西江文不首勺庭而稱軫石也唐小范與櫟下書謂其以大家爲法而其才其學足以副之可謂志專而氣銳矣

寧化李檀河世熊寒支初集二集

先生生勝國之末十冠諸生九蹟秋賦唐王時以漳浦薦不赴國變後遁跡空門所以不死者以二親在堂也文則甲申前多激發之響乙酉後增嗚咽之音與彭躬庵書曰平生事跡具見拙集藍鹿洲譔傳曰文章如韓心事如屈志節之清高與幼安伯仲余謂先生少好管韓莊屈其文痛埽鍾譚並埽王李自關畦町馮岑庵之圖叙謂得秦文氣多得漢文氣少視昌黎差遠蓋仿文泉子及漳浦爲多句亦詰屈不可讀其答陳復見書云作文字正如竹樹偃蹇巖戰門覆壓迸拆縫罅而出欹傾憔悴無復條理斯言也汨羅蹠則卓犖遼東然哉然哉原刻久燬此道光戊子餘姚

陳蘭垞垣令寧化時活字本謄脫無它本可對就可讀者錄之

永新賀子翼鮑孫水田居文集

子翼少工時文與茂先巨源石莊諸公齊名舉崇正丙子副貢生入國朝隱居不出順治丁酉巡按宣江上欲以布衣薦遂改僧服據蔡肇寄激書叙似卒於康熙丙子年九十一矣文筆奔放近蘇文忠集中史論最多它文意製峭詭有似柳州可之復愚者激書二卷包脊伯最愛之謂近似韓非呂覽而世少知者蓋嘉慶中駢體盛而散文衰桐城派尤易襲取脊伯與定菴原堂默深子瀟諸子出以丙部起文集之衰故有取於是其風實自陽湖惲李二氏昉於是古文復盛至於今不衰

新建徐巨源世溥榆墩集選榆谿逸稿

先生爲若谷少司空三子大司馬熊檀石壻勝國時已擅文名東鄉極重之東澗至推爲上下百餘年縱橫數萬里可與於斯文者惟徐生最愛恨別諸賦韓詩外傳故所作多仿文通抑揚盡氣意在筆先叙事澹蕩婉勁有韓太傅逸致晚作有絕類昌黎者餘或刻畫荆川鹿門閒類青藤深勘誤昨日中行三字係一字之誤

陽柄政順治戊戌遣司李持幣入山敦請堅拒不納三月四日之夕盜不知其未受乘夜偪之竟死非命或云熊文舉所使也檐暴雜記

卷二

引蔣心餘謂李太虛龔芝麓使人伺於逆旅刺殺之似

誤文集無定本集選爲妻兄熊熊山太常所刻僅十之三四陳伯璣刻入六家文嘉慶辛酉新建鄒意園布衣昉校錄百有五篇壬申羅竹邨孝廉安醵貲刻七十五篇餘無傳矣方出之序云讀書善考究有所見或一端深入必暢之馳騁秦漢唐宋惟取其氣最得先生之深詩話一卷亦得之妙悟當時與石莊並稱居易錄謂石莊文賜先生文潔猶塵見其表也明文案

卷二
百四

有贅結亭

詩叙應草叙二篇此皆無之或得之陳選魏和公所論彭劍伯傳亦未收末由核其異同也

臨川傳平叔占衡湘帆堂集

平叔爲明太常少卿槐子少學文於大士稱入室弟子以父罹逆案思瀚雪之讀書績文與興伯少遊切厲遭逢世變槁餓家園可云幹蠱其文旨遠詞危穆堂最重之誌蕭定侯墓至謂國初古文雪苑軫石勾庭堯峰竹垞皆健者而平叔爲第一蓋平叔以其學授之增黃若轅而定侯則黃增也語涉鄉曲未爲知言別有臨川紀三十卷編年國策四十卷五經翼鶴筆略荒莊漫筆董

糟邱崇明寺雜劇。今皆不傳。詩文集亦不可得。

海寧朱欠庵。一是爲可堂集。

欠庵舉崇正壬午舉人。入國朝。抱節高蹈。與李盩園同。國史可入隱逸傳。文筆高潔。無復社壇沾習氣。如其人。集板久佚。世罕藏者。同治癸亥。於同年金少伯舍人齋頭見之。論最多。凡九十一篇。取有史識者錄之。

餘姚黃梨洲宗義。兩雷文定後集三集文約。

曩官京師。有志於梨洲大全集之輯。歲月侵尋。校采未備。知不能成。所輯國朝文概。卷幾及千。大車塵冥。汗青無日。而余亦垂垂老矣。廩取文概題辭。編入昔廩。文則未暇錄也。梨洲論文。薄震川而宗潛谿。不名一轍。惟視其一往情深。從而攬撫之。今古之情無盡。而一人之情有至。有不至。凡情之至者。其文未有不至者也。故所作皆以情勝。惜抱則謂雖不入格。却寫得出。蓋不敢末殺也。文定文約共錄百篇。文之至者不盡於斯。

南昌彭樹廬士望。躬堂文鈔。

樹廬少負大志。周旋漳浦。立義聲於天下。入史忠正幕。以清君側干之。晚隱翠微。堅貞自守。躬耕食力。間以相地術游江南北。康熙甲辰。教授寧化。始交李寒支。以氣節發爲文章。務以理氣自勝。不屑屑於法。一主實用。蓋學宗陽明。而以念庵救其流弊。所至訪求隱逸。造就人才。謂有數十年閒。天下之病。小人中於僞。君子中於虛。君子無實學。以撥天下之亂。故小人益務於僞。不可救止。嗚呼。豈特明之季世爲然哉。子居謂文氣甚和而鋒不可犯。然非正宗。板久佚。子孫輯樹廬文鈔。減十之五。道光甲申。七世孫雲塹都轉玉墀刻之。咸豐壬子。重雕。視易堂九子文鈔中文。蓋倍之。黃岡杜茶邨潛變雅堂文集。

茶邨舉崇正己卯副貢生。壬午再乙北闕。入國朝流寓江甯。堅持高節。康熙己未。博學鴻儒之舉。遺老如梨洲。臬堂。鄧山青。主黃公二曲。無不名登啓事。而茶邨冥鴻物外。且於穆約人。應召遺書。規之。故其文別有寄託。不忘故國。舊君之痛。變雅名堂。其以此歟。杜來閣記云。文章之道。必博極萬卷。然後深。必矜慎名節。然後貴。必審擇出處。然後重。此三言者。足與堯峰學問。不可無師承。並傳而小倉山房文集。卷十與邵厚菴書。深不滿之。謂其文未是。無論其古不古也。殆以其破八家。

之樊而易視之望谿集外文十卷與陳占咸尺牘云遺集舊爲曹棟亭所藏後不知其所歸滄洲竟世諏訪未得其蹤近金陵一貧家婦出一二冊求售索價百金并古文幾二尺許則此二卷未爲完書也

崑山顧甯人炎武亭林文集亭林餘集

先生冠國史儒林傳之首學行無待贅述生平恥爲文人以文爲戒然其文未嘗求工而工於文者實莫之逮其至者當與天地永垂丁見堂論先生文明道紀政事察民隱樂道人善四者之外置不復作余則以彭尺木叙餘集謂忠孝大節具見扶世立教有功於後世文云乎哉

崑山歸恒軒莊元恭文鈔

恒軒爲太僕曾孫承其祖季思父文休家學少與亭林齊名有歸奇顧怪之目遭國變詭爲頭陀以遺民終所學不及亭林之大之富而志節則未有異也所著懸弓集三十卷無力彙行且或有忌諱語故自悶沈埋幾二百年久無傳本道光丁酉太倉季錫疇與常熟趙孝廉允懷始編爲此集張鹿樵觀察大鐫刻之獨行之士之文必不終晦於世也其文傲岸自異不事塗澤於太僕家

法稍異而阮貞孝傳因時之說足以羽翼太僕貞女論守志不嫁非禮之闕若致季滄葦侍御畫氣骨蕤然則與妄庸巨子之訶相似以之肩隨亭林無媿色云

蕭山蔡子伯仲光謙齋文集

謙齋所著經史合三百六十卷詩文詞賦百卷皆佚咸豐癸丑族孫陸士茂才等刻此距殉時百五十餘年矣先生與同邑包二先生秉德沈七禹錫毛十九奇齡皆淹貫博雅有包蔡沈毛之稱沈包逝世謙齋亦不出獨西河聲蓋天壤合集傳誦不休而三君姓氏今亦罕知可謂不幸然包沈文皆不傳謙齋則藏之名山歷久而豐城劍剛其文與西河上下足稱勁敵雖世胄清芬不墜王築巖所謂天地間至寶自有鬼神護持雖欲沈薶掩蔽不可得也徐徵之遺文四十篇附刻於後

甯都邱漫無維屏河東文集

邦士爲勾庭姊夫少從學古文者也勾庭謨傳稱其人高簡率穆讀書多元悟生平最得意所自作時文包籠三百年先輩大家之長而別出機軸然古文獨爲吾鄒所推晚精西洋算術易數曆

法不假師授冥思得之著有易勦說易數歷書皆未竟古文一字不輕下吾輩立意爲世所不可少人先生自然爲所不可及人子居謂其文奇澹不蹈襲前人一語一意今讀其文橫厲恣肆與勻庭並爲奇傑而面目似稍不同

仁和柴紹炳省軒文鈔

省軒在西泠十子中文名最著四庫全書提要謂其文清快有餘而根柢較薄金石之文尤無法蓋長於持論而短於敘事云文家以敘事爲最難國初諸老皆然不獨西泠社稿也

崑山葛龍仙芝臥龍山人集

龍仙爲明魯生太常錫璫孫張南郭采壻好理學家言尤喜陽明遺書甲申夏走姚江友其私淑者乙酉春迎史拙修孝威至吳問道有得其文章爲同志所推發淒清之音而不入驕亢多悲愴之辭而不流怨誅不談經而有淵思不言理而有微詞飛遜自放在國史可入遺逸傳此爲原刻傳世甚稀朱蘭坡國朝古文彙鈔二集始採之

萊陽宋嘉裳琬安雅堂文集文集又未刻稿

荔裳註古文名滿天下。有南施北宋之目。余幼時讀坊本題林鐵崖馬伽沙畫卷而好之。求全集不可得。辛未臘月。於李香府同年假讀。詩固與愚山抗衡。文亦如之。堂名安雅。君子之言。洵有本也。四庫全書存目。屢收安雅堂拾遺文二十卷。乾隆丙辰。族孫邦憲所刻。與此異。惜未登天祿也。宣城施閏章愚山先生文集

宣城之詩。敦厚溫柔。得風人之致。其文亦然。當時與荔裳齊名。四庫全書提要云。撫放歐曾不失渠度。視其詩品。則少遜。今讀之。純古淡泊。似駕安雅而上。若近日湘鄉曾相侯論文。以茹遠潔適爲文章之美。愚山庶幾近之。

永年申梟盟涵光聽山集

聽山爲端愍公長子。抱王哀之痛。隱居躬耕。課兩弟涵煜。涵盼。力學成名。州縣舉孝行。魏文毅薦隱逸。皆力辭不就。北方同時講學。容城祁州外。端推先生。所著荊園小語。爲家塾課子弟第一善本。與周減齋書云。作人作文。總非至誠不可。彼浮華者。朝露耳。而自序謂生平專力於詩。古文未嘗深究。蓋甘苦有得。自道其長。亦不諱所短。非遜辭也。可謂不自欺之君子矣。與朱竹垞書。謂身

在草野亦復無文可作。尤爲妄作者。箴砭賣文爲活室。翻倒懸。固自卑其品。即謨慕得金。抑不免爲劉叉所薄哉。

寧都魏東房際瑞伯子文集

翠微三魏名滿天下。叔季隱居客遊。不撓世網。東房爲門戶計。應試就記室。久客浙學。卒以哲爾肯使招小淮陰。爲孫旭所賣。欲紓桑梓之禍。致隕凶刃。嗚呼慘矣。李子文集卷九。答鮑子詔尺牘云。裘御史爲先伯兄訟理疏。據御史題名。康熙二十年。有裘充美。仁和人。丙辰進士。由中書考選廣西。自巡鹽兩淮。殆卽其人。疏上而無卹典。或大任方居京邸。部議不爲東方白耶。大任以十六年丁巳十月十四日殺東房。十七年二月二十日康邸奏大任與陳堯元李懋珠等率僞官九百五十四員。兵一萬三千三百十九名。投誠命遣兵驛送大任等來京。其文以巧力變化而合規矩。蓋能用法於無法之先。若絕不類古人。而古人之法具在。斯真善用法。而以法勝者矣。賦詩詞似皆不逮。附詩經原本正韻。竊取切字訓形言四種。竹垞頗言其誤。予亦不解也。

會稽蔣雲壑嶧斯友堂集

雲壑爲趙壁雲何弟子棄諸生隱居南塘僅順治丁酉一踰省闈與倪穗先陳介立各著史論以見志人不下百十篇今附刻十一篇與姚胄師許又文爲文字交康熙壬戌著作燬於管川存者皆晚歲酬應之作文學西漢意在以質救靡蓋聞幾社之風而起者國初吾越文人大半出陳忠裕門故流派如此雖擬議未純要以古學相砥礪非枯槁石隱者流也粵逆亂後越中先哲別集甚稀同治辛未八世孫志杰重刻皓城同年黃鞠人轉饒南歸持以相贈後有甄錄越文者當在所取焉漢陽熊鍾陵伯龍穀貽堂稿

鍾陵臚傳上第以時文冠世雄深雅健與龍首劉黃岡並稱兩大黃岡古文不合格先生稍醇雅然不敵其時藝之精李邁堂錄國朝文以其爲進賢產而楚籍取冠一代謂置諸陳張兩文貞間無媿色予不以爲然更定其目以石莊居首續錄則以巨源易姚端恪皆江右人也

睢州湯文正公斌潛安先生遺稿

文正大儒爲昭代冠文存不多而一往清迥別具畦町高古簡質掃盡學究陳腐迂語邁堂謂兼理學經濟文章而一之者宋惟朱子明惟文成我朝惟公會文正公日記則不愜其傳狀碑銘之

類而以語錄告諭書牘之屬皆有誠意挾正氣以行學問本極淵博講學又甚平允不可及也識者以文正評爲然

商邱侯朝宗方域壯悔堂文集

雪苑倡爲韓歐之文於舉世一爲之日矯變不測而才情橫溢足以達之青門云雄視一世漁洋云近日第一堯峰云甯南傳

其佳者不脫小說伎倆茶邨謂其根柢不堅梨洲謂其不多讀書勾庭謂其本領淺薄漁洋又謂

其寧南傳回護失實危盟謂其爭鮮情實子居謂子槍情氣里然亦就其三十七而勦論之耳天

假之年豈無進境材老而學底於成詎復有議之者焦南浦謂歸太僕集外尙有無數好文章恨

未見耳王秋史信相傳譚語云云集于辛卯下第後數日成之者故文雖奇而事多失實豈其然

乎張南山本青門說謂其以氣勝李邁堂謂純以神行則定評也

長洲汪鈍翁琬堯峰文鈔

青門叙三家文鈔云侯以氣勝魏以力勝汪以法勝而叔子答計改亭書則云侯肆而不醇汪醇

而不肆。姜醇肆之間。蓋以其拘於法。故不敢肆。非不能肆也。梨洲評其文曰。無可議。必不傳。子居謂其袍袖氣。重未免過當。予此集甄錄。頗較諸選爲夥。以近出散文。多不講法。夫爲文而無法。則亦何所不至。高才者自著一書可耳。何以文爲。

無錫秦留仙松齡蒼峴山人文集

蒼峴生於世族。再入承明。其文高秀從容。最爲有品。孫文恭元孫小峴。以經學詩古文世其家。毗陵多才。未能或之先焉。

吳江吳漢槎兆騫秋笈集

秋槎登順治丁酉賢書。爲讎家所中。遣戍寧古塔。康熙辛酉。以長白山賦奏御。又得東海爲道地。於明珠。賜環歸里。顧華峰之力也。迺生入玉門。甫三年。遽捐館舍。可謂極才人之阨者矣。前四卷東海刻。後四卷則其子振臣於雍正丙午續刻。駢文向與迦陵齊名。集僅四篇。餘皆散佚。寄華峰改亭書。語沈痛。不堪卒讀。當與柳州寄許京兆諸書並傳天壤不朽矣。

吳江計甫草東改亭文集

崇正辛巳改享年十五補諸生甲申作籌南五論上史忠正規畫詳盡可見施行忠正奇之雄才大略有同甫稼軒之風遭世變讀經世兵法陰陽占候靡不通貫順治辛卯僅副鄉書丁酉舉北闕旋因秦銷案革去游跡幾半天下在彰德修謝茂秦墓過順德求震川判郡時遺跡於廢圃焚香再拜至吳門稱門生於黃孝子向堅人皆賢之予謂先生過宜溝謁子貢祠廟兩過大伾謁子貢墓伏地哭不止尤非時流畷名所及嘗謁睢州講程朱之學少游天如門又從堯峰講歐曾之學故學有原本行文善於擺落醇正和雅不得以鮮深湛之思少之據族嫂湯烈婦銘云仲舒以赴我父之難時爲順治丙戌或父亦遺民側足焦原豫於吳忠節易諸公太湖義師耶匪所詳矣侯官林西仲雲銘挹奎樓選稿

西仲初刻損齋焚餘燬於耿逆之亂繼刻吳山穀音流寓杭州時作其後合爲此編論文祖述卓吾所作筆意修絜而法窪易盡未足語於作者之林所選古文析義增補二編朱文端叙古文雅正議其玉礫雜糅而里塾傳誦至今則以鹿門在陸武朝歸愚諸選篇帙繁夥學者苦不易讀不若析義之簡瑯易竟也其三四兩集與國朝文分經世持世榮世小品者今皆不傳又有莊子因

楚辭證韓文起三書評註皆爲舉業設於古文無當也然爲推官治獄有聲有新安讞讀三十卷裁缺家居不從靖南迫脅逆命幽囚問悔無愧貞臣功名學術雖遙榕邨無山大節豈可沒哉

新城王文簡公士正漁洋山人文略 蠶毛文集 續文集

新城之詩與秀水並稱兩大竹垞詩伯又雄爲國初第一新城文遜於詩而叙記雋逸有魏晉風味題跋評隲不爽碑傳書字尤得史裁蓋皆有卷軸以運用之張南山論文云朱以學勝吾謂文簡亦如之

遂安毛鶴舫際可會侯文鈔

鶴舫少工韵語後以肆力古文精力短淺不能兼綜並致絕筆不爲詩者十餘年其專壹如此辦香南豐寢食其中未嘗暫釋其文清夷深遠不乏風韵以祥符知縣舉己未大科試而不遇政績多可紀視從兄質菴檢討升方古獲齋駢體文今無隻字流傳楚枯不同傳派亦異人豈必藉祿位而始重乎初名安序堂文鈔康熙己亥方文輔重輯此卷同

會稽孟次微遠集

監州爲子塞廣文仲子少與張用賓駱叔夜姜武孫爲越郡四才子而九試棘闈不第考職州判亦未銓援實缺以視用賓早實於兵詩文皆不傳似爲勝之較叔夜武孫則所遇不同矣文長於持論近蘇文忠公而敘事頗得龍門神理全集不可得所見者傭庵北海集一冊傭庵集一冊二者皆其子目無一記叙之文非完帙也

商邨宋漫堂塾西陂類稿

太宰起家任子洵長六卿而博通典藉撫江西江蘇宏獎風流士林充賢之縣津山人詩與漁洋並稱所謂王揚州與宋黃州也百年論定有以附庸風雅目之者文則更遜蠶尾三家文鈔堯峰蠶尾諸叙意態頗近青門或疑青門客其幕久殆經潤色點定無可考也

無錫邵子湘長衡全集

青門之文漫堂與侯魏並稱徐敬齋謂其敘事尤工而痕跡未融李邁堂并謂其醞釀未深以阮亭稱其學荆川之學然視叙廣右戰功傳周襄毅尙遠豈知青門於荆川文徑各別阮亭姑譽之而邁堂姑靳之非知言也或曰國初文學龍門者多而兼法班掾者惟青門一人惜知之者眇徒

膾炙闔典史傳謂以叙事見長耳予少嗜解春集後得此集知山公波瀾意度全出於此學之三十年去之尙遠遑論唐宋大家哉或人之言較諸家爲得其真也

澤州陳文貞公廷敬午亭文編

文貞弱冠登朝致位宰輔承明著作雍容揜揚竹汀跋其註謂爲我朝之周益公今讀其文淵雅紆徐修潔自憲以廬陵爲宗頗與明揚東里相似而易名同之烏程嚴大令謙謂我朝宰相以古文名者四人孝感桐城安谿與公予謂經義齋榕邨皆以講學名文筆初不經意篤素堂集似不逮公與驂隙者其丹徒張文貞公平前乎公居揆席者陳溧陽石雲居士集高文端古處堂集成大名清慎堂集金文通集王文通鐵山文集胡井研秀巖集孫文定止亭文集魏文毅兼濟堂集王文靖公集黃文僖范露堂集梁真定蕉林集徐崑山含經堂集李文定容齋集吳文端思誠堂集後乎公者王太倉西田集王文恭世恩堂集鄂文端西林全集程文敏師善堂集彭茶陵墨香閣集徐文穆文集阿文勳德蔭堂集汪文端松泉文集梁文莊矢音集孫文定公集劉文正公集劉文定繩庵內外集陳文恭培遠堂文集莊番國滋圃文集於文襄素餘堂集

未刻

程文恭雪堂文

集蔡文恭緝齋文集梁文定敬思堂集劉文清清愛堂集王文端葆淳閣集彭文勤恩餘堂輯稿

孫文靖百一山房文集

未刻

朱文正知足齋全集紀文達公遺集百文敏守意齋文

未刻

蔣襄平繩樞

齋文鈔汪文端實事求是齋遺稿潘文恭思補齋集阮文達研經室集湯文端寸心知室存稿彭

文敬歸樸庵初刪稿倭文端公遺書凡五十一家今多不傳予所見僅二十三家若以宰輔而兼

文苑之長二百四十年來斷以曾文正公爲冠微特孝感三公卽兩文貞亦似遜之

貴谿鄭次公重靜庵先生文集

靜菴溺苦於學讀醉書齋記儼若爲予寫照詩多壬子副王文簡公使蜀時作波瀾意度遠遜漁

洋文則叙記洗盡浮蕪獨標清韵書直抒所見漕議一篇勾庭叙尤所推重邁堂則最愛與諸弟

姪論文書蓋各有所見要可肩隨蠶尾矧年甫強仕使得大年如文簡可量其所至哉

丹徒張文貞公玉書集

京江爲康熙朝賢輔少時制藝以風度勝與韓文懿並爲正宗古文亦略勝寒碧同時綸扉諸公

當與午亭抗行篤素堂不及也碑板文字多爲開國將相而作紀事等篇可考興朝掌故則兩文

端集中皆無之

太倉吳偉業梅村集

婁東註名蓋代文則四庫全書提要謂參以儷偶既異齊梁又非唐宋殊乖正格梨洲譏其張南

坦柳敬亭二傳皆失輕重爲倒卻文章家架子改爲石工說書

文定前集卷十

予謂散文中時出偶句乃

晚明文集家習氣卽梨洲猶時不免不獨梅村詩人無韵之文率不可讀梅邨文遊於詩誌表諸篇猶有可讀者論國初文固不能舍旃舍旃

益都孫文定公廷銓泚亭文集

文僅二卷非公手定乃門人慕中丞天顏所編四庫全書存目提要云國初景運光明人才蔚起孫文筆雖未能與一時作者抗衡而平正通達究無纖仄嚙殺之音蓋時會之盛爲之也予謂公漢史億持論多可取顏山雜記則頗有鬪亭柳州意致勝文集多矣

上海李舒章斐齋集

舒章生勝國之末道喪文敝東澗東鄉思以唐宋八家起之猶未復古先生與陳忠裕共主幾社

禹域叢書

國朝文概題辭卷一

十一

獨以東漢六朝之學掇才豐學瞻古文句耀海內力埽竟陵公安又防李何王李流弊雖宗尙太過神變不足其時有枇杷晚翠之嘲而深旨宏議堅光錯采雄言傑盼與荀李揚馬同風於戲盛矣忠裕殉國先生聖父死闢難北行扶匭遂以中書委質新朝一時高文典冊多出其手蔚然華國之光睿忠親王答忠正書尤爲傳誦所謂開國移書稱第一也丁亥遂卒得無可故人慷慨奇節江關蕭瑟嗒焉神傷不幸如梅邨自訟因之早嘗其生耶後集五卷已奉禁世無待本此集題多與忠裕同蓋幾社壬申文選互相剽刃之作也

桐城姚文然端恪內外集

桐城姚端恪公登崇正癸未進士國朝丙戌以薦起官歷刑部尙書長於奏疏居言路建白最多家居十四年與當路書爲桑梓陳說利病如與蔡潛帥士英張撫軍朱雲門中丞使筆如舌皆明目張膽言之而與查孟如兄弟復程賓梧二書閱歷人情深明天道尤爲菽粟薇蕢之文韓文懿叙稱爲有德之言不當以文字論也

國朝文極題辭卷二目錄

江都汪蛟門懋麟

崑山徐健庵乾學

安谿李文貞公光地

武進趙恭毅公申喬

平湖陸清獻公隴其

吉水李醒齋振裕

長洲韓文懿公荃

歙洪去蕪嘉植

益都趙秋谷執信

宜興陳其年維崧

秀水朱竹垞彝尊

吳江潘稼堂耒

臨川李石臺來泰

長洮尤悔庵侗

蕭山毛西河奇齡

華陰王山史宏撰

蘄州顧黃公景星

寧都魏叔子禧

秀水李武曹良年

東臺王石袍大輕

廣濟金穀似德嘉

武進董文友以寧

桐鄉俞寧世長城

儀封張清恪公伯行

寧都魏季子禮

寧都魏興士世傑

常熟陶子師元淳

餘姚邵念魯廷采

錢塘馮山公景

寧都魏昭士世微

大興王或庵源

蠡縣李恕谷堪

宜興儲同人欣

寧都魏敬士世儼

高安朱文端軾

禹域叢書

國朝文獻題辭卷二目錄

二

一

慈谿姜西溟宸英

宿松朱字綠書

茶陵彭石原維新

淳安方朴山葵如

桐城方望谿苞

臨川李穆堂紱

漳浦蔡文勤公世遠

鄞徐耿庵文駒

歸安茅鈍交星來

常熟陶退庵貞一

全州謝石霖濟世

吳縣楊文叔繩武

南昌萬孺廬承蒼

合河孫文定公嘉淦

寶應王白田懋宏

錢塘厲樊榭鶚

華亭黃唐堂之雋

宜興儲畫山大文

又

國朝文概題辭卷二

禹域叢書第三種

清山陰平步青著

江都汪蛟門懋麟百尺梧桐閣文集

蛟門文學荆公荅郵叙稱其文第一註二詞三文質堅氣厚才地有餘而一稟於裁高古頓挫邁堂則謂書傳再佳叙記間有鈍冗板拙健菴誌其墓稱辨道論爲朱方旦扇惑朝士昌言以排之今集中未收又云勅後其兄叔定集其遺稿十餘卷刻藏於家今亦鈔行世此集入四庫全書存目坊間烏有

崑山徐健安乾學懋園集

東海爲顧亭林氏甥學有淵源兄弟皆登鼎甲官宰相尙書侍郎聲名蓋世傳是樓藏書最富又強記者學無一日釋卷六藝百家靡不貫串發而爲文雄贍典則以文學受知奉詔有所撰述未嘗不稱旨郊社壇廟配位及視學日講儀注皆出其手集中奏疏考辨論說皆是也總裁明史大清一統志雖集羣才發凡起例折衷討論要推公爲巨擘蔚乎經國之大業矣天下士奔走其門

顧亦以此招彈射。幸聖主保全恩禮始終。可謂極儒臣之榮遇。已卷二十一。陳其年湖海樓詩集。叙見湛園未定稿。不同者。屢十數字。以此推之。則集中鴻篇大文。或有幕客及門下士捉刀者。不。屢讀禮通考一百二十卷。爲萬石園徵君纂也。

安谿李文貞公光地榕邨全集

文貞學宗朱子。幾於規目撫形。著書之多。亦如之。當時與睢州當湖並稱三家。文則格仿昌黎體。近南豐四庫全書提要目爲閎深肅括者也。

武進趙恭毅公申喬贄稿

恭毅起家縣令。歿歷封圻。官至戶部尙書。爲康熙朝名臣。始宰商邱。飲冰茹蘗。予七世祖漢凝公。與之同僚。相與攻錯。中州同推爲廉吏者也。集爲公孫侗數所編。凡例稱凡有條奏連章參劾。而不以爲苛。坐名薦舉而不以爲黨。一事再三執奏而不以爲瀆。陳一言梗議盈廷而不以爲立異。於戲公誠強楷鯁直。然非聖主能容人所不能容。公亦烏敢言人所不敢言哉。平生自治官書。不延一客。雜文似未成家。然傳文叔書溫公詩後云。讀宋六家書久之。使才者喜爲文。讀韓忠獻與

司馬文正文則不敢復肆一語余於恭毅亦云

平湖陸清獻公隴其三魚堂文集

清獻爲純儒爲循吏爲直臣。勅後從祀孔子廟廡爲國朝儒者第一流。生平造詣務在躬行實踐。不欲爲文人。不刻文集。爲文亦不屑規撫形肖。意到筆隨。直抒所見。提頓鈎勒。法度井然。有德者必有言。一人而立三不朽。蓋於諸經注疏。反覆參考。不遺餘力。發而爲文。根柢深者。枝葉鬱然。於講學家語錄。性理外概置不觀者矣。

吉水李醒齋振裕白石山房稿

尙書爲兵部侍郎石園元鼎庶子母遠山夫人爲明石城王府宗女起家檢討歷戶部尙書督江南學政時憐才好士最有聲文則寬博有餘不免冗漫有可乙處惟禹貢雖指谷邨幹譜二序不蔓不枝合作也康熙庚戌榜多名臣先生廁其間似益腰要非僅恃科名祿位以傳者

長洲韓文懿公荻有懷堂文稿

文懿寒碧齋稿衣被天下說者以爲起衰之功不下昌黎不知其古文實在時藝之上公亦自言

它日可傳在古文而不在時文。柳南隨筆謂其筋力於南北二史疏疏落落如不經意而每篇必有一二會心語品格當在堯峰之右。集頗魁見今亦無知而誦之者可勝喟哉。咸豐壬子余館五知堂任氏讀之嚴謹有法勝其師徐東海多矣。

歙洪去蕪嘉植大蔭堂集

匯邨居士歙產而僑居江寧康熙辛亥與熊文端公講學著有易說春秋解農田聞記封建宗法等書皆未之見或本未行世也集無卷數而有墨點圍不知出何人手記爲上傳誌次之講學家率不措意於文詞若去蕪者亦當時所稀者矣

益都趙秋谷執信飴山堂文集

秋谷娶孫文定公女孫爲王文簡公甥以求觀海集叙相失遂爲談龍錄一書實則先生詩清激矯然自立本不藉依附漁洋以傳雖邊幅稍窄少遜精華要不失爲大家南查北趙固施宋宋王外勁敵也文亦力去陳言氣象在蠶尾之亞沈敬亭光祿叙謂先生早貴才氣魄力頗視儕輩微皆被黜才無所施偶觸於文不自知其鋒鋷鏘鏘激蕩低昂以攄其磊落之概可謂深知先生者

矣

宜興陳其年維崧迦陵文集

迦陵以四六填詞名一世而散文亦駸駸入古蓋少時受業於吳忠節公應箕徵異幾社諸家爲駢儷樂府所掩故後人尠稱之者鄙意四六雖以才氣馳騁見長而尋櫝者多已同嚼蠟轉不若此集之可翫誦私以爲己未詞科中雖不及西河竹垞以之驂驪堯峰稼堂或可雁行中有駢文十數篇亦高出檢討集上說者謂程叔才所注乃其外集頗軼程之買櫝還珠厥說或非妄哉

秀水朱竹垞彝尊曝書亭集

秀水少逢喪亂棄制舉肆力古學覃究六藝之情於注疏務窮其指歸好金石搜剔考證與史傳參互同異其爲文益奇於辨證尤精博極羣書考據古今人物得失爲最工而經傳亦多所發明王魏二敍皆實錄也吾浙國初諸文家林立而博雅咸推先生第一西河狎主齊盟然稱兩大以言乎字字有本古人所無有者勿道則西河猶遜之答胡司臬書自謂文不入大家遜辭爾先生雖由布衣起家鴻博供奉南齋而爲高江邨所忌嫉嗾牛鈕彈之去職而韓文懿公嘗曰吾貴爲

尚書何如秀水朱十以七品官歸田多讀書萬卷哉然則後之躬耕菽水者胡不讀書

吳江潘稼堂未遂初堂集

稼堂姿稟絕人強記博覽又從徐侯齋顧亭林遊故所學具有淵源文亦得之師門而以氣勝蘇文忠所謂辭達者庶足當之山水遊記狀寫景物最工禪喜文士昔人推爲第一亦猶文忠字字華嚴法界來也

臨川李石台來泰蓮龕集

石台制藝膾炙一時與唐宋臣有李唐之目初後宜黃士子與徐澄萬刻爲合稿迄今猶語丐後生奉爲金科玉律詩文義旨微遠聲律紆徐無雕鑿之迹肆而能醇華而不靡蓋師承有自故體格宏麗不獨璇璣玉衡賦阮亭推爲鴻博冠場也司虞衡監督節慎庫譯滿文冊籍盤兌現貯寢軒民張國紀採衢信徽木議弓角折價不可多督理上江學政典湖廣試識拔得人督儲蘇松揭家米食之隔歲巡漕權關汰陋規嚴官兌皆有惠政解組時年僅三十九乙巳起整飭蘇松常道任事廬五月丁未裁缺歸家居九年乙卯四月十六日罹撫州知府王永茂之構籍沒十二月事

解而家破書燼矣。自纂紀年一卷止。此戊午被徵官侍講。分纂明史宗室官師列傳十餘萬言。壬戌以試事冒寒得疾。未六十而卒。年不稱位。未盡其才。世但以時文奉爲大宗。末已。

長洲尤悔庵伺西堂雜俎 一集 二集 三集

悔庵少與湯卿謀齊名。所作大半仿孫樵劉蛻。間爲遊戲。如討蚤檄。天語所稱爲奇文者。世以爲才子之文。於文家自爲一格。迄今少年有才而不說學者。皆喜爲此體。其實先生自名雜俎。不以入集。觀鶴栖堂集及分纂明史志傳。至三百篇之多。殊不如是。集未得見。雜俎則坊間盛行。才調俳體禪喜文字盡於此矣。

蕭山毛奇齡西河合集

西河合集內文集凡五十三種。爲卷一百二十九。多矣哉。古未有也。然其中闕者四卷。制科雜錄。後觀石錄。越語肯綮錄。何御史孝子祠主復位錄。湘湖水利志。蕭山縣志刊誤。杭州志三詰三誤。辨天問補注。八種當別自爲書。與勝朝彤史拾遺記五種同。而莫春園叙錄人之文集。誤也。西河經學堅僻。自是排擊朱子。以此不得入國史儒林。夷之文苑。而古文得之雲間陳忠裕。加以博與。

宏整與竹垞皆以才豐學贍雄峙浙東西苒苒堂推爲傑出世罕其偶乾隆中越人如茹三樵范
蘅洲先高伯祖火蓮居士猶紹述其學今則人眇知之合集板存無刷印者然其文縱橫博辨與
經說相表裏議論獨到處實一代之雄非鄙人鄉曲私言也

華陰王山史宏撰砥齋集

山史爲明南京兵部侍郎鄰舉士良五子補諸生國變後偕兄石渠宏學雲隱宏嘉隱居講學與
亭林顧氏最善顧亦極重之久留華下蓋依先生以居所謂秦人重處士講經學也關中自明空
同高言秦漢秕糠八家後起者多宗其派流爲廣鼎山史出而始軌於正戊午與三李並徵名益
著而至京稱疾不入試集中文如論于忠肅論三案卓識定評氣蒼筆老二曲天生固遠遜之河
濱亦未逮也

蘄州顧黃公景星白茅堂集

黃公負經世才少時作守令兵制巡按募兵水軍五策及復經學議而不見用入國朝以遺民終
戊午大科之薦稱病行催不到文則不立閒架不講腔調蓋埽鍾袁兼埽歸茅破八家之樊柵而

自成一格非有意爲之者豈但言段落起伏呼應爲工所能學步哉

甯都魏禧叔子文集 外篇 目錄

勾庭文學莊孟老蘇以識議勝主於用世而不爲空談當時與雪苑鈍翁三峰鼎峙學者宗之無異辭隸乾隆而稍衰道光以後考據及桐城派漸熄世變多故於是復有理董識議之說而爲之風會所趨有不知其所以然者諸家論軒輊不一其評同時作者謂侯肆而不醇汪醇而不肆姜在醇肆之間論姜實所以自謂蓋其長在敢肆能肆勝汪以此皮相者迺見爲肆而不醇子居謂槍棒氣重與雪苑埒過矣管韞山謂日讀叔子文一篇增長識見先師邊雪坡亡友賈雪持皆心摹手追李越縵論定國朝文以魏方憚爲正以李胡龔爲奇世之講姚梅派者聞之當何如

秀水李武曹良年秋錦山房集

武曹少見軫石雪苑文曰是不難遂與中表竹垞共爲古文所作清婉悠揚惜存藁不多不及暴書亭之侈富當時雖與竹垞齊名已未以虞兆潢姓名應徵而仍被落客游幕府蕉萃以終所選文緯亦未成臺遂湮沒其時海內文人郵筒驛使投贈滿插架使遺藁猶存則國初名家別集不

傳與夫無集諸文必可甄錄有資鄙著文極不少然則文粹文鑑文類文衡之傳亦千百文人之精魂訶護之夫豈姚呂蘇程四人區區棲葺之力哉

東臺王石袍大經獨善堂文集

修冰子好學勵名節明季嘗應童子試入國朝以布衣授徒養親康熙間魏侍御雙鳳巡鯁見其文曰當世軼才也薦諸朝辭不赴戊午大科詔下郝太僕浴將薦之又力辭嘗爲許由巢父論謂堯舜巢許皆治亂之聖人堯舜以有用爲用許巢以無用爲用學堯舜者必先自巢許始意在授徒講學者無真學術砥飾高行者無真名節所謂亂生於求求生於欲多所欲則多所求皆前人所未及言者也別有周易釋箋九種惜皆不傳

廣濟金穀似德嘉居業齋文藁

鄂居天下之中人文科名亦盛而國朝別集頗稀國初茶邨黃公二家外繼武者當推先生壬戌登第年已六黼元墨大器榮旋奄有熊劉風範古文亦格意高簡不欲以才氣馳騁見長閱肆臆博雖損杜顧而典則不支尙存先民桀黷異於攬拓叢碎者矣

武進董文友以甯正誼堂文選

集初名國儀集又名正誼堂文起此爲宋漫堂太宰選本祇九十篇非全集也文友詩詞與鄒訐士文與邵青門齊名當時與堯峰並稱惜強仕之年已歸道山以此所作不及堯峰類臺青門全集之隆富此選似卽出青門代太宰爲之者流傳亦罕文之成名行遠與否似有數存乎其間已亦不知其所以然仰屋梁而腐頽不輟者必爾自娛已耳災梨覆瓿詎必遂以是分工拙乎

桐鄉俞甯世長城可儀堂文集

桐川深於制義所選百廿名家文風行宇內所自作善用短句人尠學步之者古文今少傳本刻入藝海珠塵全集者厘此二卷皆解辨論議之文度未爲完本也行文取法盲左腐史獨抒所見亦復喜爲短句與制義同李邁堂以晏平仲宋太宗諸篇爲深文周內然其佳者不可揜也

儀封張清恪公伯行正誼堂文集 續集

清恪墨守程朱彙宮中外有聲所著各書以明道覺世爲已任不沾沾以文辭爲長所謂布帛菽粟異夫摘華採藻者也文集入四庫全書存目續集無之邵陽魏氏皇朝經世文編中宿遷駱馬

湖壩說治湖雜論塞運口說運河原委運河總論袁口開啓閉議戴邨壩議治河附論八篇均采之居濟一得中別集編文未盡者必當兼攬所著各書始無遺略此章實齋氏所以有裁篇別出之議編校文史者不可不知也

甯都魏禮季子文集

吾廬少勺庭五歲少受法於兄文好周秦諸子及其成也則近柳州足跡徧天下求士結友與兩兄同

甯都魏世傑興士文集

梓室爲東房子從勺庭講論最久得窺古文門戶勺庭嘗謂及門中將來可獨任事讀書處世有成立不幸遭東房之變從和公夜行八十里往視父歛拔佩刀自刺者再爲人所持遂奮拳椎胸死血結少腹目終日上視痛僂不能立踰二十日竟死東房既罹凶刃興士殉之學將成而不克底於成李寒支所謂造物奪其垂成而造就以死孝之名宜勺庭之重哀痛惜也

常熟陶元淳子師先生集 南屏集

紫司工制藝文博覽史傳志在經史戊午大科項侍郎景襄欲薦之再三辭何光祿復登剡牘跨驢歸中途聞南來者云州縣逼迫乃以十二月朔反轅赴吏部以病告其答客問云曠典宜精求天下鴻碩之士多不過數人今天下學問之博無過崑山主者不以上聞而濫及予求免訕笑非輕之也按亭林不與鶴書乃其甥三徐深知其必不事二姓不敢妄徇非主者遺賢也而與畢公權書迺云所取五十人舍舊詞臣外閒有一二知名士而蕘兒牧豎雜出其中有王者起必加誅絕何光祿之舉怒而斥之子師吳中男子能與平立乎嫚罵無理疾之已甚有王二句尤爲狂易獨不爲明詔地乎宜元功謂其憤不與選葉文敏并有微服往窺之蟻皆自取之也陶有駁文敏皇輿表評顏孝子傳二文又擠其兄奕苞兄發其隱慝文敏積怒遂移之陶戊辰會試初擬第一以策陳會推之弊主文者抑之殆王殿試又論東南賦重請減浮糧梁真定讀卷置二甲又忤翁叔元不得館選歸班選昌化有惠政以勞勩卒官入國史循吏傳而生前之阨塞極矣文則雄辨而肆初刻厯南匡集四卷遺文一本近楊太守沂孫刻之代人作及酬應者去十之四少年時志學集略刻數篇皆非其全也

餘姚邵念魯廷采思復堂前集

念魯祖魯公父貞夫世傳陽明之學先生亦以致良知爲宗文則師梨洲翁山亦曾問業於西河不妄作嘗曰文章無關世道可以不作有關世道不可不作卽文采未極亦不妨作老於章逢而覃精史學章實齋氏推謂合周程張朱韓柳歐蘇爲一人未免過情謝山則以迂陋吹之蓋卽以其文采未極第欲復封建行井田改學校生今反古言之詎能行者大儒經世之學庸如是乎集分前後此其前者而版心或署初集或署二集頗不畫一殆身後門學子開雕未詳校也

錢堂馮山公景解春集

山公十七爲古文清峭歷落多釋經之作嘗曰學者當師經師經必先求其意發於文輝光又曰作文之法以簡爲高以潔爲貴不簡不潔易薄弱而多蔓雖受法於青門而自得爲多徐敬齋極重其文而厯鈔五篇何其隘也

寧都魏世微昭士文集

耕廬爲和公長子從勺庭學古文十年嘗問其文何如勺庭指江中灘石曰汝文似此矣蓋筆氣

頗肖其父特少展拓耳

大興王或庵源居業堂文集

或庵恢奇人也少喜任俠言兵所慕惟武侯陽明而目宋儒爲迂闊從勺庭學古文自謂左史昌黎外無北面者晚事顏習齋自負經史學益堅曰吾學今始可見之行事然卒不得試以効亦可哀已勺庭門下以或庵與梁質人最爲傑出或庵文豪勁遠出懷葛堂上望溪作四君子傳然古塘言潔彝歎亦非其匹與方駕者同時其李恕谷乎初名信芳齋集此爲武進管孝逸刻韞山先生孫也先生母卽或庵孫女頗難親榮縣曾佑卿前輩藏本秘惜不輕假人予從楊素園太守展轉索得方思與曠父謀醵貲重梓廣行而曾遽奉諱歸蜀戊辰卒於家遂不可得惜哉

蠡縣李堪恕谷後集

恕谷師博野顏習齋忍嗜慾苦筋力以勤家養親而以其餘習六藝講世務以備天下國家之用以是爲孔子之學而自別於程朱於同時北方講學家容城祁州外自關門戶文則恢奇變化頗近西河於八家蹊徑極力擺脫猶其注經也曰後集者以康熙癸未前仿歐蘇者俱置之而惟存

其後焉者也

宜興儲同人欣在陸草堂集

陽羨諸儲以時文名世與金沙之王還醇之方同時鼎立而先生稱老儲畫山中子諸君皆所指授而古文尤稱致力寢饋八家叙事得史法所輯唐宋十家文風行海內鹿門本素高閣矣左國以下七種今塾中奉爲枕秘蓋經生而耆儒也徐旋卿廣文言康熙甲子徐文敬公典試欲羅致爲榜首辭不赴試是科首選爲潘根谷中丞宗洛其門人最少年也隸庚午古塘掄元先生偕匠門安公諸君同舉年已六十其介行尤不可及而近出香飲樓賓談迺云先生館於外妻以凍餒告置之妻悲自經後入闈輒爲崇不令作文故常曳白庚午門下士爲修佛事入場妻不至遂領薦赴公車門士踵行之禮闈妻復至裂卷而出自是絕意進取按辛未先生未赴南宮以年踰耳順故安得此誣妄之言茶餘談舊作中州某生事然亦不足據也以近人好談因果輕易著書徵引故事移甲就乙故附及之

甯都魏世儼敬士文集

敬士爲谷和公次子其文欽才就法潔清峭厲與諸父兄微別而性情篤摯見於文者無不入人心脾則翠微魏氏一家之文罔弗同

高安朱軾文端公集

文端光輔聖主三朝名臣經術湛深尤精於禮服習躬行不以文名公亦不藉文以重然根深膏沃前如熊李後如孫陳雁行其間差無愧云

慈溪姜西溟宸英湛園未定稿

西溟得名最早登第最遲主順天試又爲李蟠所罣卒於請室惜哉文喜蘇文忠公以從橫恣肆爲主近戰國短長言遂以左氏內外傳爲衰世之文柳南隨筆詆其妄與何大復同李邁堂至盡汰其叙事之文謂非所長論皆未是徐敬哉則謂西溟尤擅長於叙事如何仲淵吳約庵誌銘王黃湄湯文正母墓表楊安城銘以代叙安帖排真上揜荆公勾庭謂其文在醴肆之間但好意太多不能舍割然哉然哉晚年與李剛主齊名其實剛主生後西溟卅一年晚出而與之齊軫不無噲伍之感已

宿松朱書字綠古文鈔

杜谿從方望谿載褐夫游文名與之上下古文雅健尤熟於有明遺事刻有杜谿文稿十卷附其子曙扶白柴文一卷以南山集案奉禁今遂不傳嘉慶丁丑廬江章瑄鐫鐸刻此乃後人鈔輯殘本未爲完璧然較之褐夫隻字不留天壤猶爲幸已

茶陵彭石原維新墨香閣文集

參政少入翰林屢膺使節歷中外厠位綸扉雖再起再躋而山居二十年悠游文史重遇鄉會榜不獲與鹿鳴恩榮宴勛年蓋九十矣集爲道光壬午元孫來孫等校刊辛丑唐確慎公始叙之推爲李文正後著作家而以詩文厯止於是散佚必多大旨卽物求理因人論世各還其是非論斷正不止文正一人足與懷麓堂並傳不朽絕不涉其宦蹟一字豈以雍正甲寅曾擬斬監候乾隆丁卯庚午兩褫職嚴旨俱在不敢置議耶因思尙書主乙丑會試錢唐王文莊公出其門旋擢上第以女妻之尙書放還田里文莊已躋通顯豈無隻字往還今竟烏有身後亦不爲剗削六十年後元孫始敢印行然則榜下鬱壘亦復何爲而求繫援於范氏者炎涼與路人無殊又何怪潘

文恭公熙朝宰輔錄之削而不載也

淳安方朴山葵如集虛齋學古文

朴山少從毛西河游說經遵古法義理則衷朱子與西河蚪詁不同長交義門畫山耘渠望谿而文筆銳恣巉巖自成一子時文偶大家古文亦精力絕人雄長東南惟好用子史成句四庫全書提要議之李邁堂因謂改易常語似蚪戶篠驂殆宋景文之流學韓而流爲孫劉者也豈知先生文得力於宋南渡諸家於水心尤服膺最深而不一襲其面目於國朝諸家文蹊徑頗異非學新唐書亦非可之復愚一流其時文戶知之而古文無問津蓋古調之識眞者稀矣

桐城方苞望谿先生文集集外文補遺

咸豐辛亥戴存莊搜輯重刻全集叙謂搜羅殆盡按鶴徵後錄卷一有半舫齋古文叙此失收以此推之謂侍郎之文之盡於此編恐未然也侍郎文爲一代正宗百年以來推之者或過其實而薄之者亦失其眞欲舉一說以折衷之迄未有以鑒衆口四庫全書提要云大體雖潔而變化太少雖蹊徑未除而源流極正存莊謂熙甫異境同歸根柢經術羽翼道教熙甫無以過之庶乎持

平之論。若柳南隨筆。卷三謂閒有創論。然過於痛快。便近李贄聲口。始指甲寅再示道希兄弟第二條言之。但舉一篇。不足以蔽全集之美也。

臨川李紱穆堂初稿別稿雜著

侍郎之文。弟巨山絃及門人黃詹堂叙之最當。巨山云。志荆公之志。立朝風節似歐陽。孝友似南豐。詩古文似歐陽。曾王詹堂云。於文取歐。曾於命世之志取王。於學術取陸。不出其鄉。而奄有前古。其爲文情趣。則自道之云。論事之文。以說理出之。則根柢深厚。而無小非大矣。說理之文。以論事出之。則精神刻露。而無微不著矣。蓋必事與理相足。而後辭達。辭達而後辭之能事畢。蓋於韓柳歐王曾蘇諸家文。嘗繩以六經句比字櫛。以求其離合於毫釐分寸之間。實見古文爲不可及。所謂學然後知不足。此其言之所以立也。安谿言歐曾六百載來。未有嗣音。當歸此子。澤州亦以歐陽曾王六百年來文字相屬。皆未殺元明人物。詎爲定論。要之與望谿並稱兩大。必傳無疑。此則可質諸天下後世者矣。雜著未見。購之西江坊肆。藏書家亦無之。

漳浦蔡文勤公世遠二希堂集

文勤爲安谿門人所學相似而純實過之四庫全書提要云理醇詞正具有本原其選古文雅正也持擇綦嚴漢以後僅得二百三十餘篇凡理正而詞不雅詞雅而理不正者皆不錄謂其事則可法可傳其文則可歌可誦蓋眞西山文章正宗一派其所自運實允蹈之

鄧徐耿庵文駒師經堂集

耿庵久困公車垂暮始捷遠官滇洱困頓無聊所作文感激豪宕雅意選輯明文撫拾二十餘年分類九十有餘爲卷二百四十去取之意欲與明史相爲表裏將成書而物遺藁無存不及梨洲文海之尙有鈔本流傳也集亦未見

歸安茅星來鈍交文集

鈍交時文學荆川參以理齋望谿謂勝儲中子其奉詔論次化治正嘉四朝文均出其手其旁批總批亦由兵部發遞准陰周白民審定然後進御今人但謂望谿一人編輯無知茅周軼事者矣與同邑徐鄒成廣文同爲古文勦年七十無子遺書歸桐鄉友人程尙質程子春廬宗丞初名鈍交門人也刻十之三鮑渌飲得其自訂文彙較程刻爲多鄒城子敬齋錄爲二十四家之一謂法

眉山而參以朱子者也

常熟陶貞一退庵先生集

退庵爲紫司長子三仕三已其始休致以祝母壽歸其後以大考獨雍正初元起廢籍再入翰林修明史總裁同館請以全史之半相屬房師張文和同邑蔣文肅方當國許推輓而度諸公終不能行其志分置仁宗紀傳纂具復投牒歸固留不可且曰即官如老師亦非所願難進易退真不愧循吏子矣論者或以乾隆初再出復蹟爲病過矣文肅主丙午順天試喟然語同事曰世乃有不受官爵之人蓋恨不得君爲助烏序韓東籬表墓所由致歎於夫已氏也古文筆力簡要波瀾意度雅近廬陵然不規規近似手定稿二百餘篇茲刻亦不全

全州謝石霖濟世梅莊雜著

梅莊說經不主朱子匪匠十經注至上疎請以易學庸章句蓋通人之蔽每有此癖不足異也生平忠顓性成雖遭奇禍再起侃侃論事不少撓然生則爲田督許撫所斷斷垂老以衛哲治効卒填牢戶身後又因贈齊周華添髯記序爲熊學鵬宋邦綏奏燬其書可謂酷矣纂言內外篇自成

一子西北域記奄有考工爾雅方言之勝嶺外別集流傳甚稀姑存其目於此文佚無由錄也

吳縣楊文叔繩武古柏軒文集

文叔爲維斗先生孫易亭高士子胚胎前光劬文績學以詞臣退而教授主講敷文鍾山書院造就後進人才蔚興少入京門卽以古文與李客山陳和叔齊名纂述隆寧集刻於保甯太守陸錦此爲其孫梅谿孝廉一鴻重刻非其全也其文則袁存齋叙所云元氣鼓盪浩乎無涯得韓蘇氣脈而自出機杼於史學最深必傳無疑王鐵夫譏其天事不勝境盡文中夫豈然哉

南昌萬承蒼孺廬學士全集

孺廬與李臨川石交講學亦宗陸子著有萬學士易傳論互體最精妙文則和平雅潔足嗣平園劬庵東里瓣香臨川亦推之如王陽明畫像記深入無際棲賢寺羅漢記貫串內典不減坡仙咸豐己未冬日遊隆福寺於地攤得之丁卯外轉江右留贈同年張穆莊舍人而章門坊肆反無之合河孫嘉謫文定公集

文定爲三朝伉直名臣三習一弊疏以不自是規聖德可謂憂盛危明以道事君者與熊文端萬

言疏皆爲我朝奏疏第一大文字餘如請開酒禁辦理耗羨太學條規旗圈民房八旗公產諸疏指陳詳盡通達人情雖陸宣公無以過之晚年有盧魯生僞稿一事雖黎邱鬼伎亦以公抗疏不避權貴故假爲之其進家臣望谿頗不滿之不知何事若謝梅莊案則爲許容所誤非公意也南遊記凡一萬二千八百六十八字可謂奇文

寶應王懋竑白田草堂存稿

白田踰艾登第官安慶教授雍正甲辰以薦改翰林院編修直上書房踰歲以母憂歸里居十六年不復出生平學宗朱子於全書文集勤力治之精覈無倫嘗曰老屋三間破書萬卷平生志願於斯足矣文則委曲詳盡亦宗朱子邑人高星源謂白田無它勝人惟本色故當勝人予讀白田文亦云

錢塘厲鶚樊榭山房文集

樊榭耆奇愛博尤熟於宋元以來叢書稗說所纂遼史拾遺宋詩紀事諸書最爲賅洽詩集幽新雋妙刻琢研鍊擷宋詩之精而去其疏蕪時俾浙派詞亦直接碧山玉田文則似未成家而卷軸

充溢涉筆脫俗惜駢散雜廁編次者之過也

華亭黃之雋磨堂集

明崇正中雲間幾社陳忠裕諸公不鑒艾東鄉規復八家之贗體倡爲周秦東西京文下逮六朝樹骨擷采博奧閎整斐然偶盛流風及於國初范型未沫王衍右吳日千尤卓犖雄霸至康熙末稍衰磨堂起而復振其跋壬申文選隱以起衰自任文集才力雄健意語鏗鏘視貌爲唐宋者有淄澠之別焉乾隆初石笥璽浦諸公文率奇麗博洽遠駕班揚先生實爲首功梅里臺山遞相祖述道光中李龔魏蔣亦其流別迨桐城派盛家惜抱而戶柏視此體遂成絕響未有能嗣之者

宜興儲靈山大文存硯樓集 二集

靈山與仲子偁二難中子早達靈山久因公事而以元自命進取不衰徐旋卿言其獨居蕭寺終歲靜坐不作一文一日聞老僧誦經畢擊磬一聲忽然有悟大聲曰吾得元矣以圓故也提筆爲數藝今傳稿中舜生於諸馮諸篇是也次歲春官果舉第一其文品實在經畚堂上而相傳闢語迺有天下文章推江南江南文章推宜興儲氏儲氏推家兄家兄文章小弟筆削筆削何耶其學

最深於地理於形勝最精原勢一篇其尤也當時有勿庵談天書山說地之目李邁堂至以掉書袋譏之真目睫之見何足以語文家能事哉

又

二集爲張冠伯徐柱臣編徐貽孫藏有宜興史華國舊本云墨筆評批是書山親筆朱筆是在陸先生親筆訂定又云書山親筆批選百首頭上有點者是則誣妄不足信在陸卒於丙戌下距書山癸亥之卒已三十八年存硯樓集丁卯陽曲張思孝始爲開雕集中文字半歸田以後作微特朱筆不出在陸手卽墨筆批閱增刪亦豈書山親加疑書山定稿清本有曾爲在陸商訂者張氏初印樣本越漁諸君取以對定異同過錄評語流轉坊肆史不考核歲月信爲真本朱評併書山爲公在陸其從祖且授業烏有是哉

國朝文獻題辭卷三目錄

臨桂陳文恭公宏謀

陽湖蔣濟航汾功

常熟陳亦韓祖范

山陰胡稗威天游

漳浦藍鹿洲鼎元

休甯汪文端公由敦

清江楊勳愨公錫綬

常熟陶晚聞正靖

錢塘陳句山兆崙

江都馬力本榮祖

桐城劉海峰大槐

甯化雷翠庭鉉

滋陽牛空山運震

丹棱彭樂齋端淑

無爲汪訂頑有典

婺源汪雙池烜

華亭沈學子大成

廣昌黃南莊永年

涇趙星閣青藜

鄞全謝山祖望

武進劉文定公綸

仁和沈淑園廷芳

仁和杭蕢浦世駿

又

天台齊息園召南

吳江沈果堂彤

新城張勺園達

仁和趙東潛一清

海甯祝人齋淦

錢塘袁存齋枚

新建裘文達公曰修

長洲沈歸愚德潛

諸城竇東臯光鼎

秀水鄭誠齋虎文

吉水羅旭莊暹春

新城涂東里瑞

大興朱文正公珪

建甯朱梅厓仕琇

嘉興王惺齋元啓

中江林青山愈蕃

秀水錢鍾石載

仁和趙鹿泉佑

錢塘梁山舟同書

分宜林平園有席

吳江陸朗夫燿

獻縣紀文達公昀

青浦王蘭泉昶

大興朱笥河笥

嘉定錢竹汀大昕

會稽茹三樵敦和

秀水盛袖堂百二

南昌彭文勤公元瑞

鉛山蔣藏園士銓

維韓理堂夢周

平定張蓀圃佩芳

歙曹文敏公文植

武甯藏于野大謨

金壇段懋堂玉裁

長洲彭二林紹升

長洲余存吾廷燦

國朝文概題辭卷三

禹域叢書第三種

臨桂陳文恭公宏謀培遠堂詩文偶存

文恭敗歷疆圻幾徧天下晚躋政府翼贊承平學以朱子爲宗所至以教養爲先五種遺規幾於家有其書文章其餘事書院評語訓課諸生則如陸子白鹿洞講義尤非近時節鉞所有者矣

陽湖蔣濟航汾功讀孟居文集

教授爲在陸門人蓉龔侍御父也成進士年已五十二以知縣用辭不就改教授松江甲寅春以事件上官罷乙卯秋始得歸游溫州授莊方畊宗伯仲淳學士經逮蓉龔通籍後始効年八十餘矣鍵戶讀著書述不輟力學而享大年與楊農先學士交最厚顧雪滄叙陳見復經咫所謂海內留心經學與望谿文叔符倉定宇同儕者也治經邃於孟子故以讀孟名其居汎濫百氏而折衷於鄒嶧於唐宋諸家無專似望谿謂其樸訥入家而引喻發奇多取周秦間諸子戴褐夫謂體峻潔而意閑遠段落筆法俱極參差變化張匠門謂骨力高峭情致委蛇氣體純白趙映川叙則以委歸於潔蔽之爲文頗夥晚歲自定迺不多乾隆戊申畢弁山撫豫欲板行之而不果嘉慶庚辰

曾孫淶初方增宰瑞金始付槧人印本甚稀故姚春木國朝文錄朱蘭坡國朝古文彙鈔皆無之此爲初印本得之可惠私謂與孟鄰堂可並稱惜楊文購之二十餘年迄未得也

常熟陳祖范司業文集

司業爲韓文懿至戚少從其父讀書寒碧齋文懿每有撰著輒命謄寫故所學得之文懿爲多辛未經學四公品誼實在震滄易堂確軒之上行世之作無多謹嚴有法四庫全書提要猶以未盡刊除少之豈以經術掩哉歛用喪服議已入經咫複出可刪

山陰胡穉威天游石笥山房文集

實齋文略與胡穉君論校胡穉威集第一書云阮學使命榮不知其後何以不果此爲徵君五世從孫博平知縣秋湖學醇刻亥豕滿紙讀者憾焉咸豐初秋湖子冠山重榮於淮上補遺三卷增多十九篇余向聞杜尺莊丈有手校本搜采集外文頗廣惜未梓行辛酉燬於逆燄據章氏書云甲序癸賦徵君手定第二書云往在都門曾見沈徵君詩義序及杭氏續方言序送馬力畚序禹穴記四篇今本無梅史徵君沈氏詩經醒八箋序本書今尙有傳本卷首亦無之又云與周內翰

論洪範書本韵二序禹穴記與朱羅二孝廉書又云駢體與散行夾雜不分而以三洞璇華一序冠首尤不可訓今本先賦後序與章所言大異豈秋湖更定耶詞科掌錄云任御史趙總兵兩墓志皆天下奇作今亦無之則諸軼文或爲杜本所有者不知若干可勝喟哉然徵君嘗言古今人皆死惟能文章者不死若徵君者固未死也文之多寡又何足計之有

漳浦藍鼎元鹿洲初集 東征集

鹿洲負經世才通兵法朱一貴之亂佐襄毅總戎奏平臺之略雍正丁未以朱文端公薦由一統志館纂修特授普寧知縣以西穀忤惠潮道樓嚴誣劾之又以遣家人京控觸怒撫藩樓已擢臬並謫以贓私欲置之死賴總督郝玉麟鄂文端昭雪之幽囚三年擢署廣州廬一月而効天生康濟才而不得盡其用樓眞忤忍哉陳雲伯與天一並憫天一佐靳文襄治河名動九重以幕府膺僉事秩抱負盡抒鹿洲才儷天一而遇之苑枯相去遠矣集中指畫皆可見之施行如江蘇大縣宜分治其一端耳

休甯汪文端公由敦松泉文集

文端少入京師。卽客桐城張文和郎。通籍清華。典領樞要。恩遇名位。與文和同。眞傳衣蓋。太平宰相也。文筆高華。腴鍊朝廷大著作。無不豫其間。進呈表跋。明暢可誦。答明史館某論史事書。及史裁蠡說二篇。於橫雲山人彙。深知其失。視史例議二卷。不免詞費矣。文和進御定本。殆多出其手云。

清江楊勤愨公錫紱四子堂集

勤愨督漕二十年。政績爲國朝清臣第一。奏疏簡嚴通潔。它文亦多可誦。名臣不當以文字重也。常熟陶正靖晚聞先生集

晚聞爲紫司。次子退庵太史。弟於易詩書春秋三禮原委條貫。故能以經術爲文。淡簡有法。出入唐宋與父兄各成一家人。擬之宋眉山蘇氏與同邑汪贊善。應銓陳司業王侍御峻。以文章氣節名四君子。而晚聞兼裕經濟之學。輪進經史摺論左貳。闡葺宜用辟署學校。教養無術。破難行之說。極論儉爲一切自恣苟簡之害。所言有行有不行。要有關乎吏治民生。而歲四遷。受知特簡。而以處分魏廷珍太過爲旱災之應。余所不解。其時朝政雖無關失。然可言豈無大於是者。而以之

忤旨左遷不竟其用自云論思納牖冀廣聖心迺僅如是乎哉

錢塘陳句山兆崙紫竹山房全集

先生時文義法本之朴山而加以恢拓深入無際在方門四傑當在長孺輩浦虛船之上古文似微不逮視道古堂集瞠乎後矣李邁堂謂其傳誌筆筆飛騰往往束十數層意於數十百字中洵然至云詞科諸公蔑有先之者則無論杭氏卽息園椒園似亦不及自言書法第一文次之迺爲得失心知有學人固不爲大言欺天下後世云

江都馬榮祖力本文集

初名石蓮堂集後改今名壬申十月自序按徵君歿於辛巳後此所作未行世者今無可見矣徵君古文墓浦偁其清通深亮善書法幼爲望谿耘渠所重長與穉威弢甫椒園圖東齊名鴻博報罷後選仁懷知縣未任移闕鄉鹿邑卒於官今并舊刻亭雲堂稿皆鈔有知之者矣

桐城劉大槐海峰文鈔

海峰文鈔十七卷又有海峰文集八卷皆未得見徵君文喜學漆園龍門尤力追昌黎與方姚面

目不同後人推爲正統三嬪殆遙腰矣子居謂其筆力變方之疏朴爲清宕然識卑於理多未足論人未得其平且邊幅未化惜抱雖極力推之終無以饜衆口也

甯化雷翠庭鉉經筵堂集

先生少有志於聖賢從漳浦蔡文勤公游學宗程朱於陸王辨之甚力鄉舉入都以文勸受學於望谿故爲文簡要冲夷有足者風粹然儒者言也

滋陽牛運震空山堂文集

丙辰鴻博之試徵君以文溢額報罷出宰甘肅勤於吏事又廩小試秦安平番癸亥楊勸慤薦應馬周陽城之詔格於吏議未及豫試而以受萬民衣劾罷其時之大吏可知矣歷主臯蘭諸書院以老其文上法龍門昌黎不以淹博見長亦不襲古人禘禘詞科掌錄謂山左碩學無出其右者空山堂遺書數十卷咸豐中始出阮孝遜但得其文集癸亥浴佛日假讀至丙夜去散館止七日老鼠搬薑幾忘臨試徵君有知定亦軒渠地下

丹棱彭樂齋端淑白鶴堂稿

蜀中自北宋三蘇後明有升庵博雅著書得失雜糅文雖吐屬典則猶存古法而不及其詩國朝則夔州有唐大陶瀘州有先遷甫新繁有費雁峰滋衡父子此外別集流播中土甚稀雍正中先生昆季三人連掇科第以詩文掉鞅詞壇與穉威方三諸君往來文多胡蔡評泊據蒲褐山房詩話別集爲蘭泉論定刪存傳記最佳擺落凡近頗得史公之潔議論文次之同年李香府以爲然無爲汪訂頑有典望古集

訂頑論學斥陽明爲禪自叙爲文宗周秦兩漢唐宋諸聖賢不度其才力之至不至能不能三家邨學究迂腐狂態殊可哂也別有明事類稿二十口卷即今行世史外八卷之本名坊間多有此集奉禁未有見者

婺源汪烜雙池文集

雙池孤寒力學博極羣書而以宋儒爲歸宿遺書二十口種歸然與江慎修並稱文多說經講學言似未甚措意惜慎修先生著書滿家而文不傳爲可惋也

華亭沈學子大成學福齋文集

先生博極羣書於天文算法尤精文則和雅有情味得震川神解記有遠神其讀通典職官一篇云西學誕妄唐武德時已入中國明末利瑪竇來偽造耶穌慢神誣天罪不勝誅而徐文定之徒未嘗讀書從而尊奉之惑甚矣唐時已有誘入人教之事故開元二十年勅加禁斷余按祆教沿革杜氏左傳集解玉篇西陽雜俎冊府元龜宋敏求東京記墨莊漫錄卷四提要未引西谿叢語程史諸書具載之紀文達公總纂四庫全書提要及槐西雜誌卷二論內學凡一條皆確此文之後學如江慎修尙爲西學所震而不悟其闖入中華之隱禍遑論它人若先生者知幾其神乎

廣昌黃永年南莊類稿

江西巡撫常安薦南莊應鴻博之試以中式是科進士授刑部主事不得豫試後守常州疾惡過嚴羣奸構陷爲總督黃文襄劾罷待讞蘇州蕉萃困辱以劾二子貧甚館於新城陳果堂中翰守譽家踰二十年甚矣外官非讀書者所宜爲也先生初奉命守平涼以親老途遠不可往時方東巡具摺陳情行在允移鎮江受知不爲不深而不獲於大吏杈枒枘鑿蹉跌終身讀與顧同方河帥書諸篇斤斤自辨卒無有爲白其誣者文襄聲猷人不敢觸可憐也夫初有初學文類後易名

嚴甫文類刻之。初後門下士陳凝齋爲編此重校四庫全書存目有黃靜山集十二卷似合類稿八卷奉使集一卷靜子日錄一卷白雲詩鈔二卷故有此數春秋四傳異同辨希賢錄凝齋未刻今不知存亡矣。文氣勢凌厲希風勺庭在都與望谿穆堂相討論所作亦參和一家而自成面目其謂善立言者博觀往蹟證以今日天下國家民生風俗世變之故將明道經濟必非古人宿物可以假用則吾人學術議論與世變爲補救必有前人所未發者烏乎此興說三篇之所爲作也。涇趙星閣青藜漱芳居文鈔初集 二集

星閣舉丙辰南宮第一由編修轉山東道御史。初年八十二入國史文苑傳可謂榮矣。文受義法於望谿風格似之。史論亦有特識持論平易不爲矯激之言。乾隆初元得桐城文派之正者詎但假門戶爲名高耶。

鄭全謝山祖望緒埭亭集 集外編

阮文達謂經學史才詞科三者得一足傳先生兼之。李邁堂謂於漢學宋學皆能講其是而去其非文則皆以權史可爲國史張本。蓋承南雷文獻之傳於滄桑遺事通知本末遺書傳說嚴覈異

同所作碑誌表傳罔羅放失搜采無遺不惟補明史之闕兼糾南雷之誤至一時師友又極九等人表之最歐陽南雷文中人物兼而有之邁堂錄諸家文多不中肯綮惟論先生頗見其大無以易之

武進劉文定公綸繩庵內集 外集

文定以山雞舞鏡詩句受知擢冠大科洊歷宰輔所作雍容雅飭較之杭齊二大雖有未逮而以之驂驛隱拙紫竹要自無愧居相位與諸城文正公偁南北二劉則固名臣也

仁和沈淑園廷芳隱拙齋集

椒園古文得之望谿其詞科同年如蕙浦息園丹茨諸公與稚威元木夷門皆以奇博絕麗爲長而株守桐城家法不敢尺寸自軼與南莊星閣鼎立方門不得以枯淡少之

仁和杭葦浦世駿道古堂文集

先生學貫九流才伏一世詩固卓然大家文更學膽才雄而以蒼秀凝重之筆出之排突古今自成一子詞科中雙韭雲持兩大外先生與之鼎足無可甲乙袁存齋議其不知翦裁過矣

又

先生之學之文。浙人服膺心折。百年來無異辭。獨近時甬上徐時棟。烟嶼樓文集。與其弟子陳康祺。郎潛紀聞。二筆載有譏語。不可解也。徐引蔣樗庵語。謂謝山歿後。先生乾沒歸。琦亭集不出。竄爲已作者六七篇。忍於竄死友。爲有文無行之小人。烏序兩家集具在。所竄僅六七篇。讀者不難一一檢勘。杭所勦竊者。何不標舉篇名。楊庵既妄言之。可知其誣。而徐信以爲實。豈未嘗讀杭集乎。陳則謂先生詩文。發績故實。必先有藍本。而後成之。此與疑存硯樓者。同爲戲語可耳。或以先生有漢書蒙拾。文選課虛。二書。逐一例視之。亦思續衛樸齋禮記集說百卷。金史補闕一百四卷。是何鉅冊。非體大思精。安能爲之。豈取辦於兔園冊子。而然徐陳書皆新出。後生易爲所惑。故辨之。

天台齊息園召雨寶綸堂集

先生博覽強識。與蕙浦齊名。丙辰之有杭齊。猶己未之有毛朱。並稱兩大浙人。高出宇內者百年。來無異辭。近始衰。芥甘爲楚細。不亦慙乎。儀禮易讀叙。戴東珊編集。未收見馬氏本書及湖海文

傳當補入

吳江沈彤果堂集

果堂少從何義門游與陳季方陳少章並稱高第弟子讀書窮經貫串古人之異同而求其至是爲文不務辭華獨抒心得丙辰應詞科奏賦至夜半不及成詩而出所著書最者爲周官綠田攷餘如七經小疏亦稱是而辛未經學之舉無人薦剡及之荒江皓首伯道無兒可喟也然經儒而兼文章如是有志者可以興矣緒南筆談云果亭以修曲江志爲人所訟幾罹禍矣中丞某公忽夢都城隍來謁曰沈彤長者君當敘事乃寢按此說它無所見以徵君之長者又古文大家而幾罹奇禍甚矣修志之不可爲也

新城張達勺園文集

勺園從南豐梁質人臨川李侍郎游又與張東峰交梁叙其集皆盛推之雍正甲寅府縣薦應博學鴻詞巡撫常安試取與侍郎孫西華同受知而以疾不入都文似未成家予以丙辰詞科諸巨公別集外餘人多漸滅不傳故錄之

仁和趙一清東潛文案

東潛爲谷林徵君子謝山偁爲小友以諸生應浙撫嵇文敏丙辰鴻博補試被落小山堂富有藏書東潛無所不讀尤邃於地理所著水經注釋五十二卷博與顧閔胡埒而精過之集中諸攷辨糾諸家之失者皆是它文亦綜攬白氏反復辨難歸於精覈說經史者尤勝杭松吹叙謂能爲介甫之文者也

海甯祝涇人齋先生集

人齋私淑楊園粹然儒者著有戴記輯記七十卷未成淑艾錄下學編二種或云皆佚嘉慶戊寅沈小湖取淑艾錄彙附困知記或說非也集元本曰井幹居詩文彙者二卷曰日新書屋詩文鈔者二卷道光甲午陳碩士侍郎合而刻之易今名人齋於文本未措意存亦不多

錢塘袁存齋枚小倉山房文集

存齋文毀譽之者皆失實其搢紳練色多得力於蕭選於唐文粹用功尤深天才飄發筆鋒所及透關奇創誠不免時涉佻巧則南北史之病好自撰句閒引僻書喜用奇字則又新唐書之病蓋

學古久而不忍割其瑕每易有此要非不讀書所能爲藏園魚門推崇固過徐敬齋以爲極文章之變陳碩士謂才雖橫絕用之於古文則全無是處李邁堂謂碑志無一稱其爲人叙純率筆記氣質太粗議論又多小言破道朱文端於清端碑傳皆小說家言豈其然乎予錄之頗多莫文臨汀以爲持擇較慎讀袁文者不覺改觀文下世久追憶悵然

新建袁曰修文達公文集

文達聰強機警神解超捷初應鴻博旋入翰林大考高等供奉南齋以文字受知九重經進頌賦雍容揄揚洊參樞要歷位司空屢膺條簡使輟幾徧天下與書局相終始乾隆中西江多名臣而文學獨推新建彭文勤劉金門接燼繼起開之者公易名文達河間儀徵外後之得此者有愧色矣尤善治水治河淮論策七篇謂於清河安東境多分支河時濬其淤庶永不爲害且不復別徙又曰違禹之法合萬餘里之水匯於一以委之河雖由北歸海患未已又曰河可南特不可合淮又曰河合淮非其所欲惟在使之別淮改其流廣其身深其臀不與水爭地又曰北歸不可引歸天津以漳衛汶三水合不容復益以河其治淮之要在無使河合淮河淮不分五害何由去皆疏

導名言當時不用其策至咸豐初豐功決而河北公言驗矣世但以儒臣目公亦知亭林有言當其時者或無其識豈獨治河也哉

長洲沈德潛歸愚文鈔

歸愚詩名最盛以暮齒受達特之知而後之論者頗有異同平心論之取法盛唐格高律細天語以高王相比目爲詩家正宗文遜於詩而株守八家渠箋讀本與在陸抗行今猶不廢說經多沿舊說餘文要有可誦者

諸城寶東臬光鼎省吾齋集

東舉制義直接王唐同時無輩應制賦尤傳誦而包慎伯頗輕之謂伐材近而隸事雜予謂散體文法昌黎惜不多

秀水鄭誠齋虎文吞松閣集

誠齋世居餘姚父黨參先生世元以廣西籍舉雍正癸卯鄉試誠齋復以秀水通籍今越人遂無復知其父子爲舜江人矣詩本家學文則與同年邵叔平王介子討論所作與之上下

吉水羅旭莊暹春水南灌交遺稿

旭莊由編修曆贊善侍讀以大考三等仍官編修轉福建道御史乙酉九月以疏參兩廣總督蘇昌保舉運使王槩至入刑部對簿議褫職恩旨以主事用歷郎中出守德安歷山東運使庚子爲巡撫國泰勒令休致特旨改爲原品休致蘇昌者由繙繹起材最庸下爲僚屬所擲揄坐擁苞苴無一善政旭莊自撰墓誌銘但云言事不詳蘇昌姓名蓋其子富綱督滇貪婪倍於父目不識丁國泰則和坤之賊慮爲中傷故諱之改南臺後始爲古文與同年誠齋叔介子崧齋學橋諸君相講求切劘筆勁墨奧自成一家李邁堂以爲步梅崖後塵而集中曾無隻字及朱以短取峭以轉取幽亦與朱文不類不知邁堂何以云然學橋叙謂碑版文字爲多而記傳止二十九篇何以不盡付剗劂也

新城涂瑞東里類稿

新城涂氏自宜振先生後人才最盛學述大半主陸文筆則得之勺庭爲多東里爲南莊門人尙有經疑編史論編理學編經濟編四巨帙惜未開雕

大興朱文正公珪知足齋全集

文正少與叔兄筍河齊名詩文皆學昌黎今讀其集詩與筍河雁行文微不逮其銘筍河云余未嘗從公學文而何以銘公則自謙挹語也駢文豐贍華貴筍河無之

建甯朱仕琇梅厓居士文集外集

國朝古文家乾隆以前大抵規撫韓歐積久生厭丙辰大科之召石筍墓浦諸公出始以閎博奇麗爲宗梅厓又規仿周秦兩漢荀屈楊馬格韻異軍特起文後自評盛自夸詡西江人憲而學之者如盛字雲羅臺山張閏楊皆是古峭生勁一洗唐陳視勺庭堯峰以爲舊茶更目望谿爲腐木涇鼓矣子居迺謂所得視望谿益庫隘詞甚古意自今求鍊則傷格求適則傷氣碩士謂其氣少懈而骨格未堅譬之樂鮮純繹之音譬之木鮮嵒栗之致李邁堂以盛羅之弊歸獄梅厓并議其作令不終過矣梅厓文以立誠爲本以文從字順各識職爲旨歸以中有自得而能自爲爲究竟高古蒼鬱實非石筍所及邁堂何足以知之其令夏津軍與林穆庵意見其學道愛人非俗吏所爲其請改教授也自知性介不合於時年甫四十餘引身而退值承平之世作吏者猶去就自如

亮節高風翔鴻安可籠哉邁堂何所見而詆爲不終然則其時之乾沒貪墨躡躑騰仕白頭蹉跎戀棧脂膏者皆可謂高朗令終乎若高雨農謂上接震川昭代一人則意在以閩蓋宙合爲貢腴左海語不足辨矣

嘉興王惺齋元啓祇平居士集

惺齋通推步句股之術勤於攷證而篤守五子之旨說經尤精於易無同時漢學家習氣著書三十種爲文一本昌黎集爲王蘭泉審定官將樂廬三月以誣被吏議罷官經史之學一無所施主閩豫兗州諸書院者三十年成就至數千百人可以豪矣

中江林愈蕃青山文集

西川文家予所見頗少乾隆中私以丹棱彭氏爲最青山成進士歸班需次至癸未始選郪縣辛卯卒年未周甲文亦未成家然較同時羅江李石亭童山父子似勝云

秀水錢載鐔石齋文集

鐔石工繪事善鑑別法書名畫詩學少陵得其神髓看似粗枝大葉不免生梗直率蒲褐山房詩

話謂其信手便成不加研鍊未爲知言文則似未成家且爲畫詩所掩然要非其鄉紫桃軒一輩所及

仁和趙鹿泉佑清獻堂文集

鹿泉時文於江西五家外獨開生面與陳句山太僕比肩在諸城寶東臬次一時稱兩總憲云古文亦憂憂獨造集不分體而以年次自謂欲以考其閱歷之先後它如尙書質疑詩細讀春秋存稿春秋三傳雜案四書溫故錄諸書皆根據註疏判別異同亦多成文可誦經義名家豈暖暖姝姝專守一先生之說者哉

錢塘梁山舟同書頻羅庵遺集

學士詩文清峭拔俗爲書名所掩又雅不欲存所作隨散無定本嗣子玉繩搜羅十之二三分類梓行卽此本也湖海文傳有蔣修隅墓誌銘而此失收它可知已

分宜林平園有席雜著內編

平園十九補諸生卽好治經成進士歸班庚辰始選東湖知縣以居父母憂歸旋以事褫職年踰

九十始劬窮經歲月不爲不深所構散體文趙竹岡叙謂其長於攷據它若續蔡文勤古文雅正又有國朝古文雅正所見集採輯頗不愜予心嘗謂西江人多好言古文乾隆時有平園嘉慶中有李邁堂皆享大年勤著述可謂一時伏杜然掉鞅文壇高樹赤幟尙未之逮然則古文又易言乎哉

吳江陸朗夫燿切問齋文集

中丞輯切問齋文鈔取有經世實用凡空談性命理氣及考據叢碎之作皆不得與其後邵陽魏嘿深氏皇朝經史文編權輿於此其文則一遵果堂徵君之緒論簡嚴典則乾隆朝多名臣私以爲有體有用純實莫中丞若已

獻縣紀昀文達公遺集

四庫全書館之開文達始終其事總目提要二百卷館臣分纂而公綜其成於古今儒術之純疵別集文字之升降無不目營而心識之劉向李充王儉阮孝緒而後推公絕識唐之馬嘉運宋之曾鞏諸君有不逮也詩文多不經意亦多未存稿遺集收之不盡而駢儷散行類皆精贍格意俱

高志表銘傳極有古人規模所謂學富者文無不工也進呈四庫全書表爲集中第一大文字前無古人後無來者汪洪應奉走且僵矣胡書農全唐文表句擬字仿童孺君亦爲之相去可以道里計哉

青浦王蘭泉昶春融堂全集

先生於學無所不通其治古文力追韓蘇困學編題辭云凡學要於博觀而約取不約則不專不專則不精專乃能熟熟乃能養自言得力如此宜其閱博淵雅於古合以神而不襲其兒阮文達纂公神道碑云碑板之文照於四裔而推本其治經深漢儒之學註禮宗王鄭易主荀虞言性道則尊朱子下及河津陽明諸家於戲世固未有根抵不深且厚而能以文章名世者也

大興朱筠笥河文集

先生生而神慧博聞閎覽學無不通古文以鄭孔經義班固史書爲質才氣奇橫翺縷巨細於義理事物情態無不包所欲言者無不盡真氣敎成一家言集中文不越攷古紀事二端而不爲論辨乾隆中魁儒蔚生以文章論先生獨爲一時雄傑蘭泉雖有北宋南王之偶非其敵也甲戌

一榜得人最盛館中有虎豹師象之目相傳文達爲虎竹汀爲象先生爲師先高伯祖火蓮居士爲豹云爲人作傳誌表狀必先進其子孫或親故令縷述生平事蹟得一二殊異者喜曰傳神專在是矣嘗論作文叙事最難數十年來作者無足當意而首肯梅里蓋於昌黎爲近之噫亭續錄卷三以好用僻字澀句與新唐書讀之如人害噎隔症實難舒暢則先生文具在與景文實不相似蓋妄詆也

嘉定錢竹汀大昕潛研堂文集

先生學究天人博極羣經尤精於史全書三十三種經術世學歷算詞章無一不工爲乾隆中漢學大宗東原云當代學人吾必以竹汀爲第二流蓋隱以第一人自負實則先生駕東原而上之南錢北紀迺甲戌同籍之言與北朱南王同文達雖博雅亦非先生敵也文則段懋堂氏叙之當矣云隨意抒寫皆經史之精液其理明其氣和其意味深法古而無樸放之病辨論而無叫囂之習與阮文達叙養新錄謂難能者九皆知言也

會稽茹三樵敦和竹香齋古文

先生以循吏掩其經學所著易學十書胚胎西河而自關門牖今已無傳述者古文更無論矣然取法歐陽上溯龍門精光迸露不可逼視似亦探源河右余幼卽酷好之平生散體文肆力於是者爲最早學之三十年乃彌不隸吁可恨也

秀水盛百二柚堂文存

柚堂爲龍里先生子與張浦山徵君錢遶石爲中表游桑濮甫沈椒園門家世經學兼耽詞章所著全書十三種外尙有閒水漫錄棣華樂府未雕行世蒲褐山房詩話謂其宗小長蘆余謂文亦謹守纂書亭法蓋乾隆初浙人學問西則宗朱東則宗梨洲西河皆恪以鄉先輩爲師承不自開設戶牖至中葉而稍出入今則陋者或不知西河合集爲何書高才睥睨一切者至叱雲持園牧爲措大然其所就可知矣讀柚堂文聊爲發之

南昌彭文勤公元瑞恩餘堂輯稿

文勤少年奇慧與藏園稱西江兩才子久直西清應奉文字婉麗清新往往出人意表所進無不被褒賞與紀文達同膺恩眷纂述之富當稱乾隆朝大手筆輯稿出自公孫春農學士碩士謂亦

與權文公爲近其家自補堂宮詹而下四世入翰林者七人視新建裴文達公三代五嗣臣尤爲西江國朝第一清華閥閱云經進初續三稿別自爲集故不錄論語廣注叙見湖海文傳學士失守當補之

鉛山蔣藏園士銓忠雅堂文集

先生天稟英絕詩古文負盛名而詩尤擅長當時與隨園歐北並稱三家詩品殊出袁趙上文實遜其詩雖謂同時文家不一長揖獨賴首隨園非由衷之言也若以濟人利物爲心如上梧門太傅移某中丞紹守張椿山衢婺兩太守潘蘭谷觀察梁紫岑邑宰諸書與夫表孤忠篤師友至性過人志節邁古則烈丈夫所爲不當以文苑域之

澠韓夢周理堂文集

理堂與膠州法鏡野昌樂閻懷庭稱山左三君子以儒術飾吏治讀王約甫紀遺政可見而庚寅分校入闈縣有蝗攝者不之捕監司揭理堂遂罷官冤矣文筆峻潔山木推謂淵懿純茂法文未見全集以較西礪草堂眞伯仲也

平定張蓀圃佩芳希音堂集

蓀圃石洲祖也於經史致力最深讀經讀史諸篇皆持論不苟宰皖南亦有政聲集爲子曉汴太史所刻南中甚稀稚威體谷空山門人也

歙曹文敏公文填石古硯齋文鈔

文敏早登侍從正位司徒賡詠卷阿雍容諧適承平時公卿遭際隆盛千載一時爲之神往

武甯盛于野大謨字雲集文臺

于野父青厓兄節庵弟止水劍山一門擅著述才而經術古文于野尤有名乾隆己巳經學之詔按察使黃岳牧薦之固辭未赴晚以明經司訓安義不二年卒可唏也自閩中朱梅厓氏不娶同是方望谿侍郎以古文名世遠紹周秦近學昌黎異軍蒼頭特起聞其風者文率以憂憂獨造爲古漸流爲佞屈聶牙反成僞體視桐城派之文從字順劍佩相非未爲勝也閩士學梅厓者衆而自龔海峰外別集余見頗稀江右則于野與羅旭莊臺山最爲傑出張櫻檀諸人則涉詭異于野與謝愧屋齊名門士亦盛山木其尤者而與姬傳遙相應和參和桐城於于野爲轉手視梅厓致

不符矣

金壇段懋堂玉裁經韻樓集

先生爲東原入室弟子盡傳其學而於經學韻學尤善故以經韻名其樓與集文亦說經說韻者爲多與梁燿北辨戴趙水經注書及趙戴直隸河渠書辨推陷廓清可謂盡心焉耳矣今後生少年一得志背負師門反眼若不相識甚或操戈下石甘爲逢蒙再生者有之矧身後乎先生之誼篤師門干城禦侮豈非晚近所稀其說文解字注雖有自信太過勇於改經者漢唐諸儒類有之不足爲先生病也

長洲彭紹升二林居集

二林少讀儒書得南畝侍講家法長而與大紳臺山香聞游耽修淨土其文取法韓曾自謂得之於佛經蓋指禪喜文字而喜它文則雖稱意爲之工夫見地時有轉變然其最初得力之境熟處難忘不可誣也

長沙余廷燦存吾文稿

乾隆中葉休甯戴東原氏之學盛行存吾未與謀面而喜讀其書爲纂事略與陳恪勤行狀皆集中最傑出之文餘亦法度森然不名一格江節婦傳極似歸太僕東原未能爲之也



韻宋樓藏書題跋輯錄目

集部

陳思王集

周星貽

嵇康集

張燕昌

又

黃復翁

又

吳志忠

支遁集

葉弁

陸士龍文集

陸貽典

何水部集

葉林宗

韻宋樓藏書
題跋輯錄
目

梁昭明太子集

邵公疇

又

奚綢

陶隱居集

葉奕

又

張青芝

東皋子集

吳翌鳳

杜工部集

毛辰

王右丞集

顧千里

又

黃汝翁

劉隨州集

口治泉

感峰樓鈔藏

毘陵集

無名氏

朱文公校昌黎集

吳兔床

呂和粹文集

孺守居士

歐陽行周集

何焯

又

顧千里

長江集

無名氏

薛許昌集

妙道人

歌詩編

黃汝翁

沈下賢集

葉萬

李文饒文集

葉石君

元氏長慶集

楊循吉

又

錢蒙叟

又

葉石君

姚少監文集

黃復翁

周賀詩

無名氏

竺淨慧書

吳騫

又

何焯

又

吳騫

感峰樓鈔藏

甫里先生集

徐興公

李洞詩集

葉石君

一鳴集

口元輅

韓內翰別集

毛辰

杜荀鶴文集

顧潤菴

浣花集

黃復翁

徐常侍集

無名氏

柳仲塗先生集

何焯

小畜集

岳西道人

小言集

張田盒

河南先生文集

趙坦

元豐類稿

何焯

東坡先生詩

吳騫

後山先生集

何焯

高僧參寥詩

陳鱣

斜川集

吳長元

謝幼槃文集

謝肇淩

日涉園集

雲泉居士

感峰樓鈔藏

又

鮑以文

慶湖遺老集

黃浚翁

又

陳鱣

劉左史文集

朱竹垞

建康集

葉石君

陵陽先生詩

口西口

又

葉林宗

孫尚書大全集

黃浚翁

歸愚集

王士禎

又

朱竹垞

又

黃浚翁

雪溪詩

王士禎

太倉稊米集

章惇

周益公文忠集

宋賓王

又

謝浦泰

斷腸集

鮑以文

止齋先生集

周錫瓚

鉛刀編

口清之

感峰樓鈔藏

平菴悔稿

吳長元

又

趙魏

永嘉四靈詩

黃復翁

後村居士集

盧文招

芸隱橫舟集

鮑呂文

北窗文集

趙谷林

羅滄洲詩集

顧俠君

水雲詩

錢牧齋

古逸民先生集

鮑呂文

又

黃汝翁

紫石于先生詩選

沈廷芳

又

勞聿卿

寧極齋稿

吳焯

淳甫遺老集

吳焯

湛然居士文集

宋蔚如

又

黃汝翁

又

查初白

歲春詩集

王聞遠

感峰樓鈔藏

桐江集

鮑廷博

桐江續集

鮑廷博

剡源先生文集

何焯

又

趙懷玉

竹素山房詩集

杭世駿

又

鮑廷博

松雪齋文集

黃汝翁

靜修集

宋賓王

存悔齋詩

毛晉

又

毛 宸

秋澗大全集

李滄葦

清容居士集

王 彝

曹文貞公詩集

宋賓王

又

錢大昕

陳剛中詩集

吳 岫

又

姚 瑤

知非堂稿

王士禎

翰林珠玉

吳 焯

感峰樓鈔藏

又

范德機詩集

黃汝翁

吳禮部文集

黃汝翁

陳衆仲文集

黃汝翁

傅与礪詩集

吳焯

又

吳城

勾曲外史詩集

黃汝翁

又

錢天樹

鶴年詩集

宋賓王

又

徐興公

又

勞顛仰

江月松風集

翁 棧

梧溪集

頤千里

又

王士禎

樵雲獨唱集

黃復翁

九靈山房集

鋤菜翁

鍊崖賦稿

黃浚翁

又

勞季言

感峰樓鈔藏

鶴田蔣先生文集

蔣絢臣

雲林集

查慎行

說學齋集

葉恭煥

又

顧韓

又

查慎行

漱所小稿

黃浚翁

清江貝先生集

貝墉

缶鳴集

黃浚翁

友石先生詩集

黃浚翁

鼓枹稿

宋賓王

又

黃復翁

韓山人詩集

黃復翁

耕學齋詩集

黃復翁

樂府古題要解

柳 僉

又

孫星衍

唐百家詩選

何 焯

三蘇先生文粹

李兆洛

會稽掇英集

錢 穀

感峰樓鈔藏

又

文震孟

聖宋文選

吳騫

歲時雜詠

葉石君

嚴陵集

鮑以文

崇古文訣

黃汝翁

詩家鼎裔

勞權

詩苑衆芳

沈賡所

天下同文集

馬思贊

草堂雅集

宋賓王

中州啟劄

黃浚翁

荆南唱和集

吳騫

雅頌正音

黃浚翁

皇明文衡

口道穀

文心雕龍

錢功甫

又

何焯

又

沈岩

又

黃浚翁

詩式

盧文紹

感峰樓鈔藏

誠齋詩話

鮑以文

雲莊四六詩話

鮑以文

吳禮部別集

厲鶚

修辭鑑衡

黃後翁

珠玉詞

陸敕先

近體樂府

陸敕先

小山詞

陸敕先

又

毛扆

樂亭集

毛扆

東堂詞

陸敕先

又

毛辰

東山寓聲樂府

王迪

溪堂詞

陸敕先

又

毛辰

酒邊集

陸敕先

石林詞

陸敕先

又

毛辰

梅溪詞

陸敕先

感峰樓鈔藏

白石詞

陸敕先

樵隱詞

毛辰

日湖漁唱

黃汝翁

西樵語業

陸敕先

又

毛辰

放翁詞

毛辰

稼軒詞

毛辰

涸泉詩餘

勞權

惜香樂府

陸敕先

撫掌詞

勞聿仰

養拙堂詞

毛 宸

又

勞 權

省齋詩餘

毛 宸

又

勞聿仰

明秀集注

黃汝翁

又

孫原湘

遺山樂府

勞聿仰

扣舷集

勞聿仰

感峰樓鈔藏

眉菴詞

勞其卿

花間集

孫星衍

樂府雅詞

朱竹垞

感峰樓鈔藏

百宋樓藏書題跋輯錄卷四

集部

陳思王集十卷

明刊本

癸酉子月廿五日借儀顧夫子藏本校所蓄
天啟槧本訖此本間有脫謄且為李氏重
編不及天啟本尚仍舊本次序然據以補正
彼本者凡數十字披沙揀金往之得寶舊
槧之可以可貴也星貽并記

感峰樓鈔藏

嵇康集十卷 舊抄本

中散集十卷吳匏菴先生家抄本卷中謬誤
之字皆先生親手改定自板本盛而人始不復
寫書即有書不知較讎言與無書等祇當換
泥爛耳觀前賢於書以藉用心不苟如此又可
憑以證他本之失也庚子六月入伏日記

黃溪公羽跋 已見題識不錄

余向年知王兩樵表兄家藏嵇中散集乃
蘇書堂校宋抄本為藏書家所珍秘從士

禮居轉歸兩榜今乙未冬向兩榜索觀并
出副錄本見示互校稍有訛脫悉為更正殊
改原字上者抄人所誤標於上方者已意所隨
正也還書之旨附誌於此道光十五年十一月初
九日妙道人書

支遁集二卷舊抄本

崇禎己未得是集曹生舅氏為余錄就八月二日晚李涵仲偕余對勘一過原本迺嘉靖乙未七檜山房鈔為景陽主人舊籍五川居士校各有印五川居士氏楊字夢羽官禮部員外郎震澤葉弁

陸士龍文集十卷陸敕先校本

凡宋板書未嘗無脫誤處然往々正得十之七八有謂宋刊一字無謬者可爲一察也敕先校畢之後步偶書

丁未立春浚何子道林乞得此本黼季出示宋刊既與黼季校一本隨又校得此本凡皆校過兩次宋本謬字亦俱勘入其傳當亦無遺惜宋本殘缺不能盡恨耳貽典再識
丁未二月十日辰刻寒雨中毛黼季宋刻本

再校訖常熟勅先陸貽典識

何水部集三卷 舊抄本

何錡字子端秦季公之友也。能字好聚古
書帖，嘗擬元人書。何遜集一卷，筆精墨妙
字，有法在其季。孫士龍處，一旦為人訛去。
此本乃從士龍抄得者，雖無考成，尚有典刑。
後人其實之林宗。

梁昭明太子集五卷明正德刊本

崇禎辛未十二月壬辰日歲于瓜疇

乾隆庚寅九月壬午後一日灌龕外史吳個
觀于貞復堂

貞白先生陶隱居集一卷 張主人手抄本

崇禎戊辰夏四月余適鹿城良夫師時館
張氏余往謁因見師校錄是集明年己巳
余得借校然坊刻脫誤頗甚不堪改抹故
另寫此本其字蹟前後非一則余及李仙仲
奚靜宜共書也五月十七日午震澤葉奕記
於孫氏蕉夢軒之雨窗

林宗寓本今歲聽雲陸氏余從陸氏借
錄乾隆元年嘉平朔日錄竟青芝

臧峰樓鈔藏

東臯子集三卷附錄一卷舊鈔本

庚子初冬於鮑以文丈處見宋槧本凡五卷
視此增多三十餘篇惜未假得校補書此
以俟十六日延陵吳明立風記

杜工部集二十卷附補遺 景寫宋刻本

先君昔年以此編授辰曰此杜工部集乃王原叔
洙本也余借得宋板命蒼頭劉臣影寫之
其筆畫雖不工然從宋本抄出者今世行杜
集不可以計數要必以此本為祖也汝其識之
辰受書而退開卷細讀原叔記云甫集初六
十卷今祕府舊藏通人家所有稱大小集者
人自編撫非當時第次乃搜裒中外書九十
九卷除其重複定取一千四百有五篇起太平

時終湖南所作視居行之次若歲時為先以分
十卷又別錄賦筆雜著二十九篇為二卷合二十
卷寶元二年十月記二十卷末有嘉祐四年四月
注曰姑蘇郡守王琪後記此後又有補遺六卷
其東西兩川說僅存六行而缺其後而第十九
卷首缺二葉辰方知先君所借宋刻乃王郡守
鏤板於姑蘇郡齋者深可寶也謹什襲而
藏之後二十餘年吳興賈人持宋刻殘本二冊
來售第一卷僅存首三葉十九卷亦缺二葉補

遺東西兩川說亦止存六行其行數字數悉同
乃即先君當年所借原本也不覺悲喜交集
急購得之但不得善書者成此美事且奈何
又二十餘年有甥王為玉者教道寸其影宋甚精
覓舊紙於此本影寫而足成之嗟乎先君當
年之授此書也豈料忽意後日原本之復來
展之受此書也豈料今日原本復入余舍設
使書賈歸于他室終作敝篋之棄爾後歸
于余而無先君當年所授不遇等閑殘帙視

之尔焉能悉其源委哉應是乞君有靈不使
入他人之手也抄畢記其顛末如此懷歲在己卯
重九日隱湖毛辰謹識時年六十

王右丞文集十卷 宋麻沙刊本

此麻沙宋刻王右丞詩文全集十卷道光丙戌歲
汪藝芸主人借出影寫一部復編取他本勘
其得失雖宋刻亦有誤而不似以後之妄改究
為第一也遂題數語於帙端俾文繁不具錄
思適居士頌千里

此宋刻王右丞文集十卷二冊頃余友陶蘊輝從都中寄來
而得之者也先是蘊輝在蘇時余與商推古書讀書敏求記
中物須爲我購之今茲八月中旬有人自北來者寄我三種

書此本而外尙有元刻許丁卯集及宋刻小字本說文來札
云王右丞文集卽所謂山中一半雨本許丁卯集卽所謂校
宋板多詩幾大半本可見留心蒐訪竟熟讀也是翁書以爲
左券而不負余託惜以物主居奇必與說文并售索直白金
百二而余又以說文已置一部不復重出作書復之許以二
十六金得此兩書往返再三竟能如願不特幸余得書之福
亦重感余友購書之力也此書作山中一半雨本向見劉須
溪評點元刻止詩六卷見藏周香嚴家香嚴又藏何義門校
宋本亦止詩無文雖同出傳是樓而敘次紊亂字句不同非
一本矣十月十三日毛二榕坪過訪士禮居余知其能識古

書出此相質榕坪并爲余言向見桐鄉金氏本板刻差大詩
中亦作山中一半兩文則無有也與此更非一本益見此刻
最善而爲余所藏抑何幸與客去攜書插架卽跋數語於尾
葉圃黃丕烈識 嘉慶癸酉中秋後八日偶過五柳居知新
從無錫人買得元刻劉須溪評點王右丞詩卽借歸與宋刻
對其序次悉同擬購之未知許否也二十四日復翁記

威峰樓鈔藏

劉隨州文集十卷外集一卷

明正德刻本

辛未秋沈欽谷業師假得義門何先生校
本校過其前五卷依南宋書棚本乃文淵
閣殘書也後五卷用馮定遠家藏抄本
及嚴天池家抄本互勘兩抄次第與宋本
皆合宋本十行行十八字此本同可見嘉靖
間本猶可據惜文集未列入行將抄補之
治泉記

自記則用墨筆恐相混也書中圈點非畫

劉隨州文集

義口又記

毘陵集二十卷舊抄本

唐獨孤公田毘陵集二十卷祕藏天府世罕其傳
是本為吳文定公在東閩時抄出以藏於家者
也其孫徑口府君與貞山給事為內兄弟給
事迺得假歸命傭書者錄之惜乎訛舛詬
讀知余嗜古書來請校一過余且校且錄積
四旬有二日訖事余之用心亦勤矣安能吾子
若孫同余之嗜好而寶之也

朱文公校昌黎先生集四十卷外集十卷集傳一卷
遺文一卷 吳興庠臨黃山谷吳俊齋批校本

秀水王元啟讀韓記疑之明新安朱崇沐刊
是書脫少因其行世最廣故特據此詳
校俾讀者攷焉據王說是此本誠未為善本
暇自當以王記覆校之 吳元林

呂和叔文集十卷影抄宋刊本

右呂衡州集十卷甲子歲從錢牧齋借得前
五卷戊辰歲從郡中買得後三卷俱宋本
第六第七二卷均之缺如因棄置久之越三年
辛未友人姚君章始為余錄之因取英華
文粹所載者照目寫入以俟他年得完本校
定四月盡日識居守居士

凡行間所注某作某俱愚所按此本別一
照宋本抄寫第二卷聞砧以下十五首宋本

所無案陳解元棚本增入

感峰樓鈔藏

歐陽行周集十卷舊抄本

康熙己丑重陽前一日澄內弟吳紫臣借得所
收葉文莊公家本抄手校改數處葉本與
此亦互有得失俟訪得宋雕及他藏書家善
本當再校之行周文尚當為李元賓之亞然
其諸序固未減梁補闕特不宜多爾昆湖
舟中義門焯記

何校葉抄多雜糅而何自下已意語多不
確即如第五卷韓城西尉廳云列縣出於

千乃文集最妙處文苑英華八百六文粹七
十三於千上少五字皆大誤舊唐志貞觀十三
年定簿縣一千五百五十一新唐志開元二十八年
戶部帳縣千五百七十三行周此記作於貞元
十五年已非復貞觀開元之盛其缺不得反有
五千縣之多甚明矣宜據集刪苑粹衍字而
義門反以添集何耶姑舉一條用貽後之
覽斯者貴乎心知其意若尋行數墨恐
後遇善本仍有必不得之病也元和初予千里

潤
穎
識

歐陽行用集

長江集十卷陸穀先校宋本

辛巳除夕假葉鼎卿鈔安愚道人寫宋刻
本校勘正甚多可稱善本

薛許昌詩集十卷 陸初允校宋本

歲乙未有以毛校抄舊本許昌集求售者為
靜軒弟意所欲讓歸之今秋得汲古刊
本乃從靜軒處取而校之并補鈔原序跋
凡五紙毛鈔本前後均有毛子九讀書記方
印卷一首葉鳳苞二字圖方兩小印又有宋
本二字橢圓印但未識當時既有佳本何以
不取付刻也妙道人記

歌詩編四卷集外詩一卷影寫宋鈔本

余藏唐人集不下百種舊刻名鈔都備即
同一集而藏書之家有異亦在所收故種更
多也頃書友鄭益偕袖此舊鈔李賀歌詩編
一冊遺余識是馮氏藏本檢所藏尚缺此種急
收之馮所藏唐集已有一二種行款同章卻
不相類知抄各有本其藏亦非一人也乙丑夏
菱公雨記

戊辰夏從征義齋得舊刻本較此多五元丁

丑宏治壬戌二序當是明翻元刻也分卷雖同
標題序次略異即字句每間有不同稍屬當
參校之讀書敏求記載鮑欽止家本此殆
近之汲古閣識

感峰樓鈔藏

沈下賢文集十二卷 舊抄本

崇禎戊寅從閤門坊中得沈亞之集舊人鈔本才取歸為從兄林宗借去徑載相索以此本見償其原本則乾沒矣近來林宗物故書籍星散宋元刻本書盡廢於狂童敗婦之手所謂舊抄者已不可知矣此書幸歸于我庶延幾年之存間窗暫理書籍後為裝治老友馮定遠嘗謂予曰唐至元和文章士盛韓柳元白之外劉夢得沈亞之皇甫持正

李習之李元賓皆表表者予亦以為然其中
惟元賓集未暇鈔錄餘皆有善本後人勿或
輕棄較林宗之後斯大望也然予生平不欺其
心自信不若林宗其書籍必不若林宗死後
之慘焉為子孫者當慎守之以副予治之志焉
嘗康熙戊申歲洞庭葉萬字石君識

李文饒文集二十卷別集十卷外集四卷明刻本
戊子年夏假得太原張孟恭所藏蘇州文
衡山宋本校洞庭葉石君記

元氏長慶集六十卷 嘉靖壬子董氏刊本

宏治元年沒對門陸進士士脩借至命筆生
徐宗器錄原本未畢士脩赴都來別索之志
促所待十有幾于不成幸竟留之遂此深願
九月二十五日始克裝就藏于雁蕩村舍之卧
牀齋中永為珍玩且近又借得白氏集亦方
在錄可謂聯珠合璧矣
謙父

微之集舊得楊君謙鈔本行間少空字以得

宋刻本張子昭所藏始知楊氏抄本空字皆
宋本歲久漫漶處君謙承其舊而不敢益
也嘉靖壬子東吳董氏用宋本翻雕行款
如一獨于空闕字樣皆妄意揣摩填補如
首行思歸樂原堂兩字妄增云我作思歸
樂文義違背殊不可通此本流傳日廣後
人惟患其闕而無從是正良可慨也亂後余
在燕都于南城廢殿得元集殘本而所闕
誤一二完好暇日援筆改正豁然如翫之去

感峰樓鈔藏

目霍然如疥之失體微之集殘闕四百餘
年一旦復完寶玉大弓其猶有歸魯之徵
乎戊子五月東吳蒙叟識

元氏長慶集一百卷世傳止六十卷係宋洪
景伯刊本其間脫落差謬頗廣虞山太
史得宋刻本校正因借謄讀己亥夏五洞
庭葉石君識

感峰樓鈔藏

姚少監文集五卷 舊鈔本

此姚少監詩集五卷殘宋本亦出郡城陸西屏家向為翰林國史院官書余所得殘宋本二劉文集板刻正同与此同西屏家物也此後出周香嚴歸之因借而命門僕影抄俾與二劉並藏焉甲子小春月萬壽日裝成并記黃丕烈

周賀詩集一卷影寫宋刻本

紀事云周賀東雒人少泛浮圖法即清塞也遇
姚合而近易名藝文志云詩一卷然未見傳本
顧茂倫唐詩英華選賀詩七首有贈厲玄
侍御一首此集又不載未知茂倫泛何錄也此
本亦藏茂倫家末必有臨安府相北睦親坊
南陳宅書籍鋪印細字一行確是宋板余遂
借歸手抄於松風書屋

重刊校正三澤叢書四卷補遺一卷舊抄本
三澤叢書世多善本也久矣昔王阮亭司寇
酷愛此書嘗從黃俞邴徵君借抄所謂金
陵餅肆本也其後又得毛斧季寄本所謂
都兄敬刊本也書皆四卷相傳出自天隨子手
編都本按黃本不同者惟少王益祥跋少憶
白菊閑吟二絕句及丙丁二集中篇章前此
少異耳近時三吳顧氏有刊本紙墨精好
而亥豕舛錯殊甚亦無王益祥跋似從黃

本翻雕者予恒欲訪求善本且正而未果緣
飲言嘗郁君陞宣收藏抄本最佳秋日因
偕過郁君東款軒借得視顧本洵善後
有王益祥跋已缺七十餘字省其篇章次
第似據都本傳錄者但不見南濠跋耳校
畢復出予拜經樓所有舊人鈔本覆校始知
前本字句間為收人率意竄改正復不少
予此本真希世之珍也惜阮亭司寇不及見
矣按陳直齋書錄解題云叢書為甲乙

丙丁詩文雜編政和中朱衮刊於吳江補遺一卷用蜀本增入又云蜀本七卷元符中鄆人樊開所序此本正七卷第八卷為補遺又不知出自誰手視顧本少古近體詩十二首送小鷄山樵序及樊朱諸人序跋合諸樊序所云八十三篇者則定為蜀本無疑惜卷尾零落未報徑自散墮去其者以下缺五歌序一首亦缺然而世無都本已不知黃本之訛謬若此又孰知尚有蜀本者存於今日以匡二本之失屈

指自樊氏為序以來已閱六百七十餘載豈非
所謂在在處處有神物護持者耶本傳云
借人書篇帙壞舛必為輯補刊正予重都君
之誼就所借本手為校正而歸焉夫亦甫里
先生之教也乾隆甲午冬日海甯州吳騫識

重刊校正笠澤叢書四卷補遺一卷舊抄本

此冊丙寅歲大人從江右雜書中携歸以其脫
誤難讀久置敝簾中己丑適從虞山錢氏借
得馮已蒼所傳元板佳本因取而改竄以示
後人使知鈔本之不足據有如此者若能細心
淨寫一本便自可讀亦不負吾區區憊比之
意也悼記

此書別有編為八卷者以自序觀之則此四
卷者乃舊次八卷分雜著與詩而二之則非

不類不比矣或謂八卷乃宋刻殆耳學七焯
又記

按陳振孫云藝書七卷補遺一卷乃樊用
所序是為蜀本然則宋刻有四卷者亦有
八卷者未可盡以為耳學也竊又記

乾隆丁酉夏日海昌吳騫借錄一過禁
書至多舛誤予嘗廣求善本互相契勘
至此凡七校矣常欲別刊一本以救近時江
都吳下之刻之失未審何時得遂斯願也

感峰樓鈔藏

甫里先生集二十卷 明刻本

萬曆丙午春范東生見貽興公

甫里先生集

李洞詩集二卷葉石君抄本

余家林宗藏書頗精身沒之後盡屬雲烟
李洞集為周俊冲所得世傳本止有上下兩
卷今借歸補正兼以鮑溶副本見惠今以李
頌張喬刻本酬之時康熙戊申歲秋九月葉
石君識

司空表聖一鳴集十卷舊抄本

是冊為先君子舊藏本云是前明中葉人手
抄但每一展讀切訛訛字尚多欲覓善本
校讐言留心訪問數年來竟不可得今秋一書
賈持到某竹堂舊抄表聖文一冊字畫極精
雖惜僅存四分之一不為全書卻又過昂其值
無力售之因就其所錄者校改一遍勘正數
十字已覺爽心悅目未審何時得購完書補
成全璧也漫記諸卷端以俟丙戌九月東陽

主人元輅

韓內翰別集一卷叢書堂鈔本

據列傳云偃字致光京兆萬年人計有功云字致堯今日致光誤矣胡仔云致元未知孰是
自號玉山樵人小字冬郎開成六年進士韓瞻
之子李義山與瞻同年偃童時即席爲詩是
之一座盡驚李因贈詩云十歲裁詩走馬
成冷灰殘燭初離情桐花萬里閩山路雛鳳
清於老鳳聲耳藝文志載詩一卷香奩集一
卷余梓香奩已十餘年矣茲吳兢廣叢書

堂抄本別集皆天復元年辛酉五月入內庭後
詩也自辛酉迄甲戌凡十有四年往往借自述
入直扈從貶斥後除五叙朝廷播遷奸雄
篡弒始末歷狀如鏡可補史傳之缺第乙卯
丙辰未入翰苑不知何人混入惜未得慶歷間
溫陵所刻致光手書詩帖一訂正耳其亂後
依王審知本傳与李昉諸家言之甚詳惟劉
克莊謂審知據福州唐韓致光乃居南安昌
嘗依之乎又見墨林方氏所藏蔡裴君文自

書唐故官不書梁年諱稱其賢于楊風子箴
且以宋景文不與表聖同列為欠事此皆克莊
極贊致光不事二姓也若王審知為閩王始于
丁卯卒于乙酉相去十九年致光即匿影于三山
九曲之間何損其為李唐遺民耶況朱全忠
被刺刀腹出於背瘡以敗種致光亦可以含笑
見昭宗于地下矣當寓沙陽天王院歲餘其
詩奚止蘊明一篇若得章僚碑記考其傳
外遺事則羣疑渙然冰泮云隱湖毛晉跋

於續古草廬

感峰樓鈔藏

杜荀鶴文集三卷影寫宋抄本

讀書敏求記云余藏九華山人詩是陳解元書
相宋本總名唐風者後得北宋繕乃名杜荀
鶴文集而以唐風集三字注于下竊思荀鶴有
詩無文何以集名若此殊所不解通考云唐
風集十卷更與顧雲撰序刺謬矣此本為虞
山毛氏所藏想從北宋本傳錄者與述古繕寫
本同出一源而抄手工整雖非影宋已迫勝世
俗流傳之本矣洞簫記

浣花集十卷 宋刊抄補本

此殘宋刻本浣花集四至十卷余友陸子東蘿以青蚨一分得諸閭門外上塘街冷地特爲持贈余東蘿初不知爲宋刻本但云有舊人圖書葉陽生欲就君質之余曰此人余卻知之余將爲言其詳及觀後一無名氏跋而益信余所知之人也近因上津橋葉氏將刊其先世天士所著本事方釋義向余借宋刊許學士本事方因在往還登眉壽堂見爲號有陽生道兄詢悉陽生卽天士之弟精於醫曾治范伏菴太史初生時無穀道一證此書所鈐印卽其人也末跋語云某因病久嗽不愈以此償藥直知向時醫家脈藥相連故云以

此償藥直也是書破爛不堪命工粗加葺葺裝成攜示葉氏
後訥人丰帆輩各幡陽生手批醫書皆云跋語字跡實係陽
生公書而康熙乙卯三月去陽生辭世之年庚申尙有一跋
此跋洵不誣也訥人云陽生公與汪鈍翁有唱酬之作蓋精
于詩者一書之微多取印證余喜而筆諸卷端復翁余藏
韋莊浣花集向有二本一爲黑格精鈔本一爲藍格舊鈔本
一爲毛氏影鈔宋本三者之中影鈔爲上然得此殘宋刻證
之則又在影鈔者上矣蓋書以古刻爲第一一字一句之誤
猶可諦視版刻審其誤之由也鈔則已非廬山真面目矧
其爲泛泛傳鈔者乎故余佞宋雖殘鱗片甲亦在珍藏勿以

感峰樓鈔藏

不全忽之此冊前缺序目及首三卷若就影鈔本補全誠爲兩美然業無朱刻卽影鈔已失其真故仍願離之則兩美也卒讀者有影鈔本在取而觀之可耳甲戌六月六日復翁書於第九卷尾以此半刻係裝時補綴非朱版本有雖灰之無傷 余家向藏毛氏影宋本浣花集在唐人諸集中取對此此實宋版卷中微禎立樹避此四字而立樹有不盡避者宋版時或有此余初付裝見者或疑此刻之非宋而妄笑余倭宋之太甚所信未必真然裝成同人傳觀藏書家如周香嚴賞鑒家如陶朗軒皆以余言爲信則誠可信矣倭宋何嘗倭哉 昔何義門學士跋宋刊詩渾丁卯集云惜板刻糊塗幸得毛豹孫影寫宋本一一補其缺失差異於不知而妄

作者今余收浣花集失其序目及首三卷亦賴影宋本補全
卽守義門之意也宋刻出自陸東蘿所贈此屬東蘿影鈔蓋
是書始終成於東蘿云丁卯季夏裝復翁記

徐常侍集三十卷 朱竹垞手鈔本

徐文公集三十卷南唐舊臣後入於宋東海徐鉉鼎臣之詩若文也前二十卷在南唐所作後十卷入宋後所作詩政清婉立其體未興之前故無豐縟之習其文儼體為少亦雅淡有餘為組織之學者見之或不盡意然沖融演迤自能成家不可得而廢也李文正稱其為文敏速不樂豫作臨事立揮草云速則意思壯敏緩則體勢疎慢今觀集中之文

別其言也信亦唯其如是故亦無滌涇涇蓄
之趣崩雲裂石之勢此殆由人之才力各有所
偏勝雖使自知之而固無能相易者乎余從
鮑氏借得此集乃虞山馮已蒼舒本校本余
又為正其所未盡者錄成復請江陰趙敬夫
曦明覆審又得十數條其本脫者尚無從
補正之然此已可信為善本矣東里盧文弨
騎省集六冊秀水朱太史故物卷中丹黃皆
竹翁親自點勘其書錄半帙書法古雅較之

陋板惡鈔真同霄壤後歸花山馬寒中先
生甲辰乙巳間南樓園藉雲散風流予乃
得而有之覽昔墨妙不勝盛衰今昔之感小
山禁桂書齋識

感峰樓鈔藏

河東柳仲塗先生集十五卷附錄一卷舊抄本
河東先生集鈔本多謬第十卷卷首相
仍缺半葉他本遂并失去第二篇矣其清
先生偶有以此本見示其每行字數近古前
有張景序又止作十五卷因留之與予家所
傳四明黃太沖家本又借虞山毛氏所傳叢
書堂本互勘焉改正添補共二百餘字補可
讀矣此本通字皆缺末筆乃避明肅父諱
疑亦出于北宋刻云康熙五十年辛卯春日何

焯記

河東先生集陸君其清偶以鈔本見示其每
行字數近古前有張景序又止作十五卷因
留而對校初謂兩日可了乃因循作輟遂至
半月甚矣衰善病且怠於學也其清不輕
與人通假書籍倦圃竹垞兩先生歆鈔錄
其藏本甚祕者即不冒出尋常小書亦必
葉數卷數相肖始得各易所無獨此段
於予意尤厚乃識不忘焉康熙五十年二月

感峰樓鈔藏

何焯書

何東柳仲途書

感峰樓鈔藏

王黃州小畜集三十卷 明景鈔宋刻本

王黃州小畜集往歲避寇城中得之沈辨之
氏乙卯七月也近潛坤子借觀先與前三冊今
復避寇入城潛坤過訪談及索後三冊特歸
取來燈下閱之忽憶乙卯秋不覺十年矣先
陰迅速一事無成爲之三嘆題此以紀歲月
時嘉靖乙丑四月廿九日岳西道人初復齋于
桐廬齋

感峰樓鈔藏

王黃州小畜集三十卷 張初庵校宋本

宋槧小畜集舊藏沈辨之野竹齋卷首又有
惠松崖印殘本今在黃蘗公兩百宋一厘第十二
卷全九葉第十三卷全七葉第十四卷存九葉
闕第九葉第十五卷全十葉第十六卷存十葉
闕第一至七葉第十九卷存十四葉闕十五十
六三葉第二十卷全十六葉第二十一卷全十七葉
二十二卷全十七葉二十三卷全十五葉二十四卷存十
葉闕十一至末三葉宋刊存一百四十九葉餘缺卷

缺葉皆吾研齋補鈔

予少時得元之詩文數篇讀而善之銳欲見其
全集遍覓不可得既知有板梓于黃州託其
州人覓之又不得去歲入長安泛相國葉進卿
先生借得內府宋本疾讀數過甚快因鈔而
藏之今學乃詩者未能窺此老藩籬而動彈
射宋人至不遺餘力此與以耳食者何以異悲夫
萬曆庚戌三月望日晉安後學謝肇淛敬跋
案吾研齋補鈔本沒有此跋想呂氏之所祖

即出於謝在杭本耳因錄之右以備溯源之考
按云初曾居士記

威峰樓鈔藏

河南先生文集二十七卷附錄一卷舊鈔本

嘉慶乙亥冬十月嘉興朱友鶴先生出此本見
示坦以王漁洋校定本互校並有謄脫皆傳寫
者之過今審其文義兩通者並存之焯然誤者
抹去之脫者補之疑者訂於上方脫誤差少庶
幾善本云受業趙坦識

此本似從南宋刊本錄出故韓國華墓誌銘中
構字闕而不書注云今上御名構為南宋高
宗諱也附錄一卷當出自明人手訂歐陽文忠

公乞典尹構一官狀不諱構字亦一謬也校畢
并識

河南集文獻通考載三卷直齋書目載二十二
卷另有書判二卷今此集分二十七卷載攷
四庫館書目亦二十七卷范文正公原序作二十
七卷則知分合多寡之間古今本自不同也

南豐先生元豐類稿五十卷 明正統刊本

傳是稿宋本序文闕每半葉十行每行二十字何
栢邱云南豐續稿外集南渡後散軼無傳聞
禧間建昌郡守趙汝礪始得其書於先生

族孫淮缺誤頗多乃與郡丞陳東合續稿外
集校定而刪其偽者因舊題定為四十卷後
寫以傳元季又亡于兵火國初惟類稿藏于
祕閣士大夫解得見之永樂初李文毅公為
庶吉士讀書祕閣日記數篇休沐日輒錄之

今書坊所刻南豐文粹十卷是也。正統中，毘陵趙自業琬始得類稿全書，以畀宜興令鄒旦刻之。然字多謬舛，讀者病焉。成化中，南豐令楊參又取宜興本重刻于其縣。踰鴻承謬益，能是正。太學生趙璽訪得舊本，悉力讐校，而未能盡善。予取文粹文鑑諸書參校，乃稱可。讀文鑑載雜識二首，并書魏鄭公傳後類稿無之意，必續稿所載也。何焯。

王狀元集諸家注分類東坡先生詩三十卷宋刻本

宋王梅溪集百家注東坡詩近所行本皆後人
妄行竄亂刪併全本失真與宋高邱所刊施注
蘇詩無異觀者每以不能一見宋刻為恨今夏
有若賈持此書抵余家求售適余他出不值
而去明日余歸操舟訪之始得之破石南湖中
遂以善值購焉此書楷墨精雅古香襲人
真舊本之最佳者爰為長歌以書其後尚乾
隆五十一年夏重午後二日吳林吳騫識男壽

賜書

王梅溪分類蘇詩注二十五卷不及和陶詩迨
施元之編年注始合刊之按若溪漁隱以話
云前乃東坡手自編定後乃後人所編惜乎
不載和陶詩然則當時人刊東坡詩多不及
和陶詩無足怪也庚溪詩話崇寧大觀間
蔡京當國禁蘇軾文詞墨跡而毀之政和
間忽弛其禁光堯太上皇朝盡復軾官職
今上尤愛其文章乾道初梁叔子任掖垣

兼請席一日宿直召對上曰近有趙葵等注
軾詩甚詳卿見之否命內侍取以示之乾道
末上遂為軾御製序贊冠其文集命有
司與詩集同刊之

吾友鮑君以文嘗疑百家姓氏中胡銓下注
字邦衡為後人妄添謂胡銓姓名偶同而
實非忠簡公予竊以為不然按注中明有引
邦衡曰者則其為忠簡無疑鮑君又謂忠簡
廬陵人不應冠若溪予按書中只以若溪

冠胡仔姓氏上而胡銓上偶失著廬陵耳
如潘大臨大觀皆黃岡人而列孫章之後
徐口臨川人而列臨安之後此並注家之莽
鹵也兔牀記

後山先生集二十四卷 明宏治刊本

此卷宏治間刻本送邢居實序脫後平章善序脫前半凡二十行己丑七月得嘉靖以前舊鈔本對校因為補寫錢牧齋讀書非得宋刻名鈔刻云無有真細心讀書者之言如浙之某某輩徒取盈卷帙全不契勘雖可汗牛馬其實謂之無一依可也掉記

康熙七丑秋日從吳興璠書人購得舊抄後山集殘本中闕三四五六八四卷勘校一過改

正脫誤處甚少庶幾粗爲可讀而明人錯本
誤人真有不加不刻之歎也特記

高僧參寥詩十二卷 明刊本

參寥子集十二卷宋僧道潛撰道潛本姓何
於潛人墨莊漫錄云本名曇潛東坡為改曰
道潛東坡守杭州為卜西湖智果精舍居之
嘗坐得罪返初服建中靖國初詔復祕襲
常寧末歸老江湖嘗賜號妙德大師今所
傳詩集凡數本一題三學院法嗣廣定可
智果院法嗣海惠閱錄前有參寥子小影
印海惠所編首載陳師道錢參寥禪師

東歸序次教甯陳黃諫喬時敏張霄卿四
序一本題法嗣法款編卷帙俱同而叙次
迥異所載陳師道序題曰高僧參寥集序
与文中語意不符又吳之振宋詩鈔云參寥
集杭本多誤采它詩未及与斯是本為明時
歙汪汝謙校刊陳序亦非高僧參寥集序
殆即從法款本重刻未知視杭本何如耳
嘉慶十年春日陳鍾元

前引曇潛改各事今備載墨莊漫錄云

感峰樓鈔藏

呂溫卿為浙漕既起錢濟明獄又廢廖明
略事二人皆廢斥後款個而惟參寥未有以
中之會有僧與參寥有隙言參寥度牒
冒名蓋參寥本名曇潛因予瞻改曰道
潛溫卿索牒驗之信然竟免刑之歸俗鄉
管交州未幾溫卿亦為孫傑具其反舊其賊
溫擊獄人以為舊人者人必反舊之按此事
行錄未及故附書焉鱸再記

斜川集八卷 鮑以文手鈔本

蘇叔黨斜川集二十卷世罕傳本余昔見書
賈持舊者皆宋劉過龍洲道人集同名而
易其姓以應好古之求耳壬午冬桐鄉甌山
錢氏云有真本與世迥異余意為朱竹垞
太史之甥必曝書亭秘冊也偕鮑君以文買
舟相訪懇借而歸閱其首葉即用賈秋
壑半間堂事又以燕京為長安相與大噱
蓋又妄人偽作以欺世者簽駁數十事還之

以閱王弼州題跋言以劉集充斜川自元季
已不自近始因歎廣陵散久絕人寰矣次
朝廷纂修四庫全書始于永樂大典各款
中纂輯詩文各若干首編為六卷長元偶
來京師得副墨于孫中翰溶借歸手錄
雜零篇剩簡十得其二三世得見廬山真
面目亦平生之厚幸矣傳寫訛脫悉加更正
又錄宋史本傳與書所載逸事數則于前
後東坡題跋漁隱叢話書畫攷補詩四首

詞宗詞全補詞二首賦彙補賦一首播芳大
全補表一首啟二首諸纂修之所未及者他
日南旋當與鮑君共欣賞之壬寅二月二十九日
太初吳長元書于南城張少蓬寓廬

感峰樓鈔藏

謝幼槃文集十卷 舊抄本

幼槃詩文不傳于世此本從內府借出時方涇
寒京師傭書甚貴需銓旅邸費用不贍乃
自為鈔寫每清霜相呵凍十指如槌幾二十日
始克竣帙藏之于家亦足詫一段奇事也
萬曆己酉十二月十四日辛酉晉安謝肇淛
題

感峰樓鈔藏

日涉園集十卷 舊抄本

樂易居士於永樂大典中錄出時乾隆辛丑
之秋嘉慶二年丁巳閏六月借喜福堂抄本
互校另又錄詩於各體卷末並為書後附識雲
泉居士

嘉慶五年庚申閏四月借嘉興沈帶湖比部
叔垓本對寫五月初四日畢端午日校於知不
呈齋

琺按集宿西林寺有先特進及先學士詩云檀

間盤硬語怪底光炯。追還舊風熟復。深省四句又掃除。尚書公冢下云。非無玉樹郎。抱官在中州。又哭尚書墓云。過家上冢。非吾子。宿草孤墳獨可悲。又次韻寄山伯肅老二弟云。平原公。爾仲草蒙茸。種竹當年語竟空。群從嗟予真漫叟。象賢期汝繼。沂公則商老。為公孫非姪也。

慶湖遺老詩集九卷拾遺一卷補遺一卷舊鈔本

余喜蓄書兼蓄重出之本卽破爛不全者亦復蓄之重出者取爲讐勘之具不全者或待殘缺之補也余每戲謂友朋曰余譬惜字會出分金特稍從厚爾卽如此舊鈔賀方回集止半部係余友海甯陳徵君仲魚所贈以余有重出之本或可據舊藏者補錄其半俾成完璧然余第藏諸篋笥忽忽未有以補也頃張君訥菴頗與余同嗜近亦以余所爲兼收並蓄竹頭木屑之說爲是故遇書之不全者亦時得之一日邀余觀新收之書內有慶湖遺老詩集之半余細閱之似與仲魚所贈者相似未卽言明歸取證之竟爲延平之合惟第六卷

仍缺卽前本之目亦已失之訛菴一一補完屬爲跋其顛末
余曰此事固奇然不在乎書合之奇而在乎所以書合之奇
蓋兼蓄重出之本及不全之本此余一已之獨見也而訛菴
竟以余言爲然忽復效尤卽獲奇驗則此賀集特爲訛菴軼
之始耳余樂訛菴之與予同心發并樂訛菴之堅信余說有
此巧遇可以鼓興弗衰藏書家不又得一人邪裝成仲魚適
從海濱至因屬同爲欣賞焉甲戌重陽後復翁 余向從武
林書肆得陳古靈集半部係謝在杭家鈔本曾在周元亮處
各有印記越數年錢君廣伯復得其後半部一一不爽遂成
完璧今已贈荆谿陳景辰布衣以其爲古靈後人也吳槎客

感峰樓鈔藏

明經有跋載諸拜經樓文集一時傳爲勝事此慶湖遺老集
上卷曾獲諸吳城元妙觀書坊因思黃復翁家藏書最多舊
鈔秘冊或可鈔全所以特贈豈意張君訥菴適有是集之下
卷今秋偶爲復翁所見遂以余所贈者歸于訥菴延津之劍
分而更合已屬奇事而裝潢甫竟余自海甯適至吳中則又
奇之又奇也嘉慶十九年九月十三日陳鱣記

劉左史文集四卷附錄一卷舊鈔本

晁澂劉考功公敵借鈔三劉長史合集元礼
止得半部而已康熙壬午福州林孝廉吉人
以鈔本見寄乃得全竹垞考人識

感峰樓鈔藏

石林居士建康集八卷舊抄本

國史書目載石林公文集二百卷廬山桑思
立藏書目曾有之思立去今百有餘年已
不可得此從毛子晉借抄子晉得于建康焦
氏焦乃游園後人也噫予末孫不克見先
人之書又知交寔少無由訪求有其志而無
其力悲夫二十代孫萬又名樹蓮謹識

感峰樓鈔藏

陵陽先生詩四卷舊抄本

西江派圖二十五人陵陽先生其人一也其詩
實不及后山特於西江悉習亦可謂深是
乃力薄非學深也備之以見派中一家耳
弘隆乙未重五日西口識

右陵陽先生詩集四卷計八十三紙虞山馬士
弘任鄉父為友人震澤葉林宗奕抄就
己丑歲長至前一日志于南沙鄉葉氏之寗
稼軒

感峰樓鈔藏

孫尚書大全文集殘本三十三卷影抄宋刻本

此殘宋本刻孫尚書大全文集屬存三十三卷印

趙希弁讀書附志所云孫尚書大全集五十

七卷本也外間傳布頗少余借諸周文香嚴

處用舊紙委門僕張泰影摹兩匝月而

竣事歲諸讀未見書齋居然影宋鈔本

矣雖然不及毛鈔之精而一時好事之所為

以視汲古閣中入門僮僕畫鈔書者其風

致何多讓焉嘉慶甲子六月八日蕙公羽黃

石烈

感峰樓鈔藏

侍郎葛公歸愚集十卷 舊抄本

侍郎名立方謚文定邨之父也按徑籍志歸
愚集二十卷此佚其半矣文定公南渡賢相有
集三十卷詞業五十卷不知傳于世否曾訪之
濟南王士禎書

竹垞娛老齋成展讀一過時康熙丁丑八月

二日

此集係從宋刻殘本錄出卷中行款間有不同宋本自五卷
至十三卷與此本合而此本中多樂府一卷爲宋刻所無大

約後人從他處補入以足十卷之數惜與宋刻刺謬耳阮亭
竹垞未見原本之舊故跋語未及余家殘宋本楮墨精雅爲
宋刻中之上駟至樂府一卷亦係汲古精鈔取與此本相對
惟序次紊亂未能如毛鈔之舊因假李作梅藏本校讀一過
書此數語于後而歸之蕘圃 嘉慶三年戊午初秋陶五柳
主人從吳興書賈買得此書知余曾經過眼持以示予余於
此書不啻三過眼矣向年李作舟與家椒升同來吳下余借
歸與宋刻本展對無意歸之既椒升以羣書見示此□□在
因議直不妥卒還之今歲椒升應京兆試北上艤舟胥江過
余晤言問及是書云未帶出孰知其已歸賈人而報事也

感峰樓鈔藏

余家乎爰題顛末以儲諸讀未見書齋棘人黃丕烈 癸酉
三月初四日是爲寒食節偶檢及此距得時已十六年矣復
齋

雪溪詩五卷舊抄本

銍最有名譽其詩亦鮮合作卷中葦石
牛一絕句云松竹陰中山未盡梅花林外有
行人予甚愛之耳康熙己巳除夕王士禛阮亭
書

[illegible]

太倉稊米集七十卷舊抄本

太倉稊米集余求之十年數不可得道光庚戌秋客有持是書來售者一開閱即錯脫不可卒讀欲購而中止今正月十八日織里書友陶君於元後携以贐余細閱一過首冊序文三則後宋槧殘本鈔錄又欲將行格強合槧遂多脫落其中詩文七十卷固完善無恙也因亟購之並取浣香居鈔本及眠琴山館藏本將序文對校補正云時咸豐五

年乙卯孟陬月章惇謹誌

感峰樓鈔藏

周益公文忠集二百卷附錄五卷年譜一卷謝氏鈔本
周益公集二百卷附錄五卷年譜一卷九百五十
四萬五千餘言卷帙浩繁宋槧既湮世無嗣
刻本朝如玉峯傳丞相樓藏書亦僅有鈔本故
近世之士得其殘篇斷簡皆奉若拱璧也吾
婁顧子夏珍手鈔周益公集十本合清河沛
國所藏僅得七十三卷而以平園首卷補省齋
以卷之缺嘗謂余曰此集向藏玉峯近聞歸
郡人王聲宏矣若得從之補闕訂謬亦人生一

快事也言已浩歎康熙壬寅春授沅吳都文
粹請改武陵武陵^喜因授余益公集曰此余志
所未逮者舍子誰屬哉越十有一日武陵暴卒
春仲有書賈自郡來言王聲宏先生欲借
校吳都文粹余遂忻然与之偕往益欲問
益公集消息也足凡三及門時值清和暑長
人困遂巡郡邸進退失據乃就韋公祠卜筮
兆吉復詣得見先生以吳都文粹勢請觀益
公全集目凡二十七種時錢子方蔚館於金閨

感峰樓鈔藏

余即歸攜顧鈔往請補於先生先生具述

曩嘗學某公曾遺繕書者就舍鈔成而去

書賈莘志伊云既而復請許就校了見有齋

耐以十六金

文稿檢首缺五卷向朱張之藏所謂首五卷

者至此乃知其訛時與先生披閱見互有差

謬相為訂正喜動顏色戲謂余曰孺子可

教也予起謝詰朝復同錢子往先生遂出

集首兩種錢子留校省齋余持平園以

歸時夏五哉生魄也鈔對訖再詣見先生

畧無難色但臨行頻囑鄭重舟行又借別
稿詞科掖垣玉堂政府五種歸蓋六月將晦
矣七月二十日順風揭颿亭午抵蘇冒暑入
城易厯官奏議奉詔承明四種還即日猶
未啣山旅客喧闐喘吁揮汗財貨之外別
無所事事而余心獨喜無寐宵雨達旦風
自西颺尔乃放舟中流食頃入黑甜鄉裏
旋聽風水桔槔聲相送而篙師又報維
舟矣抄竟復往易親征龍飛歸廬陵

感峰樓鈔藏

閒居遊山奏事南歸思陵玉堂雜志二老堂
詩話雜志玉蕊辨樂府凡一十二種歸校
值先生送其嗣澄江科試錢子亦往遂羈焉
迨竣書稿附錄年譜還謝劄為十月中
旬云往返六閱月先生每責期与老人期戒
後乃糾諸浚力家貧乏潤筆資乃為相鄉
金子星輶先鈔成焉予海借於金自十月下
旬始鈔成於雍正元年三月計三千六百十五
頁頁計字四百二十是集也錢子實總其成

訂正舛錯費許心目余因就卷中脫落疑謬
處另副開載更竣繕本續校焉噫余十有
一月中校成全集兩部誠大快事獨念武陵
始事不獲見其成為憾然其長君聞之於
衰經中猶欲繼成先志而哀毀過中又弱一
个時癸卯正月二十四日乙巳距武陵忌辰祇
二十一日哀哉武陵存日不獨收藏甚富而手
鈔秘本充盈以匪司尤喜人借抄謂益公集
世罕見其全欲搜羅補綴成全傳世以余

感峰樓鈔藏

可佐其成數屬意焉蓋武陵之心公心也予襄
厥志今既濟矣爲叙其鈔成始末如此武陵
有知亦可無憾矣夫東倉宋賓王蔚如氏
紀

雍正甲辰閏四月借朱端撰蓋公文選校一次係
萬曆間清漳胡廷宴所刻不全失次本也間
采謬字附於旁俟高明者考證焉

吾婁吳長卿震元先生於明崇禎間集諸
名臣如黃道周董其昌陳繼儒輩數十人

作南北宋相眼

又名宋相譜

一書募刻未成聞名莫

觀乙巳春初偶偕黃齊卿過吳慎修齋頭

復見之其中周文忠公相眼具載公本集中

有閩國典之文甚悉後獲借校為益良多

逐卷中凡硃筆點識者是也雍正三年五秋

後十九較訖於瑯琊某老樓之西廡錢子

方蔚實政之古瀛洲流寓宇寅王記

津逮秘書合平園省齋中題跋刻之分十

二卷玉堂雜誌二卷二老堂詩話共五卷悉校

感峰樓鈔藏

一過略無取益汲古所刻之書類如此也中秋
前四日書

雍正六年春借常熟孫慶真所得錢氏藏
本凡二十冊中間雖有差誤然為益多矣乙
酉新正校訖謹誌

此書在宋人文集中最為難得婁水如太原
琅琊彭城延陵清河諸世家素有藏書
亦未嘗有何況其餘今宋子蔚如獨構得
之什襲而藏非素心友不輕示焉予癸丑

歲與宋子同在衰絰之中慨然借抄不常
十朋之錫焚膏繼晷矧之窮年自春迄
冬無一日不事筆硯也印抄時間有訂正不
下百餘處書成誌此時雍熙十一年癸丑季
冬二十四日太倉棘人謝浦泰心傳氏別字惺

屢謹跋

時年五十八歲

新陽集十卷後集四卷舊抄本

計詩二百五十七首潘訥叔本共佚九十二首

鮑

感峰樓鈔藏

止齋先生文集五十二卷附錄一卷明正德刻本

戊辰正月二十四日從書坊五柳居陶君琅軒
處借得宋刻陳止齋文集因將明刻對校
半月而畢明刻注內闕鈔出亦原于宋本尚
無大謬然已多脫句脫字誤字此宋本之所
以可貴也內有四卷半照明本鈔全則從闕
如嘉慶十三年二月八日香嚴居士周錫瓚書
于通津山房

感峰樓鈔藏

靈齋先生鉛刀編三十二卷抄本

鉛刀編三十二卷海內藏書家概不見東海先生過訪天一閣范氏所藏有宋槧本登閣影抄四旬始竟携歸過予齋頭余即欲傳抄不克如願今忽三十餘年先生已歸道山撫卷感往不勝悽悵聊書數語於首以爲後人珍重之意云老友清之呵凍書口口口橋畔

感峰樓鈔藏

平庵悔稿十六卷丙辰悔稿一卷後編六卷抄本
右平庵詩稿宋松陽項安世平甫著按陳氏
書錄解題載平庵悔稿十五卷後編六卷宋
史藝文志作丙辰悔稿四十七卷是其書在當
時已所見互異也御選四朝詩不列其名屬
鵲宋詩紀事有之載平庵悔稿不著卷帙
其為世所罕見可知矣吾友姚切齋天成中
翰云乾隆三十八年掌處州書院浙撫有採
書之檄時松陽項氏尚有舊藏刻本惜殘

缺不全未送省局垂編為余秋室集太史分
纂永樂大典摘出時誤傳全集已抄入四庫
全書遂未往編錄庚子秋冬予寓秋室邸
舍愁病相侵杜門不出取案頭存稿粘帖
成書手錄副本計悔稿丙辰悔稿悔稿後
編凡三種共詩一千四百餘首每稿輯成一
卷以書錄解題所載較之悔稿十五卷今
丙辰以前共得八百六十餘首悔稿後編
六卷今得詩五百五十餘首知悔稿之所缺

感峰樓鈔藏

甚少也且云後編自丁巳終壬戌據本傳則丙
辰悔禍正偽黨罷職之時後編諸詩必終
于壬戌以後如七古內凱歌一首此開禧間解
德安圍也七絕內贈石首李令云莫說三十
年前事愁損河陽一縣心自注淳熙乙未予
三人同試南宮是詩當在丙寅丁卯之際上溯
乙未方合三十餘年平甫卒于嘉定戊辰去
壬寅又六年矣安得無詩故平甫後編題辭
作于慶元戊午但云安知異時不復悔此不言

止于何年似解題所云未可盡據也又解題列
于詩集故前後共三十一卷藝文志作四十七卷
大約舉全集而言直齋或未之見也俟他
日南旋訪求殘本校補完善為書林之一
大快是書出自禁垣世間希有當什襲
藏之乾隆辛丑立春日仁和吳長元書于秋
室京邸之疏華館中

右平庵詩稿注永樂大典錄出傳宋詩者多
不列其名讀其集中詩材力富瞻每以

詩自豪是亦宋季巨擘迥出江湖諸派之上
者舊錄不分卷編為三帙有分體錯誤者余
為正其訛輯平庵悔稿為十五卷悔稿後編
為六卷仍書錄解題之舊丙辰悔稿佚去為
多只存一卷聞松陽尚有舊藏刻本當訪輯
之以為全璧也嘉慶乙丑冬日仁和趙魏借知
不足齋本校

感峰樓鈔藏

永嘉四靈詩五卷 汲古閣影鈔宋刻本

此影宋本永嘉四靈詩四卷一冊昭文同年
張子和藏書也余与子和相知以同年其相得
則彼此藏書故猶憶癸丑同上春官邸寓各
近琉璃廠每於暇日即徧游書肆恣覽古
籍一時有兩書淫之目既而子和即於是科
得翰林散館改部余下第歸連丁内外報杜
門不出与子和踪跡殊疏然彼此書札往還
無不以賞奇析疑為勗是冊于子和宦游京

師時從其家借讀故典籍者有細目一依備
考及子和奉太夫人諱南還便道過訪談及
是冊知余欲傳錄未果欣然輟贈此書遂
為士禮居中物矣顧余檢汲古閣珍藏祕
本書目宋板四靈詩三冊亦云有缺則此
影鈔者必自三本出惜其目未載卷數不
知所缺同否耳近日雖有傳本較此絕無
影響毛氏云此書久矣失傳幸而得此真
確論哉嘉慶七年壬戌十一月二十八日冬至黃

感峰樓鈔藏

丕烈書於太白樓下

四靈九僧言詩者必推之余向得四靈而無九
僧心猶歎然今復獲毛鈔影宋九僧詩真
成雙璧惜子和已歸道山不及相與欣賞耳
癸酉四月初三日偶校及此月記復翁

感峰樓鈔藏

後村居士集五十卷 舊鈔本

後村集有百九十六卷今此祇五十卷僅四之一
毛氏津逮秘書中載後村題跋凡四卷此集
無其前二卷黃氏千頃堂書目所載後村諸
集班班尚多距今未久宜尚在世間然余求
之數年卒不見也此集舊寫本字迹麤殺
閱不頗不爽目故別校加正重錄如石而以毛
氏前二卷之題跋并入焉倘得全集自當
各還其舊若不可得則世宜湮置一處

不復有放失之患後村劉克莊號也字潛夫
莆田人學於真西山以蔭入仕居廢居起宋
理宗時賜同進士出身官直龍圖閣直學士
謚文定公村詩詞及各體文皆法度卓然
爲南宋一大作手七言古風初喜摹長爪
生詩人王肩所載三篇酷与之肖而皆不見
此集集中此體亦不多見唯有築城開壕
運糧朝陵六七篇而已風格蒼老頗近老
杜留花門塞蘆子諸章其本意欲息唐

律專尚古體以趙南塘言而止今集則律詩
居多石門吳氏後村詩鈔每云出此集之外者
豈其全者非獨余不見及即前輩亦未之見
耶余因其言考其人亦庶幾無愧真氏之門
者乃宋史無傳柯氏新編亦不為之補文獻
通考亦他人之集則嘗采用後村之言而其
集亦未著錄幾疑於名之晦晦矣雖然唐
書不為韋應物傳而蘇州之名常在天壤間
文章自可傳不仗史筆垂於村亦後何憾

哉東里虞文韶

威峰樓鈔藏

芸隱橫舟稿一卷舊鈔本

宋刻此序每行十八格上空二格一行十六字系
橫舟自書最為精雅惜未勾摹耳

鮑以文

感峰樓鈔藏

北碕文集十卷 趙谷林校鈔本

抄北碕集三冊均有脫誤而乞乞妮妮之謬
惟此冊最夥以朱墨圈乙之幾成紅勒帛矣
乙巳三伏日寧城谷林意林揮汗校

感峰樓鈔藏

宋貞士羅滄洲先生詩集五卷舊鈔本

滄洲翁名公升字時翁吉之永豐人太父開禮
宋咸鴻間由胄監登第授袁州教授尋改武
岡德祐丙子文丞相開督府于閩廣號召天
下勤王辟開禮知縣事授安撫使後兵敗被
執不食死節即辰翁序中所云水心翁也滄
洲少有才略以軍功升本邑教傷大父死節傾
資北遊燕趙與宋宗室趙孟榮諸公圖復宋
祚知勢不可為回經錢塘江作吊胄濤以自寓

今載集中餘亦多感憤語永豐志云尚有石
初集則未見也滄洲有弟宋亡亦不仕元父死
于寇廬墓弔泣不御酒食肉者七年蓋孝義
萃于一堂於乎於以見宋之能養士也癸亥至
日書于京邸吳門顧俠君

水雲詩一卷舊鈔本

汪水雲詩雜見於鄭明德遂昌雜錄陶九成輟耕錄瞿宗吉詩話及程克勤宋遠民錄者不過三四首夏日晒書理雲間人物鈔詩舊冊得水雲二百三十詩首錄成一帙然迺賢序水雲詩以為多記國亡時事此帙多有之而所謂占文丞相唱和者概未之見也唯浮休道人招魂歌擬杜七古體製者今見文丞相集後水雲集劉辰翁批點刊行者藏書家必有全

本齋更与好古者共購之崇禎辛未七夕鈔完
牧齋記

感峰樓鈔藏

古逸民先生集一卷附錄一卷舊鈔本

古逸民先生詩文僅見於新安文獻志寥寥
數篇而已是集藏書家未有蓄之者吾友錢
塘姚君古香得之親串亂帙中予首借抄之
好事者因爭傳錄杭城遂有數本未幾古香
以暴卒使先一年此書無從蹤跡矣然則雖
謂古香不死可也古香名珣藏書多秘冊與
予交最善然僅及三年耳卒時年止三十餘惜
哉嘉慶甲戌六月六日通介叟識於知不足

齋時年八十有七

辛未三月初游嘉禾遇涿飲鮑丈於雙溪橋
下晝則同席夜則聯舫縱談書林舊聞亹亹
不倦真快事也越日同至本立堂書坊取
其家抄傳秘冊贈余得古逸民先生集一
卷精妙絕倫他日珍之當不減汲古鈔本矣
復翁

感峰樓鈔藏

紫岩于先生詩選三卷舊鈔本

于石字介翁婺之蘭谿人貌古氣剛而善詠諧
幼慕杜古高之為人後從王宗蒼業詞賦三年
十而宋亡遂高隱不出以詩自豪蓋宋逸民也
所居鄉名紫岩因以為號晚徙城中更號雨溪
集久不傳傳者僅此冊耳同里門人吳師道字
正傳元至治時進士為之選次金履祥為之
序詩凡三卷內缺二頁其來已久不能復補矣
弘隆丁亥二月之江沈廷芳志于樂儀書院

此本壬子年所收得于知不足齋有吾鄉沈某
園廉訪題字及諸藏書家印記中缺二葉
以家本補錄復以近年金華王氏冰壺山館
藏書新刻本補中卷末妾換馬一首及此序
舊補帛古行云見詩體要乃集外逸詩也咸
豐丙辰二月望春分日一日鵬卿記于秋井草

堂

感峰樓鈔藏

甯極齋稿一卷舊鈔本

兩集皆見於顧氏元詩選徑藉志續文獻
通考俱不載此集之傳真幸也乙未夏六月
儲谷亭主記

蔡集元詩採宣城詩九首此本無陳集附
深子植一帙因存鄭元祐墓銘一篇

感峰樓鈔藏

潯南遺老王先生文集四十五卷續編詩一卷舊鈔本

王若虛字從之愔夫其號橐城人承安二年經義
進士歷管城門山二縣令用荐入為國史院編修
官遷應奉翰林文字為著作佐郎遷平涼府
判官召為左司諫轉延州刺史入為直學士入元
遂隱居不出後東游泰山至黃峴峰憩萃美
亭談笑終焉所著文章號愔夫集又潯南
遺老集傳于世事見金史按中州集稱若虛
負重名精經學史學文章禮樂一代偉人

北渡後隱居鄉里據此則淳南遺老終于元
未嘗仕元且其人已入金史文藝傳焦氏經籍志
編入元人誤矣此本山陰祁氏藏書康熙乙未
春王歸德谷亭收藏因考史傳而附記于後
錢塘吳焯書

又按集內詩與中州集本字句微有不同覺中
州集之為善想元遺山入選時摘其微瑕不
嫌改削耳然此故原作其後一卷係因中州
集補入便相同中州集所無者宮女圍碁一

首和王子端此本多一首白髮歎六韻即感秋
十二韻之半亦元遺山增改後人失攷據以編
入續集耳焯再書

潯南議論絕高其辨駁司馬子長宋子京竇
另具隻眼獨其自作詩文絕不佳置之集中
猶蒼葭之倚蘇玉也祁氏原本歸徐中丞
蝶園先生錄得此本將貽吾友馬寒中氏
中春送客禾興舟中校對竟再記

感峰樓鈔藏

湛然居士文集十四卷舊鈔本

雍正丙午初冬借較洞庭公甫氏藏本因以補序
宋蔚如

余向藏湛然居士文集係七卷非全本也頃以
骨董鋪獲王西莊家藏本乃十四卷且為宋
賓王所校誠可珍寶前七卷用向藏本手
校其歧異已歸貝闕香矣復公羽

感峰樓鈔藏

湛然居士文集十四卷舊鈔本

萬松洞宗派按金史曾召入內殿說法承安二年詔住西山之仰山又三十九年爲元世祖至正三十一年歲次甲午此序當作於是年湛然爲萬松高弟其推許不啻口出世徒知其有功教不知禪理精深又如此歸震川有云余少已知耶律晉卿今始識從源真面目予於居士亦云但歸所見止有後七卷而余乃獲窺全豹惜抄手潦草謬字極多略用硃筆

點出他日當訪善本校定庶云侍憾康熙辛
丑六月初十日初白老人手識

感峰樓鈔藏

歲春詩集五卷舊鈔本

康熙歲壬辰_庚三月立夏後五日借婁東宋氏

鈔本再校于孝慈堂之東窗連涇南遠

識

[illegible]

長樂郡
振鐸西
諸子志

方虛谷桐江集二十卷補遺一卷

舊抄本

嘉慶乙丑閏六月借維揚秦氏石研齋所藏
治十四年范文恭手錄本重校凡改正數百字
補落者數千字始為善本去乾隆庚寅借
振鐸堂本抄錄時忽忽三十六年矣掩卷為
之憮然予八目誌知不足齋館廷博

咸峰樓鈔藏

虛谷桐江續集四十八卷舊抄本

方萬里桐江集已不傳廬此序見於戴表元
剡源文集因錄于續集之首至萬里桐江
續集自序一首已列此集第四十八卷中茲不
贅錄乾隆丁丑初一日燈下誌錄以文

感峰樓鈔藏

剡源先生文集三十卷 明刻本

帥初為學自六經百氏無不貫穿而得之莊騷
者為深文格尤近于厚其間似蘇門者所從出
均也能泛容於容若萌茁於枯條若高山大
川之觀桑麻菽粟之用乃其所少則賦才者
殊而亦遭遇變故無自發耶然採筆妙吻
宋季以來莫有匹敵宜乎伯長所專師晉
卿所深推矣康熙辛巳二月何焯題於陽羨
舟次

始余病此集為謬不可讀遇藏書者必聞嘗
蓄善本抑否康熙庚寅始從隱湖毛十丈
借得嘉靖以前舊鈔一冊為文祇六十五篇合
甲乙丙丁四卷以校影刻則唐書西域記一
篇出半幅脫去二百六十餘字其他賴以改
正處甚少集中文為影刻所逸者凡十二篇
復補錄毛文憐余校之勤也云家有剡源詩
每舊抄將并以借我乃書以志喜焯

剡源先生文集三十卷舊抄本

戴帥初剡源集三十卷一刻於洪武初宋景濂
為司業時再編於嘉靖中周儀羽可重刻
於萬厯間後裔戴洵今世所云者皆此本而
頗不易觀余購之久矣嘉慶辛未冬訪老友
鮑以文於烏戌時君病足不能起留坐榻前
情話竟日茲許以此書見貽老人善忘是冬
未能印寄明年春余有閩中之役及乙亥
返里已嬰末疾欲送烏戌未果而君且歸

道山余自若雲遷迂烏道戊命兒子殷代
奠生芻值令嗣志祖宅出晤於吳門因及此
書今年四月又見志祖於吳興復申前說既
別輟轉覓寄八月始達常州知為竹垞秋
岳歲本鮑君校之書誠不易觀而購之者亦
綦勞矣爰識得書所從來並及鮑氏兩世
交誼至於帥初之文自為宋文憲推服洎
乎

國朝已入四庫久徑論定不更贅云嘉慶

感峰樓鈔藏

丁丑九月收庵叟趙懷玉力疾書

感峰樓鈔藏

竹素山房詩集三卷附錄一卷抄本

竹素山房詩三卷元至治中太末吾衍子行著
子行寓吾杭生花坊精小學學古編古人印
式諸書而外於閒居錄辨酢醋二字謂酢
即古醋字醋字即古人酬酢酢字皆今人所
未察集中如錢良佑字說辨佐佑仲即
左右中亦有理此集吾浙藏書之家皆無
其本維揚馬涉江漫姑蘇賸鈔予僅得
見內有一題云仇仁近自建康解組歸有文

曰金淵集亦簿錄家所不載并諸家文集
未齒及者惜乎其不得傳于世也仁和杭世
駿識于補史亭

右吾竹房詩集郁君佩先為予鈔自樊榭山
房讀杭太史跋知其本近年始出於維揚為
氏也予考朱性父吾氏類編題詞是書自性
父後虞山雜鈔錄出始傳于世今第三卷末
招兩師以下諸詩文皆朱所補附錄數十則
亦其所輯是為氏所得實野航先生所

遺留其功不可沒也乾隆癸巳

朝廷開四庫館予別僊潔本進呈

乙覽業

詔儒臣采入全書以不朽之矣然

秘閣所儲人罕得見登之梨棗益廣其傳
誠好古者所宜留意也時嘉慶十年歲在乙
丑仲冬下澣歛西鮑廷博識於知不足齋
仇山村金淵集堇浦太史始於竹房詩題
中耳其名詫為異聞而深惜其不傳未幾

高宗純皇帝開館采訪遺書得之永樂大典
中既纂入

四庫全書復

頒武英殿聚珍版本於各直省承學之士遂家
有其書而樊榭堇浦已相繼下世矣博末學
小生幸天假之年轉得見所未見豈非平生
望外之喜歟通介老人又筆時年七十有八

松雪齋文集十卷外集一卷續集一卷元刻本
嘉慶庚申秋得元刊本行狀十二葉手勘一
過正誤字右莛圃

感峰樓鈔藏

靜修集二十二卷補遺二卷舊鈔本

此影鈔元版少闕文亦微有譌字共二十二卷三百
十四頁又有前明永樂間所刻詩文遺集附
錄分三十卷者實二十五卷校之此本詩文則有
闕無少譌字脫落則倍之第少附錄一卷
耳鈔較之下點識其譌字增補其脫落以便
後之翻刻劉先生集者雍正三年六月古東倉
後學宋賓王記

此影鈔前元至順間宗文堂刻本也後從邵

先生所閱容城兩賢集較對後增補遺二
卷容城集刻於前明萬厯間其脫譌錯
簡頗少錄補以稱其全云雍正丁未春正月
泮後言宋賓王記

存悔齋詩一卷遺詩一卷舊鈔本

余家藏元人集未達百家意欲擇勝授梓
閩中徐興公許以秘本五十種見寄奈魚雁
杳然想如也適馬人伯出龔子敬存悔齋
藁示予得未曾有真入手第一快事中有
殘缺二處末有朱性甫補遺一十七首閩所從
來迺秋溪王凱度家藏本卷帙如新而凱
度已為玉梅作記人矣掩卷相對法然久之
時崇禎十三年閏正月十三日毛晉識

有悔齋詩世不多見先君從馬師借抄讀
先君手跋在崇禎十三年閏正月十三辰生于
是年六月二十六日別跋書之日辰尚未生今
犬馬之齒五十有六矣白首無成深負父師
之訓一展閱間手澤如新音容久杳不禁
淚下沾衣也偶閱天平山志載子敬詩二首集
中止有其一又從六硯齋筆記得絕句一首皇
元風雅得詩五首并錄于右康熙乙亥花朝
後二日毛辰識

秋澗先生大全文集二百卷元刻本

康熙六年閏四月五月之杪考其節令則六月
中矣余於五月二十九日三十日兩日正畏日也鎮
讀秋澗集一百卷一遍文章醇厚淹博得於
歐曾為多在元人中可與潛溪方駕惜乎板殘
無銀錠之文葉落之玉楮之巧如逢好月一天
皎而蝦蟆又食之矣可惜可惜至其題跋榜
約諸文戲謔風流皆有源流則東坡山谷之
流也李滄葦記

感峰樓鈔藏

清容居士集五十卷元刻本

永樂丙申冬十月八日予得此清容居士集奈
何蟲鼠損傷卷目失次乃於暇日補治序其
先後之目故得以全其美斯集也雖未敢宗
以為億世之法然蓄書者亦得以備一時之製
作也不亦可乎畏齋王肄識

感峰樓鈔藏

漢泉曹文貞公詩集十卷影抄元刻本

丁未春閱桃花塢文瑞樓所得秀野草堂顧氏藏曹漢泉集五卷元版元印字畫端楷直出松雪手書雖其才微有闕頁而字俱完好誠罕物也披閱之下見卷帙不符絳雲樓藏目心竊疑之迨借蓮涇王先生所藏抄補闕頁乃松雪行書卷首有三脩吉徐乾符兩先生手跋極稱字畫之妙究之行不及楷且有數板闕文翻刻致謬處首脫歐蘇兩序

及咨文謚議繼又獲觀秀水朱竹垞公所
藏曹秋嶽閱本並十卷亦無前序更少輟
逸較連涇所藏又遜一籌因思元時名集
動國帑鐫板故得名手書文良工刊刻不百
餘年而行世本已絕無僅有又互多脫落合
較鈔之為前賢留一脈云雍正五年夏立
秋前言婁水宋賓王識

漢泉曹文貞公詩集十卷後錄一卷影抄元刻本
曹文貞公漢泉漫稿其子復亨所編有張
夢臣歐陽原功蘇伯脩呂仲賓序及吳間
公序附以神道碑並像贊祭文哀辭挽
章甚備其為完書無疑然止詩九卷樂府
一卷傳云有詩文十卷蓋未足信傳之子六人
孫十人皆顯仕據神道碑子霽亨謙亨泰亨
皆前卒初未登顯仕而謙亨并未得官史之
難信如此乾隆辛亥四月假黃孝廉堯圃

藏本讀其後嘉定錢大昕識

感峰樓鈔藏

陳剛中詩集三卷附錄一卷舊鈔本

剛中集三得三失之末失為湖廣方湛一索去此
冊得亦不難但印刷俱苟糊塗不可讀金太學
畋所為清正之欲閱安南事蹟者亦當留意

吳岫筆

右書一冊乃袁水朱氏潛采堂藏本惜魯魚
虎帝在所不免後借得知不足齋校本勘
定殆可云善本矣庚午天中節後二日錢唐
姚鉶識

感峰樓鈔藏

知非堂稿六卷 舊鈔本

元臨川何中太虛集吳草廬序吳與何中表
兄弟也中善五言詩如聊隨碧溪轉忽與白
鷗逢小雨十數點淡烟三四峯落葉半歲
跡清風時滿溪寒沙碧影疏微雪酒香
村湖雪殘波岸船燈獨夜人西風一夜雨丹
桂滿林花皆有唐風中自序有易類象二
卷書傳補遺十卷通鑑綱目測海三卷通
書問一卷吳才老詩韻一卷六書綱領一卷

補六書故三十二卷
劉丘述遊錄一卷
摺頤錄十卷
知非堂稿十七卷
外稿十六卷
今詩止十六卷
耳漁屏山人王士禎跋

翰林珠玉六卷 舊鈔本

歷考諸簿錄無翰林珠玉之名疑出後人彙集
按此編所錄亦有學古錄及遺稿所未載者
固知先生平生著作殷富李本集錄時採摭
未盡也此御覽品氏本雍正癸卯省試後從
天蓋楊得之歸繡谷亭插架西冷吳焯跋

感峰樓鈔藏

新編翰林珠玉六卷元刻本

是書本吾郡物卷中有白隄錢聽默經眼印
也余向於都中敝市見之未及買後欲訪求
渺不可得矣去冬五柳主人族弟歸忽代購
獲喜出望外非特既失復得固見遇合之巧
且裝潢款式無一毫更改古色古香猶是二
十年前眼中物苟非天之畀余安能遂余好
古之願若此之奇乎復翁甲戌正月五日記
此書原索白金四兩時余識力未逮已無及矣

及今番收得云京錢八吊五柳弟不願取直
歆易余家刺國策十部遂与交易了風
願焉

范德機詩集七卷舊鈔本

毛刻范德機詩不言所據鈔刻本但云是集
與揭曼碩集皆芙蓉江周仲榮見貽者亦
未及言為抄刻本之異也此冊舊抄觀前多
綱目及刊刻年月知據元刻然中多與家藏
元刻不合因手校之而舊經不寐道人以毛
本校者又未可執現行之本相勘蓋毛本已
經修改似非孝章先生取校時之刻板故
動輒歧異因復取已修本校之下方云續校

毛本者是也五月初十晨起校訖記

甲戌端陽前一日有書友携書一冊示余謂近
從吳江賈人得來者開卷視之知為舊鈔
范德機詩集而經人校勘者問其直索青
蚨千錢余曰子知此書之可以可貴乎曰不知
也余亦笑而留之蓋是書為舊鈔為校勘
此書賈之可以索千錢而余之愛此書者為
校勘者乃不寐道人末有圖記可證并有
字迹可辨故可珍且余之必欲得此書者是

感峰樓鈔藏

書雖經以毛刻校勘而又以意改字並未見元
刻尚少脫略余適有元刻手校一過乃為善
本此書之必歆歸余而始完善夫亦有數存
焉復翁記

續檢孝慈堂書目云范德機集范梈德機
七卷抄自一百三十四番一冊金孝章手校知印
是冊也復翁六月六日識

壬辰冬十月對汲古閣本互校一過彼此闕
誤及疑各用圈記

感峰樓鈔藏

吳禮部文集二十卷 元刻本

此吳禮部文集余於書友處得之云是郡城故物家真奇書也讀

欽定四庫全書總目禮部集二十卷元吳師道撰凡詩九卷文十一卷流傳頗夥此本乃新城王士禎寫自崑山徐秉義家因行於世是元刻元印之本未易得也惟延令書目宋元板雜書文集載之今檢此書有季振宜藏書圖記當是延令書目中所載者歟

中有夾籤為傳錄者竄改之處觀此可見
寫本之改易舊觀竄從此出卷首序文脫
落第一葉前半葉尚留墨痕知原序遺
失非其本無卷末有元世本傳為舊藏者抄
附便覽近時寫本因序文脫落竟於元史
本傳并諸首俱非本來面目矣惜十四卷中
缺第十八葉更無元本可補為恨事尔聞
此書先到袁氏五硯樓主人以議價未妥遂
入余家余以白金三十兩有奇易得可知一

感峰樓鈔藏

書之歸宿亦有定也末冊空葉有陶齋二字
圖書未知是袁陶齋否俟與後階質諸嘉
慶三年歲在戊午秋九月重陽前三日棘人黃
丕烈識

威峰樓鈔藏

陳衆仲文集十卷 元刻本

此陳衆仲文集明翻元本嘉定錢少詹與元
刻七卷本同以遺余者也少詹有夾片在此本
第十卷首記云自此而下皆予家本所無安
雅堂集凡十四卷予家所藏乃元板止有前
七卷此本同書昌所遺則明初人翻刻亦多
曼漈子家本有第六第七此本有第十至十
三今合兩本錄之尚闕第八第九第十四至
烈合此兩刻喜之甚並衆仲文未能卒讀

也頃萃古齋主人購書未中得一十三卷本所
謂八九卷俱有獨闕十四卷爾唯是十四卷之
說元史本傳云然至各家書目如吾家俞邵
補明史藝文志號稱廣博而所收亦十三卷
本且此本末冊有虞稷印安知千頃所藏非
即此乎則作史之紀載果可信乎書經三寫
魯魚亥豕吾見衆仲文自元迄明而以此刻
及明刻附之蓋存疑也明刻末有廬陵楊士
奇跋云刻板在福州府學不著歲月云

傅與礪詩集八卷舊抄本

案元詩傳若金新喻人以異材薦佐使安南歸
除廣州文學教授至正三年卒年四十其詩有
初稿南征稿使還新稿牛鐸音歿以其弟
若川重為編次銀梓總名曰清江集案是編
後有若川跋語跋中載三公序立存第云先
兄本意彙集四稿歿後既刻尋遭兵燬又
摠刻此集是四稿未嘗刻于生前而此編之
前尚有刻本在也是編八卷經藉志載十一

考跋語有云所有文集陸續刊行豈八卷之後
另有刻耶抑焦氏固多誤耶康熙乙未文秋
繡谷亭主

余讀与礪詩體格高亮詞色華麗元詩
存者僅十之三四其字句錯落處多不入選
僅從選本略為釐正尚有數篇此編逸去
當更求善本校對也新喻元時為州洪武
二年建縣屬臨江府重午日在繡谷亭泊
夜處後校又書

威峰樓鈔藏

乾隆癸亥冬從書賈借得刻本前四卷以朱
筆校勘一過凡錯落者悉得改之正為之
一快吳城記

威峰樓鈔藏

句曲外史貞居先生詩集五卷 舊鈔本

此句曲外史詩係予友金心山所蓄者心山為
吳庠生與予同歲科試因相識焉然但知
其能文而餘所善則未之知也後于親友案
頭見有單條小幅奇花異卉寫物生動之
趣溢于楮墨方知其善于繪事而予與心山
蹤跡不甚密因未曾以尺素相求客歲聞
心山已死殊為惻然後書友有携舊書來
者云是心山物并于雲溪友議末見心山

手跋知為文瑞榜金星軺之孫蓋家故藏
書即散亡之餘亦不失惓惓愛書之意
用是重其人以重其物而于其冊聊著梗
概云堯圃黃丕烈

句曲外史貞居先生集七卷 舊鈔本

元句曲外史集 四庫書目所載曰集三卷補遺三卷集外詩一卷共七卷是本卷數雖同於昨 四庫書目所載之本其第七卷內詩餘茅山逢故人五跋定武蘭亭九頁半是厲徵君樊榭手補尤足寶貴細審其所補之來本大約出自珊瑚網及鐵網珊瑚書並正續題跋記三書居少其硃筆是丁龍泓徵君之筆無疑更所謂趙一清校則不

能知其所在矣予昔年曾見外史手書
詩稿兩冊當時念念不及錄出一副本定
然与此集大有異同之處若得彙為一集
別為外史全集之大觀也明虞山毛氏所刻
元人十集遂江可將是本校尤善然毛刻
終不能如是本之富耳丁酉十二月初四日快
讀一過因為記此夢廬錢天樹

鶴年詩集三卷 舊鈔本

丁鶴年詩向無刻本轉相鈔寫謬字頗多雍正
丁未端陽後一日得秀水朱竹垞翁所藏明正
統間刻本于吳郡桃花塢文瑞樓兩窗較閱
刻本亦微有謬字前明蕭山魏驥序之賓王
較并記

感峰樓鈔藏

鶴年詩集三卷元刻本

予嚮家藏丁鶴年詩三卷乃永樂間刻版
汝有廬陵楊文貞士奇跋語紙墨古潔予珍
惜之斯本為元版亦分三卷簡首有高惟一
印章惟一國初人有孝行事詳郡志二本俱
善因合藏之萬厯丁未春正月三日徐興公題

感峰樓鈔藏

丁鶴年先生詩集三卷舊鈔本

丁鶴年詩從宋賓王校本傳出隨校一過
原本卷首四番及序跋補遺詩皆賓王手
錄卷中誤字尚有涂鉛未補者俟再值本
校之癸卯九月四日鐙下書于玉簪差閨臥室
聶仰

威峰樓鈔藏

江月松風集十二卷 文瑞按本

江月松風集為有元錢思復手書稿草先民
筆墨具有別致好事者因裝裱成冊錢罄
室曹秋嶽相繼收藏秋嶽亡後伯兄駕激于
金閶見之傾囊得歸一時爭相傳寫未免有
魚豕之誤此本乃予手鈔較對獨細惜有闕
脫去漫改補五字並問有舛誤亦從闕疑大
抵古人手筆當仍其舊不可妄以己意增損
也所得更有張伯淳貫酸齋書卷元人草

元閣湘竹龍唱和并雜詩東共此集為三冊
得于康熙丙寅之杪春而鈔成于季秋之十
三日東洞庭山又張翁祇識

感峰樓鈔藏

梧溪集七卷 明初刻本

範文滌飲向歆刊行梧溪集知毛子晉所藏在
先從兄抱冲小讀書堆屬予勘定而未果也
今丈已下世令嗣規續成先志以作知不足齋
叢書之廿九集深嘉厥意從望山姪借出
謁三旬力補改傳鈔刪誤惟是六七兩卷板
心有粉墨塗改痕迹於次第頗舛錯蓋景
泰板模糊斷爛致有此失又悉為之推求
訂正庶幾稱善矣然終少七卷第四葉故

其三葉末節石銘題下梧溪自注云有後序
而今俄空焉此集在毛氏時已難得錢曾敏
求記具言之予并見汲古別本鈔刻各半
者此兩卷尤舛錯脫落相較殊遜不知世
間尚有洪武印本可足是一葉以成完璧否
也校既畢遂誌於尾而歸之時嘉慶丁丑
歲顧千里書

梧溪集七卷 周硯農手鈔本

梧溪集七卷乃景泰七年丙子南康府知府
陳敏政重刻陳刻後序述原吉家世甚詳
原吉有子掖洪武初任通事司令轉翰林
博士兼文華殿經筵事卒官掖子徠嘗以
才德薦至京師未官而卒子輅宣德中以
秀才舉授南康府照磨未幾卒二子曰顏
曰孟不能歸遂僑居星子之東澗祖母黃
母徐躬紡績以教二子俱有成云集首有玉

山周伯琦汪澤民二序序言原吉初學詩
于延陵陳虞卿虞卿與柯敬仲俱事虞
邵庵得其傳與有元盛時楊范諸公齊驅
惜未著其名俟再考之虞卿官東流尹亦
序云漁洋山人跋

元席帽山人王逢梧溪集七卷壬申歲門人
楊庶常名時所貽江陰老儒周榮起研農
氏手錄本也書學鍾太傅稍雜八分終卷
如一研農壽八十有七乃卒今歿才五六年耳

感峰樓鈔藏

樵雲獨唱集六卷舊鈔本

戊辰秋七月白露後一日友人陶琅軒赴金陵
趕考寄我殘元本樵雲獨唱有鈔補者內
中間有原缺處想所據本無也因用硃筆
校元本以黑筆參鈔補即如此冊出吳伊仲
舊藏者序可信而字句實有不知妄改處
信元本為可寶余喜古書不論全否以舊
本為據陶君知余之深故搜得寄余連夜
手校如右時天氣新涼燒燭閱此校畢已

月上矣七月十八日復公雨識

感峰樓鈔藏

九靈山房集三十卷

明洪武刻正統修本

我里蔣之翹字楚雅隱廬市間有藏書之癖虞山錢牧齋宗伯編國朝詩集嘗就其家借書此卷首甲乙題字宗伯蹟也曾不三四十年士大夫家遂有不蓄一卷書者可慨也夫壬戌上元前二日鋤菜翁記

感峰樓鈔藏

鐵崖賦藁一卷芳季言手抄本

黃丕烈跋見題識不錄

東維子集不載所作古賦世所傳者僅有飛劍
遺音中三十二首及鐵崖文集中土圭蓮花漏
記里鼓三首而已此本計賦五十首俱遺音所未
載者蓋後人從青雲梯錄出以補其未備歟後
錄朱子新跋自見初藏桐鄉金氏後歸吳縣
黃氏錢塘何夢華主以傳曾傳其副又重編
為二卷改名鐵崖賦稿以紫微垣為上卷首

篇會通河為末渾天儀為下卷首進善莊為
末復刪去姑蘇臺賦第一首玩鞭亭賦一首
每卷二十四首止存四十八首次序移易非復元
本之舊今研經室外集提要所載鐵崖賦
稿二卷即何氏重編本也頃從高氏荃借得
何氏元本始知何氏於諸賦中字句又多竄改
不僅移易次第而已爰命工依元本影錄一
本凡何氏所竄改悉為標出使可識別使不見
此本不幾以何氏重編者為定本耶道光癸卯

五月廿一日季言校畢識

此本諸賦題下悉去賦字與蕭則遺音同又
版心僅書鐵崖二字凡賦字以及賦稿上下
等字俱係何氏所加傭書人誤依補入又賦
中字句又從何氏改本今悉塗乙以復其舊
是日又識

此本雜係影寫頗多訛謬頃倩力之小史映
郎用元本逐字比較一過改訂數十字然元
本亦有謬字惜不得青雲梯校之二十五日夏

玉季言又識

感峰樓鈔藏

鶴田蔣先生文集二卷 明抄本

此集為楊文敏公家藏徐興公先輩得之于建
寧書肆僅有序文二卷尚有十二卷布存其作
文大有源委然中多宋氣想習熟諸先輩
而來不能改其面目亦未潛心學究之流亞
者也徇臣玠識

感峰樓鈔藏

雲林集二卷 舊鈔本

案黃文獻公潛所作太常博士危府君墓誌府君諱永吉字德祥徙居雲林三十六峰之陽即太樸之父也詩名雲林集當以此慎行識

虞伯生有清山房詩為危太樸作又次韵太樸讀書山中見懷之作二首皆載學古錄二十七卷今檢雲林集皆失原作宋景濂有題危雲林訓子四言詩後云危公冢子字于懷自檢討奉常遷佐荊州將之官賦四言詩一章勉

之云云今亦失原作

感峰樓鈔藏

說學齋稿四卷舊鈔本

嘉靖辛酉歲震川歸師沒予覓危太僕文
因檢不得竟復之 隆慶丁卯後予以病淹
偶點檢樓間元朝集乃獲此卷竄先文莊
抄存題曰危翰林文者因思向歸師借時
若細加檢閱亦可應命只緣不肯加功草
草回之今歸已仙去而不獲見予復病淹而
非昔比皆可感也故記之云隆慶辛未秋九
月廿八日括蒼山人恭煥識

危太樸遺文藏書家絕少前一半琴川錢氏尚有抄本歸太僕有跋者是也後一半即太僕公亦未之見而況今之人乎向讀傅平叙書呂子白誌後稱其鴻健有法而此集不載此不過五十卷中所存之一二耳惜乎惜乎聞林顧韓識

按焦氏經籍志危太樸集五十卷今不可得矣世所傳之抄本凡二其一曰太樸文集皆賦頌記序有目錄而不曰卷其一曰說學

感峰樓鈔藏

所藏差少紙繆云康熙丁酉五月既望初
白老人查慎行謹識

感峰樓鈔藏

敬所小稿一卷舊鈔本

己巳夏有書船友携天文書二種及此敬所小
稿求售余獨取此為有晉江黃氏父子藏書圖
記在上也此書各家書目詳載之惟俞邵明
史藝文志別集類有云蘇仲簡敬所小稿四
卷名號以字行洪武中訓導子今檢是書並未
標明卷數而分卷出頭祇有三卷豈有所遺
耶抑志誤也俟博攷之仲夏中澣十日後翁
道光癸未季冬風雪掩窗燒燭粗讀一過通

體脫誤良多苦無別本可正隨手以意校定
未必全是也末一首脫誤尤甚幾不可句檢列
朝詩集不傳洪武時竟無蘇公姓名殆小家
故未著名耶因是歎沒世名稱之為難也

美夫識

清江貝先生文集三十卷 明洪武刻本

洪武板清江公全集四十卷流傳甚少惟見王西
莊光祿袁壽階外舅有藏本嘉慶戊辰以白
金二十四兩向同郡黃莒圃主事易得黃係得
之桐鄉金氏文瑞枋有朱印可證金星輅于
康熙五十八年曾重刻公集序云始得先生清
江集四卷又借得鈔本四十卷次第校刻想
重刻時尚未得洪武板也又云先生集鐫板
萬歷間見者絕少據此刻萬歷時又有刻

本也予未之見又唐孫華序云清江集三十卷盛行於世歲久板刻散失學者罕見全本據此又有三十卷之刻本亦未見皆首訪求之友人海鹽吳思亭續疑年錄云先生年四十八始領鄉薦張士誠據吳累徵不就計其生年當在元延祐四五年間墮水搜求先世文獻二十年来所得十餘種以此集為最佳公之子紀善公有春兩軒集訪之十餘年無後續頁附記于此他日當一一往嘉禾求之也道光丁

亥伏日貝壩謹跋

集內有葉氏藏書朱文方印係明葉文莊公
盛菴竹堂藏書之印又蓮涇朱文方印太原
叔子藏書記白文長印係康熙時吳中王蓮
聞遠孝慈堂藏書之印卷內有南陽孫子苞
印白文印二泉朱文方印無考丁亥秋七月六日
暑退涼生靜坐千墨廬書此貝壩謹誌

威峰樓鈔藏

高季迪缶鳴集十二卷 明永樂刻本

余家向藏高季迪先生缶鳴集係從東城顧
氏得來者裝潢精雅楮墨俱帶古香想舊
刻難得故珍重如此今甲寅初夏十日適值
郡中迎神賽會舉國若狂而余以疎懶性成
未及往觀午飯後偶步至學府書林披覽群
籍無一留意者見架底有破書兩本古色黝
然視之則舊刻缶鳴集也問其直索青蚨五
星因以八折歸之携歸後與素藏者相對字

跡清朗首尾完善竟為此勝於彼且前後
胡王謝三人之序彼係鈔補而此屬刻本并
多校刻周立公禮後序二葉是可喜也擲亦
裝潢而註藏諸篋笥云時乾隆甲寅四月上
澣郡後學黃丕烈識

友石先生詩集五卷

明刻本

周文香嚴得此集版刻正與之同而缺其分
五卷因借去影鈔足之併為余檢點所缺失
夾籤識其中而還之此去年事也余鹿々未
及借補適香嚴命工裝是書遂從工虞携
歸補全舊鈔二葉仍附卷尾以存其古丁卯
六月渡翁識

感峰樓鈔藏

鼓枹稿一卷舊鈔本

間嘗謂汲古所刻多譌字惟鈔本獨善此汲古闕鈔本也不特底本異常而筆畫間皆得篆隸義口較書如婦落葉旋掃旋有也雍正丁未四月十一日較宋賓王記

此香嚴書屋藏書也予因罕秘出重價收之既而揚州藝古堂主人以舊鈔元人集數種與余易書茲鼓枹稿亦有之分卷六目錄在每卷上有西園蔣氏手校鈔本長方印

取以勘此滌此夕矣道光甲申秋校箋
天

感峰樓鈔藏

韓山人詩正集續集不分卷舊鈔本

丁卯秋莫以明初刻本手校一過前脫目錄
後脫蒙齋記當補入此冊通體似影鈔者
舊刻間有一二誤字此亦仍之偶有爛板字
踪模糊此卻清爽當是後初印本寫也
忽勿以鈔本忽之復公前

感峰樓鈔藏

耕學齋詩集十二卷 舊鈔本

此舊鈔耕學齋詩集余得諸東城故藏書家
因是曲潔躬藏本故收之適書友以東倉陸
時化手鈔唐宋元明人集數種求售內有是書
留之校對一過曹本尚有一二通假字陸本續去
之非也即訛謬亦更甚於曹本聊為參閱以考
異可耳究首以曹本為據惟曹本脫落賴陸
本增補者未知陸所據之何侯再訪求善本
正之時嘉慶二年歲在丁巳六月十一日連日陰

雨晦冥而昨尤大風初作有拔木之變今晨天
晴展卷廉按此午後族事書此於讀未見書
齋薏圃黃丕烈

校陸本畢以適憶及篋中有舊鈔殘本耕學
齋集係王連涇所藏目為葉文莊鈔本因取
覆校此本乃知此本實從陸本傳錄惟行款
未之遵循耳後為校去陸本訛字幾處即如
卷十二直沽偶成次首馬牛遺矢滿平川曹陸
二本俱誤為失洞蒙云此矢字及棟葉本信然

感峰樓鈔藏

可見書以最先者為佳真確論也卷十一中增詩
一首或當時筆誤脫落陸本雖有次序不符
此集終以葉本為據而此猶以葉本傳錄尚為
可信惜葉本已失其半不能全授于心能無耿耿
邪正烈又跋

感峰樓鈔藏

樂府古題要解二卷明鈔本

正德乙亥七月二十一日錄訖唐史臣吳諱見樂府

古題要解一小帙值區區感寒受背亦樂於抄寫以詩寄興云

偶病不粒食抄書二十番娛生無此癖守死亦為寬把筆頭欵帽衣縣酒罷樽時名付流水此外復何言布衣柳僉謹誌

唐吳兢所撰樂府古題要解二卷本附古樂府詞十卷以行故宗文總目稱為十二卷此天

一閱藏本為正泣時布衣柳菴手錄檢毛晉
刻津逮秘書中有此跋稱凡三本一得之廣山
楊氏一得之錫山顧氏最後乃得一元版則
此本明人依元版手錄者也五松居士記

王荊公唐百家詩選二十卷何義門手校本

八卷乃秘閣藏書商邱公從東海司寇家得
之二十卷全者斧季得之吳興張常書人抄本
非宋刻也書跡類明初人亦不知與八卷有異
同否商邱喜於復完不復研覈但非出於
毛之偽造或真為荊公之舊耶

余見錢牧翁手校岑嘉州詩上有荊字印
者或與此不盡合此則其可疑者豈牧翁一時
疎略耶康熙己丑重九日前二日營身脰湖舟

中何焯記

晁氏讀書志云唐百家詩選二十卷宋敏求
次道嘗取其家所藏唐人一百八家詩選擇
其佳者凡一千二百四十六首為一編王介甫觀
之因再有所去取且題云欲觀唐詩者觀此
足矣遂以為介甫所纂余按玉海載唐百
家詩選二十卷不言介甫撰錄得晁氏之說
乃渙然無疑今為詩一千二百六十六首

三蘇先生文粹七十卷 宋蜀大字本

此書有宋刻密字本絕精美此本疎朗乃宋刻
之別體明時東野堂奇字齋所依倣也補
寫諸卷雅潔足以相稱珍貴家之於古書
如君子善成人美如此李兆洛過眼因識

感峰樓鈔藏

會稽掇英集二十卷續集五卷錢叔寶手抄本

隆慶戊辰夏彭城錢穀手錄

吾吳叔寶錢先生游先太史門下日取架上書讀之聞人有藏秘籍必宛轉借抄校勘丙夜不置故所藏充棟手纂續吳郡文粹南北史撫言三刺史詩惜未登梨棗若其繪畫特餘事耳此會稽掇英錄皆集唐宋名賢詩文字內流傳絕少是其早歲所抄無一情筆乃從宋刻本而錄者為世珍重可知矣萬曆庚申

如月花誕雁門文震孟跋於青瑤嶼

嘉慶甲戌九秋華亭沈憲十峯珍藏長

洲王世孫獲觀日識

感峰樓鈔藏

聖宋文選三十卷影宋鈔本

聖宋文選予昔訪之而未曾覩後晤鮑君以
文為言海鹽張鶴亭主政藏有影宋寫本
渴欲一見日久未得如願甲寅秋季偶至武
原偕陳君仲魚訪張子醞舫於涉園主人賢
而好客示以祕藏諸籍獲觀是書真生平
大快事也爰書數語附之簡末以識欣幸
云免床吳騫拜觀并記

感峰樓鈔藏

新刊古今歲時雜詠四十六卷舊鈔本

此書涉兄林宗所藏書才摹竟而林宗沒藏
本隨散各歸此書遂歸于我行將聚宋元
明之作續之未知其遂老不也東洞庭山葉石
君識

感峰樓鈔藏

嚴陵集九卷舊鈔本

乾隆三十八年六月從浙江遺書局借天一閣宋刻
本對錄二十八日知不足齋記凡二百七十四頁

乾隆四十八年三月重錄一過初四日記

感峰樓鈔藏

迂齋先生標注崇古文訣二十卷宋刻本

迂齋標注崇古文訣非世間不經見之書也即舊刻亦非罕有。余辛酉游京師見殘宋本而補抄者。卷首有吾郡西嶺朱叔英圖記。因遂收之。入諸百宋一廬賦中。其所存宋刻。卷數注載。瞭然也。適書友又携一宋刻。殘本來。係葉石君舊藏。中可配前缺卷。因遂命工重裝。竟成全璧。始歎物之會合有緣。此兩宋刻之殘而後完。實為難得。矧經吾

郡諸名家所藏而一歸余手兩美頓合豈
不幸與嘉慶丁卯夏五日復翁黃不烈謹
識

丁卯冬余友夏方米之尊人容庵丈出其舊
藏宋本崇古文訣屬為裝潢檢視之知亦
係諸宋本湊合而成卷端有序無目因從
宋本原有序之存者影寫置余本首其中
更有奇者多與葉石君舊藏本合而周九松
舊藏本間有失葉在余本內即如卷十六

末葉是也彼所錯出又係余本之失葉顛倒
錯亂雜遇之而不能仍正之是可歎已夏文
寶愛其書思裝潢卒因費不貲索書去
又遠館洞庭蹤跡不常晤未及將兩書原
委告之戊辰四月下弦日後翁又識

[illegible]

詩家鼎富二卷舊抄本

此曝書亭抄本頃以文瀾閣本相勘首葉所
缺正同其作者姓氏每少漏脫有倦叟題識
其即倦圃与否不可知既据此校彼一過亦
略注一二異字於行間焉咸豐丁巳七月十九日
勞權書

偶閱類編花果卉木全芳備祀於前集第
十九卷桐花類見引鼎富集詩旋檢是編
則方士繇崇安分水道中後二句也始信此

書出宋人所選不必以未見著錄致疑矣
第不知選者姓名意者有序引而今脫
伏尚冀異日改得之八月二十有一日鐙下又記
於丹鉛精舍是日蟬隱初度

詩苑眾芳一卷影宋鈔本

丙辰春余姻家樂潛陳氏購得宋縣本因屬
抄胥錄此冊忽已市月兩窗漫讀一過竇研
記

感峰樓鈔藏

天下同文集四十四卷 舊鈔本

近代儲藏家惟葉文莊某竹堂書目有此亦
止一冊可知五十卷之外未必再有乙丙諸集也錢
虞山編列朝詩以前甲為冠意本選余於
癸未九月沒汲古後人借抄時朱竹垞先生寓
吳蓋三寄書懇之始得一慰耳原本缺十數
紙竟無從補完矣花山馬思贊識

姚牧庵全集已不可見是集所載大半中州
文表之漏者較閱一過為喜而再識之寔

中

威峰樓鈔藏

玉山草堂雅集十六卷 宋賓王手鈔本

古昆山為壯哉縣宋嘉定間割東南鄉別立縣
官治名之曰嘉定記建始之年也前明弘治間
又割昆常嘉地建太倉州然並隸蘇府譬諸
潛匿猶兄弟行也雍正歲丙午陞州為直隸分
嘉定崇明來屬眉山潛族所謂漸玉如涂人
吾州之於玉山县也若鄉先賢遺集雖經級古
鐫板今皆散佚且毛氏所刊之書少謬難以憑
準向晤蓮涇王先生云此集首柯敬仲九思余

得石門抄本首陳基者共一十三卷中闕三六九等卷因其格行委窄繕寫不恭置而未補今年春桐鄉金元功得洞庭翁氏本亦首陳基者借之較對以補石門之闕暇則併抄之夏初入郡謁王蓮涇先生求假其所藏本觀之凡一十六卷其第一有前後卷實一十七卷七十九人詩篇二千四百一十有七較初補脫柯九思陳旅李孝先束氏昆季徐達左繆嵩湯成僧自恢九人時寓桃花塢較梅宛陵胡仲子

諸集弗暇因檢九人詩寄歸補闕謂得其全
及歸翻閱王藏與翁本乃人同詩異再閱鐵崖
先生所為序云茲來自予而次人凡五十餘家
詩凡七百餘首於人詩不符外又疑鐵崖詩冠
首豈祇作序耶遂目錄而兩存之俟真本定
焉余三補茲集以鄉先賢雅集恐漸失真
傳亟以識丙午立秋後十日古東倉室賓王識

感峰樓鈔藏

中州啟劄四卷 舊鈔本

郡城故家李鑑明古遺書殘鱗片甲約有
百餘種其可取者三四十冊而已至宋元舊
刻無可為披沙之揀唯此中州啟劄尚屬
元刻檢錢少詹元史藝文志摠集類云吳
宏道中州啟劄四卷與此正合雖鈔補而仍
缺失取其希有故存之不復分與初菴矣
乙亥二月十四日復翁

感峰樓鈔藏

荆南唱和集一卷舊鈔本

荆南唱和集一卷元明之文極為鄭明德高
青邱徐幼文諸公所稱賞傳本絕少予泛
鮑君以文知不足齋借得猶明初刊本因亟
傳錄其副並采撫紀傳為附錄係卷末予
生平最愛荆南山水之勝往來數十年行篋
未嘗一日無此書今老矣又不能出戶每一
展覽慨想前輩之風流邈不可追并念與
荆南朋好平昔唱酬文酒之寄不禁潸然撫

然也嘉慶壬申季冬海寧八十老人吳憲馬跋

感峰樓鈔藏

雅頌正音五卷 明洪武刻本

劉仔肩雅頌正音五卷家俞邵明史藝文志有其目然世不多有此刻信屬明初舊本楷墨間猶饒元刻氣息細玩卷末碑牌知此為前集而所有後集今將編類別成否未可卜故志藝文者不聞更有後集也金陵王舉直係書坊籍費姓氏今金陵少書坊且多刻工但剞劂不精坊間亦無好事如舉直者于此可以觀世變矣是冊出吳牧菴家余

以一番錢得之稍有破損兼為字紙觀其
腹因命工重裝以舊紙補綴之工料費又加
一番錢愛明刻書如此余不啻自笑其愚邪
甲子二月清明前五日遣嗣美前書

皇明文衡九十八卷 明刻本

程皇墩上承伊川之教功攻培眉山竊謂桓
公復九世之讎言也愚竊非之大道之傳無人
不被宣聖之緒言豈必區區有宋二人哉
此其見之不廣也文衡一書取材亦專以道
學為宗旨於有明他選固自出羣若較以
漢唐以來諸選家則瞠乎其後矣蓋拘於
道學而於經天緯地之義未有以及之也近
來文運聿興讀書頌詩之士而有兼之改易

時義一歸于古今有用之學幾年之後風俗
易道學之膏制于人當必大為更張之而使
天下曉然知宣聖之教人可以傳也此書向屬
亡友朱又安所藏亡後余得售之云康熙三年
正月兩憲道穀記

文心雕龍十卷 沈寔研臨何義門校本

案此書至正乙未刻于嘉禾弘治甲子刻于吳
門嘉靖庚子刻于新安辛卯刻于建安癸卯
又刻於新安萬曆己酉刻于南昌至隱秀
一篇均之缺如也余浸阮華山得宋本抄補
始為完書甲寅七月廿四日書于南宮坊之
新居時年七十四歲功甫記

義門師云此書萬曆己卯雲間張之象所
刻者分上下篇而序志別為一篇似亦有本

然晁公武讀書志亦云五十篇則此固未為
失也晁引書有論道經邦之語匡其論說
篇中所謂論語以前經無論字者為疎略
則是時古文尚書之出未久多疑其非古籍
恐難以遽議該治之士爾序志中張氏刻
脫誤尤甚自嘗夢執丹漆玉觀瀾而索源
中間失去數百字張氏書其後遂云夢嘗
索源近代實學蓋不足道也又云序志中
固自分上下篇其中又自析為四十九篇耳

子止引論道經邦駁之固未為失議對篇中
即引議事以制同為古文何獨此之遺耶庚
寅五月十九日岩錄

隱秀篇自始正而末奇至朔風動秋草朔字
元至正乙未刻于嘉禾者即缺此一葉此後
諸刻仍之胡孝轅朱青儀皆不見完書錢
功甫得阮華山宋槧本鈔補後歸虞山而傳
錄于外甚少康熙庚辰心友弟從吳興賈人
得一舊本適有鈔補隱秀篇全文除夕生

語京小齋走筆錄之

辛巳正月過隱湖訪毛先生芥季從汲古閣架上見馮已蒼先生所傳功甫本記其缺字以歸如疎放豪逸四字顯然為不學者以意增加也上元夜焯又識五月廿一日雨夜立序志篇燈下鈔補岩錄

康熙甲申余弟心友得錢文遵王家所藏馮已蒼手校本功甫此跋已蒼手抄于後乙酉携至京師余因補錄之已蒼又記云謝耳

伯嘗借功甫本于牧齋宗伯宗伯仍祕隱秀一篇已蒼君以天啟丁卯從宗伯借得因乞友人謝行甫錄之其隱秀一篇恐遂多傳于世聊自錄之則兩公之用心頗近于隘後之君子不可不以為戒若予兄弟者蓋惟恐此篇傳之不廣或致湮沒也乙酉除夕呵凍記

庚寅夏吾友子遵得弘治刻本于吳興書賈并為余得嘉靖間刊于新安者弘治本稍善予本間有硃筆改正一二訛處但不知為何

人手校因從義門先生借所藏校本與子遵
勘對至隱秀序志兩篇脫誤尔都補定并
錄吾師跋語五條附戴功甫跋語一條以識
隱秀全文前輩傳錄之難而此本幸為完書
矣
岩記

案讀書敏求記謂此書至己未刻于嘉禾
而此本錄功甫跋亦之然則刻書緣起未
之詳也頃郡中張青芝家書以藉散出中
有青芝臨義門先生校本首載錢序一

篇市房抄補爰錄諸卷端素紙行款用墨
筆識之意阮華山之宋槧不可見即元刊亦
無從問津徒賴此校本流傳言人人殊即如
此本爲沈寶所所臨與青芝本又少異同同
出一師而傳錄各異何以徵信乎聊著於此以
見古刻之傳臨校全不足信有如此者甲子十
一月六日夢翁記

戊辰三月得元刻本校正并記行款復翁
此嘉靖庚子刻於新安本郡中朱文游家

藏書也文翁故後書籍散亡此冊為其甥所
取售于五柳書居者先是五柳主人來云是
校宋本需直白金六兩余重之故允其請而
書未其竇校語無足重舊刻差可貴爾
據屬潤菴校錄一過與向收弘治本並儲焉
乙未中秋檢書及此爰題數語以著顛末美
圃黃丕烈

感峰樓鈔藏

詩式五卷 舊抄本

此書世有鐫本俱不全今乃得此五卷完備者從兩漢及唐詩人名篇嚴可摘而錄之差以五格括以十九體此可以謂之式也若世間本劉虛張其目而已豈知其用意之所在乎枏山集十卷余向鈔得之乃陸勅先校定者極精細今又得此完本因亟令人傳錄讀枏山詩者即以其所謂格與體者求之不可知其撰造之有自乎乾隆四十二年八月既望九日

杭東里人廬文昭書

感峰樓鈔藏

誠齋詩話一卷純錄飲手鈔本

乾隆四十年歲次乙未三月二日借鶴年先生
藏本校于桐花館是日北風揚沙塵埃滿
室扁鐫窗戶無少隙漏如閉車箱中作
新婦也

感峰樓鈔藏

雲莊四六傳話一卷影寫宋刻本

乾隆戊申十二月二十七日校于平津舟次宋

刻元缺第四葉第十四葉十六葉二十三首

鮑以文

咸峰樓鈔藏

吳禮部別集一卷舊鈔本

元吳禮部正傳集世少抄本獨詩話雜說一卷
罕有藏者明金華胡孝廉元瑞家收書最
富嘗跋此冊及敬仰錄云通舉郡邑凡有書
者緝其製作履歷繫若指掌下逮畸流逸
客片語隻詞亦博采旁証竟其隱伏耳目
所不及點綴弗遺其為力勤而用心苦矣今
去吳公僅二百載而文辭之詳遒弗得睹南渡
而士人方篇什史乘佚而未收者尚倚藉諸編

稍獲踪其崖銘余于禮部異世子雲也因筆
于簡末以俟異世之為余子雲者驗之觀元瑞
所云此書難得而可寶審矣邗江馬君半槎
癖嗜異書挖剔隱秘購得元時刻本方與
余同輯宋詩紀事獲觀南宋諸賢佚唱如
王井簡吳諒陳仁玉萬嘉吳琳孫應時張
勳史蒙卿林泳陳柏王儀鄧剡僧靈一輩
款為未有獨敬仰錄無從訪求向晤東陽
王大鶴潭云有其書恨未借抄以成合璧而

感峰樓鈔藏

為元瑞之子雲余兩人未敢少讓焉錢唐厲
鶚書

感峰樓鈔藏

修辭鑑衡三卷舊鈔本

王文定公修辭鑑衡見絳雲樓書目文說類不
載卷數錢竹汀補元史藝文志文史類云二卷以
郡城賜書樓口口口散出中有是書舊鈔今審
是影元鈔本擬購之而苦其索直昂業置不
復問矣後因論他書直未之定必得番餅口
金余遂檢此而口其數往反再四交易始諧蓋
他書或名人手校及手錄或影宋精鈔皆為世
所通行之書唯此行世希有四庫館收讀其

提要語序文缺第一葉以致始受書于王公之
劉某不知其名且云缺第五葉今劉起宗之
名固在而口口口口義都全此本居然全本矣
二卷之說細玩口口口原作卷一而改添為上下
者卷之結尾卷之下無次第口視紙本有補
綴痕或尚不止此然案口口口所之無次叙論
詩為首文為後口口口附凡一百九十條今本
無一失者是可無疑其缺失也書之希有而
不敢交臂失者以此王謐文肅錢舊云文定者

誤耳重陽前五日復翁燒燭書

威峰樓鈔藏

珠玉詞一卷 陸敕先校宋本

七月二十四日校凡二抄本其一即底本也章次皆
同而此刻獨異據卷首有潛翁手注云依宋
刻本

感峰樓鈔藏

近體樂府三卷 毛斧季校本

辛亥七月廿六日燈下本集校訖凡分三卷後刻
郡人羅泌校正其別作字俱另書附于各卷
之末壬子六月六日讀於松影堂 陸穀先

感峰樓鈔藏

小山詞二卷 陸敕先毛斧季校本

辛亥七月廿二日校凡三抄本其一即底本也章次皆同而此刻自玉樓春後即顛倒錯亂不知何故內一本分二卷自歸田樂以下為下卷其本極佳得脫謬字極少惜下卷已逸去耳 陸

己巳四月廿七日從孫氏舊錄本校孫氏凡二卷其次如硃筆所標之毛辰

感峰樓鈔藏

樂章集一卷 毛斧季手校本

癸亥中秋借含經堂宋本校一過卷末續添
曲子乃宋本所無又從周氏孫氏兩抄本校
正可稱完璧矣毛辰

感峰樓鈔藏

東堂詞一卷 毛斧季校本

七月廿一日校凡三抄本其一即底本也章次皆同而與此刻異內一小字本最佳所得脫誤字極

多 陸勅先

鄉謂子鴻深于詞及閱此未免尚隔一層甚矣學問之難也己卯五月十六日從舊錄本校一過毛康

感峰樓鈔藏

東山寓聲樂府三卷補遺一卷舊鈔本

東山寓聲樂府宋山陰賀鑄方回撰原本三卷久已失傳所傳者亦因侯氏本而已常熟張氏藏本與侯本同皆缺中下兩卷非足本也近獲知不足齋鮑氏手抄校本兩種一本與侯氏張氏同一本分為二卷與侯氏張氏本相較同者僅八首此本雖非原書亦屬罕見足可寶貴不知鮑氏何自得之頃以三家藏本彙而編之得二百四十五首錄成三卷仍其舊名又於

諸家選本中輯得四十首為補遺一卷附于後
方回先生詞可以十得六七矣道光戊申長至
後九日錢塘惠庵王迪識於惠迪吉齋

溪堂詞一卷陸勅先毛斧季校本

庚戌四月十三日抄本校較先

乙巳三月九日從孫氏舊錄本校毛原

感峰樓鈔藏

酒邊集一卷陸勅先毛斧季手校本

庚戌四月十三日兩抄本校款先

感峰樓鈔藏

石林詞一卷 毛斧季校本

辛亥六月廿八日三抄本校其一即底本也陸
子鴻校後手校一過其不中疑處多抹去 毛

感峰樓鈔藏

梅溪詞一卷

毛斧季本校本

六月廿九日二抄本校其一即底本也

陸勅先

感峰樓鈔藏

白石詞一卷 毛斧季手校本

六月二十九日二抄本校章次題注與此全別
按一本卷面有云宜依花菴章次則此本
蓋依花菴付梓云 陸勅先

感峰樓鈔藏

樵隱詞一卷 陸勅先毛斧季校本

庚戌四月十三日抄本校勅先

辛巳六月二十三日從錫山孫氏抄本校次序標

上毛辰

惜夢羽先生藏本已佚無從參考甲寅午

日讀訖

感峰樓鈔藏

日湖漁唱一卷 舊鈔本

癸酉夏日五柳書居以鈔本宋詞四種示余余以其皆重本故未留越日思之書不厭複為有異處也遂汲問之索直三番余因攜歸出此日湖漁唱一種以校却有一二佳字誤者亦未免悉標諸行間書經繡谷插架繡谷者西冷吳氏也吳君名焯字尺鳬蓋藏書家今其書皆散矣表之以著雪泥鴻爪云尔七月初四伏日揮汗識復翁

感峰樓鈔藏

西樵語業一卷校本

庚戌四月二十日底本校勅先

己巳二月十六日從孫氏抄本校毛辰

感峰樓鈔藏

放翁詞二卷校本

辛亥七月廿一日抄本校外有夜游宮一月照

梨花二如夢令一共四闋見花庵詞選中宜

刻作拾遺

毛扆

六月十三日曉刻兩窗讀訖

感峰樓鈔藏

稼軒詞四卷校本

辛亥七月三日敕先所校元板重校訖

毛扆

感峰樓鈔藏

洞泉詩餘一卷舊鈔本

咸豐丙辰四月十八日借丁月河家藏舊本校
此本共百九十五闕大典本洞泉集祇九十六闕
據補破攤碗紗一闕權記

感峰樓鈔藏

仙源居士惜香樂府十卷校本

庚戌四月十八日晚刻抄本校畢勅先

辛亥六月廿二日漢威重校

感峰樓鈔藏

撫掌詞一卷 舊鈔本

撫掌詞卷前不署姓名從典雅詞傳出蓋
南渡人詞也歐良乃編集者之名此本去皮字
二字遂以當作者矣末附倣李長吉十二月
宮樂詞此係樂府故不得入詞原本所有
仍補入之良南城人官司戶見劉後村所作
詩集序咸豐癸丑五月廿三日午後据曝書亭
鈔本典雅詞校過飲香詞隱芳齋并卿記
于滙喜亭池上

感峰樓鈔藏

養拙堂詞一卷 毛氏鈔本

乙丑六月十一日從周氏舊錄本再校一過時斜
風細雨毛辰

直齋書錄解題載養拙堂詞集一卷但云
管鑑明仲撰而不著其籍貫與此本相同
直齋所據蓋長沙書坊所刻百家本也
此本從吳興丁月河借得為毛斧季手校
乘暇手寫一帙以補宋詞之缺道光己酉七
月十二日校畢誌蟬盦詞隱芳權

感峰樓鈔藏

省齋詩餘一卷 舊鈔本

壬戌四月十四日從孫氏藏本校正毛扆

乙酉八月依毛斧季校本手錄顧升卿

咸豐己未六月二十一日大典本省齋集校過

多所改正惜不及半耳秋井草堂記

感峰樓鈔藏

蕭間老人明秀集注三卷影抄金刻本

琉璃殿裏兩詩淫
羨友羨翁是素心
我羨小鄉孃福地
子孫世守到于今

作宦游仙事渺茫
故交零落感滄桑
傳家祖印分明在
添得新詩孃舊藏

卅年前見兩奇書
覲面相逢付子虛
小讀

書堆歲暮久雲煙
化去已無餘

宋鄭德顏氏家訓金縢蔡松年

詞皆郡城故家物先携示余時因次兒病危無忌緒及此以歸顧明經抱冲及今散出余未之知故不及收

琴川好古有專家
秘笈儲藏富五車
一取蔡

詞一類訓兩人就敵互相誇

類訓歸張月霄蔡同歸陳子準

類訓曾經借我抄蔡詞相示又誰教收書

不惜黃金盡珍重相期屬世交

余向收書不惜少金今美川亦

此類

詞山曲海夢搜羅宋刻元雕幾許多只有

金源明秀集錯教當日眼前過

李中麓家詞山曲海余藏

詞曲甚夥名其藏弄之所曰學山海居

集雖剩半目猶全宵雅時氣次第編好事

詞山數口萬祇將兩闕世間傳

感峰樓鈔藏

中州文獻問遺山樂府諸家見一斑 四庫

但登天籟集蕭閑兀自在人間

金人詞專集
登諸四庫者

止白
樸

道光四年歲在甲申九月大盡日莠翁為笑

川世講書于百字一屢聊以記事而已

蔡松年字伯堅本杭人長於汴都從父靖

知真定府判官遂籍真定累官吏部尚

書參知政事進右丞相卒封吳國公謚文

簡明秀峰在汴梁公與梁慎修許師聖田

唐卿輩觴詠處集以是名蕭閑老人其退
居後自號也原集六卷魏道明注今存一至
三三卷金人專集傳世者自元遺山外惟淳熙
隆水數家苦集久不著錄陳子準得之吳
門周氏月霄笑川輾轉傳錄出以見示松年
辭與吳彥高齊名稱吳蔡體未竹垞詞綜
僅錄尉遲杯一闕萬紅友詞律祇存月華
清一闕按全集目錄月華清在第四卷尉
遲杯在第五卷俱在此三卷之外後三卷尚

感峰樓鈔藏

有百餘卷今所存者七十二卷耳零瑣勝璧
稱足珍愛即雷溪之注雖失之繁冗而於當
時酬贈諸君俱二詳其仕履亦足以補中州
集之未備也道光四年歲在甲申閏七月昭文
孫原湘跋

感峰樓鈔藏

遺山樂府一卷舊鈔本

遺山先生新樂府五卷此凌柘軒編選一卷本
今秋鈔于王吉甫復遇趙氏星鳳閣抄本
校補缺一闕此本雖不如新樂府本之全顧
有出于其外者抱經堂文集有題辭行附
錄之道光甲辰十二月初九日鐙下葵卿記

感峰樓鈔藏

扣舷集一卷舊鈔本

咸豐甲寅六月追暑涖喜亭得閒無所作
鈔此遣日且屬沈環仰校之晦日飲香詞隱
漫記于池上西窓下

咸峰樓鈔藏

眉菴詞一卷 舊鈔本

咸豐甲寅閏七月漫錄時適移家玉參差
館遷居甫定心緒惓惓借此聊遣病懷金
子及為余校正中秋前一日飲香生託手滙喜
亭

感峰樓鈔藏

花間集十卷 明覆宋本

錢曾讀書敏求記有此書稱紹興十八年口
陽晁謙之刊正題于後鏤板精好楮墨絕口
宋槧本之最難得者此本前應有歐陽炯
序為書賈佚去或是明人翻刻宋本然是
晁刻舊觀亦可寶也五松居士庚午歲八
月記于平津館 孫星衍

感峰樓鈔藏

樂府雅詞三卷拾遺二卷舊鈔本

曾端伯樂府雅詞陳氏書錄解題一十三
卷拾遺二卷此書抄自上元焦氏止存二卷
及拾遺殆非足本然藏書家著于錄者罕
矣康熙乙酉竹垞老人跋於吳閬慧慶僧
舍時年七十有七

感峰樓鈔藏

感峰樓鈔藏

[G e n e r a l I n f o r m a t i o n]
书名 = 国家图书馆藏古籍题跋丛刊 第 1 9 册
作者 =
页数 = 8 1 0
S S 号 = 0
出版日期 =

封面页

书名页

目录页

仪顾堂续跋

雁影齐题跋

国朝文槲题辞

韶宋楼藏书题跋辑录

附录页

卷十三至卷十六